

**SAUNOAGA FAA-TAUPOU**  
**2016-2021**

**22 IUNI 2016**

**Afioga TOLEAFOA KEN VAAFUSUAGA POUTOA (Lefaga & Faleaseela):** E muamua ona momoli atu le agaga faafetai i lau Afioga i le Fofoga Fetalai i le taulaga siitia foi aua lenei taeao fou i le alofa ma le agalelei o le Atua.

E muamua ona momoli atu le agaga faafetai ma le faamalo i lau Afioga i le Fofoga Fetalai i le taulaga siitia foi i lenei taeao fou aua foi le faafofoga a lo tatou Matai Sili i le lagi aua lo tatou vatapuia ma lo tatou Atua, i le maleifua mai o le Palemene i lenei taeao fou, i le maleifua mai o lau Afioga i le Palemia ma le Kapeneta, aemaise o sui usufono mamalu o le Fono mamalu o le Palemene o Samoa.

Lau Afioga i le Fofoga Fetalai faafetai mo lou avanoa aua se sao o lenei itumalo o Lefaga ma Faleaseela i le Tala o le Tupe ua folasia nei i le Maota o le Palemene. I le saunoaga manino ma le malamalama a le Minisita o Tupe i le taimi ua tuanai.

Lau Afioga i le Fofoga Fetalai, e momoli atu le faamalo a lenei itumalo i lou toe pale mai i le tofi o le Fofoga Fetalai e pei ona e umia i tausaga ua tuanai, ia faamanuia le Atua i lou alofaiva i le faafoeina o le Palemene o Samoa.

Ae ou te le i asaina le tai na iloa e Leuteleleite, e ao ona ou vaisausauina ia Sa ma Tia o le vavau o Samoa, aua o lele ua paia ma pau Tiafau o le Malae o le Faautugatagi a le atunuu. O Malae e lipoi ai manuia o le atunuu ma ona tagata. Tatou taalolo laia paia o Tiafau o totoouli, ma totoo tau le malae, o le usoga aua le puipuga o le Malae leai. Aua Aiga o Tupu, Aiga o Nofo, ma Aiga o Papa, ma Aiga na Tafaifa.

E faatulou atu aua le tapuaiga lelea o Lana Afioga Mamalu O Le Ao o le Malo Tutoatasi o Samoa, lau Afioga Tui Atua Tupua Tamasese Efi ma lau Masiofo Filifilia. E faatulou atu foi i le afio o Sui o le Fono a Sui Tofia, lau Afioga i le Tama Aiga Tuimalealiifano Tuitaalili Suatipatipa Vaaletoa Sualauvi II ma lau Masiofo, lau Afioga Hon Tuiloma Lameko ma lau Masiofo, lau Afioga i le Suafa Afioga Hon Le Mamea Ropati Mualia ma lau Masiofo.

E faatulou atu foi i lau afioga i le Faamasino Sili ma lou faletua ma le mamalu o le Faamasinoga a Samoa. E faatulou atu foi i lau Afioga i le Palemia o le faaululuga o le Malo Tutoatasi o Samoa ma lau Kapeneta mamalu, lau Afioga i le Fofoga Fetalai ma le Palemene o Samoa ua potopoto.

E le faagaloina foi faaululuga o Matagaluega ma Faalapotopotoga le Aufaipisinisi Tumaoti faapea paaga o atinae o Malo mai fafo. Lau tapuaiga Samoa i le afio o Tama ma o latou Aiga, Aiga ma o latou Tama, le Usoga ia Tumua ma Pule, Ituau ma Alataua, Aiga i le Tai ma le Vaa o Fonoti.

Ou te faatulou atu foi i le tapuaiga a Taitai o Ekalesia ma le Aufaigaluega i so o se fata faitaulaga i totonu o Samoa, o lo o toa ma filemu ma manuia Samoa i la outou galuega tatalo i le ao ma le po.

O le paia lava lea, ou te faamalulu atu, e le faagaloina foi le tapuaiga a o tatou uso i Sasae le Faigamalo a lau afioga i le alii Kovana ma le Lutena Kovana, i le afio o lau Afioga i le Faamasino Sili ma le Faamasinoga, le afio o Sui o Maota e lua, o le paia lava mai Laloifi ma Falesau, Gagamoe ma le Utumoe, o le fatu le gae ma ma leo utumau. O paia na i le usoga i le paia ma faleagafulu, o le Laau na Amotasi, afio i le Faatui ma Auvaa o Tootoo ma upu ia te oe le Manuatele. O paia na o Samoa mai le matafanua o leniulesa, i Saa seia paia Mulifanua. O le pa e sopoia o le Vai Suatoto ma le Ana o Vaatausili i Fili ma Puletuu.

Ae ou te le i oo atu i le Tala o le Tupe, e momoli atu lava le faafetai tele ma le faamalo a lenei itumalo o Lefaga ma Faleaseela, lau Afioga i le Palemia, lau Susuga Tuilaepa Sailele Malielegaoi. O le faaululuga o le Malo ma le faigamalo talu ai, i la outou faatupu ma le faatamalii, lele ua seei ai le tama matua o lenei itumalo i tofiga maualuluga a le atunuu. Faafetai le faaeaea ma se tofa na ae i se tautua a Le Mamea Ropati ia Samoa ma ona tagata. O la outou pule lea.

E momoli atu foi lau faafetai i le Afioga Le Mamea Ropati ona o le tauaveina o le mamalu o le itumalo i upufai a le Palemene i tausaga e tele. Ia faamanuia le Atua i lou tulai mai, ia maua sau tofa aua Samoa. Lou itumalo pele ia te au Lefaga ma Faleaseela, o le paia lava lea o le afio o le aiga Sa Tuala ma le latou tama, ma le mamalu ia Tuisavailuu, Leitu ma le Gagaeolo, afio Aiga e lua Taulagi ma i laua Matua, alaalatai

tootoo o Maauga, Taloolevavau ma Leausalilo, ma polo e fa o le Faleaana ma le tagata o le vavau. Le tapuaiga paia i faletua ma tausi, le itupa paia i saoa ma tamaitai, ma le malosi o le tatou itumalo.

E le faagaloina foi le tapuaiga a le itupa paia i le Aufaigaluega Paia a le Atua i so o se fatafaitaulaga i totonu o lou itumalo. I le afio o lau afioga Patele le Tama Pule o le Matagaluega, lau susuga i le Toeaina ma le faletua ma le Aufaigaluega galulue ma outou faletua, i susuga i Faafeagaiga ma o outou faletua.

E momoli atu foi lau faafetai ma lau faamalo i le paia o lou itumalo, ona o le avanoa ua ou nofo ai i le nofoa lea, o le agaga maualuga o le fia tautua i lou finagalo, aemaise o le igoa pele o si ou itumalo pele o Lefaga ma Faleaseela. Ou te ave foi le faamalo i ou tuafafine ma uso sa o matou tauva aua se tofi o le itumalo, malo le finau, malo le taalo faatausala, faafetai le faatamalii, faafetai le taalo faatupu, leaga o Sa Tuala o le Aiga Faalagilagi. Ae tapuai maia, se i momoli manaoga o lo ta itumalo.

Lau Afioga i le Fofoga Fetalai, o le Tala o le Tupe ua taulimaina nei, e momoli le faafetai i le Minisita o Tupe, lau Afioga e fou le tofiga ae le fou lau matafaioi. E avatu foi le faamalo i le manulauti i saunoaga a lau Afioga i le Minisita o Tupe, i le tulaga lea o le lufilufileleiina o le tatou tamaoiga ma faaaogaina ma le tatau e tusa ma taiala faaletulafono o faiga faavae o le tatou Malo. Ua matauina le tulaga o le faamuamua o lau faasoia i le Soifua Maloloina ma Aoga. E matua lagolagoina e lenei itumalo aua o le lumanai manuia lea o le atunuu pe a soifua manuia ma aoaoina lelei ona tagata, aua le va feagai ai ma uso mai fao faapea le atinaeina o le atunuu e faalagolago i le tulaga o le aoaoina lelei. Ua matauina foi i le Tala o le Tupe o le taiala mo le atinae o Samoa, le Strategy mo Samoa, lea o le a amatalia nei mo le isi 4 tausaga o lumanai 2016-2020. O le agaga maualuga a lava tapena se faamoemoe ma lelei lona faatinoina ma nofo malamalama le atunuu ona faaitiitia ai lea o le faitio. Ae tautuana aua le faavaivai pe a iai ni toatuga e fetai'i...ae tatou faamoemoe aua e le tuulafoaiina i tatou e le Atua le Tama.

O le agaga o le Tala o le Tupe ia fai fuafua ma ia gafatia le tamaoiga o le atunuu, e ao lava ona i ai le tofa manino aua fuafuaga mo le lumanai, ia lototele e uunai ma atinae polokalame ia manuia ai Samoa, ae le gata foi i lea... O lenei ua faagasolo le tatou faigamalaga mo le Paeaiga Lona XVI o le Palemene o Samoa. O lea ua tatau ona tuu atu loa manaoga o lenei itumalo i le Afioga i le Palemia ma Minisita o le Kapeneta aua le latou pule faasoia. Lau Afioga i le Minisita mo le Soifua Maloloina, o lena ua i ai le talosaga o lenei itumalo mo se matou falemai (sub-center), lea ua i ai Motootua mo gasegase o le atunuu atoa ma lenei vaega o Upolu. A o le talosaga i lau Afioga i le Minisita mo le Soifua Maloloina, e talosaga se sub-center mo si o matou itumalo e agai i ai e tau latalata mo le siaki faafomai. E tau savali atu iinei le fomai ma le tausi soifua e pei ona faia foi i isi vaega o le atunuu.

Lau Afioga i le Minisita mo Aoga, Taaloga ma Aganuu, faafetai tele mo le faleaoga fou o lo o fausia i le taimi nei mo si o matou nuu i Savaia Lefaga faapea foi Faleaseela, faafetai mo le faasoia. Ae pau lava o lea o se tuualalo, o alauni mo nai alo ma fanau o le Iunivesite lea local scholarship, o le talatala mai a se matua faapea faatoa maua le tupe pe a faaiuiu le kuata. Ae silafia o nai seleni nei e fesoasoani i le totogiina o lesitala, tusi aoga ma faasoasoa i pasese o nai alo ma fanau. O nai isi aiga e lima vaivai, o le fautuaga mo se auala e vave ai ona maua a latou alauni, fai aku ai foi. O pili aoga o fanau i le NUS, matou te lagona e le faigofie, a o le tuualalo ia mafai ona maua le aoaoga ma faaiuina a latou aoga. Ae tuu atu i ou tafatafa o lo o i ai le tofa ma le moe.

Lau Afioga i le Minisita mo Galuega, Felauaiga ma Atinae Eeseese a le Malo, o lena ua taoto atu se talosaga a lenei itumalo, ae paga lea e tele a matou auala e fia faafou ae fia ave le faamuamua i auala o nuu nei e lua o Tafagamanu ma Faleaseela. Aisea? Ona e le o i ai se auala e sosola mai ai i uta pe a tulai mai se mala faalenatura pei ona tatou molimauina i le Tsunami 2009. A silasila lau Afioga i le matou vaifanua e matua'i tele lava le afaina o soifua o nuu nei e lua ona o le leaga o auala e pei ona faatalosagaina. Faafetai mo auala ua maea ona faia mo isi nuu o le itumalo e i ai Safaatoa, Savaia, Gagaifo, Matautu ma Matafaa. Ae o le talosaga faamolemole, e toe fia faaleleia auala o Safaatoa. Savaia, Gagaifo ma Matafaa. O lea na maua sa asia e lau Afioga le auala o le fesootaiga o Faleaseela ma Falelatai, e lelei le faaifo i Falelatai ae faaletonu le auala lea i tua o Faleaseela. O lea ou te talosaga atu ai mo le toe faaleleia faamolemole lau Afioga i le Minisita. O se tasi lea o auala mo fesootaiga mai le malae vaalele i nuu o Apia ma Samoa atoa, ma e tele foi tagata tafafao maimoa mai ma le tatou atunuu e malaga taamiloi mai ai i lenei auala. E talosagaina foi se auala sima faaneionapo po o se auala laupapa i le vai sima o le Liua le Vai o Sina i Faleaseela ina ia

faasaoina ai lenei meaalofo taua, ma le isi, aua a oo ina pa lenei vai, e poloka ai le femalagaaiga a auala. O le tatalo lea ma le agaga maualalo i lau Afioga Papalii, se i e alofagia si o matou itumalo i lau faasoa.

I lau afioga i le Minisita mo Leoleo, Auaunaga o Tineimu ma Faalavelave Tutupu Faafuasei, Falepuipui ma Auaunaga toe Fuataina, faafetai ma faamalo i le auaunaga a le Matagaluega, o lea ua maua atu le fuafuaga a le Matagaluega ma le Malo, o lea sii atu le falepuipui fou i Tanumalala. E lagona lava le atuatuvaale. Aisea? Ona o lea e aafia i lalo o si ou itumalo. Aua a fai palota, o lo o aafia i lalo o faiga palota o Lefaga ma Faleaseela. Ae paga lea, ua tautuaupega so matou manatu, ae pau lava o lea, e talosaga atu i lau Afioga i le Minisita ma le Malo, ia silafia le saogalemu ma malupuipuia nuu ma afioaga o lo o taulalata ane i afioaga. O le talosaga i lau Afioga, faamolemole ia fau se falepuipui pei o fale o atunuu i fafo, ia lava le aufaigaluega, afai e 200 pagota, ia 200 foi leoleo, ia tofu le leoleo ma lana tagata e vaai ma le sosola soo o pagota.

O le isi vaega lau Afioga, o le mu o le tane suauu lea na tulai mai i le uafu i Matautu. Faafetai i le Atua, aua o le mea moni, a faateteleina, ua leai se taulaga o Apia. Faafetai i le taavale fuimu a le Malae Vaalele i Faleolo lea na i ai le vailaau faapitoa na vave foia ai lenei faalavelave. O le fautuaga, se i silasila ane, ua tatau nei ona i ai se taavale fuimu faapea e leo ai le tatou taulaga i Apia, aua o lena e te silafia, e tele tane penisini, suauu ma kesi i totonu o le tatou taulaga, e aoga mea tutupu e silafia ai mea e tatau ona faatinoina mo le lumanai.

Lau Afioga i le Minisita mo Faatoaga, Faalapotopotoga o Suesuega Faasaieinisi ma Faigafaiva, faafetai mo le ponesi mo le aufaifaatoaga koko lea na tufa talu ai nei. O le tatalo, se i silasila ane lau Afioga i aufaifaatoaga talo, fai, tamato, kapisi ma isi, ae faaauu i ai le faasoa. O le mea moni, o lea e fua le galue a le aufaifaatoaga i lona malosi, e mafai ona faatino ai lana ia faatoaga i mea tau tupe. Ae a fesoasoani le tatou Malo e ala i mea tau ponesi mo le aufaifaatoaga, e le taumate o le a fau ma soloi nei faaeleeleaga e mafai ona tatou maketi atu i fafo, tino mai lou faamoemoe ona tuutiitia lea o le okaina o ia oloa i atunuu i fafo.

Lau Afioga i le Minisita mo Punaoa Faalenatura ma le Siosiomaga, lau Afioga i le Sui Palemia, o le tatou polokalame o le suavai o le lalolagi lea sa faatinoina i si o matou nuu i Faleaseela. O la matou tatalo, o taligalu o Faleaseela ma Gagaifo Lefaga, toe pau lava lea o nuu ona soo loa lea o si o matou itumalo o Lefaga ma Faleaseela i taligalu. Ou te tatalo atu foi ia alofagia e lau Afioga le matou talosaga lea sa tuuina atu i le Minisita mo Galuega e uiga i auala ia e lua, o Faleaseela ma Tafagamanu. O le fesootaiga i taimi o mala faalenatura, ina ia vave ona faatino aua ua maoae fesuiaga o tau ua tatou i ai i lenei vaitau.

Lau Afioga i le Minisita mo Tina ma Tamaitai, Atinae o Nuu ma Afioaga ma Agafesootai, faafetai mo faamanuiaga mo le lalagaina o le ie o le Malo. O le talosaga ia alofagia aua ne i faagataina a ia i ai se isi faaopoopoga aua e le faigofie lenei matalalaga ina ia tupu pea lo latou fiafia ma faatino le atinae o le ie a le Malo.

Lau Afioga i le Minisita mo Fesootaiga, Faamatalaga ma Fesootaiga Vavave Faaneionapo, e i ai lava isi vaega o si ou itumalo e matua le maua ai lava se TV. O le vaega lea e amata atu i le Liua le Vai o Sina seia paia Faleaseela. E tatalo atu se i silasila ifo i ai lau Afioga i le Minisita.

Lau Afioga i le Fofoga Fetalai, o nai motugaafa na o si ou nei sui usufono aua se sao o le matou itumalo i le Tala o le Tupe. Afai ua le tautamalii se lagona ma se faafofoga ma le faaleoina o se manatu, ia malu ave i fale i lau Afioga ma le faafofogaaga a le Maota, aemaise o le faafofoga tapuai mai a Samoa.

Lau Afioga i le Palemia ma lau Kapeneta, ua tuutasi atu le faiva o Pili, ia faamanuia tele le Atua i o outou faiva. Ia manuia tele tualumaga a le Palemene, pei ona feagai ai nei. Soifua.

## **22 IUNI 2016**

**Susuga MULIPOLA LEIATAUA LAKI (Aiga i le Tai):** Faafetai i lau Afioga i le Fofoga Fetalai mo lou avanoa. Ou te manatu o lea ua tu mai lagi le lagaali a Tamafaiga, o lele foi ua maea ona sisi i lagi le atu a le tautai matapalapala, i le faapolo ma le faasagi e pei ona saunoa i ai lau Afioga i le Fofoga Fetalai. Faamalo le tapuai. Ae manatu o le a fagatonu ia le malama ma vili tonu le ifi a Maina.

E ava ta le tuaoi fesili a'i le lauuta, ae lauama tootoo le tofa faaolofaiva ma le faautautaga taufalaula, a o le gagana o faletetele, a ifo i manu le filiga tupetoa a tupu ma sao o aiga Samoa, ona faapea lea, se ua o tatou sootuli ma faavao tutui faasuli tupolata. Ua lia ai nei le gagana, aua ua o'o o'o tutu o tatou gafa, lele

ua tau i le vai malu le aa tagata. Ua sina nei la le aso i Falemua, a o tapuaia le seuga i Falevaai. O le a ou le sopoloa la faalupe filimafua, pe ou te sii se matalalaga. E faigata Samoa o lele ua papaga ma menamena le aneanea, i sa ma faiga o Samoa i lana filiga tupetoe aua le Maota ma le malae o tofiga i Tiafau. Tulouna ia la le paia faatafafa o le Maota Fono a Samoa, le afio o lau Afioga i le Fofoga Fetalai o le Maota, tulou le afio o lau Afioga i le Palemia ma lau Kapeneta, tulou le afifio o sui usufono mamalu o le Palemene ma le Fonousu a Samoa. Ou te muai faapoipoi lilia faalaau tuvanu ma ou faatulou, i le ee faafogafoga mai o Lana Afioga Mamalu O Le Ao o le Malo Tutoatasi o Samoa, lau Afioga Tui Atua Tupua Tamasese Efi ma lau Masiifo, faatulou atu foi i le afifio o a outou Afioga mamalu i Sui o le Fono a Sui Tofia ma outou Masiifo, faatulou i le afio o lau Afioga i le Palemia, lau Tofa Auelua Fatialofa Neioti Dr. Tuilaepa Sailele Malielegaoui ma lou faletua. Tulou le afifio o a outou afioga i alii ma tamaitai Minisita o le Kapeneta ma outou faletua, tulou le afifio o sui usufono mamalu o le Palemene i lana Paeaiga Lona XVI ma outou faletua. Tulouna le afio o lau Afioga i le Faamasino Sili ma le Ofisa o le Faamasinoaga, tulou le afifio o Faaluuluga o Matagaluega ma Faalapotopotoga Tumaoti a le Malo, faapea le Tafatolu o le Faigamalo a Samoa.

Ou te faatulou atu foi Samoa i le ee faafogafoga mai i maota ma laoa i nai o tatou matua tausii, tama ma tina matutua, ae a le tapuaiga i pulega mamalu a alii ma faipule o afioaga taitasi, faletua ma tausii, saoa ma aualuma, malosi o le nuu seia oo lava i alo ma fanau. Samoa e, o oe lava o le.ua.faalafiegatea. O le aomamala, tulou le afifio o Tama ma o latou Aiga, o Aiga foi ma o latou Tama, le Usoga a Pule ma Tumua, Ituau ma Alataua, Aiga i le Tai ma le Vaa o Fonoti.

E le vaea le fala ooto aua paia o sulii ma Feoi o le Atua i fatafaitaulaga e fia, o e o faanonomanu aua se manuia o Samoa ma ona tagata. Ia lele ua maea faaee i luma maota ou feaoga, ua ao i ai faalupega o Samoa, tulou lava. Ou te faatulou atu foi i le tapuaiga a nai o tatou uso a Malo i Sasae, le Faigamalo a Tutuila ma Manua, i le afio o lau Afioga i le Kovana Sili ma le Lutena Kovana ma lau Faigamalo, le afifio o Maopu alaalatai le Tama Matua, ma le mamalu i le Faleagafulu. O paia aua Sua ma le Vaifanua, Fofa ma Aitulagi, Saole ma Saleaamua ma le Launiu na Saelua. Tulou le afio o le Laau na Amotasi, Afifio Faatui alaalatai le auvaa o Tootoo ma upu ia te oe le Manuatele. O ou paia sausaugata na Samoa, manatu o le a taoto atu ia faamoe i ulupaga ma le faasauga o le atu folasa. Taoto foi faa'ia o le atumauga o le vavau le gae ma tau'i ma lolo'u faalaau tapu'e ou mamalu ma o ou paia e tumau e le ave. O paia mai lava i le Tai Samasama o le Tuimanua seia paia Fili ma Puletuu na tauilo ai manu o malo.

Ae o se avanoa lelei ou te faatalofa ma faafeiloai atu ai isi ou itumalo o Aiga i le Tai le itumalo ou te mimita ai, le itumalo ou te nenee ai. Se Aiga i le Tai e le o se itumalo itiiti oe, ua iloga o oe o le feagaiga a Tumua ma Pule, o oe o le pae ma le auli. O le tootoo e tausii le filemu. O ou paia mai lava i le Fa'imata seia paia Luatimu o le Uluaipou o malo, o paia e le ave. Faamalo le soifua manuia faamalo le lagi e mama. Faatulou atu i paia o nai afioaga, mai Mulifanua seia paia Apolima ma Manono. Faamalo le soifua manuia, le paia i le afioaga e susu ai Usoalii ma Alo o Malietoa, Susu Pouli ma Fuaolefau. Afio le Tapaau, alaalatai le mamalu ia te oe Ati ma Lautolu. Ae a le afioaga o Apolima si ou nuu pele ou te mimita ai, i le susu o Sau ma le aiga Sa Sau, susu Lilo ma Usoalii, alaalatai le Tu'ua ma le mamalu ia Sa'uma.

E faatalofa isi ou nuu pele o Manono, i le paia o le toafa o Alii ma le toalua o Tulafale, ma le mamalu i le Fale-Manono. Si ou pitonuu o Faleu, susu ai le susuga Tutasi o le Uluaipou o Malo, susu i lau susuga Leiataualesa o oe e te pule i le nuu faigata, alaalatai le Tulafale, susu Usoalii Faafeagai, susu le susuga i le Matua ia Vaisagote, faapea le mamalu o le aiga Sa Mutimuti. E le mafai foi ona faagaloina lau faatalofa isi ou pitonuu pele o Lepuiai, i le susu o lau susuga Leiataualetaua, o le paia lava lea i le Falelima alaalatai le matua ia Vai ma le mamalu i le Faletolu. Faatalofa atu i si ou pitonuu pele o Apai, susu ai le susuga i le Alo o le Malietoa, lau susuga Tuilaepa, susu Usoalii ma le Matua ia Finau, alaalatai oe le Pologanoa. Ae a si ou pitonuu pele o Salua ma Satoi, susu ai lo oulua toalua Taupau ma Mulipola, susu le susuga i le Tapunuu lau susuga Luatutu, alaalatai le aiga Sa Tuilagi faapea lau fetalaiga Auapaau ma le Falefa o Salua. Lo'u itumalo e, o ou paia le popo ma ou pa le solo e taoto a a'o ala oo. O upu e fai i le itulagi lea, se ua ou tu i Taumeasina ae ou tepa i le matagofie. I le agaga solia e maau faafilifili auro ai upu ma momoli atu le agaga faafetai tele i lou itumalo.

Faafetai mai le taele o lou agaga, o mea uma foi o i totonu ia te au ia faamanu atu i Lona Suafa Paia, aua foi ne'i galo se mea e tasi o Ana meaalofa. Ua faapena se mafaufauga, faafetai tele i lau pule ua to, ua pale ua pale, ua ula ua ula, titi e ua titi, se ua malie i lau faaalalo. Faafetai le faaeaea i la outou pule ua to, e ala

i la outou faiga ffilifiliga i le Faiga Palota, lea ua outou tusi aao ai, e avea ai le auauna e fai ma tofi o le itumalo i lenei lima tausaga. Faamalo le tofamamao, faafetai le utaga na saili, faafetai le saili malo. O ai ea le tagata ua e manatu mai ai? O ai foi le atalii o le tagata ua e saili mai ai? O le auauna e tu ma le apa fafano ma le ie soloi, e pei o la Iesu, 'ou te le i sau e auauna mai tagata ia te Au, ae ia Ou sau ia ou auauna atu i tagata.' Lou itumalo e, ua leai se auro leai se ario e tui ai lo outou agalelei ma le faaaloalo maualuga lea. Ia tapuai maia ma le manuia, se i ou taumafai i se malosi e gata ai. O upu e fai i le itulagi lea, 'o le a le poia faleolo, o le a fa'i a le pou ae saili le ia a tautai.

E le mafai foi ona galo Afia isi ona vao, isi ou uso a auauna tulou, lau Susuga Ifopo Matia Filisi. O le sa tulai mai i le tofi i lenei lima tausaga ua mavae, se ua faamalo le faatoatoa. Faafetai galue, faafetai mo galuega lelei, sa faatino mo lo ta itumalo. Agalelei le Atua ma ia faamanuia, ae tapuai maia se i ou liliu ane e faaauu le faiva o le tautua. Aua o le mea moni, e le i fausia Roma i se aso e tasi.

E le mafai foi ona galo lau faafetai ma le faamalo i nai ou uso a sui tauva, o e sa o matou tauva i le tofi faipule o Aiga i le Tai. Lau susuga Mulipola Oliva faapea lau fetalaiga Tautaiolevao. O paia ma mamalu o le a le oo i ai se faamatalaga, e taoto lava, a o se alao. Ae faamalo le faatamalii, faafetai le faatausala, se o upu lava a le atunuu, 'e tau lapalapa tama a o le auso'. Tapuai maia ma le manuia, ae se i ou liliu ane e asu se vai ma ati se afi aua lo tatou itumalo. A o le i siia lou vaa mo le faatamasoaliiga, lou itumalo e, ou te tatalo atu, ou te fia nonoina lau saaga, se i saa faaoti mai mo au, se i ou fili se pasina, pe fili se pauli, se pule po o se lautifa, ina ne i fili puea le mafua, ona le tali lea o le momoo o le taliuta. Aua o faiva e tapuaia o faiva manuia, e potu lava le tautai, ae le atoa ia i le liu o lona vaa. Ou te tapa foi tulua i le tata i lau tapuaiga i Suli ma Feoi o Auauna a le Atua i lo'u itumalo, o lau tatalo e manuia ai ou faiva alofilima. Samoa e, ou te le alu loa e faigata lou fita, tapuai i faiva o mafaufauga, aua lava se Samoa manuia ma le filemu, aua o lo o outou po le fala ma ula le mulila, o le a fisaga ai le tai. Ou te musu e alu le fai ae tuu lona foto, pe gau foi le tila, lafo i Manono, ae ou te momoo i se suasami aua Samoa potopoto, aua Samoa mo a taeao. Tapuai maia ma ia vivili faamanu a tagi lau tapuaiga. E vivii ae lou loto i le Alii aua e lelei o Ia, e faavavau lava Lona alofa. O Lona alofa lea ua maleifua mai ai i faguga lelei ma alafai mai i le manuia le paia o le Maota lea i ona mamalu le avea, aemaise o Samoa i lavasiga eseese o le soifua valaauina.

O lea ua tatou fesilafai ai i pue o manu ae le o pue o mala, ua vaelupe maua ae le vaelupe saa. Aua e i ai se tofa na liliu, po o se faautaga na saili mamao, ausaga le tuvae, e saasaa e le faia, e faalua le tutu i le finagalo o le Atua. Ae tatou faafetai i le Atua, o le Faavae o le Malo o Samoa, ua manuia ai i tatou, taalolo atu ia paia o le Atua i le Aiga o Sa Levi, o le latou lea faiva alofiaao. Ae o paia o Samoa i paia faale-Malo, o paia faale-Talalelei ma paia faale-Atunuu manatu o le a ou le saena le atoseu o seuga. Aua o lea ua maea ona faailo le luepue mua o faiva seu a tamalii. Aua o Samoa o le atunuu tofi e le o se atunuu taliola. E le toe tau tapuea faalaa le ola, aua pe mafuli lava le lauu e sosolo lava ona aa. O ou paia e tumau e oo i le faavavau, ae o po tala o Samoa nei fai ma lape, e mai le oneone le utufia seia paia Fili ma Puletuu, o taeao e fia o le atunuu, ma le ala soifua, ua ta'ui i le avafatafata. Ae se i faavagavaga lou taimi e fai ai se sao o Aiga i le Tai, i le atinae e le gata o le itumalo, a o Samoa ma ona tagata, ina ia totogo ae pea moemoe fou i pitovaa o Samoa.

Ae ou te le i paia la le pa i Fualaga pe ou te asaina le vai o le tama, faafetai atu i lau Afioga O Le Ao Mamalu o le Malo ma lau Masiofo, i lo oulua faiva alofiaao e ala i le soifua valaauina, ua faa-Ao i ai Samoa. Faamalo le onosai faafetai le tauatai. I le agaga fiafia ma le me'eme'e momoli atu ai le agaga faamalo i lau Afioga i le Palemia. Faamalo mo le faafoeina o le sa o Samoa i le tele o tausaga. E ui lava e le faigofie ou faiva alofi aao, i le feagai ma faitioga feagai ma tiga, aepeitai, faafetai lele ua tele suiga lelei. Siitia le tamaoiga ma tauaoloa e atunuu tetele o le lalolagi. O le fesili e mafua i se a? lelei faatino o lau Faigamalo, se ua malie toa ua malo tau, faafetai i le tofamamao. Le tofa na saili i le Atua, ua a'e manuia ai lau faatautaiga. Se o upu i le gataifale, e le tau faafuluina le pa osofia, o le maa foi e piitia e le tau laeia. A o Afioga a le Atua, 'e oge meaai leona taanoa, ae leai se mea e mativa ai le tagata e matau i le Atua.' Le Atua o le puna o le oa ma le tamaoiga Na te utufia le tofa, ae sufi i lau faautautaga. O le tatalo, tau ina faalua atu le agaga o le Atua i lau Afioga i lenei Nofoaiga.

A o se avanoa lelei foi e momoli ai le agaga faafetai tele i lau Afioga i le Minisita o Tupe, e tusa ma folasaga matagofie, se ua taliga e fialogo le mauga o Matautia, e ala i le tatou Tala o le Tupe. Ua lelei tapena

mea uma, o le mea sili ona faafetai ai Aiga i le Tai, ua faaitiitia a tatou tupe faaalua, o lona uiga o le a faateleina a tatou tupe totoe ma o le a siitia ai le tamaoaga. Faafetai i lau Afioga mo le Tala o le Tupe.

Lau Afioga i le Fofoga Fetalai, lau Afioga i le Palemia e tauala atu manaoga o lenei itumalo i a outou Afioga i Minisita o le Kapeneta. Lau Afioga i le Minisita mo Galuega, Felauaiga ma Atinae Eseeese, lau Afioga Hon Papaliitele Niko Lee Hang, e tatalo atu ma le agaga faaaloalo nai ou aualatetele. E le o toe po malae i le taua ma le aoga o aualatetele aua le faafaigofie o femalagaiga, aemaise foi le tau atinaeina o le tatou atunuu. E momoli le agaga faafetai tele i galuega faaauau o lo o faatino atu i le taimi nei. Ua faaleleia le tele o nisi o vaega o le auala, peitai lau Afioga, o nisi vaega e le o faaleleia ua sili ona ogaoga, e manatu ou te le tolovaeina le upega o lo o i ina le uta a le faimea, ae na ona faaoloolo maau atu, se i alofa silasila ane. Ua fa nei masina talu ona uma ona sua nisi o vaega o le auala o Aiga i le Tai. Lau Afioga ua le iloa po o fea ua aga i ai le konekarate sa feagai ma lea galuega. E fa masina o feagai pea lenei itumalo ma le mamalu o le atunuu ma le pefu i taimi uma tulou, afaina ai le soifua maloloina. O le mea e popole ai le agaga ma le mafaufau, ona ua faaoga e le mamalu o le itumalo le suasami se i tulou, e tau faaitiitia ai le pefu ae ua fai ma mea ua sili ona afaina ai a tatou meatotino, se i alofa, se i tautuana le tatalo a Aiga i le Tai.

Lona lua o lau talosaga lau Afioga i le Minisita mo Galuega, Felauaiga ma Atinae Eseeese, i tulaga o ou auala galue. E le o toe po malae lau Afioga i le taua aua le atinaeina o faatoaga, ae a nai fanau i le ala usu i le aoga i le savalia, tama ma tina matutua lau Afioga, e moni e le itiiti le galuega fai, peitai, e tuutuu atu i autafa o lau Afioga se i alofagia nai ou auala galue, ua lata i le 30 tausaga e le toe faaleleia.

E lua nai ou auala galue i Lalovi, sasae e tuaoi ma Fuailoolo, a o sisifo e tuaoi ma Satuimalulufi. E tasi lou auala galue i Apolima lau Afioga, ua matua faaleagaina ai le tele o taavale, ona o le omoomo ma le patupatu, tulou le faafofoga a Samoa ma le Maota. E tasi lou auala i Faleu, tasi lou auala i Lepuia, faapea si ou pitonuu o Salua. Lau Afioga e tatalo atu ma le agaga faaaloalo, se i alofagia nai ou auala galue aua le tau atinaeina.

O le tolu o talosaga lau Afioga i le Minisita mo Galuega, Felauaiga ma Atinae Eseeese, o ou vai paipa. Faafetai i le Matagaluega mo le auunaga. E le itiiti lo outou sao i le tautuaina ma le atinaeina o le atunuu. Peitai lau Afioga, e fai si utiuti o le suavai i totonu o lou itumalo. E tele o vaega e faatoa maua le suavai i le tuneva o le po pe a faaitiitia le faaogaina o le suavai. Ua na o le tafaala i le main road, agai atu i tua i le 60 i le 80mita i tua. E faapitoaugafa se faamatalaga i le suavai paipa mo lou motu o Manonotai. Lau Afioga e oo mai i le taimi nei, e leai se suavai paipa o maua ai i lou nuu. Ua na o nai tane o lo o tau talitali ai le matelaina ona o le leai o se suavai. Peitai a oo nei ina leai se uaga, ia ona agai mai lea i le motu o Upolu. Lau Afioga e tau saili se vaa, e tau saili se taavale, tapena le agai i uta ma le toe foi i le motu. O aga faigata ia ma le taugata o lo o feagai ma le motu. Sei alofagia, talosagaina ni nai pamuvai i lou itumalo, aua le faaleleia o lea vaega. Lau Afioga e le o po malae, e suavai ma vailaloa loaloa tuamaota ma tualaoa o Aiga i le Tai, o lo o sapi ai le vai o Aggies Resort. Faamolemole lau Afioga, na o le tatalo atu, ae le aoaia e Laupua Tamafaiga.

O le fa o au talosaga lau Afioga o le talosaga faamanatu, e ala i lou uafu tele aua le fesagaiga i le feoaiga a motu e lua, aemaise o Samoa. Ua matua faaleagaina le fale ma le uafu, tulou, ua taetaei ma mavaevae le sima ma ua le toe saogalemu, ma ua lamatia ai le soifua femalagaai o tagata i aso uma.

E tele atinae lelei tau turisi ua siitia i le motu. Peitai o le faigata lea o lo o feagai ma i latou ua faatinoina ia atinae, ona o le faaletonu o le uafu. Lau Afioga ou te tatalo atu ma le agaga faaaloalo. O le isi vaega o lau talosaga lau Afioga mo Galuega, e moomia ni ou moli faailoilo aua tulaga i le faailoaina o lou alavaa, mo le saogalemu aua le feoaiga o motu e lua. Ou te manatua, sa i ai moli i le vaitaimi o agai i aoga i tai i le motu, peitai ua leai se mea i le taimi nei. Lau Afioga e le tau faailoaina le taua o nei moli, e le gata i le soifua femalagaai, ia iloa alavaa, faapena foi ona faailo vaega e papau aua lava le soifua lelei o tagata femalagaai.

O le ono o au talosaga lau Afioga, e tauala atu i lau Afioga le faafetai ma le faamalo, i le Afioga i le Alii Pule ma le Matagaluega o Malosiaga Faaletise, i nisi o moli sa faamoliina ai nisi o uafu laiti o le motu, peitai lau Afioga ua toeitiiti lava soo uafu. E talosaga atu ma le agaga faaaloalo, faamolemole se i alofagia nisi moli aua lava le faamalamalamaina o le feoi o le mamalu o le motu ma le atunuu. E faatupulaia nei faafitauli pe a oo ina i ai le suiga o le tatou daylight saving pei ona i ai i le suiga o a tatou taimi. E lagolagoina

e Aiga i le Tai le Daylight Saving, ia pe a fai ma a tatou moli. Lau Afioga na o le tatalo atu, ae talitonu o lo o i ina le uta a le faimea.

Faafetai i lau Afioga, ia o lea o le a faauma atu, faafetai mo le avanoa.

O se tasi o vaega o le talosaga i lau Afioga i le Minisita, o le tulaga i ou taligalu, o se vaega o lou taligalu i tafaala, sasae ma sisifo o le Maota o le susuga i le Faafeagaiga Metotisi i le afioaga o Lalovi, e le o au atu i ai le taligalu lau Afioga. Ua foi mai le faatinoina o le taligalu i le isi pito o lou itumalo aepeitai, e le o faatinoina se taligalu i lea vaega i tafaala. O le popolega, ona e gatasi lelei le auala ia ma le suasami pe a oo ina sua o'oo'o. E afaina ai le auala, ia aemaise foi o le mamalu o le itumalo o lo o nonofo ai, Lau Afioga, o upu a le atunuu, 'e logo lava le tuli i le tata' se i alofa.

O se tasi vaega o lau talosaga e agai atu i lau Afioga i le Sui Palemia, lau Afioga Hon Fiamē Naomi Mataafa, le Minisita mo Punaoa Faalenatura ma le Siosiomaga. E manatu e le itiiti le agaga faafetai i le tele o galuega lelei sa faatino mo le motu o Manono. Peitai lau Afioga, o upu e masani ai le tatou faigamalo lenei, o le mea e lelei mo Upolu e lelei foi mo Savaii. E i ai le manatu o le sui e lelei mo Upolu ma Savaii, ua sili foi ona lelei mo le motu o Manono. O le tulaga i ou taligalu faatamilo lau Afioga, ua maitauina le afaina, o le fua faatamilo o le motu, ona ua aia ma soloia le tele o vaega. E moomia se taligalu faamolemole, aua le faatumauina pea o le motu ona o le aafiaga o suiga o tau i lenei vaitau. E le o nofoai lou afioaga, o lo o faatino le lauina o le maa aua le puipuia, peitai a oo ina sau le Tsunami, ia o le a avea maa aua e laiti e fai ma auupega malosi e faatamaia ai meatotino aemaise o le soifua manuia o ona tagata.

Lau Afioga ua taatia atu se tasi o talosaga e ala i eleele, lau Afioga mo le silafia, o lo o tuafale foi si ou nuu i ou eleele. Tatalo atu ma le agaga faaaloalo, e pei ona tusi atu, se i alofagia ia eleele aua le fofoga taumafa ia aemaise foi o se vaega e tua i ai pe aafia i vaitaimi o lologa ma Tsunami.

Lau Afioga i le Minisita mo Faamasinoga ma Pulega Tau Faamasinoga, Komisi o Komesina o Faiga Palota, e tatalo atu ma le agaga faaaloalo, se i alofagia se tofi faaopopo o Aiga i le Tai, silasila ane lau Afioga i le Faiga Palota talu ai, siitia maua luga i le 4,035 le Lola o Aiga i le Tai. Tatalo atu o fea o i ai le tofa ma le faautaga se tofi faaopopo mo Aiga i le Tai.

O se tasi o vaega o le talosaga lau Afioga, e le o toe po malae i le tulaga o lou itumalo, tulou le afio o lau Afioga i le Minisita mo Fesootaiga, Faamatalaga ma Fesootaiga Vavave Faaneionapo lau Afioga Hon Afamasaga ua tapa fua i lou suafa, e le o se tuli ua vale aemaise o le afioaga o Satuimalufilufi. O le talosaga e tau ina faaoloolomaa atu aua e tupu lava matagi i liu o vaa, lau Afioga pe le tataua ona tuu le afioaga o Satuimalufilufi i totonu o lou itumalo faa-palota. A silasila lau Afioga i le faatulagaina o lenei itumalo, o Paepaeala i Mulifanua ona sosoo lea ma Satui fou, ona toe sosoo lea ma Mulifanua ona toe sosoo foi lea ma Satui, maea Satui ona sosoo lea ma Apolima, ona toe sosoo foi lea ma Satui, ona faatoa oo lea ia Manono. Lau Afioga i le Fofoga Fetalai, o manatu e faatupu lagona e maua ai foi se tofa ma se faautaga ae sili ona lelei mo le Ofisa o Faiga Palota mo le faafaigofieina o le latou galuega, aemaise foi o itumalo e lua pei ona i ai.

Ona faaii lea o lau talosaga i lau Afioga i le Minisita mo le Soifua Maloloina, lau Afioga Hon Tuitama Talalelei Tuitama, e le o po malae i tulaga e pei ona i ai, e talosaga atu ma le agaga faaaloalo ina ne'i ou tagisa ae se i alofagia se maota gasegase mo le motu o Manono, aua lava le faafaigofie e pei ona maua e fiu e tau saili se vaa, e tau saili se taavale aemaise i vaitaimi ogaoga ma le louloua o le tau. Ou te manatu e afaina lava le soifua o le toaina ma le loomatua e le i maua lava se vaa ma se taavale, aua lava le soifua lelei ma le soifua manuia tutusa o tagata uma. O le talosaga atu lea ma le agaga faaaloalo. Lau Afioga i le Palemia ma le mamalu o le Kapeneta, faapea sui usufono mamalu o le Palemene aemaise o le fita faafogafoga mai a Samoa mai ona ao e oo i ona iu, ae le gata i lea o le taufalemau i le Aiga o Sa Levi. O se sao lena o Aiga i le Tai e taua atu i lau Afioga i le Fofoga o le Maota. Ae afai ua sala se gagana ma lapelapea sa matou afa, o le ftatalo, "A utu le sami, asu i le upega." O le faanaunautaiga, aua lava ne i "Faavaitu'uipuina le vai faae'e," ina ne i nape le afa ona maua lea o le suavai aua o avanoa e le au maua.

Ia manuia tele lau Afioga O Le Ao o le Malo, manuia a outou Afioga i Sui o le Fono a Sui Tofia, manuia lau Afioga i le Fofoga Fetalai, ia maua sou finagalo aua le faafoefoeina o le Maota. Ia manuia lau Afioga i le Palemia ma le mamalu o le Kapeneta, ia manuia sui usufono mamalu o le Palemene, faapea lau tapuaiga Samoa. Ia manuia tele le faafogafoga mai a le paia o si ou itumalo. Soifua ma ia manuia.

## **22 IUNI 2016**

**Tofa AUMUA ISAIA LAMEKO (Falealili Sisifo):** Lau Afioga i le Fofoga Fetalai ma le mamalu o sui usufono o lenei Palemene. Ua faaifo le faiva o Ana e pei o le fetalai i le faiva i le tai, lafo foi i le liu le atu o le tautai matapalapala, tulima foi le tu i le tula le lupe sa faalele aua ua sao nei i matau le fuifui alii. Ua tuulā le vaatele ina ua tulau le folauga, ae faapei o le fetalai a Tulatala, “Ua malie toa ua malo tau,” ae siva ai nei le teine ma lana fuifui āile, aua ua logo nei le fua ma le pao, e pei o le upu ia Tinilau. A o le aso ma tulaga o le tatou aso i le maleifua mai ma le soifua maua ma le lagi e mama, i le paia ma le mamalu o lenei Fonotaga. Ua malo afua ua malo ua maua lo tatou taeao fesilafai, aua ua mua muā le aso, e pei o le fetalai ia Tualemoso. Ua to’ā foi le tai sua ae noanoa le taitau. Ua fotupule foi le faiva o tama aua ua loloma le tai o Tumua. Ua toa foi le tai o Ala, aua ua ula ma ua matagofie ai foi le aso. Aua ua moe manū ala, ua moe Fogalevasa. Ua tatou fesilafai ai nei i avatui ma avafatafata e pei ona silafia e Saoluaga. Ua tele ai lava upu i manū, ae itiiti upu i mala, ae ua i le agaga le matagofie ma le manaia o lo tatou taeao fesilasilafai. A o lenei aso, ua fai i lagi le tuligasi’ā a Sa Tagalōā. O paia ma mamalu o lenei aso ma le Palemene o Samoa.

Lau Afioga i le Fofoga Fetalai, le paia i le afio o le Afioga O Le Ao Mamalu o le Malo o Samoa lau Afioga Tui Atua Tupua Tamasese Efi ma lau Masiofo, afio Sui o le Fono a Sui Tofia ma a latou Masiofo. Afio lau Afioga i le Faamasino Sili ma lou faletua, Afio lau Afioga i le Palemia ma lou faletua, afio tamaitai ma alii Minisita o le Kapeneta, Minisita Lagolago ma sui usufono o le Palemene, afio Susuga i Faafeagaiga e fia o lo o tauasuina le Ipuvai o le Ola i so o se fatafaitaulaga i Samoa. Afio faauluuluga o malo mai fafo, afio faauluuluga o Faalapotopotoga, Matagaluga a le Malo, afio saotamaitai, sao aualuma ma le malosia o nuu i so o se afioaga i totonu o Samoa. O le paia lava lea o Tama ma o latou Aiga, Aiga ma o latou Tama. Le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Ou te fia pai foi i le Faigamalo a Tutuila ma Manua, i le afio a lau Afioga i le Kovana Sili ma lou faletua, Lutena Kovana ma lou faletua, o le paia lava lea i le mamalu o Sua ma le Vaifanua, Fofu ma Aitulagi, Saole ma Saleaamua ma le Launiu Saelua, Tootoo o le Faleula ma upu i le Manuatele. O paia ia ma mamalu faaleaganuu, faalemalo ma le faatalalelei o lo o tatou sapi ai nei. Ia faaopea ia ta fua nai le sami ae tatou tuli alavaa e tasi. Tau ia o le Atua ua lava lea mo tatou i le aso nei. Faafetai la i le Atua auā ua Ona faia mea matagofie ua tatou fesilafai ai nei i au-o-manu ae le o au-o-mala, i luma o nuu ae le o tua o nuu, i mauga o ao ae le o mauga o Lilaumea. E faapena ona tatou viia le Atua auā mai ia Ia le alofa, ua ala ai ona tatou oaoa i faleseu ma sa’ā i maaomalie pe saō foi i lagitau.

Le paia o si ou itumalo o Falealili Sisifo amata mai Saga seia oo i Sapunaoa, susu lau Susuga Tuatagaloa le Saofetalai ma To’osavili o le Ki o le Malo, afio mai lau Afioga Meleisea o le saoaualuma, afio mai Leilua ma le toafa Tamatane, afio mai le Matua ia Fanene, afio mai Salevalasi, susu mai Tuisamoa o le Tapaau Faasisina o le solomuli a Manumea, susu mai le paia o Leusoalii, susu mai oe Lufilufi ma upu ia te oe Taulauniu.

Susu mai ouluga suafa Saleā, Saoleititi, Taito ma Ula, afio mai le Matua lau Afioga Alaimoana maliu mai Sa Alaimoana faapea le mamalu ia te oe le Falealili, maliu mai oe Talaolefale lau tofa Falaila ma le lauti na laulelei ia te oe Falealili. Susu mai Pulotu o le alo o Tuatagaloa, maliu mai le alii o aiga lau tofa Talauena, maliu mai le Anofale ma ou manu faapea upu ia te oe Falealili. Afio mai alo o Fanene, afio mai Te’o o oe o le Anavataua na faaleo ai papa o Tupua, susu mai lo outou Usoalii, maliu mai le aiga Sa Talo i lau tofa Taloolemaagao ma le uso na toto, maliu mai Muatua ma Salea’alii ma le lauti na laulelei. Afio le mamalu o lo outou toafa, maliu mai Leavasa ma Vaelopa o e na leleo i le fale o Ituau ma Alataua, o tootoo o le aava, maliu mai Tuiloma ma Taituuga o manu o le Tuasivi e fagogota i tai e lua, susu mai Patea o le alalata ma le alo o le Tuatagaloa, susu mai Taa o le nafa na tausi o le alo o Malietoa. Susu mai Muliava o le fofoga o le vai, susu mai Fuataufao o oe o le Suafa faalupea, alaatai mai e matutua lau tofa Muliaga ma Maseafa alaatai le mamalu o le lotoifale o Manu Samoa. O paia na ma mamalu o lo tatou itumalo o Falealili Sisifo, a o le aotelega o le faalaniga o lenei itumalo o Falealili lea ua vaeluaina. O le paia ia Alalagafa la lua nofo o Tulafale, tauagaeseese ia te oe Falealili. E momoli atu ai le faafetai ma le faamalo i lo tatou itumalo i la outou faaeaea i le maea ai o le tatou Faiga Palota i le tausaga lenei, faamalo faafetai o la outou pule lea. O le a teu i le va o lou fatu ma lou mama ma e le mafai lava ona galo. E avea foi lenei avanoa faatauvaa e momoli atu ai le faafetai tele ma le faamalo i sui o Falealili i le Paeauga talu ai le Tofa Tusa Misi Tupuola



ma le Tofa Tuiloma Pule Unasa Alaimoana Lameko, i le asaina o le gasu o le taeao ma faataatia le alafua mo galuega o lo tatou itumalo. Faafetai fai o le faiva, faamalo tautua, faamalo faaeaea itumalo.

Ia ona ou liliu mai lea e fai sina faamatalaga i le Tala Autu o le Tupe i lenei tausaga. I le vaavaai i le Tala Faataata o le Tupe mo le Tausaga 2016/2017 ua atagia ai vaega nei. O le mea muamua, ua siitia i le 3.1% le tupe maua i le 2016/2017 pe a faatusatusa i le 2015/2016, e momoli atu ai le faafetai ma le faamalo i le Minisita o Tupe Maua, Ofisa Sili o Pulega ma le aufaigaluega o le Matagaluega o Tupe Maua mo galuega o le aoina o tupe aua galuega faatino ma galuega atinae o le tatou atunuu.

O le vaega lona lua, ua siitia i le 76.5% tupe faameaalofa mai fafo pe a faatusatusa i le 2015/2016 ma e maua ai alamanuia mo tatou tagata o lo o galulue i galuega faavaitaimi i fafo atu o Samoa. E maua ai foi alamanuia mo pisinisi tau tagata tafafao maimoa mai ma maua ai galuega mo o tatou tagata i Samoa nei ma siitia ai le fua faataata o oloa o lo o auina atu i fafo. O le mea moni lau Afioga i le Fofoga Fetalai o lo o ave pea le faamamafa a le Malo i vaega nei. O le Matagaluega o Aoga, siitia i le 10.2%, Matagaluega o le Soifua Maloloina 9.7%, Matagaluega o Tupe 8.5%, Matagaluega o Galuega ma Atinae Tetele 5.2%. Lau Afioga i le Fofoga Fetalai, ia na o ni manaoga o lenei itumalo mo a tatou Matagaluega o lo o i ai.

O le Matagaluega o Aoga, e talosagaina le siitia o le tulaga aoao o le numeracy ma i ai ni guidelines ma ni meafaigaluega (text book) e faaaoa e tamaiti mo aoga tulagalua aemaise kolisi. Ia siitia le capacity o faiaoga aua le aoaoina o tamaiti, ma e momoli atu ai le faafetai ma le faamalo i le Minisita mo Aoga ma le Ofisa Sili o Pulega ma le Matagaluega faapea le Tapaau ma le aufaigaluega a le Iunivesite Aoao o Samoa ma Iunivesite mai fafo, o lo o tatou faipaaga mo lea faamoemoe.

Se'e atu i le Matagaluega o le Soifua Maloloina lau Afioga i le Minisita, e talosagaina pea se fomai faapitua e taitasi i le vaiaso mo le Falemai i Poutasi. I le Matagaluega o Galuega ma Atinae Tetele, e talosagaina lava le eletise ma le vai taumafa e faaaogaina ai ia tatou community service obligations i nuu i uta i Sapunaoa, Matautu, Malaemalu ma Satalo.

O le vaega lona lua e momoli atu le faafetai tele i le Afioga i le Palemia ma le Kapeneta mo le faataina o auala galue o Vaovai, Satalo ma Sapunaoa. Ia ae o totonu o lenei itumalo, o lo o tele lava auala galue e le i faataina taifei o le matou nuu i Saleilua i le auala galue Numera 3, Numera 2 ma le Numera 1. O Poutasi Numera 1, o Matautu Numera 1, o Tafatafa Numera 1, Malaemalu Numera 1 ia ma le auala galue i le pitonuu o Piu ma Sapunaoa e le i faataina. E talosagaina foi lau Afioga i le Minisita mo auala laupapa fords i le vai lea i Satalo ma le vai lea i le pitonuu o Piu i Sapunaoa.

Mo le Matagaluega o le Siosiomaga i le galuega o le totoina o le togatogo i Sapunaoa, Satalo, Malaemalu, Vaovai ma Poutasi. O le galuega mo taligalu i Iliili, Saleilua, Matautu, Malaemalu ma Sapunaoa i le tuaoi ma le vai lea e i Salesatele. Ia, o le vaega lona tolu o le faataina o auala mo le Tsunami i Poutasi Satalo ma Faleulu i Sapunaoa. Mo le Faalapotopotoga o Tagata Tafafao Maimoa Mai, ou te talosagaina le faataina o auala agai i mataaga ma turisi i Iliili i Saleilua ma Poutasi ma Tafatafa e tolu auala lelei i mataaga ia ma Malaemalu i le auala fou ia e i ai i le taimi nei.

O le Matagaluega o Faatoaga ma Faigafaiva, e talosagaina le siitia o le faasao o le gataifale. Lua, e talosagaina meafaigaluega (materials) mo nuu taitasi mo le toe totoina o le niu, koko ma le kofe, e faaaogaina ai le tatou stimulus package. Tolu, siitia meafaigaluega (materials) mo le talo Salani, talo Fusi, ma le talo Tanumalala mo le aufaifaataoaga ina ia ausia matatia mo le totoina aua le auina atu i maketi i fafo ae ia lava foi a tatou meaai taumafa i totonu o lo tatou atunuu, (food security).

O le Matagaluega mo Fesootaiga, Faamatalaga ma Fesootaiga Vavave Faaneonapo, e talosagaina lava ma le faaloalo e le ola le telefoni feaveai i gataifale o Falealili Sisifo i le amata atu i iliili seia paia Sapunaoa seiloga e te sau i uta i le auala ta, ona faatoa maua lea o le fesootaiga ma isi tagata o lo o faaaogaina telefoni feaveai. E talosagaina foi ina ia faapena ona faaauauina atu le tatou cable mo le faaaogaina o le tatou internet.

O le Matagaluega o Pisinisi, Alamanuia ma Leipa, e talosagaina le siitia o le maua o avanoa tutusa mo o tatou tagata saili galuega ua maua Tusipasi maualuluga mai Iunivesite ia siitia le mauaina o avanoa tutusa mo nai o tatou tagata saili galuega e le o i ai ni Tusipasi. Ia faaauauina pea o le Polokalame faa-Aperenitisi e uunaia ai o tatou tagata e leai ni Tusipasi ae i ai agavaa o matata eseese ma taualoa ai a latou pisinisi. Fa, ia silasila totoa i avanoa tutusa mo le toe aumaia lea o le tatou (GEGS) Government Exports Guarantee Scheme mo tagata faipisinisi i faatoaga, faigafaiva, gaosia o oloa, garment ina ia uunaia ai le auina atu o



E le faagaloina foi le tapuaiga a le Auaifaluga paia a le Atua o Suli ma Feoi o le Talalelei o lo o faafalele-malu ma faafaletulua i totonu o lou itumalo faapea foi Samoa atoa. Faafetai mo le tauasuina o le Ipuvai o le Ola aua se inumaga faale-agaga o Samoa ma ona tagata mo nei ma a taeao. Faamalo le fai tatalo.

Lau Afioga i le Fofoga Fetalai, ina ne i ou laa loa ae fia afea lou itumalo pele o Aana Alofi Nu. 2, o lo o faafofoga tapuai mai aua e le galo afia i si ona vao, i le afio o Sooelelagi ma Alo Tamalelagi ma i laua Faiga, alaalatai lau Tofa Alipia o oe o le Matua-na-togi. O le mamalu i le Faleiva ma Faletui-aana ma lau Fetalaiiga Leulumoega e te pola puipui aua Aiga-e-fa ma Laau-na-faufau, le Nofo a Too ma Aana-sa-na-eseese, o oe o le Tumua. Faafetai tele mo le tapuaiga a o alofaiva lo tatou itumalo mo lana faiga filifiliga, malo le seu silasila.

E faapea foi le tapuaiga i lou nuu pele o Nofoalii aua le afio o le Aiga Sa Tuala, afio Taimalieutu o le Fofoga o le Vai, Afio le Falefa o le Aiga Sa Tuala o le Aiga Faalagilagi na masaesae ai le lagi. Afio Muagututia o le Aloalii ma le Tama Sa Tuala, Susu foi le Matua o le Aiga Sa Tanuvasā i ona matafale e fa. O Tanuvasa na itulua ai Aana, o Tanuvasa ma Aana na atoa ia te oe le itumalo. O le Laau na Fausia na faufau ai Malo. O le mamalu o le nofo a ituaiga o le Faleaana ma lau Fetalaiiga Faiumu Ataata. Alaalatai foi le Fale Aana i Gagaae ma lo la Tapaau ia Tauti ma Malaitai faapea le Lauti na laulelei. Le paia e o lou itumalo, ua faamalo ma faafetai le saili Malo, ia aua ne i a tatou le viiga a ia tuuina atu i le Atua e Ona le manuia, ua malie le pule i maga, ua malie le ua na to i va, o lau faaea ma lau puleto ua tototetele ua ou sapaia faatuaeleele. O lau faaaloalo lea ua ou tiu ai nei ma ou sapi ai i upufai o Malo, a o ai ea le tagata ua e manatu mai ai?

Ou te fia faaaogaina foi lenei avanoa taua e momoli atu ai le faafetai tele i le Tofa Tolofuaivalelei Falemoe Leiataua, o le sa ma tauva i le tofi o le Nofoa o le Palemene. Faafetai i le Atua ua toa le tai o galu fefatia o lea ua matafi le lagi a ua lafo le malu, faafetai le tofa faatamaalii ma le tausinio faafaleupolu. Ia tatou faagalo fatia ua sola ae tuli i luma so tatou ai aua e taaalo a tama a o le uso, Aana Alofi Nu. 2, o outou o le uso ia te au.

Lau Afioga i le Fofoga Fetalai, e avea foi lenei avanoa taua ou te momoli atu ai lau faafetai tele i le sa tulai mai i le foe ma le Nofoa o lenei itumalo i tausaga e tele le Tofa Tolofuaivalelei Falemoe Leiataua, faafetai i lau Tofa sa tulai mai i le Nofoa mo galuega uma na e faia mo lo ta itumalo. O a foi ni galuega o lo o toote ae fia faaaauu ia taatia mai lou faatuatuaiga ia te au ou te faaaauuina la ta tautua e pei ona i ai. Lou itumalo e, tapuai maia, aua le faatoina faiva aua e talitonu le taofi e le i fausia le matagofie o Roma i se aso ma se tausaga e tasi.

Lau Afioga i le Fofoga Fetalai, avea ia lenei avanoa i lau lauga mua e fia faaleo atu ai nisi o galuega atiaepo o ni galuega fia faaleleia i totonu o lou itumalo.

Lau Afioga i le Palemia ma le mamalu o le Kapeneta, ou te le tau selu atu, ina ne i tatou fao le viiga o le Atua, a o lo outou paia o le vaitele e tafe uma i ai punavai, o le afitutu foi e atiafi i ai sui usufono uma o le Maota i mataupu ua mafatia ai o latou itumalo. Afai foi ua se tai taliga i le faafofogaaga ae ioe le manatu o lē e tuitui ma le lotu maualalo, e toina mai.

Lau Afioga i le Fofoga Fetalai faapea le Kapeneta aemaise o le Minisita e fitoitonu i lenei talosaga, o le auala galue o si ou nuu o Nofoalii, e le i oo lava i ai se faalauleleina po o se ta foi. E tatalo atu ma le agaga faaaloalo se i tagai ane i lo matou auala galue. Na manatu, e le gata ina logolelei ma lelei i le feoi a si ou itumalo, ae o lo o faapea foi ona i ai aseta a le Malo i nei auala. E lua pamuvai, ae tasi le faatanoavai a le Pulega o le Suavai o lo o i ai i le auala galue lea. E faapea foi i laina eletise malolosi a le Malosiaga Tau Eletise. Ae ioe le talitonuga, o le faalauleleina o le auala galue lea, o le a faapea ona faafaigofie ai feoaiga ma felauaiga i le tulaga o galuega faatino.

O lona lua o lau talosaga i le Malo ma le Kapeneta, o le pitonuu o si ou nuu o Vaialua i le tuaoi ma Fasitoota, ua tele lona afaina ma ua lamatia le saogalemu o ē o lo o alaala ma papaaao ai ona o le siitia pea o le suatai. Ma o le pitonuu foi lea o lo o i ai le Maota o Lana Afioga Mamalu O Le Ao o le Malo, e faapea foi i le Tamaaiga, le Afioga ia Tuimalealiifano. Lau Afioga i le Papaliitele o lo o fitoitonu i ai galuega ma felauaiga, e tatalo ma le agaga maualalo se i tagai ifo i lea vaega.

O lona tolu i lau talosaga, o le suavai taumafa mo si ou itumalo o ē o lo o alaala ma papaaao i nuu a uta. I Leulumoega lava latou ia, pe afa maila le sau mai tai i le auala agai i le main road i uta, na o latou na o lo o maua le suavai taumafa, a o le isi vaega o lo o alaala ma papaaao seia paia le auala o lo o faalava ifo i

Aleisa, o i latou na o lo o taliilagi le vai. Semeamanu le poloketi a le CSSP ma le Koluse Mumu ua maua ai le faamamaavega mo nisi o aiga o lo o nonofo i uta e pei ona i ai nisi ua faamanuiaina i tanevai. E tatalo atu ai i le Afioga i le Minisita, e faafetaia le Malo mo le auala galue o si ou nuu o Leulumoega, e ese mai le auala Maligi pei ona lauiloa e le toatele o le atunuu. E matagofie lenei auala, ma o le toatele foi o aiga ua nofoia, ae peitai ane, e le i oo i ai se eletise, e le i oo foi i ai se vai. E tatalo atu ai ma le agaga maualalo, e fia maua se vai ma se laina eletise mo i latou o lo o alaala ma papaaao i lea vaega o Leulumoega, e faapena foi i Nofolii i ē o lo o nonofo i uta, se i tagai ifo le Pulega o le Malosiaga o le Suavai i se faamamaavega mo i latou nei.

Lau Afioga i le Fofoga Fetalai ma le mamalu o le Palemene, ou te talitonu ua lava lea lauga, e toe maua foi nisi manatu i se taimi o i luma. Ae o se manatu i le Tala Faatatau o le Tupe ua i luma o le Laulau a Fono, e avatu lau faafetai tele i lau Afioga i le Minisita o Tupe. E fou lau Afioga i le tofiga ae fou lou silafia i lea matata. Faamalo faafetai. E lagolagoina e le itumalo o Aana Alofi Nu.2 le Tala o le Tupe i lona aotelega.

Lau Afioga i le Fofoga Fetalai, ua matou manatu, o le a seu i fanua se matou faamatalaga. E ui i le naunau i le avanoa faaauuro ua tuuina mai mo lenei sui usufono, ae manatu e le sili le toa e aea le olo i lo lē na te pulea lona loto. Ia lagi e mama ma ia faafualoa e le Atua le soifua o Lana Afioga Mamalu O le Ao o le Malo, faapea Sui o le Fono a Sui Tofia, lagi e mama i lau Afioga i le Fofoga Fetalai o le Maota, ia faamanuia le Atua i le Palemia ma le Sui Palemia ma le Aiga Kapeneta ma sui usufono uma o le Palemene. Ia manuia le tapuaiga a si ou itumalo o Aana Alofi Nu.2, aemaise o le faafofoga a Samoa ae ou ola i le alofa o le Atua. Soifua.

## **22 IUNI 2016**

**Afioga FAAULUSAU ROSA DUFFY-STOWERS (Gagaifomauga Nu. 3):** Faafetai lava i lau Afioga i le Fofoga Fetalai, ua maea foi le malu taeao aua se faasiliga malosi o le Maota Fono nei, ae faafetai tele i lau Afioga mo le avanoa faaauuro ua mafai ona tuuina mai mo lou nei sui usufono mai le Gagaifomauga Nu. 3.

Mapu ane ia i taputoa oe le alii seu, ae ee ia i vaatapu ou paia sausaugata Samoa aua o oe o le aomamala i le afio o Lana Afioga Mamalu O Le Ao o le Malo, lau Afioga Tui Atua Tupua Tamasese Efi ma lau Masiofo, afifio o a outou Afioga i Sui o le Fono a Sui Tofia ma a outou Masiofo. Afio lau Afioga i le Palemia lau Susuga Tuilaepa Sailele Malielegaoi ma lou faletua. Afio lau Afioga i le Sui Palemia, afifio a outou Afioga i Minisita o le Kapeneta, afio lau Afioga i le Fofoga Fetalai, afifio a outou Afioga i le mamalu o le Palemene o Samoa.

Afifio le paia o le Aufaigaluega a le Atua i fatafaitaulaga e fia, o le paia lava lea aua Aiga ma latou Tama, o Tama foi ma Aiga, Pule ma Tumua, Itua ma Alataua, Aiga i le Tai ma le Vaa o Fonoti, ma le mamalu tele o le Tafatolu o Faigamalo a Samoa.

E le faagaloina i le loto lo tatou vatupuia ma o tatou uso a tuaoi, le paia ia Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, le Tama a le Manua ma Tootoo o le Faleula, le paia ia te oe le Manuatele ma oe le Faatuiolemotu. O ou paia na Samoa.

Lepa ia la i le foe ae mapu ane i le too, ae se i ou liliu ane isi ou itumalo pele o Gagaifomauga Nu. 3, e amata mai lea i Fagaee seia paia Aopo. O le a ou amata mai la i Aopo leaga o lea ou te Faaulusau mai i Aopo, isi ou nuu pele Aopo, i le afio o le Aiga o Mavaega, afio o Eetau ma le Ati Eetau, afifio Tauaanae ma Matofai, alaالاتي lau fetalaiga Pao ma le falelima o Saeseese, aemaise o le afio o le Tapaau o le Tagaloa Aopo.

E le faagaloina foi si ou nuu o Letui i le afifio o Aiga, alaالاتي le nofo a ituaiga ia Fatua ma le Falelupe ma lau fetalaiga Fiu, o le mamalu lava lea i le Faletolu. Susu mai foi Sa Tupua ma Sa Malietoa, le Matua o Leasi ma le aiga ma lou vaa fetalai, afifio mai e na faasaosao ma le faapea Usoalii o suafa, alaالاتي lo oulua Falelua, Saletolo ma Salealiifano, o le mamalu lava lea i le Faletolu. Afio mai foi Polataivao ma Saigoa, alaالاتي le mamalu i le nofo a vaega ia Saitupua ma Leatiluatoga, o le mamalu lava lea i le faletolu.

E le mafai ona ou faagaloina le aufaigaluega paia a le Atua o lo o faafalelemalu i so o se fatafaitaulaga o si ou itumalo aua e faigata lau faaaloalo ma lau faaeaea i lou nei tagata faatauvaa. O ai ea ua outou sii ai le fale o Asomua i le mauga, ua malie le papa nai Galagala, ua malie le papa nai Tuē, ua malie le faatolotologatama e pei o le tala i le fale Salemuliaga, ua ou tiu ai nei ua ou inu, ua ou malie, ua ou sapaia

faatuaeleele la outou faaaloalo. E le i faigofie ona to mai la outou faaaloalo, ae o lea ua filitupetoea i le pule a le Atua ou te tiu ai faamatalaoa aua le suigaula i le papa nai Galagala.

Lou itumalo e, tuu maia la outou faatuatuaga o le a ou galue ai mo lenei lima tausaga aua se manuia o le tatou itumalo aemaise o Samoa atoa. E lua tai na folau ai Samoa anamua, o le tai o Alo ma le tai o Tigilau. Ou te le fia faaaogaina la le tai o Tigilau, e manino luga ae nenefu lalo, ae ou te fia faaaogaina le tai o Alo e manino atoa luga seia paia le alititai. O le finagalo foi lea o le Atua ina ia faia Lona finagalo i le lalolagi pei ona faia i le lagi. E pei ona faatonu e Tavita lona agaga ma faapea ane, “Lou agaga e, ia faamanu atu ia ia Ieova, o mea uma foi o ia te au, ia faamanu i Lona suafa paia. Lou agaga e, ia e faamanu atu ia Ieova, aua ne i galo se mea e tasi o ana meaalofa.” E faapea se agaga ia te au le Atua, o lau pule lea, faafetai i lou faamaoni, aua o oe na tofia lou nei tagata e ala i le musumusuga a le Agaga Paia i lou itumalo.

Lau Afioga i le Palemia, e momoli atu lau faafetai faapitoa i lau Afioga ma le Faigamalo i le Paeaiaga ua mavae atu, e tusa ai ma le Tulafono ua amanaia ai le sao o le matou itupa, le itupa lea o tina ma tamaitai, ua mafai ai ona ou pale mai ma faamanuiaina ai lo’u nei tagata i lenei foi Paeaiaga i lou itumalo.

Lau Afioga i le Taitai o le Malo, lau Afioga i le Palemia, e momoli atu lau faafetai faapitoa, lau Afioga ma le Faigamalo i le Paeaiaga ua mavae atu e tusa ai ma le tulafono ua amanaia ai le sao o le matou itupa, le itupa lenei o tina ma tamaitai, ua mafai ai ona ou pale mai, ma faamanuia ai lou nei tagata i lenei Paeaiaga.

Lau Afioga i le Fofoga Fetalai, e leai lava ni galuega foi lea, o ni mea tetele o e tuitui ai si ou itumalo aemaise a nai nuu ia o Aopo ma Letui. O le tulaga foi o le ma itumalo lea e i ai nei, faafetai tele lava i le Afioga i le Palemia, le Taitai o le Malo i le tausaga ua mavae, le Paeaiaga ua mavae, ua mafai ai ona toalua i maua nei i le Maota nei. Ia o lou nei sui usufono ma le Afioga ia Laauli, o le Minisita foi lea o Faatoaga ma Faigafaiva. Ma e ou te talitonu foi, atonu o lena foi o lo o... a misi atu ni mea ou te avatua mo le faaleleia o le ma itumalo, ia o la e foi o lo o nofo i totonu o le Kapeneta, e mafai ona ia musumusu atu i le latou vaega aua ni atinae o le matou itumalo. Ma e faapena lava ona ma fai mea fealofani, e ma te felafaoi foi, o a foi ni mea e manao ia ou te sau e faaleo atu iinei, e faapena lava.

Pau lava lea o le lagona o lou itumalo i le Tala Faatatau o le Tupe e pei ona folasia, o le agaga o le faafetai ma le faamalo, o le agaga o le tofa saili aua le silasila totoa i le taumafaiga lea o ni alafua aemaise o le silasila mamao, ina ia mafai ona faaleleia ma sii le tamaoiga o si o tatou atunuu o Samoa. Po o a foi lava ni naunautaiga, po o ni atinae e fia faaleleia o lou itumalo, ia ou te talitonu, o lou taimi muamua lenei, ia o le tausaga muamua foi lenei o lau Paeaiaga. Ae e talitonu e faasoa mai lava e le Matai Sili i le lagi le soifua ona faapena ai lea ona musumusu atu foi i le la itu i Minisita o le Kapeneta e faapena ona fesoasoani mai i le atinae o lou itumalo.

Ae na pau lava o lea, na o le lua lava ia nai Matagaluega e fia oo i ai se lagona ona o le mea foi lea sa sau ai le Paeaiaga ua mavae, o le ave lava lea o le faamuamua i le Soifua Maloloina ma le Matagaluega o Aoga. Ma e ou te talitonu foi, ua loa foi ona i ai le miti lea a le Malo, ina ia tutusa le aoga iinei i le aoaoina o le tamaititi aoga i Malifa, ma le aoaoina o le tamaititi Aopo, ina ia mafai ona o tutusa lelei le aoaoina o tamaiti i vaega ia. Pei na pau lava si tuualalo i lau Afioga i le Minisita mo Aoga, ina ia matua uunai le Matagaluega aua le faataatiaga o ni metotia ma ni alafua ina ia mafai ai ona ausia lenei faamoemoe. Ia amata mai lava i le Pre School e tau i aoga maualuluga a le Malo. Sa ou manatu lava faapea, pe a ae faalaugatasia i lea taimi ma lea taimi pei se audit check se Pepa Sueda National mai level eseese ina ia mafai ai ona iloilo lelei ai e le Matagaluega o Aoga po o oo lelei le kilivaina o le Curriculum i totonu o level eseese o aoga i tua, ma aoga i Upolu nei. Ma o se outcome foi o se National Exam e fai, e mafai foi ona iloilo ma le capacity o faiaoga o lo o aoaoina tamaiti i nuu i tua aemaise a nuu ia o Savaii ma nuu i tua. E leai se mea o i ai i aoga o lo o i Apia nei, ona o lea o lo o i luga lava o le laina, e pei o nuu i tua lava lea e faaletonu. Ma o le miti la lena o lea ua tulituliloa ai se lagona, ina ia mafai, ina ia oo lelei le kiliva lea i aoga ia i tua.

Lau Afioga i le Minisita mo le Soifua Maloloina, o le matou falemai lea i Safotu, ia o le tele lava o vaiaso e leai se fomai. Ae o le talosaga lava lea, ou te talitonu ua faataatitia ia le fale fou o le a mafai ai ona maua se fesoasoani i le vaega lea.

O lena na ona ou toe faamauina, o se lagona lea i se fomai lea mo le matou falemai lea i Safotu, ona o i e agai mai ai lou itumalo lea amata mai i Aopo seia oo mai i le itumalo o si ou tama lea o Faasootauloa i Saleaula. Ia na pau lava na o nai lagona o lo o i ai i lou itumalo i lenei itula, ia ae ou te matua ou momoli atu le faafetai i lau Afioga i le Minisita o Tupe, e matua lagolagoina atoa e lou nei sui le tatou Tala Faatatu

o le Tupe ua folasia. Ae ou te talitonu ma le atoatoa o le tofa saili na iloiloina ai le Tala Faatatau o le Tupe lea, ia na to mai lagi. Ma o le lagona foi lena o lo o i ai, leai foi la ma se manatu, ona ou te talitonu atoatoa, ia o le folasaga ua i ai le tatou Tala Faatatau o le Tupe. Ia o le tatalo, ia alofa mai le Atua ina ia ausia le faamoemoe lea, o lenei Tala Faatatau o le Tupe.

Ua uma se tautalaga a lou nei sui usufono lau Afioga i le Fofoga Fetalai, ia ae ia faamanuia mai le Atua i lau Afioga i le Fofoga Fetalai, le Afioga i le Palemia, lau Afioga i le Sui Palemia, le Minisita o le Kapeneta, o Afioga i Minisita Lagolago, ia aemaise foi le paia mauuluga o sui usufono a le Palemene o le tatou fonotaga o lenei aso. E faapea foi ona faamanuia le Atua i le tapuaiga a Samoa o lo o faafogafoga mai, aemaise O Le Ao Mamalu o le Malo ma Sui o le Fono a Sui Tofia, ma tulaga uma faapea. Ia faamanuia mai le Atua i le tatou fonotaga. Soifua.

## **22 IUNI 2016**

**Tofa LOPAOO NATANIELU MUA (Vaisigano Nu. 1):** Faafetai i lau Afioga i le Fofoga Fetalai, le mamalu o le Maota nei, faafetai mo lou avanoa e fai ai se sao o lou itumalo, aua le fono usu a Samoa. Ae ou te le i taia le tutafaitoa sa see lilia ai Saveasiuleo, pe ou te sosoli foi le faaufaifai o tapu ma sa o faatamasoaliiiga, ou te sosoli lava ma le faaeteete, ina ne'i meaane ua ula sa le fono, ona le soo lea o le tai ao, ona avea lea ma aleu ma sese o le tamaloa mai Asau.

Ae tulouna ia le faafogofoga tapuai mai a lau Afioga O Le Ao Mamalu o le Malo, lau Afioga Tui Atua Tupua Tamasese Efi faapea foi lau Masiofo, tulou o la outou Afioga i Sui o le Fono a Sui Tofia, lau Afioga Tuimalealiifano Vaaletoa Sualauvi II ma le Masiofo, lau Afioga Tuiloma Pule Lameko ma le Masiofo, faapea foi lau Afioga Le Mamea Ropati ma lau Masiofo. Faatulou atu foi i lau Afioga i le Palemia, lau Afioga Tuilaepa Sailele Malielegaoi, faapea foi lau Afioga i le Tamaitai Sui Palemia, lau Afioga Fiamme Naomi Mataafa, faatulou atu foi i le saofaiga i Minisita o le Kapeneta, faapea foi Minisita Lagolago. Ia faatulou atu foi i lau Afioga i le Fofoga Fetalai o le Maota, faapea foi le Afioga i le Sui Fofoga Fetalai o le Maota, faapea foi alii ma tamaitai faipule o le Maota o Samoa. Faapea foi ona faatulou atu i le Afioga i le Faamasino Sili ma le mamalu o le Ofisa o le Faamasinoga, faapea foi ona faatulou atu i le paia ma le mamalu i ulu ma Faauluuluga o Matagaluega a le Malo faapea foi Pisinisi Tumaoti o le tatou Malo.

E faapea foi ona ou faatulou ma faatalofa atu i lau Afioga i le Failautusi o le Fono lau Afioga Fepuleai faapea foi le mamalu o le tatou Ofisa, ae le mafai ona matou faagaloina le tapuaiga mau a le Aufaigaluega paia a le Atua o lo o faanonomanu ma faafalelemalu aua le tapuaiga o faiva o le tatou Maota nei faapea foi le tatou atunuu. O taitai ma faauluuluga o ekalesia eseese faapea foi le Aufaigaluega galulue i so o se feau, e le gata i totonu o Samoa nei ae o atunuu i fafo.

O le paia lava lea i Aiga ma Tama, o Tama foi ma Aiga, mamalu tele ia Pule ma Tumua, Itua ma Alataua, Aiga i le Tai ma le Vaa o Fonoti. Faatulou atu foi i le faafogofoga tapuai mai a o tatou uso i Sasae, le Afio o Sua ma le Vaifanua, Fofu ma Aitulagi, Saole ma Saleaamua, ma le Launiu na Saelua, ae tainane le motu sa aua le Laau na Amotasi, le Afio o Alii faapea foi le Alii o Faatui, ma le mamalu o Tootoo o Faleula, ma upu ia te oe Manuatele tulou tulou lava.

Ae le mafai lava ona faagaloina si ou itumalo o Vaisigano Nu 1. E ao lava ina ou lia faafoea le tautai ae, tatala foi le faautouto i le tulaga o le vaaloa o lo outou Sa ma Faiga, leaga o la outou tofa ma la outou faautaga, ua ou pale ma seei ai i le nofoa o le ta itumalo. Ua susu ma ee ai aiga, le paia i Aiga ma Salafai, o Aiga o Tupu, o Aiga o Nofo, Aiga o Papa, Aiga o Falefa, Aiga o Samoeleoi, o le Aiga Salilomaiava, o le na toala fanau fai, faaautamaina e Tuiatua ma Tuihana. O lea e faatuloua atu ai i le paia o Aiga o Mavaega i le susu o lau Susuga Tufuga ma le paia o le Aiga, Afio o lau Afioga Matua ia Masoe ma le toalua i ai. Faapea foi le afio o lau afioga i le Maopu lau Afioga Tupua. Alaalatai le mamalu ia Salafai faaituala lua i le Falefia ma Siu o le Fanua faapea foi lo ouluga sa tautai lua Fao ma Mua tainane le mamalu o faletua ma tausii saoa ma tamaitai malosiaga ia uamaga ma ava a aumaga, tupulaga o tama ma teine aemaise fanau o le itumalo.

E faapea foi ona matou faatulou atu ia Tapaau ma le gafa, i le afio o lau Afioga Toomata, Susu lau Susuga i le Gafa, lau Susuga Vaepule, afio lau Afioga i le Aloalii lau Afioga Vaai, mamalu mai ouluga Tama Taulauniu ma Tuiasau, malii mai foi oe Sa Oloapu ma upu ia oe Safune. Faatulou atu i lau Afioga ia Lealiifano Valevale faapea Tapumanaiia ma le afio o le Toalima ma upu ia te oe Safune. O paia ma mamalu

na o le tatou itumalo. Ia ee laia i o outou fala le gae, mapu ane i fala matu ma fai malie le filiga ma le mataigatila, ae se i ou taumafai e faaleo sou finagalo ma faufau se manatu aua se manuia alu i luma o le ta itumalo e toomaga i ai nei, taeao ma iēluā.

Lau Afioga i le Fofoga Fetalai, e fia momoli atu le faafetai i lau Afioga i le Minisita o Tupe ona o le folasaga matagofie o le Tala o le Tupe ua faapea ona tuuina mai i le Maota. Ae muamua ona ou fia tautala atu ma le ava ma le agaga faaaloalo e tusa ai ma mataupu e faapea ona moomia mo lou nei itumalo.

E muamua ona ou amata atu i lau Afioga i le Minisita mo Aoga, Taaloga ma Aganuu aua se ... O lo o i ai se manatu faapea, o le mamao o lou itumalo mai Apia, e i ai le upu faa-Peretania foi lele, out of sight out of mind. Ua avea le mamao ma mea ua faafaigofie ai ona faagalo i manatu o Matagaluega ae peitai i lou tulai mai ma ou faafeiloai atu i le Matagaluega faapea lau Afioga i le Minisita ua tau i ai se suiga. O lea e momoli atu ai le agaga faafetai. E i ai vaega o le tulaga faale-aoaoga o lo o manaomia ma fautuaina ai le mamalu o lenei Maota ona a tatou vaai aemaise lou lava itumalo. Ou te talanoa mo le Kolisi i Asau, o le 80% o faiaoga o Diploma Graduate ae na o le 20%, Batchelor graduates 20% na o le 4 faiaoga. E le na ma se laina, a faapea e fia silasila i ai i aoga lea i Upolu nei, e mautinoa e toatele atu le tatou au graduates po o tagata ua iu mai i faailoga mauualuluga nai lo nai fanau ia fai Diploma, ia ae o le Kolisi le mea. O lau fesili ma le faaaloalo lava i le mamalu o le Maota, o le a faapefea la ona popoto tamaiti o lenei itumalo pe afai o lea? E fia ni Inisinia, e fia Loia? E fia faitau tupe foi ia fanau a lenei itumalo. Ae peitai o le faavae e le o mafai ai e fanau o lenei itumalo ona ausia se isi matatia i luga atu o le mea o lo o mafai ona fai nei. E pei o le ala lenei na fai atu ai se faamatalaga i le amataga a mamao lava i tua, ia ua faapena foi ona galo i finagalo ma loto.

Lau Afioga i le Fofoga Fetalai e avatu ai se talosaga ma le ava tele, afai e mafai ona ave le formation level e fai i totonu o Kolisi, atonu e mafai ai ona avatu ma isi faiaoga lelei ave ai i tua ma le tele o tamaiti ia e o atu i le NUS aua fai mai le Pule o le NUS e \$15,000 le tupe e faatupe ai le tamaititi toatasi e faatino ai ana aoga i totonu o le NUS. Ia atonu e i ai foi sina auala e mafai ona fesoasoani ai ia ma avatu ai ni faiaoga lelei ma tele ai ni tamaiti o le a feololo lo latou taumafai e ausia ai le o i luga e faiaoga. O le mea moni lau Afioga, o le level lea enter mai ai tamaiti e omai i le aoga faafaiaoga, o se mea i lalo o le 10 agai i le 20 le faatulagaina o maka.

O le foundation lea e pasi i le 15, pe a, o lona uiga la o tamaiti ia e i lalo ifo o tamaiti na lea lau mai i le tatou aoga. E le faapea e talitua pe upu leagaina le taumafai o fanau o la foi e i ai Iunivesite ua mafai ona tuutuu atu iai i luga lo latou taumafai e fai se isi mea. Ae talosaga atu ma le ava tele e naunau tele le sui usufono i le lelei o le itumalo, aua o le tali o le tatou faafitauli tau tupe o le atamamai o tatou fanau ma le lumanai o tatou fanau. Ae afai la e le o faia se auala e lava tapena ai a tatou fanau mo le lumanai ou te manatu lau Afioga o le a faapea ona faaletonu, tailo i isi itumalo a o lou itumalo.

Ia ona ou oo mai lea i le Matagaluega o le Soifua Maloloina, faafetai i lau Afioga mo le lipoti, a o nai mea e aafia ai le matou itumalo o le vaitaimi lea na sioki ai vai. Ia e le gata i lenei, o le leai o se foma Doctor e fia alu atu e nofo i Savaii, ua uma le vaitaimi lea sa i ai Salausa. Na iu mai lava Salausa i ana aoga faafomai alu atu nofo i Sataua, 'ai ai lava e namu, ma tauanau atu e nisi o falemai e toe foi mai le Afioga Salausa ae lelei tele lenei vaitaimi. Sa lelei foi le togafitiga ma le vaavaaia o si o matou itumalo, ia ae ona la o le taimi lenei ua le toe i ai ni foma o toe fia o atu e nonofo i o. Pe le tatau ona toe silasila le Matagaluega pe le fai ni fale mananaia e o atu foma e nonofo ai, ina ia mafai ai ona faafiafia le loto. O lea foi ua i ai aoga a le faatuatua i o pe a faapea e iai ni fanau e popole iai ne'i te'i ua leai ni avanoa e aoaoina ai, ae se i vagana public school ia o lo o i ai nai ogaoga e moomia le toe faaleleia, ia o le talosaga atu lenei.

O le Pepa a le Palemene 2016/2017 Nu. 2 faasamoa itulau e 326, o lo o i ai ni fuainumera e faapopoleina ai lenei tagata. O le aofaiga o le talavai i le tausaga lea na proposed ai e 356,400, a o le aofaiga na ausia e 397,980. O le aofaiga o lo o fuafuaina e 377,190, ua ala ona ou taua lea tulaga lau Afioga, ona e toe tupu foi le mea lea na tupu i le tausaga na tea atu nei ua le lava tatou vai. Ae na sili ona aafia lou itumalo, na ou tauanauina ia le Afioga i le Minisita faapea foi le Matagaluega i nai vai e avatu i lou itumalo. Afai na ova i luga le talavai na fai nai lo o le fuafuaga a o lea foi ua toe fuafua atu e le ova ma le mea sa i ai i le tausaga na tea atu nei, e i ai lou lagona e toe tupu foi. E feololo nei i Upolu la iai fale talavai a o Savaii e tasi a le fale talavai na o le falemai. O le mea lea e talosaga ai i lau Afioga, pe mafai ona toe silasila ane, e tele lava isi mea e fia talanoa ai ma auiliili le Tala o le Tupe ae peitai ane lau Afioga, e utiuti le taimi. Na ona

faapuupuu atu o sou manatu e uiga i se auaunaga a le Soifua Maloloina, pe mafai ona toe silasila ane i le tulaga lea.

Ia ona ou oo mai ai lea i le Ofisa o Galuega Tetele a le Malo, lau Afioga i le Minisita e auala atu i lau Afioga i le Fofoga Fetalai, o le uafu i Asau ua leva ona taatia lenei aseta aupito sili ona taua. Na faimalaga atu foi nai aufaipisinisi e fia taula o latou vaafagota i le matou uafu, ia ae peitai ane e i ai le faafitauli e leai se vai. Lau Afioga i le Fofoga Fetalai e i ai auala e maua ai le vai ae le o lava le sailiga. O Asau e vai spring water uma lava lalo o Asau i le mea la e i ai, o lona uiga e iai le mea la e ala ai ona mafua le i ai o le mea lea.

Lau Afioga i le Fofoga Fetalai e avatu le talosaga a lenei nuu ma lenei itumalo, alofa se i toe sailiili ane ma se i toe sailiili ifo o lo o tele vai la e fau i Asau ae pau a le mea manaomia tonu le mea o lo o tu ai le tube lea tatau ona fai ai. Ae ua manaomia nai a matou auala galue e fia fai, silasila lau Afioga o le matou itumalo e tele ai le koko o lo o tele le demand o le koko i lenei vaitaimi. E talosaga atu i lau Afioga, aua le faataina na o le fai lava o le auala foi lele e alu i gauta tau i uta i le mea lea e i ai le Tuasivi, ae tuu pea faitalia matou ma teuteu. Ia ae talosaga atu tai ono masina ma avatu se grader ma se lola e tau omiomi ai le auala se i tulou le aoauli. E tau omiomi ai i lalo i lea taimi ma lea taimi, ae a faapea lava e le o faia e matou le tausiga ia aua le toe faia ae faamolemole aua le faataina leaga e tele le tau o le galuega pe a faata.

Lau Afioga i le Fofoga Fetalai ona ou oo mai ai lea i le Ofisa o Faatoaga, tele ia o le poloketi lea sa faatino i lalo o le SACEP, a o le koko o lo o manaomia e le tele o lou itumalo. E pei ona e silafia e i ai le koko lea e ave e Wildercon i le latou faigapaaga ma le Tofa Saleimoa Vaai e le gata i lea o le Afioga i le Aloalii. O faatoaga koko tetele ia ae o le lipoti lata mai e le o lava tele le tou fesoasoani. E i ai foi nisi o le matou nuu na oka ia koko i le tausaga lea na tea atu nei ia Mati, o lenei lava ua Iuni e le i avatua se mea uma atu le paleni. O lona uiga lau Afioga a faapea e tiai uma isi mea mo le itu Asau ae avatu na o le koko ma le talo, o le tali tele lea i faafitauli o le Afioga i le Minisita o Tupe e tele le sao o le tatou Ofisa o Faatoaga, tele le sao o tatou faatoaga. A o lou manatu e le o lava le tatou aufaigaluega, afai e tausaga atoa o faatali ia koko e nisi o faifaatoaga o lona uiga e le o lelei le tatou tali atu ma le faatinoga o le tatou poloketi lea fia miliona lea e alu ai. E manaia le taatiaga o le poloketi lea i ai, but e le o lelei le faatinoga o le tatou galuega lau Afioga, a ou nanaina, e leai se tatou mea e maua. O lea ou te tilotilo atu i le Tala o le Tupe a le tatou Minisita o Tupe o le tatou deficit e \$78miliona lea nono mai le \$98miliona e tau poupuu atu ai le tatou Paketi o lenei tausaga. Ae ana faapea e tali mai le tatou Ofisa i tatou Faatoaga e tele le fesoasoani mo le Afioga i le Minisita o Tupe faapea foi le tatou Malo i le faatinoina o le tatou atinae.

Ona i ai lea o si avanoa lenei e fia faaleo ai lau faafetai i le Pulega a le Women in Business, o lo o matauina le tele foi o le sao o lea auaunaga tumaoti i le tatou galuega faatino o lo o latou export ina le Virgin Oil ma latou export ina le koko, e tele a latou galuega lea fai. A fai atu foi a e aumai le kofe i le masina fou, e o lava aumai. O lona uiga lau Afioga i le Fofoga Fetalai ma le mamalu o le Maota nei, ou te le iloa pe i ai se tatou fesoasoani i nei ituaiga Faalapotopotoga. Ae o lou manatu na o au e tatau lava ona i ai se isi \$2miliona a le Ofisa o Faatoaga e ave i ai atonu e sili atu ona lelei le auaunaga a lea vaega ina ia mafai ona faaoga tatou laueleele, aua o le mea lea ua fai mai nei o le a aumai Saina e faasino mai ia tatou le galueaiina o le tatou laueleele.

O lea lava tatou te iloa fai e iloa lelei lava e le itu Asau fai le koko, a o lo o manaomia lava le fesoasoani a le Matagaluega. A le o lona foi o nai tagata ia pei ona ou taua atu suafa o nai tamalii, toe ave i ai ni tupe e toe faatetele ai toga koko, aua o lona tou te iloa tagata nei. Fai mai Vaai i aso ia ou te manatua pea le upu a Vaai o tupe la e maua i lalo o le koko, lalo o fai ma lalo o niu. E moni, e moni le tala lona ae o lo o manaomia le lagolagosua a le tatou Matagaluega ina ia mafai ona lelei le faasologa o le tatou atina'e faafaatoaga e fesoasoani ai i le Tala o le tatou Tupe lea e manaomia le \$98miliona. O lea e ala ai ona maua mai le \$74miliona e maua ai tupe faaalu i tupe maua lea manaomia ai le nonogatupe lea e \$98miliona. O lau fesili atu foi la i lau Afioga i le Minisita o Tupe, po o fea le mea lona e aumai ai lea nonogatupe mama le tului, ae pe fia foi le tului, aua na ona faapena mai ia ae fiu lava e sue atu i totonu o le auiliiliga o le Tala o le Tupe e le o i ai ni mea faapena, o lona uiga o lo o i ai nisi.

Ae ui o lea lau Afioga i le Fofoga Fetalai, ona tatou oo mai ai lea i le Ofisa o Faiga Palota, leaga o le finagalo lenei o le finagalo o lou itumalo pau lava lenei o le nuu pule o Salafai, e leai so latou tofi. na o Asau. Ua faatiga taliga foi le Afioga i le Aloalii fai mai aveese le sui o Asau ma le itumalo, na o ona tuu



atu tafatafa o lau Afioga, silasila ane i ai, po o le a se finagalo o i ai, ae pei e manaia foi pe a tasi le sui o le itumalo o Asau. Ia fai le sui o Vaisala ma Auala pe a finagalo i ai lau Afioga i le Palemia ma le mamalu o lenei Maota. Ua faaiuiu atu le matou manatu na ona ou toe seu tasi atu lava i le Taulaga i Asau, lau Afioga i le Palemia le Taitai o le Malo, e auala atu le matou talosaga i lau Afioga i le Fofoga Fetalai, pe a faapea e lelava ia tatou seleni o se tuualalo atu pe le faa privatise lena port ae aumai se tagata e fesoasoani i ai te i ua pala le uafu, se i tulou le tatou Maota, e le i toe tuta ai se vaa karasini po o se vaa suauu. Ae o lo o i ai le Kamupani o lo o fia o atu e fia faaoga le matou uafu, ia ae paga lea e noatia ia o matou apaau i le pulega a le malo. Ae le o faapea o fai atu e aumai i le matou nuu le pulega e leai, atonu o lau Afioga e silafia mea uma ma tagata uma e o mai i lou Ofisa e fia fai ni mea faapea atonu o lo o i ai se isi e fia develop ina le uafu ona fai lea i ai se tulaga a la ua i ai customers already. O le isi e 30 lona fuavaa e fia omai i Asau. Ou te mautinoa o lena e silafia e lau Afioga ia ae se i e silasila ane i ai aua e aoga i le matou tamaoiga o si o matou itumalo. O le mea lea e ala ai ona ou tetele atu ma augani atu faatoaga, aua na o le pau lena o tupe i le taimi nei, ae manaomia lava se galuega tele mai i lo outou mamalu i le ofisa o Faatoaga ina ia faaleleia le tamaoiga o le matou itumalo ma faaleleia le faatoaga o mea na ua i o, o la ua matou galulue, uiga, o eleele la ua i ai ma ua galulue ai i le taimi nei.

Lau Afioga i le Minisita mo Galuega, ua faigata a le o i uta i auala. O Vaisala, o Auala ma Asau, aua le faataina ae na ona fai a faalelei, build le auala ia na ona faaoga lava o le base course ia, aua le faataina pau a le mea ia mafai ona o i uta taavale mananaia a nai o matou itumalo ina ua sui le itu e feoi ai. Ia faafaigofie ai foi galuega ma mea faapena o le matou itumalo. E tele a manatu, e tele a manao, ae e umi foi le tatou mafutaga i lenei 5 tausaga, ae na ona ou faapea atu, o nai nisi na o matou manaoga, tuulafoai atu tuu atu i outou luma, le mamalu o lenei Palemene lau Afioga i le Fofoga Fetalai, auala atu ai i lau Afioga i le Palemia, le Afioga i le Sui Palemia. Lena ua i lau Afioga foi i le Sui Palemia le talosaga mo le taligalu ona ua afaina tele se tasi o matou afioaga, ia agalelei ma alofa ane se i e silasila ane i le talosaga i lau Afioga faapea foi le Ofisa o Tupe Maua ma tatou Tourism. Ua fai sina concern o nisi o matou, o le fautuaga na aumai isi ou itumalo, pe a pe a maketi ese Savaii, maketi ese Upolu. Ona o le upu foi lele na ou taua muamua i luma o le tatou talanoaga sa fai, ua tele laau o le togavao ua le mafai ona iloa atu laau o le vao. We can't see the trees through the forest. Ia pei a fai faatasi Upolu ma Savaii, ia ae i ai le molimau faapea ai ana maketi na o Savaii, faapena foi le toatele o tagata e fia o atu i lo tatou motu o Savaii.

Lau Afioga i le Fofoga Fetalai, ia alofa mai, le Atua faapea ona fesoasoani i taualumaga o le tatou fonotaga faatoa amata, alofagia e le Atua lau Afioga i le Palemia, le Taitai o le Malo, lau Afioga i le Tamaitai Sui Palemia, le mamalu o le Aiga Kapeneta, faapea foi Minisita Lagologo o le tatou Maota, ia faapena foi le tatou itu nei na saunoa mai le Palemia, o tatou o le Itu Agai. Ia manuia le tatou fono, manuia foi le faafofogaaga i lau Afioga i le Ao o le Malo, lau Afioga Tui Atua Tupua Tamasese Efi ma le masiofo, le saofaiga o le Fono a Sui Tofia, ia i le mamalu i le Faamasino Sili ma le Ofisa o Faamasinoga, ia faapea foi tatou Ekalesia ma Faauluuluga o Ekalesia ma le afaigaluega Paia a le Atua o lo o faafogafoga mai i lenei aso, ia faapea foi le tatou atunuu atoa, ia aemaise si ou itumalo o Vaisigano Nu 1 mai Asau i Vaisala alofagia e le Atua lou tapuai faafetai.

## **22 IUNI 2016**

**Afioga FAALOGO IOSEFA SOPI (Siumu):** E momoli le faafetai i lau Afioga i le Fofoga Fetalai mo le avanoa ua tuuina mai. Ia e manatu o le a le toe ta i tua se faamatalaga, ae o le a faaoga lenei avanoa faaauuro i lenei taimi, e avatu ai se manatu o le sui mai lenei itumalo.

Ia e muamua ona faatalofa atu i Lana Afioga Mamalu O Le Ao o le Malo ma lau Masiofo, o le Vaa Nofoa Tolu, Sui o le Fono a Sui Tofia, lau Afioga i le Palemia ma le Kapeneta, le Faamasino Sili ma le Aiga o Faamasinoga, le Fofoga Fetalai ma sui usufono mamalu uma o le Palemene.

E faatalofa atu foi i Taitai o ekalesia kerisiano uma i totonu o Samoa, o lo o faafogafoga mai. e faatalofa atu foi i Faauluuluga o Matagaluega ma Faalapopotoga a le Malo, faapea foi Pisinisi ma Kamupani eseese o lo o faigaluega i le Malo. Ia o le paia lava lea i Aiga ma a latou Tama, o Tama ma Aiga, le Usoga ia Tumua ma Pule, Itua ma Alataua, Aiga i le Tai ma le Vaa o Fonoti. Ia o tatou uso i le Motu i Sasae, le afio o lau Afioga i le Kovana ma lau Masiofo, le Kovana Lutena, le Fofoga Fetalai, ma sui usufono mamalu uma o Maota e lua, nuunuu atu ia outou paia ma sa ma faiga.

Lau Afioga i le Fofoga Fetalai, avea ia lenei taimi se i ou oo atu ai isi ou itumalo e pele ia te au, mai Siufaga seia paia Faletele amata mai Mauga tetele seia oo i maugaiti, i le susu o Faafeagaiga, o lo o nonomanu aua se manuia o si ou itumalo. O le paia lava lea ia Sa Asomua ma Aiga, Tuuu ma lo outou Aiga Sa Tuuu, le falelua o Tulafale ia Mano ma Faoagali, Lio o oe o le fofoga o le Alataua Utai Leuo ma le Faletolu. Ia e muamua ona momoli atu lau faafetai tele, i lou itumalo i le matupalapala ua outou tuuina mai i lou nei sui usufono. Faafetai i le manatu mai, faafetai i le faaeaea, ia tuu mai lo outou faatuatuaga i lenei lima tausaga, o le a taumafai la outou sui usufono i le mea e gata mai ai le taumafai.

Lau Afioga i le Taitai o le Malo, faafetai i galuega sa fai i le lima tausaga ua tuanai atu. Malo le faatoatoa, malo le galue, alo ane laia mo le isi lima tausaga, o lo o lumanai nei.

Lau Afioga i le Fofoga Fetalai, ia se i oo atu se faamatalaga i aiga Minisita o le Kapeneta. E muamua se faamatalaga i le Afioga i le Minisita o Tupe, e lagolagoina e lou nei sui usufono le Tala o le Tupe ua i lumamea nei. Ae maimau e pe ana tele ni a tatou tupe, semanu e le tau fai atu ni lauga. Ia ae e i ai foi le isi upu fai mai, a e iloa le mea e fai ae le faia, o le agasala lea. Ia o lea o le a taumafai atu ni manaoga, ia ma ni mea o fia faaleleia isi ou itumalo.

Lau Afioga i le Minisita mo Galuega, Felauaiga ma Atinae Eseeese, ia o lena ua tuuina atu le talosaga a lenei itumalo i se tusi ua oo atu i lau Afioga a Siumu, ae tau ina ou toe oo i ai i galuega ia, i auala i totonu o si ou nuu, i public roads ia e taua i le tusi, ou te iloa ua lua tausaga e le i toe oo atu i ai se vaega toe teuteu po o le maintenance. Ia e faapena foi ia auala galue i lenei nuu, tasi le auala galue na faia i le lima tausaga ua tuanai atu. E talosagaina foi le auala sima lea e latalata i le faleaoga ua tele ina faaleagaina ai meatotino a le Aoga pe a oo i le taimi e sua ai lea vai. E faapena le auala e tuafale cross island road a uma ane le lima tausaga ua faaleleia ia o auala e aoga mo turisi ma e malaga mai fafo. O le isi talosaga o moli auala atonu pau lea o le pito e le o i ai ni moli masalo pe na o le fa ni moli o lo o ola i le taimi nei. Na ona tuu atu i autafa o lau Afioga mo ni nai moli e ola i lenei vaitaimi.

Lau Afioga i le Minisita mo le Soifua Maloloina, faafetai o lea ua maua tala o le a le toe avea ni gasegase i fafo o le a taumafai e fai togafitiga iinei i Samoa ia atonu o le a sefe ai tupe ia ma maua ai foi le poto masani o susuga i Fomai o le tatou atunuu.

Lau Afioga i le Minisita mo Faatoaga, Faalapotopotoga o Suesuega Faasaienisi ma Faigafaiva, e talosaga atu se mea toso vaa po o se ramp talu ona faia le taligalu i gataifale ua le o toe mafai ona tosoina i luga vaafagota o lenei nuu. Mo le silafia tasi lenei itumalo o lo o tautuaina le atunuu i vaafagota. Se i tagai ane foi lau Afioga i le faaaogaina lea eleele aua ua tele nuu ma alaalfaga pei ua faaoga autafa o maota ma laoa e fai ai faatoaga ae ua faatuatunai le toe agai i uta. Pe le o auala galue ea le mafuaaga ua ala ai ona le oo tagata i uta e faaoga fanua ma gaioi.

Lau Afioga i le Minisita mo Aoga ma Taaloga ma Aganuu, e faamoemoe o oe le isi tagata sa e taalo i le Manu Samoa se i taumafai a'e le tatou au ua tauau ina se'ese'e malie atu i tua. Ua tauau ina le toe mafaia e tatou ia Fiti, ia ae tatou talia le taaloga ma Tonga i le Aso Toonai nei. E talosaga foi le malae o si ou aoga i Palalaua pe mafai ona toe tagai i ai na o le level lava le mea e manaomia i le taimi nei. Ia ou te iloa na o le pau na o nai talosaga o lo o fia molimoli atu i lenei itula, o nai motugaafa na, o nai talotalo foi na sei iai foi se isi taimi o se isi fono ia ona tuuina atu lea o nisi manatu.

Lau Afioga i le Fofoga Fetalai ia faatasi le Atua ma le Fono mamalu a Samoa, a i ai se pati ua sala e matua atu i ina, manuia le tapuaiga a Samoa manuia le Fono, faafetai.

## **22 IUNI 2016**

**Tofa NONU LOSE NIUMATA (Safata Sasae):** Lau Afioga i le Fofoga Fetalai ma le mamalu o sui usufono o le Palemene o la'u lauga muamua lenei i le Maota. O le a faapitoa se manatu i le agaga faafetai i lenei Maota i le tapuaiga a Samoa aemaise o lou itumalo Safata Sasae. Ou te faatulou atu foi i le tapuaiga a le Afioga O Le Ao o le Malo faapea foi le tapuaiga i le mamalu o Sui o le Fono a Sui Tofia, tulou le afio o lau Afioga i le Palemia faapea le mamalu o le Palemene.

Ou te faatulou atu foi i le afio o lau Afioga i le Fofoga Fetalai ma sui usufono mamalu o le Palemene, ou te faatulou atu foi i le tapuaiga a le Afioga i le Faamasino Sili ma le mamalu o le Faamasinoga, o paia na o le ta faigamalo Samoa. Ou te faatulou atu foi i le tapuaiga a Samoa i Aiga ma latou Tama, o Tama foi ma o latou Aiga, Aiga o Nofo, Aiga o Alii, Aiga o Papa, Usoga a Tumua ma Pule, Ituau ma Alataua, Aiga i le

Tai ma le Vaa o Fonoti. Ou te faatulou atu foi i le tapuaiga a le motu i Sasae, Sua ma Vaifanua, Fofu ma Aitulagi, Ituau ma le Alataua, Saole ma Saleaamua ma le Launiu Saelua, Faatui o le Motu, Tootoo o le Faleula ma le Manuatele. Samoa, o oe lava o le aomamala, pe ou te toesea pe faaopoopo le mamalu masani o Samoa faapea sa'u tautalaga ona lape lea tulou, tulouna lava. Ae faapito se faamatalaga i lou itumalo Safata Sasae amata mai i Niualama e oo i Fatituli. Afifio le Aiga Sa Tunumafono, Faaululuga o le Aiga Sa Tunumafono, Tapaau o le Alataua, Taulauniu ma le ...Aitutagata ma le mamalu o le Alataua. E momoli atu le faafetai tele e tusa ai ma le faatuatuaga o le tatou itumalo i le tapuaiga a le aufailotu ma le paia lasilasi o e sa lagolagoina lo'u nei tagata. O le upumoni a lo'u tagata faatauvaa ma le mamalu faalupe o le Itumalo e momoli atu foi le faamalo i e sa tauva i Safata i Sasae. O upu masani e oso ae pea le la e faiaso foi le Alii.

Lau Afioga i le Fofoga Fetalai e momoli atu le faamalo ma le faafetai i lenei Tala o le Tupe. O lo o manino mai le sini autu o le Tala o le Tupe, faamalosi le faavae tapena mo taeao. O lona uiga o galuega e faatino i le taimi nei ma galuega e faaauau, o lo o manino i le oototoga o le Tala o le Tupe Maua ma Tupe Faaalu ma Nonogatupe, atinae faamuamua ma le pasene o le tamaoaiga ma ua lagolagoina e Safata Sasae le Tala o le Tupe mo le tausaga 2016/2017. lau Afioga i le Fofoga Fetalai, e iai nisi o galuega mo le matou itumalo pei o le faaleleia o faleaoga ina ia lelei le Siosiomaga mo le fanau. Mo le faatinoina o galuega o le taligalu ma le faaleleia o aualagaluega ina ia fesoasoani i le atinae o faatoaga. O lo o lelei le aualatele se i vagana e fai faalapoia le aualalaupapa i Tafitoala. Lau Afioga i le Fofoga Fetalai o lenei aso ia alofagia e le Atua le mamalu o lenei maota afua mai i lau Afioga i le Fofoga Fetalai, lau Afioga i le Palemia ma le Kapeneta aemaise sui usufono mamalu o lenei Palemene ia faatupu mai e le Atua ni o tatou manatu ia faatino o tatou tiute tusa ia ma le finagalo o le Atua aua se manuia o le tatou atunuu, soifua.

## **22 IUNI 2016**

**Afioga FAUMUINA ASI PAULI WAYNE FONG (Itumalo Tu Taulaga i Sisifo):** Faafetai atu i lau Afioga i le Fofoga Fetalai i lenei aso. E viia lava le agalelei o le Alii ua mafai ona tatou toe maua lenei mafutaga e toe amatalia ai le tatou galuega i lenei aoauli. Faafetai foi ua maua se faasiliga malosi e toe faaauau ai le tatou galuega. Ae faafetai mo le avanoa ua tuuina mai aua se sao o lenei itumalo i le fonotaga a le tatou Palemene i lenei aso.

Ae ou te le i oo atu la i le tulaga o le tatou faamoemoe, e leai se agaga o le aso o le a taumafai atu ai se vaivaiga o lenei itumalo, ae faigata ou te iloa ua tataua ona faasolo le tatou galuega, ona ou te iloa po o nei lava e uma ai tatou lauga ia faataupou.

E muai faatulou atu i le paia o le Maota Fono o Samoa i le afio o lau Afioga i le Fofoga Fetalai, le Palemia ma le auvaa o le Kapeneta faapea le mamalu i sui usufono o le Palemene o Samoa. E faatulou foi i le tapuaiga i Lana Afioga Mamalu O Le Ao o le Malo faapea le auvaa toatolu i Sui o le Fono a Sui Tofia. E faatulou foi i le Faamasino Sili ma le Ofisa o Faamasinoga. E faatulou atu foi i le Aiga Sa Levi i so o se fatafaitaulaga o lo o nonomanu aua le manuia o Samoa. E faatulou foi i le tapuaiga a Samoa aoao i le paia i Tama ma Aiga, o Aiga ma Tama, le usoga a Tumua ma Pule, Ituau ma Alataua, Aiga i le Tai ma le Vaa o Fonoti.

E faatulou atu foi i le tapuaiga i le Faigamalo a Tutuila ma Manua i le paia ia Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, Faatui o le Motu ma upu ia Manuatele.

Ou te faatulou ma ou faatalofa atu i si ou itumalo, o le Itumalo Tu Taulaga i Sisifo. Ou te manatu o le itumalo lenei ua aofia ai Samoa aoao, aua ua le po se silafia i e o lo o sailimalo i le itumalo lenei, i le Itu Taulaga i Sisifo, ua aofia uma ai Samoa atoa, ae o le a le aveesea ai paia o Faleata. Ona faatulou lea i le afifio o Tama Faleata, i le Toafa, le Pulelua ma le Faiga, le saofaiga a Atua ma le mamalu ia Faleata, tulouna lava.

E le mafai foi ona faagaloina si ou nuu pele i Vaigaga, i le susu o le Susuga i le Faafeagaiga Taulagi a lenei nuu le Susuga ia Tautua ma le Faletua, susu foi le Alo o Malietoa ma le falefia o alii, e pola puipui e Ulugia ma Ulugia.

E le mafai foi ona faagaloina si ou aiga i Laloaoa e afio ai Sooalo o le tama tau Lepea, e polapuipui e Puaalatamai ma Puaasegisegi. E le mafai foi ona faagaloina si o matou aiga i Gagaifo Lefaga, lau Susuga Sua, afifio mai Faumuina ma lau Afioga Leupepe ma le afio o le Maopu. E faatalofa atu i si ou aiga i Matanofo i Falelatai i lau Afioga i le Tuimalealiifano, le Tauso ma le tama a Tausala.

E le faagaloina foi le mamalu o le aufaipisinisi i le Itu Taulaga i Sisifo e toatele i latou o lo o aumau ma nonofo ai le mamalu o le aufaipisinisi, aemaise foi o le mamalu o le au Saina o lo o matou nonofo ai i lea itumalo. Ae o le a taumafai atu se vaivaiga a le sui usufono o lenei itumalo e uiga i le Tala Faatatau o le Tupe.

E muamua ona momoli atu le faafetai i le Susuga i le Minisita o Tupe aua foi le galuega maeaea, e ui lava ina faanoanoa i le le lava o tupe e faasoa aua le taumafai atu a itumalo taitasi, ae talitonu le agaga, o lena e i ina le tofa. O lea foi faatoa amata le tatou Paeaiga, o lea ua matou taumafai atu le toatele o i matou i mea e mananao ai, ae ou te iloa e le mafai ona lava lau faasoa. Ae faafetai tele mo lau galuega maeaea.

Lau Afioga i le Minisita mo Galuega, e talitonu lava le agaga ua toe piki lava oe ona o le ta itumalo fou lenei Itumalo Tu Taulaga, leaga o oe e te loto alofa o oe e te faamaoni, o oe e te toa. E ui lava e le lava tupe e avatu e te faasoa mai ai galuega, ae talitonu le agaga o lena e ia te oe le tomai. E le te i te i foi tuu atu oe e le ta itumalo, ona o le taua i le afioga i le Palemia o le Itumalo Taulaga lenei ta te tautua mai ai. O lea la se i e toe tagai ifo lava i le Itumalo Tu Taulaga i Sisifo ma le faamoemoega o i ai.

Mo le silafia, o le a ou amata mai Moamoa; e silafia e lau Afioga ua leva foi tausaga o e tautua ai, ua aumai nai tagata mai Apia ave i Moamoa ae leai ni auala, leai ni paipa, ae pei uma lava o le Tulafono e tataua ona fai muamua mea ia ona faatoa ave loa lea o tagata e nonofo ai. O lea la e talosaga atu ai i lau Afioga, ou te iloa lava o lo o lava le faasoa i ina, ina ia e taumafai se i alofa ifo lava i le itulagi lea. E le o lelei ni auala, e le i i ai foi ni paipa, o lo o nonofo foi i latou i le itu lea, ae o lo o i ai foi le aoga fesoasoani a le Ekalesia Katoliko. Ua maitauina a louloua le aso, e nonofo ai lava i Moamoa, aua a pa le vai, ia o le auala laupapa ua leva ona i ai ae le mafai ona sao ai se isi. E taatia atu i ina i lau Afioga.

Sa i ai le manatu i le Tala Faaopoopo o le Tupe aua le Matagaluega lea sa faia le tatou aualatele lea i Faleata, e amata mai Malifa e tau i Saina, e momoli atu le fafetai tele i le Malo mo lea fuafuaga, o lea ua latalata faaii le galuega, ae se paga, ua fai afaafa a tatou galuega, ona e i ai isi nuu ma afioaga sa aafia meatotino, ae ua leai se seleni.

O lea sa i ai le agaga faapea ai e tuu ifo sina mea faaopoopo i ai i ina aua le faaumaina o galuega o lo o totoe, lea e aofia ai si o matou nuu o Vaigaga i lona pa ua faifai ua le uma. O lea e taatia atu i ina i lau Afioga foi aua se taumafaiga o le tulaga lea.

O le a ou oo mai i le Minisita mo Aoga, lau Afioga i le Minisita, leaga e faigata o lau Afioga o le Toetaufanua, o le toa, o oe o le toa manumanu o le tatou atunuu, o lea ua e pale mai. O oe lava le isi tofiga aupito sili ona sao lea e i ai i totonu o le tatou Palemene nei, ae faafetai atu lava i lau Afioga ua e toe tulai mai. Se i toe tagai ifo lava faamolemole i faamanuiaga ia e maua e aoga tulaga lua, ua taofiofi le tatou seleni, ae ua le iloa e Komiti po o le a le mea o le a faatino ai le galuega. Ua tele ina taofiofi e le mafai ona faatino le galuega po o le grant lea ua aumai aua le faatinoina o galuega. Ia, o lo o taumafai foi Komiti o Aoga aua faleaoga fai, ae toe tatalo atu lava i lau Afioga, se i toe tagai ane lava i le grant, pe leai lava sina suiga laitiiti aua mea fai a le Komiti. Ua tele ina saisai vae ma lima se i tulou, ua le mafai ai ona faatino le galuega. O lea foi e alaala mai le sui usufono mo Faleata Sisifo ua leva foi ona galue ae o le a ou avatua pea si mataupu lea. O lo o i ai lava le fanua i Vaitele e leai lava se mea o tu ai, na o vao ua atoa le 20 tausaga o tu ai. E tatalo atu i lau Afioga po o le a sou finagalo, tuu i ai se faleaoga e faaoga i ai, aua a ola le tamaitiiti, poto lona mafaufau i lo le ola o le vao e leai lava se tatou mea e maua ai. O lea e tatalo atu i lau Afioga, se i e toe tagai ane lava, a lava le faasoa, po o lea tausaga fou, a ia uma lau Paeaiga ua tu se faleaoga, o le afaaigoa foi i lau Afioga pe a oo i le taimi e tu ai.

Ona ou oo mai lea i lau Afioga i le Minisita mo le Soifua Maloloina, o lau Afioga lava e ola ai Samoa, o lau Afioga foi e feoti ai Samoa. Ae talitonu le agaga, o lena ua e tulai mai, o le faalua lenei ona e tulai mai, ua matua e iloa lava le faafitauli o lo o feagai nei ma le Matagaluega o le Soifua Maloloina. E tatalo atu i lau Afioga i le vaegatupe lea ua tuu atu aua gasegase e ave i fafo, pe le tilotilo i insure a le aufaigaluega ina ia mafai ona alu lava le tagata ia e fai se galuega mo ia ae le i oo i le taimi e gasegase ai. E mafai lava foi si tamai mea laitiiti e totogi e tagata faigaluega, faatoa ifo e le Malo ina ia maua ai le puipuiga ia aua ne i taofia ai le alu o le tagata e vaai le fomai i le tulaga lea. A maua e insure lea, ou te talitonu o le a tele lava lona faamamaavega i gasegase foi e ave i fafo, ae taatia atu i lau Afioga aua lea faamoemoe.

Ona ou oo mai lea i Tina ma Tamaitai, i lau Afioga i le Tamaitai Minisita, o oe lava o le pae ma le auli, e tele faafitauli o nuu ma alaafaga o lo o autovaa atu i lau Afioga aua foi nuu ma o latou faamoemoe. Ou te

talitonu o le a auli ma lelei ia fuafuaga aua o lea faatoa oo atu lea o se tina i totonu o le Matagaluega lea. O lea la e faafetai ai foi le tofiga ua mafai ona maua mo lau Afioga.

Lau Afioga i le Minisita mo Leoleo, ou te iloa e te le o moe, ae tele ina momoe le aufaigaluega. Ua matua mafatia lava si o matou itumalo i le tele o pagota e omai tua, ae faafetai i fuafuaga a le Malo o le a ave i Tanumalala o le a maua ai se mapu o i matou nei i pagota o lo o sosola mai tua.

E talitonu le agaga e au atu foi au i se isi manatu sa i ai a 200 pagota, 200 foi leoleo ina ia mafai ona maua ai se faamamaavega i le mamalu o le atunuu.

E momoli tele atu le faafetai i le Ofisa ma le Komesina o Leoleo, manaia le galuega taumafai o lo o ua maua ai nei se saogalemu e i tatou mai vailaau faasaina po o latou foi o lo o umia e oo foi i laau malolosi e faasaina, o lea ua i ai le suiga tele. Faafetai i lau Afioga mo le galuega maeaea. Ia, e tatalo atu foi i le Minisita mo Tagata Tafafao Maimoa Mai, a i ai foi se fesoasoani, ia fesoasoani atu i lou uso a Minisita aua foi le taumafaiga foi o le falepuipui aua o lo o i ai le tomai faapitua i lau Afioga.

I lou uso le Minisita mo Faatoaga, e leai lava ni mea tele o lenei itumalo, leaga e leai ni fanua e galulue ai, ae a i ai ni nai polokalame laiti se i tulou, e fai ni a latou pa e fai ai se latou tauvaga i tua lava o fale o i matou o lo o nonofo i Itumalo Tu Taulaga, manaia lena. Ae faafetai foi mo le toe tofia o lau Afioga i le tulaga lea.

Mo nisi ou uso a Minisita, faafetai lava mo le galuega maeaea, o lea e le i ai ni lape o outou leaga o lea faatoa outou tulai mai, ae talitonu lava e gasolo le tatou galuega ma maua atu lava i se taimi. O lea e momoli tele atu le faafetai i lenei aso.

Faafetai tele i le Afioga i le Palemia ona o lona faatoatoa i le tulaga o tofiga a le tatou Malo o lea foi ua matou faatoatoa atu ai ma matou i lenei pito. Faafetai mo le avanoa ua tuuina mai. Ae toe momoli atu lava le faafetai ia i latou sa matou tausinio i le faiga palota, e le mafai lava ona faagaloina outou, ae faafetai mo le lagolago mai, ua maua se avanoa e oo mai ai aua le taumafaiga o le Palemene o Samoa.

Ia, o se manatu lea, ia maua lava e lau Afioga i le Fofoga Fetalai le malosi o le tino aemaise le agaga ma le mafaufau aua le faafoeina o lenei Palemene. Faamalo foi i sui usufono taitasi uma o le Palemene i le latou taumafai mai, ae ia manuia lava fuafuaga o lo o totoe o lenei aso ma le faasologa o Fonotaga a le Palemene. Faafetai lava.

## **22 IUNI 2016**

**Afioga TOOMATA AKI TUIPEA (Salega Sisifo):** Faafetai i lau Afioga mo le avanoa ua maua e le sui usufono o lenei itumalo aua se manatu e uiga i le Tala o le Tupe ua i luma o le Laulau a Fono, le Tala Faatatau o le Tupe 2016/2017. A o le i faia se manatu e uiga i lenei Tala Faatatau o le Tupe, e muamua lava ona ou faatulou, tulou, tulou lava. E ao foi ona ou faatalofa i le tafatolu o Pulega a le Malo i Lana Afioga Mamalu O Le Ao o le Malo o Samoa, lau Afioga Tui Atua Tupua Tamasese Efi ma le Masiofo. Afifio Sui o le Fono a Sui Tofia i la outou seetolu, lau Afioga i le Tuiaana Tuimalealiifano Vaaletoa ma lau Masiofo, lau Afioga Tuiloma Pule Lameko ma lau Masiofo, lau Afioga Le Mamea Tuiletufuga Ropati ma le Masiofo, aemaise lau Afioga i le Palemia ma lou auvaa.

Afio le Faamasino Sili ma le Ofisa o Faamasinoga, afio sui usufono mamalu o le Palemene o Samoa, Faauluuluga o Matagaluega ma Faalapotopotoga a le Malo, aemaise o Faauluuluga o Kamupani Tumaoti o lo o fesoasoani tele i le atiaeina o le Malo o Samoa.

Ou te faatalofa atu ma faatulou atu i le paia o Malo mai fafo o lo o i ai o latou sui e faipaaga ma si o tatou atunuu aua le lima mafola i le fesoasoani mai i le atiaeina o le tamaoaiga o Samoa. E le faagaloina foi le tapuaiga a si o tatou atunuu i motu uma o Samoa, Manono ma Apolima ma Salafai, aemaise Upolu nei. O le paia lava lea i le usoga a Pule ma Tumua, Ituaui ma Alataua, Aiga i le Tai ma le Vaa o Fonoti, Tama ma Aiga, Aiga ma Tama. Ae le faagaloina foi le faalogo taputapu mai a o tatou Malo o uso o Faigamalo a Tutuila ma Manua, afio le Kovana Sili ma le Lutena Kovana, afifio o sui usufono mamalu o Maota e Lua. Le paia lava lea ia Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, Tama a le Manuatele, Tootoo o le Faleula ma le Laau na Amotasi.

Ou te fia faatalofa afoi i lou i lou itumalo na mafua ai ona ou tulai i totonu o lenei Maota, Salega Sisifo mai Fagafau, Samataitai ma Samataiuta, Fogatuli ma Faiaai. Le paia lava lea i le afio o Fualau ma Aiga, afifio o Tilafono ma le Faavaoga, afifio Gisa ma Fepuleai, ae tainane lau fetalai Tuisalega, o oe e te

teuvaatele i lo tatou itumalo. Afio Afualo ma le Toafa o ou Alo, lau Fetalaiga Faimanu o le fofoga o Usoalii. Afifio Alo o Lilomaiava, Seve ma Tilimafaga, Afio Tuimaugapo ma le Aiga Sa Tuimaugapo, ae polapui e le falefa o Sa Soa ma Sa Mai.

E faatalofa atu foi i lou nuu pele o Samataitai ma Samataiuta, afio lau Afioga i le Sao Toomata, afifio le toafa ma le toatolu o Alii, ae polapui e le mamlau ia Saleutogipoe o le limamatua i le faleupolu o tofiga. Faafetai i la outou puleto ma la outou faaaloalo ua mafai ai ona logona se leo o le auauna faatauvaa i totonu o le Maota o Samoa. Faafetai tele, faafetai, faafetai. Ae tapuai maia se i fai se manatu o le ta itumalo e uiga i le Tala o le Tupe ua iloiloinei nei e lana Palemene.

O le a leai sau faamatalaga tele i le tulaga o le Tala o le Tupe ona o lo o i ai le Taitaifono o le matou Komiti e faaleoina i se taimi le Lipoti a la matou Komiti, ae muamua ona ou faapea atu, lau Afioga i le Minisita o Tupe, faafetai faatoatoa, faafetai i Faauluuluga o Matagaluega, o i latou sa latou tapena lenei Tala o le Tupe.

E le faigofie, aua e leai ni a tatou tupe tele e maua i totonu o Samoa, e utiuti lau faasoa, e fai o le manao, a o le fesili, o fea e aumai ai tupe e faatino ai le manao? E le lava lo tatou tamaoaiga i totonu o le tatou atunuu, faatusatusa i isi atunuu o lo o i ai o latou tamaoaiga e tele, o alagatupe e auala mai ai fesoasoani, a o tatou, e tagiilima, e taumafai, e aisi i fafo e nono tupe ona mafai lea ona faatino o tatou manaoga.

Lau Afioga i le Minisita o Tupe, o oe o le lauia, ua e fagota i le sami loloto faava o Malo, ua lava lou silafia, ua lava lou iloa e te saili mai ai tupe e atiae ai le atunuu. E ui lava o lo o tau faasoasoa lau faasoa i lenei tausaga, a o lena tausaga, alo e fai ou faiva, faaoga i ai lou tomai, saili mai ni tupe e aumai ni fesoasoani ina ia sasaa mai i lo tatou atunuu, ona tuu lea o le 50pasene i Upolu nei, ae ave ave le isi 50 pasene e atiae ai si o tatou motu i Savaii. Ou te faapea atu, e le tele ni talosaga a lenei itumalo, ae i ai nai talosaga ogaoga e taua e tatau ona ou faaleo.

O le talosaga muamua, o lena ua i lau Afioga i le Minisita o Galuega ma Atinae Eeseese talosaga a lenei itumalo ma ona auala galue, mai lava i Fagafau, Samataitai ma Samataiuta, Fogatuli ma Faiaai. Ua maua le tala ua foi mai lau asiasiga. Ou te talosaga atu, e moomia lo tatou o faatasi e faasino atu tulaga o lo o pagatia ai nai o matou nuu. O lo o i ai fesoasoani a le Malo i auala galue, ae o le faafitauli o lo o i ai e le gafatia e nai o matou nuu ona teu ma faaleleia, ae o lo o i ai le manulauti a le HRPP, o mea e lelei ma matagofie mo Upolu nei, e fapena foi ona matagofie ma lelei mo Savaii. O le a le mea e le faata ai auala o si o matou itumalo? O i ina e ola lelei ai le niu, ola lelei le koko, ola lelei le talo, ma so o se mea, ona mafai lea ona lelei le atinae, aua o lo o fia galulue tagata, ae ua le tutusa generation i aso ia ma aso nei. Ua mananao ina ia alu le taavale i uta, o lo o i ai taavale, a o le faalavelave seiloga o le four wheel drive faatoa sao i uta i le aega. E moomia la le faaleleia ma faata e sao ai so o se taavale.

O le isi talosaga faamolemole, o le Matagaluega a le Soifua Maloloina, atonu ua faaleo atu e nisi o sui usufono o itumalo i tua faaletonu o lo o i ai falemai. O le faaletonu muamua isi o matou falemai, e leai ni fualaau i le tele o taimi. E tele foi ina tuufua falemai e leai se fomai faapitoa. Ua maua tala ua i ai le fomai ma lona faletua mai fafo, ae talitonu e le tumau lea fuafuaga. E tatau ai i le Matagaluega ona silasila totoa i ni auala e faatosina ai e ua maua le poto faapitoa i le faafomai ina ia mafai ona nonofo i Salafai, ua lelei aoga e aoga ai a latou fanau, ae manaomia sina two faaopopo i o latou totogi e faatumau ai ona nonofo lea i tua i falemai.

E le gata foi i lea, o le tele o nai tagata o si o matou itumalo, a omai e leai ni vai i Foalalo, ona omai lea i pasi e o i Tuasivi, e mamao. E oo mai isi gasegase ua maliluu i le ala. Ou te faamanatu atu, o le auala lea i le va o Taga ma Gataivai, sa taua i aso ia o le auala o le mativa. Ae afai ae maliluu soo nisi o le matou itumalo ona o le mamao o Tuasivi, ua tatau ona faaigoa o le ala o le oti.

O le mea lea ou te talosga atu ai ma le agaga faaaloalo, se i silasila totoa i lea itu. E faatauaina foi le soifua maloloina o nai tagata o si o matou itumalo ma le motu uma i Savaii.

O le isi talosaga faamolemole, o le talosaga i le Afioga i le Palemia, e i ai le taimi e auina atu ai faamanuiaga mo latou aiga, ua maua i faamatalaga e tau talosga ma fai le pepa e talosaga ai. Aisea le mea e le tuuina atu ai foi e faasafua, faasolo i nuu ina ia tofufufusia nuu uma ma ia faamanuiaga. Lau Afioga, e momoli atu lau faafetai tele e fai ma leo o le matou itumalo i lau Afioga i le Palemia ma le Kapeneta ma le Malo i tausaga ua mavae seia oo mai i lenei taimi, i le tauveina ma le faafoeina o le tatou Malo, e talitonu e le faigofie ae a ou toe tepa i tua i tausaga e tele ua mavae, ua tele suiga i le vaiga e le gata ia i tatou o i Samoa nei ae faapea foi tagata mai fafo. Sa fesiligia nisi o lo o faimalaga mai fafo pe fiafia i Salafai, o le

latou tali, “E fiafia tele i Salafai i lo Upolu nei.” O lea e talosagaina ai le Malo se i silasila totoia i le atiaaina o le tamaoiga mo tagata tafafao mai fafo i le motu tele i Salafai, e i le tatou Tala o le Tupe. Lau Afioga, ou te le vivii atu, ou te le selu atu, ae ua tele suiga o le tatou atunuu i le Paeaiga a lau Faigamalo. Ia fesoasoani atu ia maua pea le lototele maua le malosi i le tino ma le mafaufau e faaaaupegaina ai oe e le Atua aemaise o le Sui Palemia ma lau Kapeneta aua le taitaiga o Samoa i lenei lima tausaga.

Ou te faapea atu ai, ia manuia lau Afioga i le Fofoga Fetalai faapea sui usufono mamalu uma o le Maota, soifua.

## **22 IUNI 2016**

**Afioga LEANA RONNIE POSINI (Safata Sisifo):** Lau Afioga i le Fofoga Fetalai, ou te muai faatulou ma ou lalagi sugalu e momoli ai fe’etaga o tupu. Ou te eli foi le tofau le anaia e tele o le laga ai fetu’e o manaia. Ae o le mavaega foi na i utu o Manua, a tagutugutu le ala, aua nei fata laoloina. Ou te taliulu foi i le fofoga ulaula o Sina Fatulua i lona vailia, ae popo’e ne i see lilia lo ta faailo nai le faaseega.

Ae ou te faatulou atu i le tapuaiga a Lana Afioga Mamalu O Le Ao o le Malo o Samoa, lau Afioga Tui Atua Tupua Tamasese ma lau Masiofo. Afifio o Sui o le Fono a Sui Tofia, Tuimalealiifano Vaaletoa Sualauvi II ma lau Masiofo, lau Tofa Tuiloma Lameko ma lau Masiofo, lau Afioga Le Mamea Ropati ma lau Masiofo. Ua sausaufialele foi le manu na gase i uamanu, ina ua musa lagona faagaetia i le afio o lau Afioga i le Palemia, lau Susuga Tuilaepa Fatialofa Auelua Lupesoliai Lolofietele Neioti Aiono Galumalemana Dr. Sailele Malielegaoi, o le Palemia. O oe o le siapo na lautele i Atua. Afio i lau Afioga i le Sui Palemia, lau Afioga Fiamē Naomi Mataafa, o le Sa’o Faapito. Afifio i a outou Afioga i Alii ma Tamaitai Minisita o le Kapeneta. Le afio i lau Afioga i le Faamasino Sili, lau Afioga Patu Tiavaasue Falefatu Sapolu ma le mamalu o le Faamasinoga. :Le afio i lau Afioga i le Fofoga Fetalai, papaaao alii ma tamaitai faipule, o sui usufono mamalu na filifilia mai i itumalo taitasi i le Fonousu a le Malo Tutoatasi o Samoa, o le Fono Faitulafono po o le Palemene.

E le vaea le fala ooto, e le faagaloina le tapuaiga a Samoa o le atunuu tofi ua uma ona tafaitoto, mai paega mauululuga seia paia toafa tagutugutu o le loloto o ou vaof ilifili faapea ou vaosa ma ou vaofeai. I le afifio o Tama ma o latou Aiga, o Aiga foi ma latou Tama, le usoga a Tumua ma Pule, Ituau ma Alataua, Aiga i le Tai ma le Vaa o Fonoti. E taliu foi ae popoe i le tapuaiga a Taitai o Ekalesia i le aufaigaluega tofoti a le Atua, i so o se fata faitaulaga, faanono manu i le Atua o le Silisili ese, aua se manuia o Samoa. Lea ua liu tino la outou tatalo sa fauao faupo, malo fai o le faiva.

Lea e saasaa foi tua le ava a Faleata, aua le tapuaiga o tatou uso i Sasae i le po o le fala ma ula le mulila, lau tapuaiga o ou faiva peau talaloa i le afio i lau Afioga i le Kovana Sili ma le Faigamalo, o paia lava lea aua Sua ma le Vaifanua, Fofu ma Itulagi, Saole ma Saleaumua le Launiu na Saelua ma Tama a le Manuatele. Ona ou faasee lea i Muliava, se i faalanu vai o Nofoa, aua le tapuaiga mamalu ma le leoleoa a lo’u itumalo pele o Safata i Sisifo. E ui ina vaeluaina lo ta itumalo e ala i le filifiliina o ni sui usufono taitasi o Safata i Sasae ma Safata i Sisifo i le Palemene, ae le mafai ona aveeseina ai mamalu o le ta itumalo, leaga o Safata o le Aiga Malosi. I le afifio o le Falefa o le Uluga Tanifa, ma lo latou Faaululuga, mamalu ia Taulauniu ma le Aitu Tagata ma le mamalu i le Le Alataua ma le Nofo a Tula ia Safata.

Ae faapitoaugafa sou leo i Safata Sisifo e amata mai Vaiee, Niusuatia, Lotofaga, Sataoa ma Saanapu. I le afifio o Satunumafono, le afifio o Tama a le Fale Teo ma Tuia, Afio le Matua, Susu Usoalii, Alalatai Safuiane ma Faleata ma Gataiala ma lau Fetalai Lutuimagamau.

Le Afio i lau Afioga i le Sao Faapito, lau Afioga Leituala, susu Manua susu Usoalii ma le Vaigafa. Lau Fetalai Tupai o le Tootoo o le Manino ma le Aava, eetai tau i upu o Lealataua ma Tapaau le fano.

Afio lau Afioga Afoa ma Ama, afifio Pule ma Maugagaoa, lau Fetalai Saseve o le Igoamatua, ma le nofo a fanau, ma le mamalu o le Faletolu. Afifio Taoga ma Afemata, afifio Seiuli, le Taasoa ma le Maopu, lau Fetalai Faleafulugogo ma le Igoamatua, ma le mamalu i le Faletolu.

Afio lau Afioga Anapu o le Sao, afifio o le Toalima o Alii, afio le Maopu o le Tuiaana, lau Fetalai Tuigaleava o le Igoamatua, o le Nofo a Ituaiga ma Aiga e lua ma le mamalu o le Faletolu.

E le mafai ona faagaloina Susuga i Faafeagaiga, ma o latou faletua o lo o falefaalemalu i lo tatou itumalo. O lo o outou faia le faiva o le tatalo, ina ia manuia lo ta itumalo, o so’u foi faatauvaa e faaleo ai se finagalo o le ta itumalo. O mamalu na o lo o ta sapi ai, i upufai o Malo.

Lau Afioga i le Fofoga Fetalai, ma le mamalu o le Maota, e faaleo le agaga faafetai tele i lau Afioga i le Minisita o Tupe i le Tala o le Tupe ua folasia nei i le Palemene. E momoli le faafetai tele i le Ofisa o Tupe ma le mamalu o le afaigaluega mo le tapenaina o le Tala o le Tupe. Ae fia faaleo nisi o mea e fia faaleleia o lou itumalo.

Lau Afioga i le Minisita mo Aoga, malo le galulue mo le atinaeina o tulaga o aoga aua o lea e ave i ai la tatou faamuamua, aua a manuia alo ma fanau o se atunuu manuia lea. Lau Afioga o le aoga o le matou itumalo, ua agai atu i le 500 tamaiti aoga o lo o i ai, o se fuainumera ua vave ona faatupulaia, e maitau atu ma sailiili atu, e na o le 10 faiaoga o lo o i ai. O lon uiga e foliga mai i le aofai o faiaoga o lo o i ai, a faatusatusa atu i isi aoga i le taulaga, e le i atoa se 500 a ua ou maitau atu toeitiiti 40 faiaoga lea e i ai. E talitonu foi la le manatu, o le faasoasoa tutusa o faiaoga, aua o i tonu foi e faaitiitia ai le agai mai o alo ma fanau o le matou itumalo i totonu o le taulaga. O lea e tatalo atu ai i lau Afioga i le Minisita i lo matou kolisi lea, ia se i alofagia ifo ni faiaoga o le itumalo.

O aoga tulagalua ia o le matou itumalo falelua i Vaiee ma Nuusuatia, o le aoga i Lotofaga ma le Aoga i Sataoa o le aoga i Saanapu, o aoga ia e le o atoa faiaoga, e tai toa ono faiaoga mai totonu o aoga ia. E talitonu foi o le taua lea o le matou maitau ai, ona e taitoatasi faiaoga i le lua vasega o lo o i ai. E talitonu o le faleaoga e momoli atu le faamalo i lau Afioga, ua i ai le tele o le suiga o le tulaga o faleaoga, a o nai faiaoga, o lo o manaomia ai le faaleleina o faiaoga, aua e talitonu, a lava a tatou faiaoga, ia o le manuia foi lea o alo ma fanau o le tatou atunuu.

Lau Afioga i le Minisita o Galuega, e momoli atu le agaga faafetai tele i galuega tetele i lau afioga foi, i le tele o manaoga o le tatou Malo, e faatutu atu i lau Afioga, o auala ia o le matou nuu i Sataoa, o auala ia i le agai i tai ma le agai i uta. A silasila lau Afioga pe afai ua oo atu i ai lau Afioga toeitiiti a le sao ai se taavale i le agai lea i uta. O le auala lea o le tele o le matou nuu o Sataoa e nonofo ai ma affio ai. O le auala foi lea o lea e agai ai i uta i auala galue, e talitonu lau afioga e tuu atu i ou autafa, aua lau faasoa i auala ia o si o matou nuu i Sataoa.

E faapea foi si o matou nuu i Vaiee, le auala galue lea e agai i Vaiee, e talitonu a o auala ia e manaomia le faaleleia aua foi le mamalu o le atunuu o lo o agai i faatoaga, e tua i ai o tatou aiga.

O le isi lau Afioga i le Fofoga Fetalai, i le auala lea e agai i tai i Sataoa, e i ai le vaitafe lea e i ai i ina i le auala laupapa lea e i ina, ona o le suiga o le tau ua matou maitauina ai, ua pa atu nei le vai vae atu le paia o le Palemene, ona alu atu lea o le vai ua ova i luga o le auala. Ua agai atu le vai i tai i le aai, tele aiga ua afaina ai, talu ai suiga o le tau. Ia, tuu atu i lau Afioga i se suiga e toe sui ai le alalaupapa lea, mo le faasaoina lava o nai aiga ona o le tele o aiga ua aafia i le vai lea.

Lau Afioga i le Minisita mo Galuega, Felauaiga ma Atinae Eeseese maitau foi le auala lea i le alu i Saanaputai, le auala lea e faatino ai nei le ata tifaga. Ua tolu nei ata tifaga ua faatino i tai i Saanaputai, le auala lea e alu atu i Saanapu. Ae pei o le tasi lea o faafitauli e feagai ma kamupani mai fafo o le taumafai e faalaulelei le auala lea. Lau Afioga i le Minisita, ia tuu atu i ou autafa, ia e aoga foi le faaleleia o le auala lea e le gata o le matou nuu i le agai lea i tai, ia aua foi le faamoemoe mo mea nei o turisi e faatosina mai ai foi turisi aua le atinae o si o tatou Malo.

O nai moli auala i ina i le matou nuu i Vaiee, ia faapea foi le aoga lea a le kolisi a lo matou itumalo, e pogisa, ae manaomia ni nai moli e faamalamalama ai le kolisi lea, aua le faasaoina o latou meatotino a le kolisi ma le aoga a lo matou itumalo.

Lau Afioga i le Minisita o le Soifua Maloloina, faafetai tele i lau Afioga, i le tulaga lena ua agai ai le falemai i Saanapu. E momoli atu ai le agaga faafetai tele i lau Afioga. Matou te talitonu, o le vaai foi lea i le agai mai Apia ma le tatou falemai lea ma mataitu le tatou falemai, ua matua tumu lava. O lea e tatalo atu ai i lau Afioga i le Minisita, o se falemai, ou te iloa o i o le a sulufai atu i ai Safata ma Lefaga pe a mautu le falemai lea. Ae faafetai atu i lau Afioga, taatia atu i ou autafa, ia mo le toe faaleleia o le falemai lea i lo matou nuu i Saanapu.

Lau Afioga i le Sui Palemia, lau Afioga i le Minisita mo le Siosiomaga, o le matou nuu lea i Sataoa o la ua i ai le taligalu la ua i ai, ae ou te talitonu e le o faasaoina lo matou nuu. Tasi lea nuu tele o le matou itumalo, e manaomia le toe faauma o le taligalu o lo o i ai nei i tai i Sataoa. E tele se vaega e le i uma ona fai ai le taligalu, ia se i alofa ifo lau Afioga i le Minisita ia faapea foi Saanapu. O lo o i ai foi se vaega e toe faaauau i ai le taligalu.



Lau Afioga i le Fofoga Fetalai ma le mamalu o le Maota, o nai manatu i auaunaga lautele, aua le manuia lautele o si o tatou atunuu. Lau Afioga i le Minisita o Aoga, e taua tele i manatu le tulaga i aoaoga aemaise a le vaega lea o le aoga tulagalua. I lau maitau i aoga tulagalua i lo matou itumalo faapea foi nisi o aoga na asiasi i ai, o lau maitau i ai, o le tulaga i mea o lipoti ia e aumai e tamaiti ia e fai, fai mai e aumai i faiaoga.

Na ona faapea atu o le fautuaga i lau Afioga ma le Minisita mo Aoga i le tulaga lea i le faiga o lipoti aemaise lava vasega ia o le tulagalua, aua ou te maitau, pe fai e le Ofisa o Aoga ia ni lipoti e laugatasia uma ai ia Aoga ia Tulagalua. Ia ae vaai foi i ripoti, pei a e i ai mataupu ia e pei o le English, o le numera, pei na ona tau sao mai lava o le maka lea e i ai. Ia ae ua tatou oo i le vaitau lenei o le Igilisi ma le Numera, faamanino lelei le Vaega o le numera ma le Igilisi o la e vaivai ai le tamaititi ona maua ai lea o ona maka. Aua e pei e tau tuu saoloto ai faapea fai mai a o le numera e faaletonu. O le isi mea e tau maitau, ia aemaise a ia Aoga ia Tulagalua, aua a ou vaai atu nei i le Tausaga Muamua, Tausaga Lua ma le Tausaga Tolu, e tasi a le faiaoga e faia mataupu ia e fitu. E leai se Vaega foi lea, tatou fai piliota, aua e tasi a le faiaoga na te aveina le Tausaga Muamua, pule ia ma lona taimi e faavasega ai ana mataupu. Ae afai e faavasega foi lea i le tulaga e auai i ai faiaoga, e faapitoa le faiaoga Igilisi, faapitoa le faiaoga o le Numera, o i ina foi e iloa ai le faasoasoatau o taimi o le faiaoga e aoaoina ai tamaiti. Atonu o le mea foi lea e sau ai le isi tamaititi lelei na o le Samoa ae oti uma isi mataupu. Ae taua i lou manatu ona o i le e i ai le faavae o tatou tamaiti aoga. A lelei ona faavae ia le tulaga o aoga tulagalua, o le alu atu lava lea i le Kolisi, leaga sa ou galue i le Iunivesite, o lea ou te maua atu i le Tausaga 13 lea e agai atu, o le matuai maualalalo lava o le tulaga i le aoaoina lea e i ai, ona faitio foi lea i le isi taimi i le tatou Iunivesite, i le lelele o tatou tamaiti na aoaoina, ia ae peitai na amata mai lalo o le vaega lea o le tulagalua.

O le isi mea e fia oo i ai se tautalaga lau Afioga i le Fofoga Fetalai, i le tulaga i le mea lea o le aiatatau a fanau. Lau Afioga e le iloa po o le tasi lea o mea o lea e afaina ai le tulaga o fanau aoga ia i le mea lea e i ai nei. O le maitau atu e latalata i le 30 tausaga talu ai, e matautia le tulaga lelei o amio faaaloalo o a tatou fanau. Ae o le aiatatau lea ua oo mai, o le tele ia o le suiga o uiga o alo ma fanau o lo o faaali i totonu o aoaoga aemaise lava le aoga a le Iunivesite. O le mea la lea lau Afioga, afai e le talafeagai le mea lea o le aiatatau, ia o le a le mea e le aveese ai le aiatatau. Tatou faaaoaga le upu, faataua a tatou fanau, ae o le aiatatau foi lea, ua tatou vaai ai i le tele o misa i aoaoga lea o fai nei.

Lau Afioga ona oo mai lea o se tala i le Iunivesite o Samoa. Faafetai tele i lau Afioga ona o le tuufaatasiga o le aoga a le Iunivesite ma le aoga a le Matata Eseese, lea ua maitau nei ua 10 nei tausaga o faatino le faamoemoe lea. E momoli ai le agaga faafetai i Taitai o le Malo na latou faatinoina le faamoemoe lea. Ae ou te talitonu foi e tuu atu i lau Afioga lea ua atoa le 10 tausaga pe le toe i ai se komiti e toe iloilo ina le tuufaatasiga lea, pe le toe i ai se isi suiga i le tulaga o le nainautiga o le taofi ina ia ave le tatou faamuamua i alo ma fanau ia lelei a tatou aoga. E fua foi i le aoga a Ausetalia lea e taua nei o le APTC. O le aoga lea a le APTC, o le aoga a Matata Eseese mai Ausetalia, lea e vaavaalua i totonu o le tatou atunuu. E talitonu foi i ina i Ausetalia ma Niu Sila e tumaoti lava aoga ia.

O le mea foi lea ua tatou vaavaai ai i le Aoga lea a le Matata Eseese a Ausetalia ua aumai i inei, ona e tumaoti na ia mai le Iunivesite. Ou te talitonu la i le tulaga o le tuufaatasiga, ia faafetai i lea tuufaatasiga ua 10 tausaga ae le toe tagatagai ifo lau Afioga i le Minisita i lea tuufaatasiga, o le naunautiga ia lelei alo ma fanau, aemaise lava le Matata Eseese o le aoga lea tatou te tua i ai, e aotauina ai tatou fanau aua agavaa faapitoa, aua le tele o galuega aua ou te talitonu a lelei foi le tatou aoga lea, ia ua le toe aumaia foi ni konekarate mai fafo e faatino a tatou galuega lea lava ua maua i totonu o le tatou atunuu alo ma fanau e faatino ai ia agavaa eseese ia.

Ou te faafetai foi i le Vaega o Tusipasi Taualoa, aua e maitau i le tausaga ua mavae atu nei, e maua le 300,000.00 o le tupe na aumai i le Faalapotopotoga lea o Tusipasi Taualoa, avatu i le Iunivesite e fesoasoani ma faatino ai galuega tau Matata Eseese, ina ia faaleleia ai pea tulaga ia. O lea e momoli ai le agaga faafetai tele i le Vaega lea o Tusipasi Taualoa, ou te faafetai foi ona ua faatu e lo tatou Malo le Faalapotopotoga lea, ina ia ausia ai e aoaoga uma a Samoa le agavaa maualuga ina ia aloaia ai tatou Tusipasi aua le feagai ai ma Niu Sila ma Ausetalia. A feoi foi lo tatou atunuu i alo ma fanau, e sue gofie galuega i atunuu mamao.

Lau Afioga i le Fofoga Fetalai, lau Afioga i le Sui Palemia, lau Afioga Fiame, e faaauau se manatu i le tulaga tau lisi o fanua lea e saini e lo outou Matagaluega le feagaiga lea. E talitonu foi o lea ua aafia ai nisi nuu o lenei itumalo, i sainiga o feagaiga ia, ona e tau maitau atu, aemaise a ia fanua ia e tu lalata i sami e

fiafia i ai tagata tafafao maimoa mai, e i ai fanua e sainsiina e le Matagaluega ona sainsi lea o le Feagaiga lea, ae tapa mai e le Ofisa o Turisi o le a le mea ua sainsi ai le feagaiga lea ma le Kamupani lea ae o le Kamupani lea e tataua ona aumai muamua e saili e latou po o i ai ni a latou tupe ae mulimuli ane ua uma ona sainsi le feagaigae le Siosiomaga ia ua leai la se mea e toe mafai i ai. O lea la e tau fai i ai... O lou la talitonuga, e a pe a aafia ai ma le Matagaluega o Tagata Tafafao Maimoa Mai. A o ni feagaiga o ni fanua tau Samoa ia, tataua ona aafia ai le Matagaluega o Turisi e suesue lelei, ia kamupani ia mai fafo e faatu o latou faletalimalo. Po o ni kamupani e tele ni a latou tupe. E talosagaina foi lauAfioga i le tulaga tau oneone. O leni foi nuu ma leni foi itumalo e tele foi ina faatagaina le lauina o le oneone, ia se i alofa ifo e fua i ai le pemitā mo le faatagaina o le lauina o le oneone.

Lau Afioga i le Minisita o Faamasinoga, faafetai tele i galuega fai a le Faamasinoga. Lau Afioga e maitau i totonu o le Faamasinoga aemaise a i faamasinoga tau apili ia e fai nei, masalo o le tele o tausaga o taliga le tatou faamasinoga o le apili. Pe leai se isi faiga a lau Afioga ma le mamalu o le Matagaluega e tau faavavevave ai tatou faamasinoga apili ia. Tau maitau foi i lau Afioga, ia e i ai foi isi taimi e taliga ai iuga o faamasinoga e i ai faamasinoga ua maitauina ua ova ma le tai tausaga o taliga o latou faaiuga, ia ua avea foi ma mea ua taliga ai fuafuaga a aiga i o latou faamoemoe e le gata i matai, ia a o fanua foi.

Lau Afioga i le Minisita mo Galuega, Felauaiga ma Atinae Esee, faafetai tele mo galuega tetele ia o tatou auala. O le matou auala lea i Saanapu lau Afioga, e i ai mea ia e faata foi lele e pei e faata motumotu foi lea le auala. E i ai lona aafiaga ua ou tau maitau e pei e lautele le itu lea ae pei e lauiti le isi e i ai le mea ua ou tau maitauina i le isi taimi, e pei ua tau saosaoa foi maua loa le malu lea, tau tupu ai loa faalavelave. O le faafitauli lea, tuu atu i lau Afioga e faasosoo atu loa le ta lea i le lautele ia ona manaia a lea o le feoaiga o le tatou atunuu.

O le resitala i le LTA ma le vaega lea o taavale. Ua tau maitau foi ma le totoa i totonu i le mea lea e pasi ai tatou taavale, o le tatou atunuu foi ua tele taavale. E silasila foi a tau maitau le aofai o taavale e pasi i le masina, ia ona fua lea ua amata ona tele, po ua amata ona tele. Pe leai foi se taimi e ono faamatuu ai i tua, i le pasiina o taavale, ae i ai foi ni iaiaga e tuu i tua i Kamupani ua agavaa ma talafeagai e pasi ai a tatou taavale. E le gata i lea, o meafaigaluega o lo o pasi ai tatou taavale i le LTA. E iai nisi o masini ou te iloa ua tataua ona ua toe faaopopo i ai aua le pasiaina tatou taavale. E i ai isi taimi o taavale na tau avatu o lelei taofi, ae tau patatu loa iina, ia ua tau faaletonu ai foi ma taofi o tatou taavale.

O le isi mea talu ai i lea na tupu i le ave taxi lea na taua na faia le mea valea i le tulaga o le Sisigafua lea na uma atu, lau Afioga i le Minisita, se i suesue maea ia le faiga o lipoti ia o avetaavale o lo o avea ia tatou pasese, e tauvalea ai le tatou atunuu. Ia ana fai nei foi la o se tagata tafafao maimoa mai fafo, ia ou te talitonu, lau Afioga i le Minisita o Matagaluega o Leoleo se i tagai totoa ifo lau Afioga, mo lipoti ia e aumai e le tou Matagaluega e ave e fai ai laisene avetaavale, ona faatoa fai lea o laisene o avetaavale. A o lea e maua le tama lea na faia le faaletonu lea ma le solitulafono sa i ai foi isi ana soligatulafono muamua, sa tataua lava ona aveese lona laisene ma aua nei toe avea i ai se laisene avetaavale. Ou te talitonu e aoga foi i lau Afioga i le Minisita e tuu atu i ou autafa aua o lea na maua o le avetaavale lea sa molia muamua ia a o lea lava na faataga i ai le laisene avetaavale.

Lau Afioga i le Minisita o Tupe, malo le faautiuti o le faasoosoa i le utiuti o le faasoa o le Tala o le Tupe. Faafetai tele mo le Tala o le Tupe, ae pau lava lea o lau faafesili i lau Afioga i le Minisita o Tupe, e i ai le tatou tupe faasili lena e i ai, i le Tala o le Tupe leni 2016/2017 e \$23 miliona. Faafetai tele i lau Afioga ona o lea e i ai lea faasiliga, ae sa tau i ai foi se manatu, pe le tau faaitiitia ai le tatou nonogatupe ae aua laia le faasili lea e \$23 miliona. O le agaga foi e faafetai o lea e i ai le faasili lea, pe le mafai ona fai ai se isi atinae a le tatou Malo o lo o manaomia ma ave i ai le faamuamua.

Lau Afioga i le Fofoga Fetalai, e fia faamauina le agaga faafetai i lau Afioga i le Palemia ma lau Kapeneta, faafetai mo galuega atinae lelei aua le manuia o le tatou atunuu ma e talia lelei e leni itumalo le Tala o le Tupe ua folasia nei i le Palemene. Ona faaiu atu ai lea o so matou leo, lou itumalo e, e manatua pea i lou loto le agiagi a Fonoti ia Toleafoa, e ui a ina ua le toe lagona sau tala, ae ou te tautala pea i lou suafa i aso uma.

O lau pule lea, e le palea nei lelea, e le ula foi i avea, ae o le a tusi i le papa aano o lou loto matamata tetele ai lau faaaloalo, e le mafai ona galo. O le a sou faatauvaa, ou te faamoemoe pea i le Agaga o le Atua, e nanananea ai sou vaivai faatasi ai ma la outou tapuaiga leleoa e ato ai atu i liu aua so ta sao i upufai aua

sona lumanai manuia. Ou te tatalo foi ia tumau manuia i ou aupā i lau Afioga i le Fofoga Fetalai, ia tofa i le Atua lau faatautaiga, lau Afioga i le Palemia ma lau Kapeneta, le afiō o Minisita Lagolago, ia lupeni faalupe taliaami la outou filifiliga, sagai ane ai o le tai, ia mamao la outou silasila, ia loloto la outou tofa, aua auma o tau pupue i la tatou folauga.

Le paia e o le Palemene o le Fonousu a Samoa, o tatou tauau lea ua fufusi ma lalafō mai i ai le faatuatua o Samoa, o le a se tatou maa e togi ma se aso e velo, ia fai lea ma ala e manuia ai Samoa, ae sili ai ona viia le Atua, Le o lo o faavae ai Samoa. Ia manuia tele Lana Afioga Mamalu O Le Ao o le Malo, le tapuaiga a auauna a le Atua, tainane le tapuaiga a Samoa, manuia le Palemene o Samoa. Soifua.

## **22 IUNI 2016**

**Afioga TUIFAASISINA MISA LISATI LELEISUAO PALEMENE (Palauli Sasae):** Lau afioga i le Fofoga Fetalai o le Maota, faapea Sui Usufono mamalu uma o lenei Maota, tainane Samoa faa-foga-foga mai, ou te tula'i atu ma le ava, e fai se sao o lenei Itumalo, o Palauli Sasa'e, i le Tala Faatatau Autu o le Tupe 2016/2017.

E le gata i lea, a'o le ulua'i saunoaga a Faasisina ma Sā-Lilomaiava, ma le levaleva ia Sa-Faleletaua ma Palauli na potopoto, ma Oe le Pule, mo lenei Paea'iga Lona XVI, o le Palemene o le Malo Tutoatasi o Samoa.

Paia ma Mamalu: Ona faasifo lea ma le gatete o le tauva'a, auā ua so'ua le lotolau ma lafolafō le tuua'u, ua ta'a le igafō o tanifa na i'ite i ai tautai a le Tuimanu'a. Auā paia, fa'aifogatā o lenei Maota, tainane le maualuga fa'aofogatā o Samoa, fa'afofoga tapuai mai.

Maota; A fa'asolo malie le seelili'a sā ma faigā, ona ou mua'i paia lea ole maota ma le malae, aua e ui ua malae-tauave Tiafau, ae le tu'ueseeseina ma mamalu ole Maota o Samoa. Auā le e'e papa-ao o lau Afioga i le Fofoga o le Maota o Samoa, lau Afioga ile Fofoga Fetalai. Tainane le afio o le Afioga i le Taitai o le Malo, le Afioga i le Palemia, faapea Minisita o le Kapeneta ma Minisita Lagolago.

Mamalu mai foi lena itu o le Maota, i le afiō o sui usufono mamalu o le Palemene, auā Taitaifono ma Sui Taitaifono, ma sui usufono o Komiti Faapalemene.

Susu foi lau susuga i le Failautusi ma le Sui Failautusi o le Maota ma le Aufaigaluega a le Palemene, faapea Faaluuluga, ma Sui o Matagaluga, ma Faalapotopotoga a le Malo, ma le mamalu ua tatou faatasi.

Tafatolu o Faigamalo; ona afe lea o sa matou faamatalaga, auā le taotoga-a-i'asā o le Tafatolu, o Ituaufefa'atauagai o Faigamalo. Ae a le tapuaiga a le Faamasino Sili ma le Faamasinoga, ma le potu moli i futiafu i lenei taeao, o le Pulega Faatonu ma le Palemene e tusa o ā la matafaioi u'ulima, e i ai lenei aso.

Samoa; Ona ou afea lea o le sā-elē-ma-ta'ua, auā o Samoa o le Ao e mā-i-mala, i ona lumā-fatu-toto ma ona papa-tu-loto. Ae, e leai foi se malosia a'o se faafia-atamai e fia utu-vai-tofo i ai, auā ua malu-tau-aso le Maota o Samoa.

Ua taoto-tanu le fatuloa o tofiga, ua maape foi le tafa'i-lau'o o mavaega, ae ua o tatou tausitu-faasolo foi faaaloaloga a tuaā ua tofafa i ti'asā. Ae a le afio, i fata-lele o le sā-folau o Samoa, O le Afioga O Le Ao Mamalu o le Malo o Samoa ma le Masiofo, faapea le malu-taue'e, o le sā-se'etolu o le Fono a Sui Tofia. O le paia lava lea auā Tama ma Aiga, Pule ma Tumua, Ituaufefa'atau, Aiga i le Tai ma le Vaa o Fonoti.

Tutuila ma Manua; ae manatua foi i le lotu le tapuaiga a Tutuila ma Manua, auā Sua ma le Vaifanua, Fofu ma Aitulagi, Ituaufefa'atau, Saole ma Saleaumua ma le Launiu Saelua, Faatuiolemotu, To'oto'o-o le-Faleula ma upu i le Manuatele.

Aufaigaluega Totofi a le Atua; ae le galo foi i le lotu le tapuaiga tatalo ma le faanonōgāmanū a leAufaigaluega totofi a le Atua i so'o se fatafaitaulaga i so'o se afioaga ma alaalfaga.

Faafetai mo le Faaeaea: Lau Afioga i le Fofoga Fetalai, so'o se folauga lava e taumuli i le ava, o fea e taoto ai faamoemoega ma taunuuga, ae taumulimuli talosaga ma faanonōgāmanū a le tapuaiga, ina ia taulau le faamoemoe. E mafua ai le agaga faafetai, e fia faaleoina.

Itumalo o Palauli: Si o'u itumalo pele i le lotu ma le mafaufau – o Palauli Sasae. O ai ea le tagata ma le atalii o le tagata ua outou manatu ane ai. Ae pē lā na aogā e asu so outou vaitaumafa, ae ua outou si'i lava le tagata faatauvaa, i la outou tofa faaeaea. E mafua ai ona lē mātaofiofia le puna a'e o le agaga faafetai, ona o lau pule-tō, ua malie malō, faafetai, faafetai, faafetai tele lava.

Vaitoomuli: Faafetai tapuai, faamalo tatalo i lau susuga Feleti Sefo ma le Faletua, faifeau EFKS, faapea foi le susuga Alosio ma le Faletua,- feasoasoani Katoliko, le susuga ia Pastor Pagaemaalii ma le faletua, faapea le susuga ia Tapusoa Faafia ma le faletua Epikopo i Vaitoomuli.

E faapena foi le faafetai ma le faamalo i le tapuaiga a Tapaau ma le Aloalii, ma Alo o Lilomaiava, faapea Tulafalealii, ia Fiso ma Seumanufagai ma le levaleva ia Sa-Faleletua.

Faala: Faafetai tapuai, faamalo tatalo i lau susuga Uili ma le Faletua, Faifeau EFKS, faapea le Susuga ia Ioane ma le faletua, Fesoasoani Katoliko, Faapea foi le Susuga ia Savea Levini ma le Faletua ole Epikopo i Faala.

E faapena foi le faafetai ma le faamalo i le tapuaiga a Alo o Lilomaiava, Sa Lauulu ma le Matua, faapea le Sa'o Fetalai (Lagaia) ma le Uso (Tui ma Tapusoa) ma le Tofa Manusina.

Vailoa: Faafetai tapuai, faamalo tatalo i lau susuga Siaosi Leleimalefaga ma le Faletua, o le faifeau EFKS, lau Afioga Patele Falaniko, le susuga ia Sio ma le Faletua, Tiakono Katoliko faapea lau susuga Iosua ma le Faletua, Ekalesia Assembly of God i Vailoa. E faapena foi le faafetai ma le faamalō – i le tapuaiga a Faasisina, ma le Aloalii, le Fofoga o Lilomaiava, faapea le Faleao ma Sa-Letaulua, Toluono ma le aiga a Falelima, faapea Le tapuaiga i le Nofolii, le tofa ia Savea ma Lemoa, Tui, Misa ma Ulumea, le tapuiaga i le Matua, le tofa Ma'i ma Latu, ma upu ia oe Palauli. Palauli e iloga oe i le Nofō-ā-Pule ma le va faafeagai ai ma Tumua, auā e te toala-fa'a-autama - i Tama ma Aiga uma o Samoa, ma lou gafa-na-soo ai Samoa, ma ou vaipapa na susua ma tutupu mai ai, toa o Samoa.

Faafetai faaloalo, faafetai faaeaea, faafetai faafetai tele lava. Tau ia, ia maua se malosi e tauave ai ou paia ma mamalu aua lenei faaloalo maualuga, ua ou ula ai.

Sui tauva: Ou te fia faaleoina foi le faafetai, i tuafafine ma le uso (vaeatu outou sā ma faigā) sa o matou tauva i le tofi o la tatou itumalo. O le mea moni, o Palauli o le Aiga. Faafetai taupati faatamaalii, faamalo tausiniō faa-faleupolu. Tatou, taufai tatalo, aua, e oso lava malama, e togo foi, taeao matagofie, aua e agi lau-fofola le alofa ma le agalelei o le Atua, i aso uma.

Tapuaiga a Aiga: Ona afe lea o se tala faafetai i le lotoifale o si ou aiga, e lē gata i Palauli ae faapea foi tafa e fia o Samoa, ma atunuu i fafo, faapea foi uso ma tuafafine, tausoga ma fanau, uo ma e masani, faapea foi Tamaitai Monike i Samoa ma Aukilani, Niu Sila. Faafetai alolofa, faafetai tatalo

Lau Afioga i le Fofoga Fetalai, ona ua i ai lava i le agaga faafetai, ae ou te iloa foi, o lauga faa-taupou nei a sui usufono, e toe saili mai e fai ai le molimau a le Malo pe afai e tuumalo se sui usufono. E mafua ai ona ou manatu, pe aamu mai foi nisi sui usufono, ae fai pea lau faafetai i lou toalua.

Talosaga ma le fanau, tusa pe tauemu mai isi sui usufono, ae ua faafofoga i luma o lenei Maota ma Samoa, ua ou faafetai atu ia te oe le pele ma le fanau. O le a foi le finagalo o le Atua, ae tautalaaso lenei lauga faa-taupou ile molimau a le Malo, e taulagia ai la'u faafetai ia te oe ma le fanau, aua o se miti, a'o se faanaunautaga na puna ae i lo'u loto, ae, o outou tauau ma le fanau, o lo o tausoa ai.

E le mulia'i ona tuuititia lea o le loto faafetai mo le tapuaiga a si o'u tina pele, o Faimafili Moefaauouo Leleisiua, faafetai tatalo, faamalo tapuai. E aliali lou alofa, e iloaitino foi lou agalelei. Ia, ua uma lea vaisua, o le loto faafetai ma le agaga faagaetia i si ou itumalo ma le aiga, ona o le amanaia ma le faatuatuaga ua aumai.

Ona fou lea o si ou vaa, se i faaleo manaoga o si ou itumalo, e taatia atu i tafatafa o lau Afioga i le Taitai o le Malo ma a outou Afioga i Minisita o le Kapeneta, aua lenei 5 tausaga ua savalia.

Manaoga o le itumalo: Aotelega o le Tala o le Tupe. Lau Afioga i le Fofoga Fetalai, ua manino le saunoaga a le Minisita o Tupe i le Autu o le Tala o le Tupe 2016/2017, e faapea – “*Faamalosi le Faavae ma Tāpena mo a Taeao.*”

O lea Autu, o lo o sosolo mai le Sini Autu o le Tala o le Tupe 2015/2016, e faapea – “Ia fua o tatou manao i le seleni ua tatou maua.” Lea e lalagofaatasi ma le faamamafa o le Tala o le Tupe 2016/2017, e faapea – “Toe fetuunai tupe maua ma tupe faaalu, ina ia fausia ai se faavae mautu mo le tamaoaiga mo le lumanai.”

Lau Afioga i le Fofoga Fetalai, e le tau faamalalamaina le tulaga o lo tatou tamaoaiga, e leai ni a tatou minerale ma ni oa faalenatura tatou te faamoemoe i ai, e faatau atu e maua ai ni tupe se tele, e atina'e ai si o tatou atunuu, ia pei o le tamaoaiga o isi atunuu. E mafua ai le loto faafetai, e le gata o le Autu ua tapulaaina, ina ia “faamalosi faavae tau-tamaoaiga, ma tapena mo a taeao”, ae o le faanaunautaga, ina ia mulimulitaia ma ausia le Autu ua faataoto. O le mea moni, e le gafatia e a tatou atinae o i ai nei, ona faafetai o tatou

manaoga, ae faamoemoe i le tofa potu mai le Atua, lea ua foaiina i o tatou Taitai, e faafoefoe tatau ai, o tatou manaoga, ma ave ai le faamuamua i mea e tatau ona faamuamua mai lea taimi i lea taimi.

O i tonu, lea e taoto ai se taofi o Palauli Sasae, e tuu atu i tafatafa o lau Afioga i le Taitai o le Malo ma le paia o le Kapeneta, manaoga o lenei itumalo, auā lau faasoa i lenei 5 tausaga o le Paeaiga. Ae auala atu i le Nofoa, le tuualalo a Palauli Sasae i lau Afioga i le Minisita o Tupe, e faapea, se i e tagai totoa ane i le atinaeina o le taulaga i Salelologa ina ia maua ai ni galuega mo tagata Savaii, ma le toe tau omai i Apia, ae ia nonofo pea i aiga ma afioaga i Savaii ma atinae ai laufanua mo fua o faatoaga, aua le auina atu i fafo, e maua ai seleni e tua i ai le tausiga o aiga ma tautua ai ekalesia ma nuu.

Matagaluega mo Galuega, Felauaiga ma Atinae Esee; lau Afioga i le Fofoga Fetalai, e auala atu i le Nofoa, le talosaga i le Afioga a le Minisita mo Galuega, mo auala galue o si o'u itumalo, e moomia le faaleleia;

(i) Auala Galue o Vailoa, Vaitoomuli ma Faala, e moomia le fia faaleleia, ona o lea ua toe lalaga maumaga, ma ua maua avanoa i faitotoa e aveina ai a tatou talo i fafo. Aua a lelei auala, ua faaosofia foi le fia galulue ma toaaga e fai maumaga, ma le toe-tau saili galuega solo mai i le taulaga, i Apia.

(ii) Auala i le Afu Aau; e moomia le fia faaleleia o le auala i le mataaga lea i Vailoa, mo le faafaigofie ai ona afea e tagata tafafao maimoa mai fafo, aua e maua ai seleni mo le afioaga, faapea le atina'eina o aiga taitasi.

(iii) Auala i le Galu Faasee; e moomia foi le faaleleia o le auala i le mataaga i Aganoa, Fa'ala, lea e i ai Galu Fa'ase'e, faapea foi fia-faaleleia o molī o le auala, aua le feafioa'i o tagata tafafao maimoa mai fafo ma le aufaigaluega a le faletalimalo, faapea le mamalu o le atunuu lautele.

Lau Afioga a le Fofoga Fetalai, o lau mataupu mulimuli i le Minisita mo Galuega, se i toe silasila ane i le Uafu i Vaitoomuli. Mo le silafia, e tulaga ese le Uafu sa i ai, e lē gata o le saogalemu o femalagaiga, ae mafai foi ona silasila i ai mo le atinaeina, o faiga-faiva ma tagata tafafao maimoa mai fafo.

Matagaluega o Aoga, Taaloga ma Aganuu; lau Afioga i le Fofoga Fetalai, e leai se matua Samoa e lē lagona le faanoanoa i faafitauli o lo o tulai mai i le fanau aoga, i Apia. Auā o le mea moni, e leai se matua e lē popole i sana fanau e a'afia i ni faalavelave tutupu mai. Ae, mo tatou o Ta'ita'i o si o tatou atunuu, tatou te lagona le faanoanoa, ona o ata vaaia ma le fa'aluma-lumaina o si o tatou atunuu i le silasila mai a malo ma tagata mai fafo.

Lau Afioga i le Fofoga Fetalai, e matuā lagolagoina e lou sui usufono le toe-faataatiaese o le Tulafono o lo o faasā ai, le sasa o le fanau. Aua e leai se isi o tatou e le i mao ai se matua, ma sasa e faiaoga e oo lava i faifeau. Ae, o lenei lava tatou te ola maloloina ma malolosi. E telē le fete'ena'i o a tatou talitonuga ma poloaiga faakerisiano ma a tatou tulafono fou lea e fa'asā ai ona toe sasa tamaiti.

I le Faataoto 13 - fuaiupu 24: O lo o faapea mai; "O le, ua tuuna lana sasa, ua inoino lea i lona atalii, ae o le ua alofa ia te ia, ua saili le aoaiga mo ia." O le a le aoaiga lea e talanoa mai ai le Faataoto-?? O le AOAIGA - O LE SASA.

O totonu foi o aoga, ua a'aitui tamaiti aoga, ma faatupula'ia le lē mafaufau i faiaoga, aua ua iloa lelei e faasa ona toe sasa i latou. Lau Afioga i le Minisita mo Aoga, lau Afioga i le Toetaufanua a le Malietoa, fai mai Moretekai ia Eseta; "Pe na iloa e ai, e fai oe mo aso faapenei". E ui e le o lau afioga o se Eseta, ae o le fa'ataua – na faia lau Afioga (vaeatu ou paia apoapo gata) mo aso faapenei, se i silasila totoa ane, ia uma atu lenei Paeaiga, ae ua lē toe ta'ua nei faafitauli faalumuluma Aiga, Nuu ma le Atunuu.

O le fesoasoani a Palauli Sasae – ia fa'ataga ona toe sasa le fanau aoga. Aua e 90% o tatou tagata o lo o soifua i le olaga faa-Samoa moni i afioaga i tua ma Savaii, ae o lea, ua ola le toatele o le fanau i le talutalu-fou, o faiga mai fafo, e saoloto ai i mea e fiafia i ai. O le isi fesoasoani a Palauli Sasae – ia faamalosi loa le agai tamaiti uma o itumalo taitasi i Kolisi i o latou itumalo, e taofia ai le toe omai e aoaoga i Apia. E taugofie lea mo matua, i pasese, ae sili ai, o le nofo o le tamaititi i tafatafa o le tinā ma le tamā e aoa'i ma faatonu ai, i lo le tuufau e omai i Apia, ae le iloa mai, amioga ia e fai.

Lau Afioga i le Fofoga Fetalai, ou te iloa foi o le mafuaaga lea e naunau ai matua e aumai o latou alo e aoga i Apia, ona o le talitonuga e na o Apia o lo o i ai faiaoga lelei, aemaise ai lava i mataupu Faasaienisi. O si a matou tuualalo; pe lē mafai ona toe fa'atuina se televise mo aoga a le fanau. Ou te manatua ai i aso ia, sa fai atu ai polokalame i le leitio mo tamaiti e aoao faasolosolo ai i vasega, i lea aso ma lea aso. Sa faatautaia e le susuga Meki Stewart ma si tina ia Palagi Faasau ma nisi. Ou te iloa, vagana se toaititi o lenei

Maota e le i sivasiva i pese sa usuina atu ai, ma faataitai i mataupu sa aoaoina atu ai. E faapenā le manatu lea e talanoa atu ai, e faatulaga i le televise, le aoaoina o mataupu Faasaienisi lea e tau leai ni faiaoga, ona aoaoina atu ai lea, ae aooga mai le fanau i aoga mauualuluga i afioaga i tua ma Savaii. O le vaifofo lea mo le utiuti o faiaoga Faasainesi ma o le fofu foi lea e taofiofia ai foi le fanau i aiga, nuu, ma afioaga. Ma o le a faaoga tatau ma atoa ai le National Broadband lea e i ai.

Lau Afioga i le Fofoga Fetalai, ona afe mai lea o se tala i manaoga tau aoaoga ma ta'loga o lenei itumalo: (i) Fa'alauteleina o le Malae Taalo o le Kolisi Mauualuga o Palauli ma Satupaitea ina ia tutusa ai ma malae taalo i Apia nei, aua le atinaeina o taleni taalo. (ii) Fausia o se Faletaalo Laititi (Mini Gym) – mo taaloga netipolo, volipolo ma fusuga aua o le kolisi o Palauli ua tapuvae tasi i ai taaloga a kolisi o lea itu o Salafai. (iii) Toe tatalaina o le Aoga mo fanau e i ai Manaoga Faapitoa – o le taimi nei ua leai se auunaga faapea i Salafai, ae moomia tele lenei atina'e mo lenei itumalo. (iv) Matagaluega o Faamasinoga. (v) Lau Afioga i le Fofoga Fetalai, e faaleo atu se talosaga i le Minisita mo Faamasinoga – ona ua maitauina le autovaa mai o aiga i Faamasinoga e fofoga i Apia nei, ae sa masani na suesue lava mataupu tau faamasinoga a Savaii, i Savaii. O nisi o aiga e tau saili foi ni aiga i Apia e api ai, pe a fofoga sa latou mataupu, aemaise pe a āsoa, ma, e lē taugofie.

Ae o le mataupu lava ua avea ma faafitauli, o le tolo so'o o Faamasinoga, ae ua malaga mai tagata mai fafo. Pe le i ai lava se faiga e mafai ai ona faatulaga lelei Faamasinoga e tuutiitia ai le tolopo so'o, ona e taugata foi pasese e malaga mai ai aiga, mai atunuu i fafo.

Mataupu Faapitoa: Lau Afioga i le Fofoga Fetalai, e i ai nai mataupu lautele ia ou te fia talanoa atu ai. O ni mataupu ou te iloa, e tatau ona silasila toto'a i ai lenei Maota, ona o aafiaga ma le tausiga o le filemu, faapea le atina'e o si o tatou atunuu.

Aia toatele vs Aia taitoatasi: O le mataupu lenei, na ou maitauina mai le tatou Symposium sa fai ina ua maea faatautō i tatou ma tatala lenei Paeaiaga. Atonu foi, e manatua e le toatele o sui usufono sa auai, o se mataupu sa fetuunai ai, le Afioga i le Taitai o le Malo ma le afioga i le Faamasino Sili i lana folasaga sa fai. O le tulaga na ou maitauina, pe afai e tuuina atu se mataupu i luma o le Faamasinoga. E lē mafai ona manumalo se faaiuga a Alii ma Faipule o afioaga ma alaafaga pe afai e feteenai ma se aiatatau a se tagata e toatasi, o lo o puipuia i le Faavae o Samoa. Ae o le tele o faaiuga a Alii ma Faipule, o lo o faia mo le lelei o le lautele o tagata o le afioaga. O se faaupuga lata mai – e sili le faataua a le Faavae i le aia toatasi o lo o le aia toatele. O se mataupu lava ua lu'itauina ai lo'u mafaufau, ma tuufesili – pe leai lava se auala e maua ai se avanoa e mafai ai ona tutusa le silasila a le Faamasinoga i aiā nei e 2. Ona fai lea o le faaiuga, fai fuafua i le tāua o mafuaaga o lo o faavae ai finauga. Ona o le taimi nei, e matuā leai se avanoa e mālō ai se finagalo o Alii ma Faipule pe afai e oia ai se aiatatau a se tagata e toatasi. E tai pei foi le mataupu lenei, o le fa'asā ona sasa o le fanau.

O le 90% o tatou tagata o lo o soifua i lalo o le pule faamalumu a Alii ma Faipule, ae limataitaiina le soifua, i taiala mai fafo, e faamuamua ai le tagata e toatasi, ae lolo i ai le finagalo autasi o le toatele. Ou te manatu, o a tatou faiga faatemokarasi, o lo o faavae ai o tatou Faigamalo. E amanaia aia a le toaitiiti ae faatino le finagalo o le toatele. E pei foi o lenei Maota, e ui e le o aloaia se vaega e agaia le Malo, ae le aveesea ai le amanaia o aiatatau a sui tutoatasi, ma sui usufono uma o lenei Maota. Ae a oo ina fai faaiuga o le tulaga lava, e mafuli i ai le toatele, o le faaiuga foi lena.

Ia ae lafo atu, e saga faatupu manatu, mo le agai i luma, aemaise mo le tausiga o le filemu ma le nofo lelei i totonu o afioaga, auā o le mea moni, e tuai atu Leoleo, ae o le tofā ma le faautaga a Alii ma Faipule o lo o tausii vaatele, e toafimalie ma filemu ai se nuu, ma malu ai tagata uma o le faiganuu. E mafua ai ona lagolagoina e Palauli Sasae se teuteuga o le Faavae e silasila tutusa ai le faamasinoga i aiā toatele ma aiā taito'atasi, ia fai fuafua i mafuaaga o se finauga.

Faamautuina o Samoa o se atunuu Kerisiano; ua agiga le finagalo o le Taitai o le Malo i le mataupu lenei; ma ua fagua ai foi peau o le matagi-toga i finagalo tete'e, ona o le aiatatau ma le saolotoga lava lenei taitoatasi. Lau Afioga i le Fofoga Fetalai, e i ai le upu faasamoa—"E fua le kupa i le tai kupa, e saili le u i le tologa, ae fana le manu i le au-fue-ta". O lona uiga, e fua le gaoioiga i mea e tulai mai i lea taimi i lea taimi.

Fai mai le taitaiu tautaua o Farani, o Napoleone –"A uma ona fua le fili, ona fili lea o le au, ma fua le malae." O le mea moni, e leai se mea e tupu fua, e faaosofia mafauaaga, i mea e tulai mai.

Lau Afioga i le Fofoga Fetalai, ou te talitonu, o i tonu lea e faamanatu mai ai Peteru – e faapea “ia outou mataala, ona o lē, ua fai outou mona fili, o le tiapolo lea, o lo o fealualua’i o ia, pei se Leona tagi, ua saili se tasi e aina e ia; ia outou tete’e atu ia te ia ina ua outou iloa o lo o oono lo outou au uso i le lalolagi, i ia lava mea tiga.” (1 Peteru mataupu 5- fuaiupu e 8).

Faafetai lava i lau Afioga i le Fofoga Fetalai. Ou te talitonu lava e tasi lava le taimi e taupou ai le taupou, ae o le a ou usitaia lava, e afaina loa ona le toe taupou lea. O lea ua maea atu ni nai mataupu e fai i ai le faasoa a lau Afioga i le Taitai o le Malo faapea le paia o le Kapeneta, ma le Faigamalo.

Ia, lau Afioga i le Fofoga Fetalai, maua lau tofā faale-Atua auā le fa’afocina o le Maota o Samoa. Alofagia foi le Taitai o le Malo ma le Kapeneta ma le Faigamalo, maua la outou tofa potu mai le Atua aua le faafocina o lo tatou Malo.

Ia lēna foi itu o le malu, i Taitaifono ma Sui Taitaifono ma sui usufono mamalu o Komiti Faapalemene, maua foi la outou tofā, aemaise o le malosi moomia aua galuega ua tofia ai. Ia faapea foi i Faaluuluga o Matagaluega ma Faalapotopotoga a le Malo ua tatou mafuta.

Ia faamanuia le Atua i lenei Maota faapea le tapuaiga a Samoa, mai ona ao se i oo i le fu-aga lalovaoa. Faamanuia foi i le galuega tapuai ma faanonomanu a le Aufaigaluega tofofi a le Atua.

Le tapuaiga a si ou itumalo pele o Palauli Sasae, aua Faasisina ma Sā-Lilomaiaava, ma le levaleva ia Sa-Faleletaua ma Palauli na potopoto, ma Oe le Pule. Faafetai tapuai, faafetai tatalo. Faamanuia tele le Atua i lo tatou itumalo. Foi mai sa matou tala, alofagia e le Atua le nofo tuavae o le Failautusi ma le aufaigaluega a le Palemene.

O le matou tala lea ma le ava, soifua ma ia manuia.

## **22 IUNI 2016**

**Afioga SALAUSA JOHN AH CHING** (Faleata Sasae): E tulai atu i le agaga faaaloalo tele ma le migao e tatau ai, ona o le avanoa ua tuuina mai e lau Afioga i le Fofoga Fetalai. E muamua ona ou faatulou i le tatou Tapaau Sili o i le Lagi o le faavae papa lea o le Malo o Samoa.

E faatulou i suli vaaia o le Atua ma le Aiga Sa Levi, susuga i Taitai o Ekalesia e fia i Samoa, ma le paia o le aufaigaluega o lo o aumau ma faafalelēmalo i nuu ma alaafaga e oo atu lava i tuluiga uma o Samoa. O la outou faanōnōmanu, ua liligi mai ai le alofa mutimutivale o le Atua mo Samoa ma lona Malo.

E faatulou atu i le tapuaiga mau a Lana Afioga Mamalu O Le Ao o le Malo o Samoa, lau Afioga Tui Atua Tupua Tamasese Efi ma le Masiifo. Le lagolagosua a outou Afioga i Sui o le Fono a Sui Tofia ma o outou faletua. E faatulou atu i le tafatolu o le itufono faafetauagāi o faigamalo, i le afio o lau Afioga i le Faamasino Sili ma le vasega o alii ma tamaitai Faamasino, ma le Ofisa o Faamasinoga. Lau Afioga i le Palemia ma Minisita o le Kapeneta faapea Afioga i Minisita Lagolago ma le Ofisa o le Palemia. Lau Afioga i le Fofoga Fetalai o le Maota o le Fono Aoao Faitulafono o le Malo Tutoatasi o Samoa, e afio ma alaialatai ai sui usufono o itumalo taitasi, o lupe na fā’ia mai le fuifui, mo le tapenaina o le Maota o Samoa. O le Maota e utu ai tagi o le atunuu i mafatiaga o le olaga ma le soifuaga faapea foi le Afioga i le Failautusi ma le Ofisa o le Fono Aoao.

E faatulou atu i le faafofoga tapuai mai a si o tatou atunuu pele o Samoa aoao. O paia lava e faasino i le usuga a Tumua ma Pule Ituau ma Alataua Aiga i le Tai ma le Vaa o Fonoti, Aiga ma latou Tama, o Tama foi ma o latou Aiga. Ae tainane foi le faafofoga tapuai mai o tatou uso i le motu i Gagaē i Amerika Samoa, le tafatolu o le faigamalo le paia o le falesefulu faapea oe le Motusā le Manuatele. Tulou, tulou, tulouna lava. Lau Afioga i le Fofoga Fetalai, faafetai tele mo le avanoa ua tuuina mai.

Ae le i faaalā se manatu i le Tala Faatatau o le Tupe ua folasia nei i le Maota, avea ia lenei avanoa e avatu ai se manatu a o se folasaga o le agaga ma le mafaufau i si ou itumalo pele o Faleata Sasae, si ou nuu i Lepea e afio ai Faumuina o le Tupufia, Usoalii ma Tamapaa, afio Leota Matagiolveao, alaialatai oulua le nofoasa lau Afioga Vaitagutu ma Ai’i, le mamalu ia te oe le falelima ma le falevalu o tagatanoa, ma le lua vaifale, alaialatai Tauaitu ma le saofaiga a Atua.

Si ou nuu i Vaimoso e susu ai Mataia le tama a le Fale, afio le Usoalii ma le Matua ia Patauave, alaialatai oulua Igoamatua Tomaagauaune ma Manuleleua ma oulua aiga o Aogamalie ma le Faleagafulu. Susu Nofotama ma Matua o Toala ma Tiufea ma le Malae.

E faapea foi si ou nuu o Vailoa e susu ai Siliga ma Umusa i le Siliga, alaalatai lau tofa Nuu ma Leatinuu ma upu ia te oe le Faigā. O paia na o si o tatou itumalo, nuunuu atu laia i tootoo o le itumalo o e o lo o latou tausia ma puipui mamalu ia.

Si ou itumalo pele, ua iu le ta faiga palota, o lau faaaloalo maualuga ua lafo mai i lou nei tagata faatauavaa, e fai ma ou siufofoga e molimolia sou finagalo a o sou manatu i upufai o lo ta Malo. Ua lafoai faaiuga o le faiga palota, ae o lau sui usufono o le sui usufono mo tagata uma o lo ta itumalo.

E ao ai ona faaaogaina lou malosi o i ai, e finafinau ai i mea lelei, e le gata mo lo ta itumalo a o se ta sao mo le lelei agai i luma o Samoa atoa ma ona tagata.

E le faagaloina foi le tapuaiga i susuga i faafeagaiga i fatafaitaulaga e fia i totonu o si o tatou itumalo. E le faagaloina le tapuaiga i susuga i faafeagaiga i soo se fatafaitaulaga o itumalo, o Tapaau ma faleupolu, faletua ma tausii. saoa ma le malosi o le itumalo. E le mafai foi ona faagaloina tina ma tama matutua ma i latou foi ua faataotolia i fale, ona o ma'i tugā o le tino. E avatu le faafetai faapitoa i si ou nuu i Lepea lo tatou aiga Sa Faumuina, ona o lo outou sailimalo, ua outou finagalo ai e avea lenei tagata faatauavaa, e fai ma ou sui tauva i le faiga palota na se i mavae atu nei. Faafetai i lau Afioga i le sui o le nuu, lau tofa Vaitagutu, faafetai i le Usoalii ma Tamapaa, faafetai i le Tauaitu ma le Saofaiga a Atua. Faafetai i faletua ma tausii, faafetai i lau Afioga le Telesa ma lou aualuma, faafetai i lau Afioga Tuimavave ma lou aumaga.

E toe faapitoa lava le faafetai tele i le matou komiti o le palota, nai ou aiga uma o uso ma tuafafine, uo ma e masani, ona o le tele o le lagolago sa outou tuuina mai i auala eseese, e tatalo lava i le Atua ia faatutumu avanoa uma o mea sa faagaogaina, ona o lo outou alofa moni. Ou te taumafai e fai sou aoga mo lo tatou nuu ma le itumalo.

Faafetai tele foi i si au manamea o si ou toalua o La Tanuvasa Salausa Ah Ching, ma si au fanau i lo outou onosai i nei mea, o le galuega ma le lagolago e le faigofie.

Lau Afioga i le Fofoga Fetalai, o le a see atu loa se manatu i le Tala Faatatau o le Tupe, e pei ona folasia mai i le Maota. E avatu le faamalo ma le faafetai i le Minisita o Tupe ma le Malo, i le tapenaga o lenei tala ma faamatalaga, faamalo i le silasila alualu amao ma le tofa ua matua loloto tele i le fauina ma le faataatiaga, o le Tala Faatatau o le Tupe 2016/2017. Faafetai atu i le Malo na se i mavae atu nei, ona o le faafoefoaina mai o le sa o Samoa, ana faaletonu le tuanai atu lea, e matua faaletonu le tamaoiga o le atunuu o le a i ai i le taimi nei. Ae o lea ua faamaonia mai le faatupulaia o le tamaoiga o le atunuu i le 1.7% i tausaga e tolu na se i mavae atu nei, aemaise le aafiaga o le atunuu i le afa o Eveni. Se i silasila la i le manaia? O le a se isi manatu ia i tatou uma? E le taumate tatou te mananao uma ia aveave ai loa lenei lelei, ma tatou taumafai uma ina ia siitia le tamaoiga o le atunuu i tausaga uma. E ese foi la le manaia o taiala ua faataatitia mai e lau Afioga i le Minisita o Tupe e faatonutonu ai lo tatou sa mo lenei tausaga o i luma nei. Afai e ogatasi taiala ia ma le gaoioi faatino a tatou uma, faapea le gaoioi faatino o le aufaigaluega uma a le Malo, e leai se mea o le a ponatia ai le agai i luga o le tamaoiga o le atunuu.

O le Lipoti na folasia e le Minisita o Tupe i le aso 31 Me 2016, ua taatia mai ai le ata o le tamaoiga o Samoa i lona aoaotetele i le taimi nei. E foliga mai o lo o saogalemu lo tatou tamaoiga ma atinae mo le taimi nei.

Ae peitai ane, o le tatou tamaoiga ma lona tulaga, e taatia ai mai lea taimi i lea taimi, e aafia tele fesuiaiga o le tamaoiga o le lalolagi. O le lipoti mai le Faalapotopotoga o Tupe a le Lalolagi le IMF, o le a faaitiitia le malosi o le tamaoiga o le lalolagi i le tausaga 2016/2017. O le mea lea e ao ai ona tatou tapena nei, e puipui i tatou mai lona aafiaga tele i fesuiaiga o tupe a le lalolagi, ia tupu ae a ua tatou sauni i ai.

E momoli atu ai la le faafetai i lau Afioga i le Minisita o Tupe ma le Malo, o lea ua faataoto mai fuafuaga e tapena ai lo tatou tamaoiga, ina ia tupu le malosi. O le tilotilo la a lou sui usufono i tapenaga aoaotetele ia, ua talafeagai le lelei mo lenei vaitaimi, e fuafua le lelei o mea faatino, i tupe maua, faaitiitia tupe alu le talafeagai, uunai le atinae o pisinisi tumaoti, siitia le lelei ma faatinoga o auaunaga a Matagaluega a le Malo. O le mea lea, lau Afioga i le Fofoga Fetalai, ua lagolagoina ai e le sui usufono o Faleata Sasae le Tala Faatatau o le Tupe ua faataatia mai 2016/2017. O le a la se isi sitepu e sosoo ai? Ua tatau ona iā faatasi e faatino loa ia fuafuaga ua uma ona faataatitia. Ma o le motto lea e tatau ona tatou alalaga ai i le vaitaimi lenei, o le faatino, faatino ma faatino. Manaia tele le āgaga lea na ae i le taimi o le faiga palota i faasalalauga a le Ofisa o faiga palota, e faapea mai, Resitala ma palota, resitala ma palota, resitala ma palota. Ou te manatu o le agaga foi lea e tatau ona tatou mulimuli ai nei, fuafua ma faatino, fuafua ma faatino. Ma o le



alaga lea ua tatau ona lagona i totonu o Matagaluega uma o Faalapotopotoga a le Malo, tele ma tele fuafuaga lelei ma matagofie ua uma ona faataatitia i totonu o Corporate Plans ma Strategic Plans, ae o na lelei faatoa manuia le tagata soifua pe a faataunuuna ma faatino. O le tele o taimi ua ova le fuafua, ma fuafua ai lava ae faatino ane ua toeitiiti uma le tausaga faaletupe. O le tele foi o nisi o a tatou polokalame ua leva ona uma ona faapepa ma faatusi, ona faataatitia atu loa lea i si toeaina e igoa ia taatiamai, se i malie lava lona loto ona fai lea. E le aoaia e Laupua Tamafaiga lau Afioga i le Fofoga Fetalai, ae ona o le tulaga ua faataatitia ai nei a tatou Government Sectors, e tele foi stakeholders i totonu o Sectors taitasi.

O le mea lea e taua ai tele le faatoaga ona faaauau fonotaga faatulagaina masani a stakeholders i totonu o Sectors taitasi, e soalaupule ai ma faatino mea uma ua uma ona fuafuaina, ina ia o gatasi mea uma i le tulaga faa-coordination ma le collaboration ma toe fuafua nisi mea lelei mo le lumanai. E pei lava ona silafia, o le tolo o mea e mafai ona fai nei, o le taugata foi lena o lona toe faatinoina i le lumanai. So o se taimi lava e faatino ai se fuafuaga, o le a siitia foi lena auunaga quality of service improves. O le mea mo i tatou uma lava e faatinoina le public service e aofia ai foi ma sui usufono uma, e tatau ona tatou faamalolosi, e le faigofie le tatou galuega ma e leai foi nisi tatou te faamoemoe i ai e omai e fai, o i tatou lava tatou te faamoemoe i ai. O le taimi lava lena o le tauamataina o lena Paeiga, e laititi nai mataupu e fia talanoa i ai, aua le tamaoiga ina ia siitia lona lelei i tausaga taitasi.

E tele lava nisi atinae a le Malo, ae o atinae nei e faamoemoe i ai le lotoifale o le atunuu ma lona tamaoiga i le aiga i luma o le atinae o faatoaga ma le atinae o tagata tafafao maimoa mai. E leai o lena e i ina le silafia ma le potu masani i lau Afioga i le Minisita ma Afioga i Pule Sili o Matagaluega. E matou te tuu atu le faamalosiua ma le faamanuiaga ina ia agai pea i luma a tatou atinae e le faigofie, ia tumau le faatuatua tatou te fuafua faatasi ma faatino faatasi ma le Atua.

O le atinae o faatoaga, lau Afioga i le Fofoga Fetalai, ua ou iloa e tele fuafuaga a le Minisita o Faatoaga ma Faigafaiva ua faataatitia nei mo le atinae o faatoaga, ae ua na o ni nai motugaafa e tuutuu atu i ou tafatafa, faaoga lelei, a leai faamolemole toe faafai mai. Ou te iloa ua uma ona asia muamua le fuafuaga lena ma ua ta'u mai le tali, e matua faigata lava ona faatino. Ua tiga la ona ou iloa e faigata, ae ua i ai le mafuaaga ua ala ai ona ou toe laga lena mataupu, afai e i ai se avanoa pumoomoo lava e mafai ai ona faatino, o lona uiga e i ai sina avanoa e mafai ai ona toe asia le mataupu ma faatalanoa. O le mafuaaga lena, sa ou talanoa i se tasi o tamā mai le faasiusiuga i sisifo o le motu lena o Upolu, fai mai lana tala ia te au, ua tele le mativa, ona ou fesili atu lea i ai. E faapefea lo outou eleele ma le gataifale? Ae fai mai lana tala, 'matou te le matitiva i taumafa, tele a matou faatoaga lelei foi lo matou gataifale i i'a.' A o le faafitauli ou te sau ma au tautalo e faatau i le aualatele, o la foi e sau le isi toeaina o le matou nuu ma ana foi tautalo e faatau i le aualatele. Ona ma tau fai faatau ai lava lea faapena, se i vagana ua i ai se isi tagata ese e ui atu ma faatau a matou tau talo, ae a leai e iu lava ina ou toe alu e ave lau tau talo e faatau mai ai le tau talo a si toeaina o lo o i le isi itu o le auala. E faapena foi le tala i tau'i'a, o le mea o lo o manaomia o sina tino o le tupe, e faatau ai isi mea e manaomia o le aiga. E faatau ai le suka o le masina o le fasimoli, o le tooth paste ma le tooth brush, e totogi ai le pili o le aoga, faatau ai le cash power saogatupe a le Ekalesia ma le nuu, aua e le mafai ona ave le tautalo i saogamea a le Ekalesia. E manaomia se tino o le tupe mo le faamati ma mea faapena.

O le manatu autu la, ana faapea e i ai se faleoloa a le Malo pe o se isi lava faalapotopotoga e mafai ona omai i ai le afaifaatoaga e aumai ai a latou fua o faatoaga, tuu atu i ai ae tuu mai le tupe, ona faasaga loa lea o le faalapotopotoga e faatau atu fua ia o faatoaga, i totonu o le atunuu ma auina sao atu i maketi i fafo. Ou te manatu sa oo talanoaga muamua i se mea e tau o le export authority ae sa matauina i lena taimi le faigata ma le lavelave o lona faatinoga. E tele mea fou i lena vai taimi, alu foi i luma le silafia ma le atamamai o le afaigaluega a le Malo. Pe le ua suia ai faigata ia sa i ai muamua i se isi auala talafeagai e mafai ai ona faatino se mea faapenei, o se auala foi faapenei e matua faaosofia ai le loto naunau o le au faifaatoaga ma le au faifaiva e galulue, ma o le a fesoasoani malosi i le siitia o le tatou tupe faaleoleo i fafo po o le foreign reserve.

O le soifua maloloina e muamua ona avatu le faamalo ma le faafetai i le Minisita mo le Soifua Maloloina, faamalulu atu lau Afioga i le Fofoga Fetalai, ae ou te le i oo atu i le tulaga lea, sei toe faauma atu le isi faaopoopoga lea o le tuualalo i le Minisita mo Faatoaga ma Faigafaiva.

O le isi tulaga lea ua i ai a tatou mobile abbatoirs, e fasi ai a tatou povi i lona tulaga saogalemu ma le soifua maloloina. O le isi a tatou maketi sa i ai muamua ao ta fasi a tatou manu i le laolao, o le tatou motu i Tutuila. Ou te manatu sa taofia le avatu ina o povi i Tutuila ona o Tulafono a le Feterale ma le tulaga sa ta fasi ai a tatou manu, ae o lea ua saogalemu le fasiina o a tatou manu i mobile abbatoirs. O lea ua alagatau ai, le toe lagalagaina o le tatou maketi lea i Tutuila e manaia e lata mai, toe lelei le faafesuaiga o le tupe Amerika ma siisii ai lava i luga le tatou foreign reserve. E faaputupu lava nai mea laiti na ma alualu malie ai lava i luga le foreign reseve, aua tatou te naunau tele i mea tetele, ae o nai mea laiti lava e faaputupu e maua ai le mea tele. O le atinae o le soifua maloloina, e muamua ona momoli atu le faafetai i lau Afioga i le Minisita o Soifua Maloloina, le palemia ma le Kapeneta i le tofiaina o au, e avea ma Minisita Lagolago mo le Matagaluga. E tele faatulagana fou o lo o taumafai i ai le atinae o le soifua maloloina ma a faatino mai ia fuafuaga uma, o le a siitia le lelei o le auunaga aemaise ai le toe siitia ai o le auunaga i falemai faaitumalo, ma le fesoasoani muamua e mafai ona maua e o tatou tagata i totonu o aiga ma nuu, i polokalame faa fesoasoani muamua po o le primary health care. O lona autu, ia faalatalata le auunaga i le mea e nonofo ai tagata. Faafetai i lau Afioga i le Minisita ma le Ofisa uma o le Soifua Maloloina i le fuafuaina ma le faataatiaga o tulaga, pau lava le mea o lo o totoe nei o le faataunuina loa o nei fuafuaga uma. O se tasi o to'atugā tele o lo o i ai nei le auunaga a le Soifua Maloloina, o le lē lava lea o le aufaigaluga tomā faapitoa aemaise lava fomai ma nurses. O le faigata lena o atinae faapenei, o le manaomia o tagata aoaoina faapitoa ma o ia foi aoga, e tau i le fitu tausaga faatoa maua se fomai.

Faafetai. O le a faataatia le ofisa o soifua maloloina. E fia faaleoina la se...e. faauma atu ai lau tautalaga. E momoli atu ai le faafetai, sa ou fia oo foi i le turisi ae e le afaina atonu e maua se isi aso. E fia faaleoina le agaga faafetai i nisi o Minisita na oo atu i ai nai talosaga, Minisita mo Galuga...

Faafetai i lau Afioga i le Fofoga Fetalai o le a faauma atu ia. Tuu ese pepa ia e lima sei oo i se isi aso. Faauma atu ia le faamatalaga, e momoli atu le faafetai ma le faamalo i lau Afioga i le Fofoga Fetalai, faapea foi le tapuaiga mau i le Palemene. Tau ia ina ia alofa mai le Atua i lou malosi aua le faafoeina o le Maota o Samoa. Alofa mai le Atua i le Afioga i le Palemia Sui Palemia ma le Kapeneta, i tiute fita o feagai ma outou i aso uma. Ia alofagia foi e le Atua le Palemene o Samoa, ia maua se ai mo lenei Nofoga mo le lumanai. Soifua.

## **22 IUNI 2016**

**Afioga FUIMAONO TEO SAMUEL TEO (Falealili Sasae):** O le usitai lava o le mea sili lea lau Afioga i le Fofoga Fetalai. Sa ou manatu o se faifeau sa outou tofia o le a i ai sona taimi faapitoa i le aso a taeao, ui i lea, faafetai mo le avanoa. O lea foi na tuumumusu mai ou uso nei, ae sa ou manatu e tau faaumiumi sina taimi ta te taupou ai, aua a uma loa le aso ua le aoga foi, ae faafetai mo le avanoa.

Masalo o lea ua faafofoga le Maota i felafolafoaiga aemaise o lauga faataupou a sui usufono mamalu. Sa usiusi lava faavaa o savili le faalogologo ma le maitau, o le ala foi lea o le tuai ma musu se lagona e faaleo atu i lenei itula, peitai, e lagona lava le agaga o le usiusitai i lau Afioga o lo o faatautaia lenei Maota.

Ou te manatu o lea ua faafua pupue galu feai o le vasa ma peau faailo mala o le matasaua na to ai manu o Malo, ma ua gase atu le au i Fagalele na tauilo ai manu o Malo.

Ou te taofi, e le seetuagalu le gogo a Sa Fenunivao pe fou le lauamanu, ae ou te talitalimanu i le faamuli o atu. E le tau sailia foi se faga ou te malu ai aua e le o au o se lupe na see mai i le tiotio o faiva o le gataifale po o le tuavao, leai, o au lava o le tama a tu tula ma tu tula na ou see mai i le tiotio o faiva a manaia. E!, se ua viligia le vaiti gase o le u a le tama Falealili o Manusamoa, o le ala lea o lou saafi, aua ua pepese ai Samoa e faamanatu le manumalo aiai o le tama Falealili o Manusamoa. E ui lava ina tau faaletonu le taumafaiga o lo o i ai nei a le tatou Manu, ae talitonu ua ao Samoa ma ua lauiloa ona o lau Manu Samoa. E nenee ma mimita ai so o se Atua ma Samoa atoa. Talofa Samoa, o lea ua tafatu seuga o lo outou sa i auvai, ma ua malu le fau o outou faiva manaia, ua logo foi le pualilo o lo outou uta fanua ma ua mu totototo lou suniula, ua talatala foi le ilaoa o lau pelu tala mama, ua e folau i lou vaapipi ma ua e aloalo i lou foe leifi, aisea? Aua ua see lo ta vaa i tuluiga e fia o le kelope ma ua amanaia lo ta leo i upufai o faigamalo tetele o le lalolagi. Lou itumalo pele Falealili Sasae, ou te le apoina ou paia i iu aua e pele ma mamae oe ia te au, e amuli ona tala faalauvae le upega o tupu, o ou sa, o ou paia, o ou faiga ma ou ao tu tafaitoa, a o usi faavaa savili le faafofoga a Samoa. Ou te tulivae ma ou toele ma le agaga loto maualalo, o le fisaga o matagi e toto

ai le sau ma momoli mai ai le malu ma apoia ai le susu i ou laugutu o se faamanatu o le faaaloalo ma le migao e laualuga i le vatapuia le sootuli ma le avafatafata.

Ou te faatulou atu i le tapuaiga malu i le afio o Lana Afioga Mamalu O Le Ao o le Malo, lau Afioga Tui Atua Tupua Tamasese Efi, o le Tama na saesae laufai ai Tumua, o le Tama a le Aiga Sa Fenunuivao ma lau Masiofo. E faatulou atu i le tapuaiga mamalu a Sui o le Fono a Sui Tofia, afio lau Afioga i le Tamaaiga Taaana, lau Afioga i le Tuiaana Tuimalealiifano Eti Vaaletoa Sualauvi II ma lau Masiofo, afio lau Afioga i le alo o Tuiaana Sagate, lau Afioga Hon Le Mamea Ropati Mualia ma lau Masiofo. Afio lau Afioga i le Manu o le Tuasivi e fagota i tai e lua lau Afioga Hon Tuiloma Lameko ma lau Masiofo.

Ou te faatulou atu i le afio o lau Afioga i le Palemia, Tuilaepa Fatialofa Auelua Lupesoliai Aiono Neioti, Galumalemana Dr. Sailele Malielegaoi. Afio lau Afioga i le Tamaitai Sui Palemia lau Afioga Fiamē Naomi Mataafa. Afifio alii ma tamaitai Minisita o le Kapeneta, afio i Minisita Lagolago ma le paia mauuluga o sui usufono uma, o sui usufono mamalu o le Paeaiga Lona XVI o le Palemene o le Maota o Samoa.

E faatulou atu i lau Afioga i le Faamasino Sili ma le vasega o Faamasino o le Faamasinoga a Samoa. E faatulou atu i le susu o susuga i faafeagaiga taulagi i so o se fatafaitaulaga i Samoa, le paia mauuluga i le Aufaigaluega tofoti a le Atua o lo o faafaletuluia ma faafalelemalu i nuu ma afioaga aua se manuia o Samoa mo a taeao.

Sesema ni manu ma talosia le mana o le Atua soifua mo tagatanuu uma o Samoa, aemaise o ana tama fanau o lo o i ai i le tafa o taua i le puipuiga o le saogalemu o le lalolagi, aemaise ole taase e fai ma vaa ma ipu i atunuu ese, a o alo ma fanau o lo o taase i le sailiga o le poto salalau aua ni taitai o Samoa mo a taeao.

E faatulou atu i Faauluuluga o Matagaluega eseese a le Malo, Faauluuluga o kamupani, pisinisi ma Faalapotopotoga Tumaoti i totonu o Samoa, o paia mamana na o Samoa i ona faafua e fa, o ona galu e iva ma ona peau e 13 aua Aiga ma latou Tama, Tama foi ma o latou Aiga, Aiga o Tupu, Aiga o Nofo, Aiga o Papa, Aiga na Tafai, Tumua ma Pule, Itua ma Alataua, Aiga i le Tai ma le Vaa o Fonoti. E le faagaloina foi le paia mauuluga o tatou uso i le motu i Sasae, aua le nofo a Maopu ia Sua ma le Vaifanua, Itua ma Alataua, Fofu ma Aitulagi, Saole ma Saleaamua ma le Launiu na Saelua, a o mamalu aua le Laau na Amotasi, Faatui o le Motu ma Tootoo o le Faleula ma Tama a le Manuatele. O ou paia mamana na Samoa nuunuu atu faatini o tausala.

E faatulou atu i lou itumalo peleina Falealili Sasae, ma avatu malu i puega pe afai e sala se leo o la outou auauna i le faaleoina o ou paia, e le o ia te au se atoa, aisea? O sau upu ea e toe suia ai ou paia? E leai. O sau e toe faaopoopo ai ou mamalu? E leai. O le tatalo, afai e galo ia te au se iota o ou paia ma ou mamalu, ia malie afenoa, o le leo o le auauna ua na o se taua o fafo o le manu e le fofoa, aisea? Aua e i ai le taimi e soa ai e le tagata le i'a, e soa foi e le i'a le tagata. E ui ua vaeluaina le tatou itumalo, ae le mafai ona toesea paia ma mamalu aua Alaalagafa ma lo lua nofo a Tulafale ma le Tauagaeseese ia Falealili. Ae tumau pea le mafanafana o le nonofo ai o Falealili i so o se itu ma so o se mea, e suafetuitui ma mili alafau i so o se taimi.

I lou ava ma lou faaaloalo tele, ou te faatulou atu ai i lou nuu pele Salani ma ou aiga e fia ou te mitamita ai i totonu o Salani. Tulou ia le afifio o Aiga Sa Fenunuivao ma la outou Tama, tulou le afio o lau Afioga i le Gafatasi, lau Afioga Fuimaono ma ou alo tutusa, afio Leasiolagi o le Saoao, afio Sifuiva o le Matuaalii, malii mai oe le Tofa i le Matua Tofuaiofoia ma le mamalu ia Sataeleava ma le Fuaiala.

E faatulou atu i auauna a le Atua i totonu o lou nuu pele o Salani, faatulou atu i faletua ma tausi, Tamasaailau ma le aualuma, Tupua ma le aumaga aemaise o ni o tatou paolo tupu e malu ai lo tatou nuu. Le fuaga o lalovaoa o le tatou nuu i Salani, o ou paia apoapogata na, ia ao ia ma sunui i le tupua i Salani ma Alofisula, o Tuani ma Pitovaoaiga tainane Lotomua ma Fogavaiuta.

E faatulou atu i le afifio o Sa Alaalatoa ma le alo o Samalaulu, alaالاتي lau fetalaiiga Faatili o le Tapunuu, alaالاتي lau Tofa Gaopo'a o le Tulafale a le Tuiatua, alaالاتي lau tofa i le na faialaga, lau tofa Letoga Ulupuaa ma le mamalu i le Faleono.

Susu lau Susuga i le Toeaina Faatonu o le Sui Taitaifono o le Ekalesia Aoa, lau Susuga Tunumoso Iosia, susu susuga i faafeagaiga i lena itu o le vai, faletua ma tausi, tamaitai ma saoao ma le malosi o le nuu i lo tatou nuu Sapoe. Ae le faagaloina ou aiga pele.

Tulou le afio o lau Afioga i le Aloalii Muagututia, afifio Tufugafale ma Seugalii ma le mamalu i le faletolu ma le lauti na laulelei. Susu susuga i faafeagaiga taulagi i lena itu o le vai, le mamalu i faletua ma tausi,

tamaitai ma saooa, Tupua ma le aumaga ma le fuaga o lalovaoa ma lo tatou nuu pele o Utulaelae ou te nene ai.

E faatulou atu i lou nuu pele ou te matanana ai Salesatele i le afio o lau Afioga i le Alo o Salamasina, o le uluai tupu na Tafaifa ia Samoa, lau Afioga Tapusatele ma ou alo, Faleafaga ma Alaifea, afio alo o Leilua o Fonoti ma Sialega, afio le Aloalii o Paitomaleifi, susu Leota, alaalatai le Aiga Talimalama, alaalatai le tofa i le matua o le tama a Malaelua lau fetalai Faleafaga, le mamalu i le nofoala. Tulouna le auuana a le Atua ma lou faletua o lo o faanonomanu i le alaalafaga, tulou faletua ma tausi, saooa ma tamaitai, Tupua ma le aumaga ma le fuaga mo a taeao, aemaise ou aiga peleina i Salesatele. Ao ia ou paia i Taoaluga ma Taoalalo, o Faga ma Siuofaga o Tuavao ma Maota, o le tupua i le Malaeoletalu.

E faatulou atu i si ou nuu pele Siuniu, e te itiiti igaga ae te lave i mala. Tulou le afio o le taofia a Moetalalelei, Teo ma Meleisea ma Togiailupe, alaalatai le tafa Salalemosooi, Taelega ma Lauvao ma le nofo a ituaiga. Susuga i le faafeagaiga aemaise le Susuga i le Peresetene o le Paranesi ma lou faletua, o lo o faanonomanu i le afioaga, faafetai tatalo, faafetai anapogi. Faletua ma tausi, tamaitai ma saooa, Tupua ma le aumaga ma le fuaga o lalovaoa, ao ia ou paia i Malae, o ou paia na, o ou faiga na, o ou sa na ma ou ao na, lou itumalo peleina o Falealili Sasae.

I le agaga mauualalo ma le loto faagaetia ia te au e momoli atu ai lau faafetai, faafetai, faafetai tele lava. Ua tali felagiai le pepese o fetu o le lagi ua saafi foi le masina ma ua liliu le alo o le la, ma ua sisiva i luga o peau. Aisea? Ua ou atu e, atu e, ina ua faaolo le sau i la outou tofa faatupu ma le faautaga sailimalo. Pale ua pale, ula e ua ula, ua ou sei, ua lalelei. Ua se ie ua folasia i malae, se ua ou titi ina ua e topule i lou faatauva. O la outou faatofalaiga ua ou malu ai. O ai ea lou tagata vaivai ua afe ai le alofa ua faamafola lou agalelei, ona o se tautua le lava ma le auuua e sii au i le mauga e pei o le upu ia Asomua. Le vai sa ota momoo i ai ta te fia inu ai, se ua ou inu ua ou malie. O moomooga faalupe o naumati i lo outou soifua ma lou ola, ia tapuaaoina e le agalelei o le Atua ina ne i ota momoe ma manu ae sau mala e atiae. Lou itumalo peleina, lafo mai laia o lou faatuatua. Ou te matua talitonu o le a e tapuai faanonomanu, po le fala, ula le mulila ma tui le mulipapa ae se i ou molimolia la outou tofa ma le faautaga, so ta sao ia manuvao mo se atinae manuia o lo ta itumalo. O le mea e lelei i Apia, e lelei foi i Falealili Sasae.

E momoli le agaga faafetai o lenei itumalo o Falealili Sasae i lau Afioga i le Palemia i le tofa poto ma le tofa loloto sa saili i le Atua le tofiga o lau Kapeneta. O le tala a lenei itumalo, e lagolagoina ma le atoatoa ua sao le tofiga ua tofia ma valaauina ai sui usufono mamalu e pei ona tofia nei. Se ua faafetai le toa malo sailimalo mo Samoa aua se lumanai manuia mo Samoa mo a taeao, ua malie le faaaloalo ina ua e topule i se tofa faamatua moepo ina ia vaeluaina lenei itumalo e pei ona i ai nei, o se faiga ua matua faatauina e lenei itumalo, ua mafai ai ona faia lana filifiliga i se tulaga saoloto ma le fuafuaina lelei i le tagata o lo o faia le tautua i le aiga, o le nuu ma le Ekalesia.

O le tatalo, ia faafualoa e le Atua lou soifua, aua o lou olo ma lou malu o le Atua, ia tului ma faatamaoaigna lau tofa i le alofa mutimutivale, aua ua iloga mea silisili ma le tauleleia ua faataunuuna ma ua taunuu ua siitia ai le tulaga o Samoa nai lo le tele o isi atunuu o lo o i ai nei. A o le tatalo ma le faaaloalo a lenei itumalo o Falealili Sasae, lau Afioga i le Palemia ma lau Kapeneta, e faapito augafa sa matou faamatalaga i nisi o Minisita.

Ae le i tuu atua manaoga o lenei itumalo, e fia faamauina lava ma faaleoina le agaga o le faafetai i lau komiti filifilia o le Palota sa latou galulue punouai, o lea ua tini le faamoemoe. I ou aiga o lo o alaala ma papaaao i so o se tafa o Samoa ma atunuu e mamao, o uo ma aumeamamae, o uso ma tuafafine, o kamupani sa agalelei aemaise o si ou toalua faapelepele ma si au fanau toaititi e toasefululua, sa matua lagolago malosi i lou faamoemoe. Mai le taele o lou loto ma lou agaga, faafetai tele i lo outou lagolago. Faafetai atu i lou toalua ona o le taulagalaga i mea lelei, ua e uunaia ai au ou te alu i lenei mea. Faafetai.

E fia tuuina atu se agaga o se talosaga, masalo ua tele ma ua le ofi api a Minisita o lo o tusitusia ai talosaga a sui usufono, ae toe faapoo se isi laupepa se tasi mo Falealili Sasae.

E fia agai se faamatalaga mo le Minisita mo Galuega, Felauaiga ma Atinae Esee lau Afioga Papaliitele Niko Lee Hang. E ese lou fiafia ina ua tofia oe e ave ma Minisita, aua o oe o le tagata lotu, e te alofa e faasafua lou alofa e le faatuaoia. O auala i nuu o Salesatele, Salani, Siuniu, Sapoe ma Utulaelae, e pei ona avatu le talosaga, pau lava le mea na manao i ai lenei itumalo, se i e afio atu e te tagai, ona e afio mai lava lea pule oe po o afea e fai ai. E le o se tala e fatu, ae i ai lou talitonuga faatoa talitonu lava Toma ina ua

vaai. O nei auala ua ova i le 30 tausaga e le i faataina, o auala galue foi i Siuniu, Salesatele, Salani ma nuu nei e lima, e le i i ai ma se auala ua toe suaina pe faataina. Ae silafia, tasi lenei itumalo o lo o logologoa le tala o le talo o lo o sau ai, e le misi tailua vaiaso ma o atu i latou o lo o faia le aoina mai o le talo e ave i fafo a o le mea leaga o le le mafai e le faifaatoaga ona amo i le mea mamao ona ua eseese foi aso.

Ua uma foi ona mamate nai manu sa faaaogaina, solofanua, se i tulou, ua alu alu ua uma le malosi, ua toe foi lava i le amoina o fua o faatoaga i le main road e faatalitali ai le taavale. E tusa lava pe le faataina lau Afioga, tau lava o le sua ina ia sao ai se taavale e faamamaavega ai i si o matou itumalo.

O le escape road pei ona e silafia, tasi lenei itumalo sa aafia i le Tsunami ua uma ona faataunuu le taligalu, faamolemole lau Afioga i le Minisita e le i uma le taligalu ae le i i ai se taligalu i Utulaelae Sapoe ma Salesatele, ae maitauina i ia vaiataimi o le Tsunami le aafia tele o tagata tafafao maimoa mai fafo o lo o i ai.

E tatalo ai ma le agaga o le loto mauualalo lau Afioga pe mafai ona silasila ane ia oo atu i aso faigata, pe i ai se mea e mafai ona sosola ai i uta le nuu e pei ona talosaga atu ai. O auala galue, ia o le a taoto atu e fai i ai le fuafuaga poto aua le faamamaavega i o matou faifaatoaga. O moli auala faailoilo aua le fegasoloai o fanau aoga i le vaveao e pue le pasi, aemaise o tama ma tina matutua, e tuuina atu i lau Afioga faamolemole, e moomia ni nai poumoli o lo o i ai nei ina ia mafai ona avea ma faamalamalama ala i taimi o feoaiga aemaise o gaioiga e fai.

Faafetai i lau Afioga i le Fofoga Fetalai, manatu e tuua le aso ananafi, ua oo i le Afioga i le Minisita mo Galuega, Felauaiga ma Atinae Eseese e faamanatu i auala galue aemaise o auala e ui i totonu o nuu o lenei itumalo, e aafia uma nuu e lima mo le silafia, o lo o i ai turisi i totonu o Salani, ia faapea foi Sapoe ma Utulaelae, ina ia alofagia auala ina ia faaleleia. E manatu e le toe ta i tua se faamatalaga, na ona ou see i fala gatete ma utuutu malie le salefu o le taeao o lea ua uma ona e toto le niu o le tuaoi, ia aua le vatapuia o le Atua foafoa ia ma le palealii o Ana galuega. E momoli le faafetai i le faiga malologa o lea ua alafai mai i faguga lelei le mamalu o le Maota nei.

Lau Afioga i le Minisita mo Punaoa Faalenatura ma le Siosiomaga, e fia oo se faamatalaga i taligalu, ia e tasi lenei o nuu na aafia i le mala faalenatura e oo mai i le taimi nei e le o i ai ni taligalu o Salesatele, ia Sapoe faapea foi Utulaelae.

O le Minisita mo le Soifua Maloloina, ia na o se talosaga e tuu atu i ou autafa lau Afioga Dr. Leao Tuitama, o sina Health Centre. Ou te talitonu ua lava le falemai lea i Poutasi e faaaogaina mai e itumalo e lua, ae na o lo matou itumalo, na o se mea ina o i ai tagata e mafai ona fua ai le toto, fua ai le suka, fai fusiga ia aemaise o nai mai faafuasei i le leva o le po a o la e i ai sina vai manava ma nai panadol ia aua le faaaogaina ae le i oo mai i le falemai autu.

Ia ona oo atu lea o se tala i le Afioga i le Minisita mo Leoleo, Auaunaga o Tineimu ma Faalavelave Tutupu Faafuasei, Falepuipui ma Auaunaga toe Fuataina, ia manatu o lea ua vaeluaina le itumalo, e alagatai foi ona i ai sina Ofisa i o tu totonu o lou itumalo ia aua lava le malupuipua ma le saogalemua ia ma le faamalosalia o le Tulafono.

E faamuliga se faamatalaga i le Minisita mo Aoga, Taaloga ma Aganuu lau Afioga i le Toetaufanua a le Malietoa lau Afioga Loau, e talitonu lava o lea ua e tulai mai i le foe. O lou soatau foi o se tagata e laitiiti, ua iloga la oulua tulai mai, e logologoa foi lua tala i le taimi o taaloga. Ia ae manatu i ai, atonu o le ala lea ua alagatai ai ona toe silasila i nisi vaega e atinae mai ai le lakapi. E talosagaina e le gata i faleaoga o ou itumalo i Salani ma Sapoe, ia a o se malae lakapi faava o Malo ina ia mafai ona atiae ai le taaloga lenei. E silafia masalo ai o le ala lea ua faaletonu fai ma faaletonu o le tatou au ona ua tau leai ni tama taaalo mai i le mea na afua mai ai le taaloga. Ia ae ou te manatu, ua tatai foi ona faaavanoa se lua taimi e fai ma oulua agai ai e ave le tomā ma faasoā le silafia ina ia mafai ona faaleleia lo tatou au. E manatu lava e leai o le tofi mai le Atua, e le i saga filifilia oulua i lenei taimi. A ou manatu i le filifiliga o Ieremia fai mai le Atua ia Ieremia, *“na ou faia oe i le manava o lou tina ae e te le i fanau mai ma faauina oe e avea oe ma Perofeta.”* E ui lava e le o oe o se perofeta, ae ou te talitonu lava o oe na filifilia i lenei taimi e tulai mai, aua le faaleleia o lea vaega ma le faaaloalo e talosaga atu ai ma le agaga o le loto mauualalo, o se malae e leai se malae o lou itumalo.

O lo o tele eleele i Salani ia faapea foi Salesatele, e mafai ona fausia ai se malae o si ou itumalo. E mafai foi ona fai mai se matou Iuni latou i le itumalo o Falealili Sasae, aua le atinaeina o le tatou taaloga lea faatasi ai ma taaloga e le gata i lakapi, ia a o taaloga afereti e i ai ia, mo mea o field events, aua ou te talitonu, e

seasea maua se tatou pine auro i le mea lea o le tamoe, a o field events e i ai taaloga ia o le pulu mamafa, o le togi pulu foi lea salafalafa ia ma le javelin po o le tao, o taaloga ia e aoga i ai o tatou tagata aua e tino malolosi. Ia o le fuafuaga lena ma le manaoga, e aisi atu ai i lau Afioga i le Minisita, ia mo lea vaega ma lou agaga faaloalo.

Lau Afioga i le Fofoga Fetalai ua iu manaoga o lenei itumalo, a o le agaga maua faafetai lo outou seei mai i le tofi i le faatautaia o le Maota Fono. Faafetaia galuega lelei na faatino e lo tatou Malo e le o po se lilo tulaga foi sa umia o le Minisita, lea foi ua e toe pale mai, malo faafetai. Ia tau ia ina ia faamanuia le Atua i ou faiva a manaia aua le faatautaia o le tatou Maota nei.

Lau Afioga i le Palemia, ia utupupuina fulu o le segaula i lau tofa, ia aua le taitaiina o le Faigamalo o Samoa, ina ia sao ma uli seia oo ai ina faaii lenei lima tausaga. Manuia le Maota, ia ae ola le leo faafetai, soifua.

### **23 IUNI 2016**

**Tofa NAFOITOA TALAIMANU KETI (Gagaemauga Nu. 3):** Lau Afioga i le Fofoga Fetalai, ou te tulai ma lou faaloalo e tatau ai ma le ava tele, e tusa ai ma le avanoa ua e tatala mai mo lenei itumalo, Gagaemauga Nu 3, e taumafai atu ai ni manatu a o ni lagona vaivai e tusa ma le Tala Faatatau o le Tupe ua taoto nei i le Maota mo lona pasiaina. Peitai, ae ou te le i asaasaina le tai sua ma le tai loloto, aua le faamoemoe o lou tulai, ou te muamua ona ou faafeiloai atu i le paia o le Maota o Samoa. O le Maota e le ato matatulutuluina e se tasi, ae o le fale lava e ato fulu. Aua o lele ua taotoga iasa le aso e pei o le tala ia Tooa ma Fitimaopoloa i taitai o le Malo. Faafetai i le Atua ua Ia faaae manuia faiga malologa sa folau ai i le pouliuli, a lea ua fotu malama, i Lona alofa ma Lona agalelei, lea ua tatou fesilafai ai i manuia, ae le o mala i lenei taeao. Malo le soifua.

Lau Afioga i le Fofoga Fetalai, se ua asaasa gata lava ia le alavaa o lenei taeao, aua ua le gata ina sousou, a ua galua foi, i sao o itumalo sa asa le gasu o le taeao. Ae ui lava i lea, o Matautu o le tautai ua masani i aso faapenei. Ua masani i le faitauga o galu, ua iloa foi afeofe e sao ai ma vave ona oo ai i le aloalo, e le tae otaota foi, lea ua mafua ai ona ou tu i Taumeasina, ae tepa i Matagofie e pei o le tala e fai i le fale Vaimauga. Aua o lele ua tau fai sunui ao o le lagi, i le lagi to i le ala ma le lagi to i le tai, ae a le lagi e to i le ea?, ina ua soo tuli taitai o le atunuu, lele ua atoa ai le faga i lāua, ina ua tau fai puea le matila ma le ofeloa, e pei o upu e fai i le gataifale. Ua saua foi i le matamata, lele ua nofoia pou o lauga, ua atoa tupe i le fala, e pei o le upu e fai i le faiva o taulafoga. I le paia sautuafafa o le Maota i Tiafau tauave nei, o tua o Lepea ma Vaitagutu ma Vaiala, lele lauvivilu ai tulatoa ma le aufueloloa o le atunuu. Fai mai o le Maota o Samoa o le Maota o le Tāgātia, o le Maota o le Tāgāmanu a le atunuu aua upufai o lana faigamalo. A o le Maota foi o le faautugatagi, aua o le Maota e tapuaia e le mamalu o le atunuu.

Lau Afioga i le Fofoga Fetalai, se ua setogi lau seuga na lagatila i lenei taeao, lea ua e taia le tu tafaitoa, ma ua e faautuutu le salefu se i tea mea i Matautusa ma momoli lapalapa o malo i Fogaa, ae a se tatou utugataufa ia Keriso ma le atunuu tofi ma le atunuu mamala. Se i sula le aao laveai ma le agalelei o le Atua o Sapaota, ona o lo outou soifua maua e ala ai ona tepa i ula, ma tago e ula ua sei foi i ula o lenei taeao. Malo le fai o le faiva. O upu moni o oe o le maa faafuagalua i aso faapenei. Ae aua foi ne i galo o upu a le Tusi Paia aua ne'i ia te i tatou, aua ne'i ia te i tatou se mea e tasi. A o le viiga ma le faamanu i le Atua, e faasilisiliina lea i mea e manao ai le tagata. Ina ne'i ou momoo la i ia o le loloto, lenei uluai avanoa faauroa ua e tatala mai, ae galo ai figota o le aloalo, aua o ona momoga e talimalie ai le mano ma le galala i aso uma, aemaise o lenei ua tu i tai le satele o lenei Paeaiga lona XVI o le Palemene. O upu a e fai i le motusa, a oo ina faalefulu, e muamua a ona lauvae manu a le Tuimanua. Po o le a le tele o manu, e iloagofie lava manu a le Tuimanua i ona lauvae.

Ae ou te le i taia la le tuluvao ma ou ma ou faamutituu le faiva o Lopala, se i nono ni manatu o lenei itumalo Gagaemauga Nu. 3, e uiga i le Tala Faatatau o le Tupe 2016/2017 lea ua faataoto nei i le Maota.

Lau Afioga i le Fofoga Fetalai, ou te muamua ona ou faatulou i le tapuaiga leoleoa, papa le gae o lau Afioga O Le Ao Mamalu o le Malo ma lau Masiofo, ae a le fala le see, i le tapuaiga a le Fono a Sui Tofia ma outou Masiofo, ma o le mamalu lava lea aua le paia o Aiga ma a latou Tama, Tama foi ma Aiga, le Usoga a Pule ma Tumua, Itua ma Alataua, Aiga i le Tai ma le Vaa o Fonoti, ae a Aiga o Tupu, Aiga o Nofu, Aiga o Papa ma Aiga Tafaifa. Se ua matalupe foi le seuga i le paū o le malu nei, o lea ou te faatulou

atu ai i le afio mai o lau Afioga i le Palemia Susuga i le Alo o le Malietoa o le tama tau Punefu, o Tulaniu o Atua o oe o le Aloalii o le Laau na Fausia lau Susuga Tuilaepa Fatialofa Auelua Galumalemana Dr. Aiono Sailele Malielegaoi o oe o le Taitai o le Malo.

E faatulou atu foi i lau Afioga i le Sui Palemia lau Afioga i le Sao Faapito Fiamē Naomi Mataafa faapea le saofaiga a Minisita mamalu o le Kapeneta ma le mamalu le vaea o Afioga i Sui Minisita.

Ou te faatulou foi i le tapuaiga a lau Afioga i le Faamasino Sili, Afioga i alii ma tamaitai o le Faamasinoga faapea le Ofisa ma le auaunaga faa-Faamasinoga. Ou te faatulou ma le faaaloalo foi i lenei taeao i le e'e mai o lau Afioga i le Fofoga Fetalai o le Maota o le Fono Aoa o Samoa faapea le paia maualuga o lupe papa na ta na fa'ia mai i le fuifui, sui usufono mamalu uma o le Palemene i lona Maota. Ou te ofo alofa ma faatalofa atu foi i lau Susuga i le Failautusi Sili o le Maota ma lou sui ma le mamalu o le Ofisa o le Fono, malo le galulue faafetai le tautua le faatuaia ina ia sologa manuia taualumaga o galuega a lenei Maota. Ou te faatalofa atu foi ma le faaaloalo i le mamalu o Faauluuluga o Matagaluega ma Faalapotopotoga Tumaoti a le Malo ua faatasi mai i lenei taeao, malo le onosai malo le tautua Malo, o outou lava e lima ma vae i ai le Faigamalo onosai i tiute ma faiva. Ou te faafeiloai foi i le paia o le Aufaigaluega galulue a le Atua i so o se fatafaitaulaga o le atunuu, se ua faamalo tatalo. Ua manuia faiva o le Malo ona o la outou faanonogamanu i le Atua ua mata faigofie ai lo matou valaauina.

Ou te faatalofa foi i le faafofoga tapuai mai a le Faigamalo o Tutuila ma Manu'a, le afio o lau Afioga i le Kovana ma le Lutena Kovana le paia o le Faigamalo i Maota e lua ma le mamalu i sui usufono uma o le Palemene. O le paia lava lea aua le motu o Salaia le paia i le Faleagafulu Sua ma Aitulagi, Saole ma Saleaamua, Ituau ma le Alataua ma le Launiu na Saelua. Ae tainane foi le paia o le Motusa i le Laau na Amotasi, Faatui o le Motu ma Tootoo o le Faleula ma upu ia te oe le Manuatele. O paia sauo'o ia ma paia maualuluga ia o Samoa mai lava i le oneone le ufitia seia pai'a le pa sopoia o le a nuunuu atu faatini o Tausala. O upu lava e fai i le gataifale, se ta te momoo lava i ni ia ae manumanu i le upega aua o le upega e tautau ae fagota.

Ou te tautala ai ma le faaeteete e faafeiloa ai isi ou itumalo pele o Gagaemauga Nu. 3 e amata mai i fanuatanu ma asofaatau siligā ma fale faama'oa i tulagā ma malaē e o'o atu lava i malo amata. Ae matua lava le tu'u i lou tupua tasi i lou malaefono i Falefagamalo. O le paia lava lea aua le afio o le Aiga Sa Pesetā ma lo outou maopu, alaatai o Leusoalii ma le nofo ituaiga o le Faleiva ma upu ia te oe Matautu o le faamaluga o Malo. E momoli atu le faafetai tele i le taele o lo'u loto i lo outou paia aua le afio o Suisala o le nofo a matua i le Aiga Sa Peseta, afio mai Lilo ma Lemaveve, alalatai le mamalu i le Atofa'i ma tino o le Fa'i ma upu ia Matautu, faafetai i la outou faaaloalo. Ou te momoli atu foi i le agaga maualalo le faafetai i le tatou afioaga i Satoalepai, le paia aua le afio o Maiava aea le susu o Mataia o le Aiga Sa Peseta maliu mai lau fetalaiiga Mauigoa o oe o le Aitutagata ma upu ia Satoalepai, faafetai i la outou faaaloalo. Ou te momoli atu le faafetai tele i le tatou afioaga i Fagamalo se o outou a o Tootoouli o lo o outou si'i ma faafaileleina upu aua le mamalu o le Tupua o le Tui Fiti i Falefagamalo e tapuvae tasi i ai lo tatou itu o Malo i ana meatetele e fai.

Ou te momoli atu foi le faafetai tele i le tatou afioaga i Lelepa o le upu moni o tatou lava o le nuu e tasi, e tasi lo ta faalupega, tasi lo ta faasinomaga, tasi lo ta fatu, tasi le ta savali o Sua ma Faalea. O Matautu o le Muaautasi o le Usoga a Pule o oe o le Muaaufaalele a o le Muaautau foi e te lave i manino e te lave foi i le ava lea na afua ai ona ea le fua a Salafai na limulimua i Manono, lea na faaigoa ai le vaa na fealuai i le va o Upolu ma Savaii o le Limulimutau. O pine faamau na o Matautu. Ioe, si ou nuu pele o Avao si ou nuu o lo o tanu ai lo'u pute i le papa o Misi i le vaega tonu o lo o tu ai le maa faamanatu na liliu ai le Tusi Paia i le Gagana Samoa. O lona uiga o le tama a le elele, ua e masani i le saili malo lea ua ou oaoa ai i Faleseu ma ou see i Maaomalie. Aisea? Leota ma Aiga o oe o le Tama Faasausau o Matautu o oe ua faalanu maaveave, a o oe foi e te lave i le manino e te lave i le aua aua o oe foi o le Tama tau Lepea ma Vaitagutu. Lau fetalaiiga Leiauloto Galuvao ma Nafaitoa, lau Afioga Tuipoloa Tivai Tataimata Seuamuli ma Tiatia ma lo outou siapo lautele e le vaea. Faafetai i la outou faaaloalo lea ua matou pale ua pale, ua titi foi ua titi, ua ula foi ua ula ona o la outou pule to ua mafua ai ona lagona so matou leo i le Maota mamalu lenei. A o ai le tagata faatauvaa ua outou filifilia ai au? Ioe o au nei a o oe taeao. E leitioa a toe fesili le auauna a le Atua ia Iese; 'Iese e i ai se isi tama?' Fai mai le tali a le toeaina, ioe ae na o Tavita o lo o i le vao o ia o lo o leoleo manu a le aiga. Fai mai Samuelu; 'alu se feau e sau, le tama lena na fetalai mai ai le Atua fau'u

loa.' Lo'u nuu e, e tele au tamafanau e i ai faailoga ma le atamamai tele ae ua outou aumaia lava lo'u faatauva. Aisea? Ua outou fesili muamua i le Atua aua o le Atua o le Atua o Malo, o le Atua o lo tatou faasinomaga o Ia e faasinoala ma faatonufoalauina lo tatou lumanai. O le mea lea faamanuia le Atua i le saofaiga a le tatou nuu. E faapitoaugafa sau faafetai i lou pitonuu o Vaipouliaasa le paia aua le afio o Pese ma Mautele, alaalatai o le falefa o Sa Osofia ma le mamalu ia Sa Aula ma le faamaluga o Malo. Faafetai tele i lo outou fai uso moni tou te manatua o lo outou vaito'a manogi ma le palapala i o outou tuamaota, a o lea ua fai nei ma vaimalu ma vai tele o Matautu e tua i ai le galala ma le vaivai. E leitioa upu e fai ia Falealili, 'e ta fia pa'i e i le vai o tama.' Ia tapuai laia ma le manuia se i taumafai so tatou sao ia Manuvao. Saleia o oe o le oneone sina e le i soona tuua oe e le Atua e te tupito i le tatou nuu e te tova i le Gagae ma le Gagaifo e fai oe talipupuni i taimi o faigata. Ua le ese foi oe ma le tagata vaai e pei ona aumai e Afioga Paia a le Atua, o ou faiva alofilima e ola ai le nuu. A lea na e tomua i malae i le taimi o le ta Faiga Palota, o lau tamua na maua ai a'i na maua ai foi malo. Faafetai i le paia i le afio o le alo o le Lilomaiava lau Afioga Paleitoga, alaalatai o la outou tofa faapea Saleituga ma le Vainalelepa. Ia tapuai mai laia ma le manuia se i ou taumafai e taina nisi ai faasili mo lo ta itumalo i lenei 5 tausaga o lenei Paeaiga.

O lau faafetai faapitoa mo le Aiga Sa Levi o lou itumalo, le Tama faaleagaga i lau Susuga i le tausi Matagaluga ia Rev. Pulea Tiimalu ma le faletua o le Ekalesia Metotisi i Avao, faafetai tele le tatalo faamanuia le Atua i le galuega. Lau Susuga i le faafeagaiga Leota ma Aiga ma Matautu Rev. Tavita Kirisimasi ma le faletua EFKS i Avao, faafetai le tatalo. Lau Susuga Siaki ma le faletua o le Ekalesia VOC i Saleia manuia ou faiva ma tofiga, e le galo afi'a i le vao tusa lava pe faaopea i nuu ese ma Tumua nei. Ou te manatua lava le afiafi ina ua tolaulau le Faiga Palota, pau lava lea o la outou valaau, 'Nafaitoa vivii ane ia lou loto i le Atua faafetai mo mea uma.' Lau Susuga Sileli ma le faletua e le galo la outou tapuaiga EFKS i Fagamalo faafetai tele le tatalo, lua Susuga i Epikopo Samu ma Seuamuli ma lua faletua o le Ekalesia Mamona i Fagamalo, faafetai le tatalo. Lau Susuga Salesa ma le faletua o le Ekalesia Katoliko i Safai faafetai mo le galuega, lau Susuga Afa ma le faletua o le Ekalesia Assembly i Safai faafetai le tapuai, faafetai tatalo ia faamanuia le Atua i lo outou feagai ai ma le galuega ma le valaauina e le faigofie. E le galo Afi'a i si ona vao lau Afioga i le Fofoga Fetalai i lau Afioga i le alii polofesa i lau Tofa Faamoetaulao Dr. Faale Tumaalii. Malo taalo faatausala, faafetai tele le faatamalii, e ui lava o le iuga o le faiga filifiliga a lo ta itumalo ou te faaauauina au galuega lelei e ala i le Nofoa lea ou te nofo ai i le Palemene, a o upu a le sui usufono, se o oe lava o le toa, faafetai i galuega e tele sa e taulamua ai mo se manuia o lo ta itumalo. O nisi mea ua maea a o nisi mea e le i maea ia o lea o le a ou faaauauina le ta galuega lelei mo ta tagatanuu. O upu masani lava o le Talalelei, tapuni le isi faitotoa ae tatala e le Atua le isi faitotoa i le tagata e matau ma faatuatua ia te ia.

O lau faafetai mulimuli i lau Komiti i Upolu nei ma Savaii, faafetai tele i lo outou lotomau i le mea moni, faafetai i la outou galuega sa outou fitaituga ai i le taimi o le Faiga Palota. A lea ua tatou futifuti manuula ina ua pasioa paioa, ua tonini foi tonana ina ua tali faaaliali le Atua o Sapaota i la tatou tatalo sa fauao, faupo ia sagai ane laia o ai o le tai e tauave faatasi lo tatou tofi aua ne'i toe mamulu. Ia e faafetai foi i si o matou aiga i Samoa nei ma atunuu i fafo, e le galo la outou lagolago malosi lea ua manuia ai lenei faamoemoe. Si ou toalua Susiana ma le fanau, faapea fanau a fanau ma fanau a fanau e le i tutupu mai, malo le lototetele i le Alii. Faafetai mo fautuaga ou te alu i lenei taaloga taumatemate, ae moni ai upu o tatou fono tatalo e faia soo, e leai se mea e faigata i le Atua. A lea ua tau lo outou ai, fai laia ma faaputuga maa i lena itu o le vai e fai ma molimau i le Silisiliese o le Atua. A fesili atu a outou fanau o le a tutupu mai a taeao, ona tau lea i ai o le Atua na Ia faia ia mea sili e le o le tagata. Faape laia i nifo o le fatafaitaulaga ma susunu se i oo a'e lona manogi i le Atua e fai ma faaailoga o Lona alofa ma Lona faamaoni.

Lau Afioga i le Fofoga Fetalai ona ou oo mai lea i le faamoemoe o lenei taeao le Tala Faatatau o le Tupe 2016/2017. E fia faamauiina le faamalo ma le faafetai a lenei itumalo i lau Afioga i le Minisita o Tupe.

O le faataotoga o le Sini Autu o le Tala o le Tupe o la e taoto ai ni upu lelei e faapea, '*faamalosi i le faavae ma tapena mo a taeao.*' Ua ou manatu ua lalago faatasi lelei ma le faamoemoe o le taiala mo le atinae o Samoa 2016–2020 o lo o manino mai ai le taua o le ola fuafua tatau i seleni ua maua e o tatou lima, living within our means. O lau faitau atu i le Tala o le Tupe o lo o i ai se naunautaiga i lau Afioga e faaitiitia aitalafu mai fafo ae taumafai tatou lava auala ina ia acina ai ni tupe ina ia mafai ona tua lava tatou i lo tatou lotoifale e aunoa ma se ola faalagolago. O le faafetai tele lea a lenei itumalo aua o le upu moni lau Afioga,



e lelei a fesoasoani mai fafo ae le umi. Ua silafia lelei e lenei Maota e i ai taimi e ta aofai ai foreign aids, meaalofa e aafia ai lo tatou tamaoiaiga, ae lelei lava lo tatou tapenapena mamao atu, tatou te le iloa taga e fai i le vasa pe a tatou motu ma le taula. Lau Afioga i le Minisita o Tupe, tatao i lenei, matou te lagolagoina ma le faamoemoe le Tala o le Tupe.

Lau Afioga i le Fofoga Fetalai, e tuuina atu ni talosaga a lenei itumalo, e taumafai lava e faapuupuu se lauga e alofa atu i le galuega, ma le faamoemoe pei ona saunoa i ai lau Afioga i lenei taeao. E lua ni talosaga tetele ua tuuina atu e lenei itumalo i lau Afioga i le Minisita mo le Siosiomaga ma Punaoa Faalenatura, ua taoto i ou luma se talosaga tusitusia a lenei itumalo. Matou te valuvalusia ai aa o le fau. A silasila a outou Afioga i Matautu, tasi lenei o itumalo o lo o taoto ai le tele o faletalimalo, beach fales iloga o le atunuu. E autovaa atu foi le toatele o tagata tafafao e fia nonofo ai. Peitai, ua amata ona sola lona oneone sina ua amata ona sola. A o ou laitiiti, o le mea lava lea sa ou mimita ai. Peitai i lenei vaiata, ua sola le oneone, o mea ia e avaga mai ai, e tosina mai ai loto ma manatu o tagata tafafao mai e fai ai Samoa ma penina o le Pasefika, o tatou matafaga.

Lau Afioga i le Minisita mo Punaoa Faalenatura ma le Siosiomaga, o la matou tatalo, se i e asiasi atu lava se i o matou talimalo i lau Afioga ma e silasila i le tulaga o lo o taoto ai le afaina tele o matou gataifale, ma le tele o faletalimalo lea e tua i ai le Malo i lana atinae o turisi, Tourism Industry, e lagolagoina tele e lenei itumalo. O le tatalo faatauvaa, na gata lava nai maa talu ona uma le afa o Valelia, e oo mai i nei aso, o la e lava e taumafai nisi vaega ua tele ina aia o itumalo, ae moomia le lagolago a le tatou Malo. Ma le faaloalo lava. O upu lava e pei ona taua e se tasi o sui usufono i le taimi ua mavae, o ai ea na manatu o le a fai oe ma Masiofo e te laveai i manaoga ma faigata o lenei aso? Lau Afioga i le Sao Faapito, o le faaoololomaau lenei i lo matou tulai mai, masalo na tuitui foi e tama ua mavae atu o lea foi ua matou toe tuitui atu ma le agaga faaloalo i lau polo faasoa ma le lufilufilima lelei, o se taimi o i luma o lenei Paeaiga ua faatino, o lau pule lea, faafetai.

Lau Afioga i le Minisita mo Galuega, Felauaiga ma Atinae Eeseese, o lenei foi ua taoto atu se talosaga tusitusia a lenei itumalo i galuega mo auala galue, o lea lava ua maitauina ma le totoā le Tala o le Tupe, tatou taumafai e tua lava tatou ia tatou ma le faamoemoe atu i le tele o mea.

O le agaga o lenei itumalo lau Afioga i le Minisita mo Galuega, lau Afioga i le Palemia, o lenei ua taoto i ou luma le matou talosaga tusitusia, o le a se aso o le a se taimi e oo ai i ai lau faasoa, matou te momoli atu le faafetai tele i galuega faatino ua maea pei o le auala galue i Fagamalo. Ua toe o se aga ona maea lea o le talivai o lo o faatino nei i tua o Saleia ma le aualalaupapa. A o le agaga e fia fautuaina ai galuega tetele faapea, e i ai le talivai a Saleia, se i toe silasila ane lava a oulū Afioga, i mea o inisia....

I timuga ma tafega talu ai nei, na ati mai le vai, maimau le tele o tupe. Maimau e pe ana ou i ai i le amataga, na ona tanumaa o lalo, faasima le tumutumu. A oo ina sau tafega, e toe lolovaia uma Vaipouli ma Saleia, lea na tulai mai. O lona uiga e tatau ona toe silasila i ai ma asiasi i ai i ona tulaga foi o konekarate ina ia aoga le tupe a le Malo e fesoasoai mai i le tatou saogalemu aua ne i soona faaogaina i le tulaga le talafeagai ma le faatinoga o galuega. O nai talosaga tetele ia a lenei itumalo, ae i ai nai fautuaga laiti o lea toe lima minute.

Lau Afioga i le Minisita mo Faamasinoga, o le matou fautuaga, aisea ea ua le toe faaauau ai le faatinoina o faamasinoga savali i itumalo taitasi, lea sa masani ona oo atu le faamasinoga ma faatino i itumalo. E i ai le itu taua e pei ona ou molimau a o ou galue i le Ofisa o Leoleo, sa fesoasoani tele i le puipuia o soligatulafono, aua a tulai se taulealea po o se tama solitulafono i totonu lava o lona itumalo, e maua uma i le vaai a lona itumalo, e pei ni leoleo alii ma faipule, e matamuli e tulai. O lona uiga e taua tele le ave i tua o le service e faigofie i le atunuu, afai ua determine. e deter ai le atunuu mai le soliga o Tulafono, o le mea lea sa ou molimauina, o le fautuaga, se i toe silasila ane i ai, e a pe a toe faaauau le mea lenei, i lo le tau malaga mai i Tuasivi, e taugata femalagaaiga. a o le tiute lea o tatou Taitai o le Malo, e faafaigofie le auaunaga mo le mamalu o le atunuu. Ae taua mo le saogalemu ma le puipuia mai le soli o tulafono.

Lau Afioga i le Minisita mo Aoga, lau Afioga i le Toetaufanua a le Malietoa, e le toe tau fai atua se matou tala. O le talosaga lava lea e tasi, masalo pe na e silasila i le Televisa ma nusipepa, tamaiti o lenei itumalo. O le quality la e i ai o le matua lelei lava, lea na aifilofilo, na sili le isi tamaititi i le tusigatala, ma maua prize, tulaga lua isi i le Year 11, Year 12 ma le Year 13. O le agaga maualuga lau Afioga i le Minisita, e le mafai ona faatino pea ni nai vaega o asiasiga se i silafia ai e le Matagaluega tulaga o lo o i ai le quality o

aoaoga ina ia faatupulaia pea ma improve a tatou aoaoga i o matou afioaga i tua ma Savaii. O le mea lea e tuu atu ai le fautuaga, o lena e i ina le uto a le faimea.

O le isi foi vaega se i faamolemole fai ma asiasi ane, e manaomia lo lua tomai ma Tapuai. Tasi lenei o nuu e toatele ana tamafanau i le Manu Samoa, o le Itu o Tane o lo o faatino le matou galuega. O le mea lea, e moomia le fesoasoani.

Ia, faamuli sa matou fautuaga e le o se talosaga a o le fautuaga i le Minisita mo Faatoaga, e moomia lava e le matou itumalo le toe faamalositia o le totoina o tatou niu, aua e tua i ai si o tatou atunuu ma lenei itumalo. O le fautuaga, toe silasila ane ina ia faaauau pea le tatou polokalame lea e talia e le matou itumalo.

O nai motugaafa ia a lenei usugafono e faauma atu ai se matou lauga a lenei itumalo ma faapea atu ai i lau Afioga i le Fofoga Fetalai, faafetai mo le avanoa ua tatala mai mo lenei itumalo e tatala atu ai so matou vaivaiga aua le Fonousu a Samoa. Tau ia ina alofagia e le Atua, ua se toa ma lau Afioga i le fitaituga i le galuega. O la matou tatalo, ia alofagia e le Atua ia foai le tofa ma le moe foi i lau Afioga, ae a le faafoefoaina o le Maota o Samoa.

Lau Afioga i le Aloalii lau Afioga i le Palemia, malo le tofa, malo le faatoatoa, malo le onosai i le taitaiga o le tatou Malo, e tele fita ma faigata, ae lagolagoina e lenei itumalo. O le mea lea, ia alofagia e le Atua le tofa sasaa i lau Afioga aua le foaina o le Sa o Samoa. Ia, le lagolagosua a lau Afioga i le Sao Faapito ia i ai le tofa a le Atua i le saofaiga a le Kapeneta, ia lototetele, ia liligi mai le lagi faamanuiaga e faafoefoe ai le tele o faafitauli na tagisa ai sui usufono mamalu uma o le Palemene aua le faaauauina o tiute ma faiva ua valaauina ai ae matou maloloina i le alofa ma le agalelei o le Atua. Faafetai.

## **23 IUNI 2016**

**Afioga TAPULESATELE MAUTENI TAMASONE METULI II ESERA (Vaisigano Nu. 2):** Ou te tulai atu ma le ava tele i lenei taeao fou e pei ona i ai le Fonotaga a le tatou Palemene. Faafetai mo le avanoa lau Afioga i le Fofoga Fetalai, e le tele lava ni manatu ma ni fautuaga aua le tatou galuega.

E itiiti foi se manatu i le Tala o le Tupe, ona faaiu lea i se tulaga foi e fia faailoa atu ai nisi o mea o lo o manaomia e lenei itumalo. O paia o le aso lenei, o paia o le Atua soifua, o paia o le tumu a le Atua, o le Atua le Tama, le Atua le Alo, le Atua le Agaga Paia.

Tulouna ia le Afaigaluega paia a lo tatou Atua Silisiliese, a o paia faale-Aganuu, o le malu o paia e le popo, o paia e faavavau. Tulouna ia le tapuaiga a Lana Afioga Mamalu O Le Ao o le Malo Tutoatasi o Samoa. Tulouna ia le faafofogaaga ma le tapuaiga a Samoa atoa ma si ou itumalo. Tulouna paia faa-Palemene, o paia o le Maota Fono Aoaofaitulafono. Ona ou gagana lea ma ou faapea, tulouna ia Lana Afioga Mamalu O Le Ao o le Malo Tutoatasi o Samoa lau Afioga Tui Atua Tupua Tamasese Efi tainane lau Masiifo. Tulouna le paia i Sui o le Fono a Sui Tofia, lau Afioga Tuimalealiifano Vaaletoa Sualauvi le II ma lau Masiifo, lau Afioga Le Mamea Tuiletufuga Ropati Mualia ma lau Masiifo, lau Tofa Tuiloma Pule Lameko ma lau Masiifo. Tulouna lau Afioga i le Palemia lau Susuga Tuilaepa Auelua Fatialofa Lupesoliai Neioti Aiono Dr. Sailele Malielegaoi. Lau Afioga i le Sui Palemia lau Afioga Fiame Naomi Mataafa. Le paia i le Kapeneta, Minisita Lagolago aemaise sui usufono mamalu uma o le Palemene.

Tulouna lau Afioga i le Fofoga Fetalai lau Afioga Leapepe Taimaiono Toleafoa Faafisi ma le mamalu o le Ofisa o le Fono Aoaofaitulafono, tulouna lau Afioga i le Faamasino Sili, lau Afioga Patu Tiavaasue Falefatu Sapolu. Tulouna le afifio o Faamasino uma, tulouna le mamalu o le Ofisa o Faamasinoga. Tulouna le mamalu i Faauluuluga o Matagaluega ma Faalapotopotoga a le Malo o Ulu o Pisinisi.

Ae tulouna ia le tapuaiga i lena itu o le vai i lau Afioga i le Lutena Kovana ma le mamalu o Sui o le Maota, ae tainane le atoa o le motu i Sasae. Ia nuunuu atu ia, ona ou faapea lea, tulouna ia le paia i Tama ma Aiga, Tama ma o latou Aiga, Pule ma Tumua, Ituau ma Alataua, Aiga i le Tai ma le Vaa o Fonoti. O paia lava ia i Aiga o Tupu, Aiga o Nofo, Aiga o Papa ma Aiga na Tafaiifa.

Tulouna le paia i le motu i Sasae i le Faleagafulu, susu Sua ma le Aitulagi, Ituau ma Alataua, Saole ma Saleaamua. Le paia i le motu i Manua i le afio o le Laau na Amotasi, Faatui o le Motu ma le mamalu o le Tootoo o le Faleula ma upu i le Manuatele.

O paia na o le Tama o i le lagi e afua mai i Malaetele seia paia Fili ma Puletuu. A o le paia o le mea nei ne'i ou laaloa, afifio mai oulua Tama a le Fale, Afio mai Faumuina, susu mai Mataia, susu mai Seiuli o le

Alo o Malietoa, afio mai Tapaau e lua o Letele ma Mataafa, tulouna oe Faleata o oe le Tauaitu o le saofaiga a Atua. Tulouna lo outou Toafa o Igoamatua, le Pulelua ma le Faiga ma le nofo a Pule.

Ona oo lea o se faamatalaga i si ou itumalo. Tulouna ia le paia o si ou itumalo o Vaisigano Nu. 2 o Sataua, Papa ma Fagasa, o le paia lava lea o le afioga i Aiga, e faapea le falefa o Sataua ma Lealuga.

O Aiga o Tupu, Aiga o Nofo, Aiga o Papa ma Aiga na Tafai. Susu mai alii o le nuu ma Luapitofanua ma Ufagalilo ma lo outou Maopu, faapea foi le fetalaiga ia Aumua ma Maninoa, o Utuutu ma Faitau. O paia ia ua liligo ma pa'i ai le fogatia le faanuualii ma le tupua i faupapa ia iloga ia paia na. Ae mua ia se faamatalaga ma se faamalo i si ou itumalo o Vaisigano Nu. 2 aua e fai mai le isi fuaitau; 'e tulagamua le suemutu a le tamalii ae talitali le tulafale.' O lea ua a'e malo le taumafai ua manuia le Faiga Palota, o lea ua tu i matagiolo ma sausau i le moana. Le tapuaiga i Faafeagaiga uma o Ekalesia uma o lou itumalo aemaise uso a auauna o lo o faanonomanu aua se manuia o le itumalo ma Samoa atoa. Faafetai i la outou tatalo ma la outou tapuaiga.

E momoli atu le faafetai tele mo le galuega a lau Komiti, faafetai le tauivi faafetai i lo outou galulue maeaea ma le faamaoni, faafetai i lo outou finagalo manumalo, o lea ua iu ma le manuia lau faatamasoalii. Le mamalu e i aiga uma o si ou itumalo ma le taumafaiga aua se manuia mo tagata uma, faafetai i la outou lagolago.

Ae ou te faatauaina lava lau faafetai i le Tofa Motuopuaa Uifagasa Dr. Aisoli Vaai o le sa tulai mai i le Nofoa o le itumalo ona o lona finagalo malie atoatoa, e tapuaia ma lagolago i lou pale mai. Faafetai mo galuega lelei sa e faatino ua faamalo le malolo faatausala. Ae o se leo o le tautalaga i nai o maua aiga uma i Samoa nei ma atunuu mamao, faafetai i lo outou finau malo ma le finau faatamalii. Ua manuia faiva o le tama, faafetai, faafetai, faafetai tele mo galuega ua iu i le tulaga manuia ma e viia ai pea Lona alofa tunoa.

Lau Afioga i le Fofoga o le Fetalai, o le a faaleo ia nai manatu ma nai fautuaga aua fuafuaga alu i luma mo le manuia lautele o tagatanuu uma. Ou te fia faailoa atu foi i lau Afioga i le Fofoga Fetalai, e lagolagoina e lenei sui usufono le Tala Faatatau o le Tupe 2016/2017, ma o le a fai i ai se manatu itiiti i se taimi o mulimuli mai.

Ae e muamua lava ona ou aveatu le faamalo ma le faafetai i lau Afioga i le Palemia ma le Faigamalo mo galuega lelei uma ua faatino i nei tausaga e tele ua tulai mai ai lona Vaega Faaupufai. Faafetai le galulue ma le alofa mo le lumanai manuia o Samoa ma ona tagata. O nai motugaafa mo le Faigamalo e faatupu manatu ma lagolago atu ai i lenei galuega i lenei Paeaiga aua e fautele lo ta Sa. E auala atu se manatu lau Afioga i le Fofoga o le Fetalai i le Palemia ma Minisita o le Kapeneta. O si vaega lau Afioga i le Fofoga Fetalai o le vaega muamua, ia silasila lau Afioga i taumafaiga ma fuafuaga mo le faaleleia atili o tulaga i aoaoga i totonu o Samoa. E i ai lava le talitonuga o lo o faagasolo faapea ia tulaga i fuafuaga a le Malo. Ia faataua ma ave pea le faamuamua i aoaoga e le gata i vasega laiti a o vasega maualuluga ma Iunivesite i potu aoaoina i tomai eseese ma tomai faamatata aua le atinaeina o Samoa. E faafetaia lava le taumafaiga a le Malo pei ona i ai le fesoasoani tau tupe i totogi o aoaoga i vasega laiti. Ae a talafeagai i se finagalo a le Malo ia iai se fesoasoani mo tamaiti aoga ma nai o latou matua mo le faatupeina o aoaoga i le Iunivesite ina ia faigofie ai le olaga aoaoina.

A tusa ai, ia fesoasoani le Malo e taumafai ia faia se tulaga faaunegatupe e faafaigofie ai ona maua tupe mo le totogiina o pili i le Iunivesite mo le potu aoaoina o tomai eseese ma tomai faamatata ma ia aiaia ma faatulaga lelei, ina ia lelei faatino le toe totogiina o ia tupe e tamaiti aoga ma matua. E ese mai ai se lagolago a Faletupe ina ia maua aloaia lelei ai le ola aoaoina. Ua matauina lava le i ai o lenei faafitauli tuga i aiga ua agavaa fanau mo le ulufale atu i Iunivesite i le tau sailia o ni pili aoga. Ae tatalo atu ai mo se tulaga fesoasoani i le finagalo o le Malo. O le isi tulaga ia faataua pea le tulaga e faatatau i le aoaoina lelei o faiaoga e le gata o faiaoga o vasega laiti a o vasega maualuluga. Ua tulai mai pea ma molimauina le tulaga faaletonu i nisi o mataupu i le lē atoatoa o le tulaga tau le agavaa o faiaoga, ma atili ai le toaititi pea o tamaiti aoga e aoaoina mo nisi o mataupu, e i ai le matematika ma le faasaienisi. Ia tumau pea le maua e faiaoga o avanoa e toe suesue atili ai lo tatou tomai eseese faafaiaoga ina ia ogatasi ai ma tulaga o le soifuaga faaaoaoga alu alu i luma i metotia ma faiga faafaiaoga. E faafetaia foi le Malo i le tulaga ua mafai ai ona toe galulue nisi o faiaoga ua malolo ae o lo o lava pea le malosi o le tino ma le mafaufau e faatino ai le latou galuega. Ae tatalo foi i le Malo ia faamautu pea le tulaga lelei o totogi o faiaoga.

O le isi vaega lona lua lau Afioga i le Fofoga Fetalai, ia silasila le Malo i taumafaiga mo le faateleina o galuega mo tagata uma e moomia ni galuega i Samoa nei ma ia taumafai pea ia i ai ni pisinisi tetele i totonu o le tatou atunuu. E talosaga atu i le Malo ina ia taumafai pea mo ni pisinisi tetele mai fafo ia faatinoina i Samoa nei aua le faaaogaina o taleni ma tomai o tatou tagata. Ua maitauina lava le toatele o fanau ua iu mai i aoaoga, ae ua le maua lava ni galuega. O nei taumafaiga a le Malo mo ni pisinisi tetele e pei o le Yazaki Samoa, ina ia faaulu mai i Samoa nei e moomia lava le i ai pea o fuafuaga fesoasoani, po o faatosina a le Malo mo pisinisi faapenei tau amata e faamautu ma faatosina mai ai nei ituaiga pisinisi tetele. E talitonu lava e le tatau ona faimea tuulafoai le Malo i lea tulaga, ae ia taulamua ma finau malosi ina ia lava nei ituaiga pisinisi i Samoa. O le isi tulaga lau Afioga ia silasila pea i ai le Malo, o le taumafai lea ina ia faatupulaia ni avanoa mo galuega faa-Matata po o le Aperenitisi aua lava le taumafai ina ia mauagofie ni galuega faigaluega mo le toatele o tamaiti i'u mai i aoga maualuluga ma le Iunivesite e fia aoaoina atoa ai ma tagata matutua e agavaa mo le aoaoina mo ia ituaiga galuega. Ia taulamua le Malo i le faatinoina o faatosina e auala i fesoasoani mo pisinisi e fia auai i sea fuafuaga mo le faafaigaluegaina o tagata e agavaa mo le faopoopoina pea o nei avanoa faigaluega mo le atunuu. Ia mautinoa lelei foi ia aua lava ne'i faatamala le Malo atoa ai ma le aufaipisinisi i le aoaoina o potu mo tomai faa-Matata.

O le vaega e tolu lau Afioga i le Fofoga Fetalai, i le tulaga lava tau galuega mo o tatou tagata. E tatalo atu i le Malo ia silasila i se faiga e mafai ai ona agavaa galuega faavaitaimi e i ai le tau apu ma le tau vine. E pei ona malaga ai o tatou tagata i Niu Sila e galulue ai ina ia agavaa lea tulaga mo le Quota po o le Se'i mo le Nofomau a Niu Sila pei ona i ai nei.

Ia faatumauina ma faamausali atili pea le faiga paaga a Samoa ma Niu Sila faapea foi ma le tatou faigapaaga ma Ausetalia mo galuega faavaitaimi pei ona auina atu ai o tatou tagata e faigaluega ai. Ae i le tulaga lea i le tatou faiga paaga ma Niu Sila, ia maua pea ia avanoa e o atu ai e galulue i Niu Sila i galuega faavaitaimi nei. Ia vaavaalua pea ma le avanoa o le Quota i tausaga taitasi o lo o i ai nei ma Niu Sila. Ona o se tulaga la ina ia faafaigofie ai ia le isi vaega lea o le Quota, ia toe silasila le Malo i le tulai mai pea o le faafitauli o le lē maua o ni galuega aua le faamalieina o le isi vaega taua lea o le Quota a Niu Sila ae ia faatauanau pea le Malo o Niu Sila mo se faiga e agavaa le galuega faavaitaimi mo lea Quota i ni tulaga talafeagai lelei, ina ia faigofie ai ona maua e o tatou tagata avanoa faanofomau agai atu ai i le ave ma tagatanuu o Niu Sila.

Ona ou oo mai lea lau Afioga i le vaega lona fa. Ia silasila le Malo i taumafaiga ma fuafuaga mo le faaleleia atili o le tulaga i faatoaga ma faigafaiva. O si tulaga muamua lea, ia mataala le Matagaluega ma ia taofiofi i nisi o faaitaiga po o ni tulaga faavaifofo le mautonu ma le talafeagai e toe faaofi mai i Samoa e nisi o a tatou paaga. Ua tele ni tulaga faaletonu i laau, manu felele po o nisi foi vaega o meaola ma meatoto ua matauina le tulai mai ma aafia ai lo tatou siosiomaga, ona o ia fuafuaga ma faaitaiga le mautonu. E lelei lava le silasila totoa i nei tulaga faaletonu, ia aua ai lava ne'i toe aafia lo tatou siosiomaga i ni manu faalafua po o ni tulaga pagatia i meatoto ma manu. O le isi tulaga e tele lava nisi meatoto ua taumafai pea le Matagaluega o Faatoaga ma Faigafaiva e faatino ma atina'e ae le o tulaga lelei lava. O lea e taua ai se manatu ia se fuafuaga mo le toe atinaeina o meatoto ua molimauina tulaga lelei mo Samoa, e i ai le koko samoa i nuu ma itumalo e lelei ai lea tamaoaiga aemaise ai lo matou itumalo ma ia faatauanau lea tulaga e le Matagaluega ma ia faia i se tulaga faapaaga, aua o se fua o faaeleleaga ua matauina le moomia mo le fofoga taumafa aemaise o fale gaosioloa atoa ai ma le auina atu i fafo. E talosaga atu i le Malo ina ia fesoasoani e faamautuina le maketi i fafo mo koko ona o lo o mafai pea ona ave lea fua o faaeleleaga ma tamaoaiga mo le tele o aiga o le atunuu atoa ai ma ni maketi mo isi meatoto either ma mea gaosi. O le isi tulaga lau Afioga i le Fofoga Fetalai, ia faataua pea ma faamalosi e le Matagaluega le fagotaina o le gataifale i tulaga e faasaoina ai ia ma figota i faiga e saogalemu ma malu ai pea ogasami o Samoa aua le fofoga taumafa ma le atinaeina o le tamaoaiga o le lautele o tagata o le atunuu, ona e le gafatia pe mafai foi e le toatele o tagata, ona o le utiuti o le faaso, ona faatino nisi o ituaiga nisi tulaga faafaigafaiva i le sami loloto.

O le isi tulaga e fia agai i ai se faamatalaga, ia toe silasila pea le Malo i se avanoa e faatino ai se Fale'ia i le itu Asau, aua o lo o mautu ai le uafu i Asau mo le fetaulaiga mo vaafagota ma fale e faatino ai se atinae. E le gata i lea, o lo o tulaga lelei pea le tele o 'ia i ogasami o le itu Asau.

Ma o le talitonuga, e ono mafai ona avea lea atinae, ma fuafuaga e faigofie ai ona faatamaoia ai le toatele o tagata o le itumalo faapea foi le lautele o le atunuu e maua ai o galuega ma tomai o faa-faigafaiva. O le a faapea foi ona maua ai ma avanoa i nisi o pisinisi ma auunaga e moomia mo ia ituaiga nofoaga, o atinae e tau i le tamaoia. O le tulaga mulimuli, ia silasila pea le Malo i le uunaia ma le faamautuina ma taulogologo pea le Matagaluega mo le lelei faatino o ona tiute.

Ia faapupu atu isi vaega ia e 3 o lo o totoe ona o le finagalo o le Fofoga Fetalai, tele naua le popolega o lo o i ai nei le lalolagi e faatatau i le tulaga e tatau i le suauu ma le penisini po o le fossil fuel o lo o faaaogaina i taavale afi. E tasi lenei o aafiaga, po o le faafitauli e pito ogaoga o le faaleagaina o le siosiomaga, e ui lava ina itiiti ia Samoa nei, tulaga faaletonu atoa ai ma le amanaia ma ia iloga se fesoasoani a le Malo, e alagata lava i le Malo, silasila totoa, ina ia fuafua ma tapenapena mo le faaulufale mai o taavale afi, faaaogaina ai ituaiga paoa po o malosiaga e fesoasoani i le faasaoina o le siosiomaga. Ae faafetaia lava le Malo, ona o le taumafai pea ma le taulamua i le fausiaina mo le faaaogaina loa o malosiaga faafouina i le Renewable Energy mo le eletise o si o tatou atunuu. O le isi popolega tele lau Afioga ua leai lava se finagalo o le Malo i le tulaga lea o le faaofi mai o le tele o taavale tuai second hand e auua ma se aiaiga mo le tapulaa e faatagaina ona faaulufale mai. E faatatau lea i le mauuluga ma le malosi o le kasa o le ea leaga engine emission e aafia ai le siosiomaga. O se tulaga ua matua puipua malosi lava e atunuu atiae, e moni e laititi lo tatou faatupu kasa leaga, ae moomia lava so tatou sao mo le puipua o le siosiomaga, ona o o tatou motu ma isi atumotu laiti ua maitau lava le aafia tele i faafitauli o le siosiomaga.

O le vaega e 6 lau Afioga, o le a faataatia ua le lava le taimi, ae o le vaega e 7, silasila le Malo i le taumafai ma fuafuaga mo le faaleleia atili o le auunaga tau soifua maloloina. E faafetaia le Malo ona o le tulaga maoae ua i ai falemai i totonu o le tatou atunuu, ae tatau foi ona ogatasi mautu o falemai ma le lelei ma le mautu o le faaaogaina ma le faatinoina o auunaga tau soifua maloloina. Ia lagolago ma uunaia malosi e Malo ia faatulaga faagasolo lelei ia galuega ia tusa ai ma aiaiga o faatinoga. E tatou atu ia faamautu lelei i fomai mo falemai taitasi e ese mai ai i Motootua ma Tuasivi, ma ia faapea foi i isi tofiga ma auunaga ina ia saogalemu ai le faaaogaina ma maua ai le ola soifua lelei o gasegase uma. O le mea moni o lo o faaletonu pea le tulaga o le lei o ni fomai mo nisi falemai. Ia ma lea, ua maitauina lava le faaletonu pea, maua ma le leai o vai manaomia, ia silasila pea le Malo mo le soifua manuia o tagata ina ia ogatusa le lelei o meatotino, le Pulega ma le faagaioina o le Matagaluega, atoa ai ma le faatinoga o galuega....

Ia o le a taatia le tulaga lea i le vaega lona 8...

E leai se tulaga lea lau Afioga i le Fofoga Fetalai e faatautee i lau saunoaga ae ne'i te'i foi ua faapea nisi sui ua ta faifai mea faatasi ona i ai lea o nisi tulaga faapena. A o le manatu e pei ona e saunoa, o le a faapena ona fai.

Ae lau Afioga i le Fofoga Fetalai, faafetai, ua faataunuina lau lauga i le aso lenei. E taua tele lenei aso i si ou aiga. Ia manuia tele le tapuaiga O Le Ao Mamalu o le Malo o Samoa, malo foi le faafogafoga, aemaise si ou itumalo, e amata mai i mauga tetele seia paia mauga iti. Fai mai le isi fuaitau e masani ai tautai o le faiva loloto e faapea," e to iu le asa." O lona uiga, e taumafa lava le ia ua polo, ma sii le atu o le vaa, e asa lona faatamasoaliiga. O le talosaga i le Malo, ia manatua mai si o matou itumalo o Vaisigano Nu. 2, nai o matou nuu o Papa, Sataua ma Fagasa. Le Palemia e ma le Faigamalo, o lona ua solo le lavalima, ua manuia lau faatautaiga, ia fasoaso lelei lou tamaoia, lau ato ponapona nei vale faaso. Ia folau ia i peau o manu, ae matou tapuaia outou faiva a manaia. Soifua.

## **23 IUNI 2016**

**Afioga SULAMANAIA FETAIAI TAUILILI TUIVASA (Vaimauga Sasae):** Faafetai i lau Afioga i le Fofoga Fetalai mo le avanoa, ae o le sui usufono lenei mo Vaimauga Sasae ua tulai atu. Ae le i faia se faamatalaga i le Tala Autu o le Tupe ua opea nei i le Maota, ou te tomanatu lava i le aso na tofi ai le Fofoga Fetalai o le Maota e avea ma Fofoga Fetalai, na saunoa ai le Fofoga Fetalai e faapea; "O le tofiaina o au, o le a faafaigofie ou tiute aua ua leai se Itu Agai." Ae sa matauina ananafi e lou sui usufono le faigata o le galuega a le Fofoga Fetalai i le tau vaovaoina mai o sui usufono fou ua le mafai ona taofia. Ou te faatusaina lava se i tulou e pei o le taavale afi, se i tulou, ua sau lava, e fiu le leoleo e talotalo atu, ae o la e alu lava. Ina ua maua atu e le leoleo, ona fai atu lea o le leoleo, e te iloaina le mea lea na ou talotalo atu ai ia te oe, e

le o le saosaoa po o se solitulafono, a o lou peleue lauga lena e omia i le faitotoa o lau taavale o lea e tautau mai fafo.

Masalo o se agaga faagaetia ia te au le tofiaina o au ou te vaesalaina le gasu o le taeao mai lava i le siufanua i Saua ina ua ae ma le manuia le aso ma le faamoemoe.

Ae o le a mapu ia i logoe le tapuloa o alii ma le galugalua o vaitoa aua o Samoa o le atunuu tofi, e talatau Toga ae tofi Samoa. Ua malepe le laau nai Siuofaitotoa ma Tulimataala, ua nofo ai nei au ma lou Tumua ma lou Itua ma lou Alataua. E tasi lena faavae o Samoa. Ua malepe foi le tofiga nai le malae o le vavau, o lo o taoto ai le laau na fausia lele e tausi e Leulumoega ma Aana ma Sanaeseese, tasi lena faavae o le atunuu. Ua malepe le i'a na i Mulinuu ma Togafuafua ma Sepolataemo ua maua ao o Atua, uso o Atua, iu o Atua, atua o faiga, Atua o le Fauono, itu o le Tapaau ma le apaautane, ma Atua e le tonu. e matua le tuu ia te oe Lufilufi. Ua taoto foi Puleono ma Salafai, Fuifatu, Vaituutuu, o Finao, Vailoa, Tia ma Matia Itua ma Faletoi.

E le faagaloina foi le motu i Sasae i Malotumau ma Fatulegae, o Laloifi ma le Falesau ma le Faleomavaega. Tulouna foi pou o masame ma Tuisaua ma le Malaetele o ou paia ia Samoa na lua, ae se i ou faasee ia i Muliava ma ou faalanu vai o nofoa aua le ee tapuai o le afaigaluega tofofi a le Atua i so o se fatafaitaulaga e fia o lo o nonomanu aua se manuia o le tatou Faigamalo nei. Aua le afio tapuai o Lana Afioga Mamalu O Le Ao o le Malo, afio le Afioga ia Tuiatua Tupua Tamasese Efi ma le Masiofo, afio foi sui usufono o le Fono a Sui Tofia ma latou Masiofo, afio le Afioga i le Faamasino Sili ma le Ofisa o Faamasinoga o Samoa. Afio lau Afioga i le Palemia ma le Sui Palemia ma lau Kapeneta, le Fofoga Fetalai ma le Sui Fofoga Fetalai ma le Palemene o Samoa, o paia ia o Aiga Sa Tupua ma Sa Malietoa, o le mamalu foi i le usoga a Tumua ma Pule, Itua ma Alataua, Aiga i le Tai ma le Vaa o Fonoti.

E le faagaloina foi i lou loto lou itumalo pele o Vaimauga Sasae, i le amata mai Lauili i le afio o lau Afioga i le Sao Faapito, lau Afioga i le Saoalii lau Afioga Leniu, aemaise ai alo o Leniu, le Afioga ia Fuamatu ma Maposua, le matua ia Taliulu ma le aiga paia o Salevalasi. Lau fetalaiiga Fuatimau o oe o le moa vinimua ia Tuamasaga aemaise ituala e fia ma oe Tuisamau.

E le faagaloina foi le tapuaiga a si ou nuu o Letogo aua le afio o le Afioga i le Fofoga o le Alataua Tuliapupu, o le paia lava lea aua le Usolii ma le matua i le Teialii, alo o Malietoa, alo o Tuliapupu ae a Mautaua ma upu ia Tuisamau.

Si ou nuu o Vailele aua le afio o Samoa ma le falefia o alii, le mamalu i le Gautaala, le mamalu ia laua matua ma le mamalu ia Saleupolu.

Le tapuaiga i si ou nuu i Fagalii, o le paia lava lea aua le afio o le Alaalatama, Tuisugaletaua ma Luamanuvae, maliu mai Pulemagafa ma le Faiga ma oe Saleupolu. E le galo foi nai ou pitonuu i Maugafiafia i tupu ma tamalii o le atunuu o lo o afio ma alala ai ona o ni fanua faatau tumaoti o lo o alala ma afio ai. Ia aea le afaigaluega a le Atua o lo o tapuaia le leoa le paia o lenei fonotaga aemaise o lo o alofaiva i fata faitaulaga e fia o le afaigaluega i totonu o si ou itumalo. E le faagaloina foi le tapuaiga a le Afioga i le Ofisa Sili ma le Matagaluga o Tupe Maua sa ou tautua ai i le tele o tausaga leni ua ou pae mai ai i leni faagatama talofa, talofa lava.

Ia e'e maia i o outou seuga ma o outou taomagamutia sei liliu ane la outou sui usufono e fai se tatou sao aua le faagatama o le atunuu. Ou te fia talanoa i le Tala o le Tupe matagofie ua opea i le Maota, lau Afioga i le Minisita o Tupe e momoli le faafetai ma le faamalo ua opea i le Maota leni tala matagofie. E leai se lagona o le suesue ae o le lagona o le faafetai ona o le faasoia ua iai. Na o nai vaega a e fia faaali ai se manatu ona o le tulaga lea i le Ofisa o le Siosiomaga o lo o toe faamatuu atu iai nisi o vaegatupe aua le aoina o le lapisi sei tulou. O le tatalo a leni sui usufono o tulaga ia i loli lapisi ia po o konekarate ia e iai a le agaga o le sui a silasila atu o lea foi ua toe faaopoopo le \$610,000 mo le totogiina o ia konekarate. Ae pe le mafai ona faamatuu lea vaega seleni agai i afioaga ma alalafaga, e maua atu po o se mea o le \$2miliona i le \$3miliona o lo o faagaga mo le aoina o le lapisi sei tulou. Ia ona iai lea o le manatu o le sui usufono na o se talosaga i le MNRE, le Minisita ia pe le mafai ona fuafua i le 49 o itumalo o le tatou Palemene ia pe fuafua tai \$50,000 a le itumalo ae aua le toe tuuina i konekarate ae tuu i itumalo e faasoasoina. A faapea la e \$50,000, o le faaitaiga o lou itumalo e fa nuu o lona uiga pe \$15,000 a le nuu i le tausaga ona o le fai alofa foi i le tele o le eleele lea i Tafaigata o le a uma teu ai le lapisi. Ae o lo o iai a tua maota o afioaga pei o le

matou nuu ma le matou itumalo o lo o tele tua Maota e le o faaaogaina e fai a e le nuu se i tulou le mea e lafoai ai le lapisi mama ma le lapisi mamafa.

Ia ona oo mai ai lea i le tulaga o le Tala o le Tupe i le vaega lea o le Ofisa Faatonu se i silasila ane le Afioga i le Minisita i lea vaega i le tupe o laisene. E pei o lea e matauina pe na o le \$100,000 o lo o tuuina mai i le laisene o le Ofisa Faatonu ae pei o lea e matau o le tele foi o ia Kamupani o lo o iai i le tulaga lea ia pe le o mafai ona ova atu i luga se tupe e maua mai ai i laisene ona a fuafua foi i tupe maua a ia Kamupani o lo o faatinoina ia pei o se vaega lena. Ia ae o lea e vaai atu foi o lea foi e toe faamatu i ai e le Malo se grant i le Ofisa lea o le Regulator a o lea e matau o lo o lava a le tupe o lo o maua mai latou seleni e faatino ai lea fuafuaga. O le tulaga i le vavao o lo o i ai nei le aufaigaluega a le Malo i le tulaga lea o le long service ia e tatalo atu i le Afioga i le Minisita o Tupe po o le a le tulaga o lo o iai lea vaega ona o lo o mafatia le paia i le aufaigaluega a le Malo ona ua le maua lea faamanuiaga. Ou te tatalo atu ona o lea foi e aafia ai lenei sui usufono, e leai se agaga o le Tulafono... Ae o le lape lea i ai o le faatinoina e le Matagaluega lea faatinoina agai i totonu o Matagaluega a le Malo o i lea lape. Ia ae o le tala mai faimai ua saunoa mai ma avatu i luga o le FK. Ia ae a silasila o nai Faiaoga ma e ua loa ona faigaluega i le Malo a o lea ua faamuta le tulaga lea o le long service. O lea la e tatalo atu ai sei toe silasila if ope mafai ona toe tatala atu i tua se avanoa ina ia mafai ona afifio loa le atunuu e faaoga le long service lea. A o le mea lea e tau popole ai ma faanoanoa ai ona ua faanatinati mai e le Matagaluega e ona Tulafono ma aveatu ai le faatanaga ia ae le o lelei ona soalaupule i tua i afioaga.

E avatu lau faafetai i le Afioga i le Minisita ona o le Tala o le Tupe, faafetai foi i le Matagaluega o Tupe Maua matauina foi le tele o tausaga sa pologa le aufaigaluega timuia ma laina ona o le tulaga sa faatino ai auunaga. Silafia o le vaega lea o tiute ma lafoga e aumai containers ia e tiute a i tai ae lei aveatua i tua. Ia ae faafetai o lea ua maua atu o lea ua toe faasaoina mai se isi seleni \$200,000 mai se mea sa iai mai le faatinoina o se fale e tiute ai oloa. Ia aua o le tulaga sa iai e le gata ina gapatia foi o le aufaigaluega i le timuia ma le laina ia ae o le mamalu foi o le atunuu aua e la'u i fafo oloa ae faatino le galuega ia a o isi taimi e timuia ma laina. Ae faafetai i le tulai mai o le Minisita ma le Ofisa Sili foi i lenei vaitau ia lea ua fai ai se fale faapea e mafai ona faatino ai lea auunaga. O se manatu o le sui usufono i le vaega lea o le S Cable ia pei o le tele o nei tulaga tupe o lo o faatinoina e totogi ia na o se talosaga a po o le a le tulaga i le toe totogiina mai o le tatou tupe lea pe a faataunuu le tatou fuafuaga fou o lo o iai. Ia o lona uiga o le a le mafai ona toe faatino lea tulaga tupe lea faatino atu e pay ai le vaegatupe lea o le S Cable. Ia pei o nai vaega na ae matua'i lagolagoina e lenei sui usufono le tulaga i le Tala Autu o le tupe ia ma le Tala Faaopoopo o lo o i ai nei.

Ia ae o le avanoa foi lenei e aveatu ai lau talosaga i si ou itumalo o faafofoga mai i atinae o lo o fia faatinoina. Ia amata atu i le Afioga i le Minisita lea, pau a lea o le Minisita aulelei lea iai le Afioga Afamasaga leaga o ia na matemate Malo. O le nuu lenei o Lailii lau Afioga i le Minisita o fesootaiga matua nenefu atoa mea ia o TV ona o le mauga. Ia e tatalo atu pe le mafai ona fai nisi pou i le va o Letogo ma Lailii e faamanino ai TV. A oo loa la i le taimi o le leaga o le tau ia e matua'i pogisa atoa le TV, e fia faaoga foi e si ou Nuu o Lailii le tulaga lea i le Broadpan pe mafai ona faaoo atu i ai le tosoina o se isi foi mea ia ona o le tele foi o si o matou nuu e fia o foi i le mea lea o le facebook ia ae o le faalavelave na o le telefoni ae o le tulaga foi gale o le tuuina atu i fale e faatinoina ai ia e le o maua lea auunaga.

O le Minisita mo Faamasinoga ma Pulega Tau Faamasinoga o lo o afio mai, ia e avatu le faamalo i le tele o le suiga fou lea ua iai lau Matagaluega ia e le toe o'o a se faamatalaga i le tulaga lea. Pau lava se talosaga ona o le tulaga lea i le tofiaina foi o alii Faamasino, ia aua o le taimi sa ou i ai i le service ae ta te fiu e apply atu ae fai mai e le oo tausaga i le tulaga e tataua ona manaomia ai e lau Afioga. Ia ae pei o lea e avatu tagata foi na, se i tulou ua litaea mai matagaluega ma ofisa, afai ua litaea o lona uiga, e le tataua ona toe faaaogaina. Ia ae pei o le tele lava o nai Faamasino o tagata ua litaea mai isi Matagaluega lea ou te vaai ai, ia se i silasila ane i lea tulaga.

Le Minisita mo Aoga, Taaloga ma Aganuu ia o le tatalo a lenei nuu o Letogo ua avea le o atu o tagata e aumau ma faatau fanua i Vailele ma mea ua faatumulia ai ia faleaoga a le nuu lenei o Letogo, o le tatalo la i ai le reserve a le MNRE i tuamaota o Letogo pe le mafai ona toe fai ai se tatou faleaoga i ina.

Fai ai se faleaoga e faalautele ma ai ia ma nai tagata foi o lo o alaala ai i ina ina ia mafai ona agai i ai ia faatasi ai ma se malae taalo aua leaga o e o lo o a lala i uta i Maugafafia ma Vailele-uta ma le tulaga lea e

le o i ai se mea e agai e taaalo ai nai tagata ia, tuaia Letogo ia la e i ai a latou malae ma Vailele, ia a o nai tagata ia ua faatau fanua ma afifio ai i i, e le o i ai se tatou malae taalo e faatino ai. E pei o le tatalo atu i lau Afioga i le Minisita, se i tilotilo ane i se faleaoga ia po o se malae taalo foi o lea vaega.

Ia tatou oa tu i le Minisita mo Tina ma Tamaitai, Atinae o Nuu ma Afioga ma Agafesootai, ia faafetai i le tulaga i le sao o le tofiaina o lau Afioga e taitaiina le Matagaluega lea o Tina aua ta te faalogologo mai a i fafo ae le i oo mai i totonu ia pei e le matagofie le tofi o se tama e alu e vaai se Matagaluega o Tina. Ia faafetai i le tofiga a le Afioga i le alii Palemia o lea ua tofi oe e te taitaiina ma vaaia ua fetau onomea foi faatasi ai ma lau Minisita Lagolago. Ia pau lava le tatalo pe mafai ona toe faaauau pea ia tulaga i le.... Na iai le Saina na taunuu mai i inei ia o le popolega o le mea lea o le laufala, ua sau le Saina e faatalatalanoa le mea lea o le laufala fai mai e fia manaomia ni laufala e toto i inei i Samoa ae la'u atu i lona atunuu e faimai ai le ietoga. Ia aua o tatou a tatou i le ietoga lea fai toeitiiti atoa le masina o lalaga. Ia o nai manumanuga na ina nei omai foi ia tagata mai fafo aveatu le tatou laufala ae lalaga mai tala mai le ietoga pei o se talaga ie mai se faleoloa.

Ia le Afioga i le Minisita o Tupe Maua ia o lo o matagofie lau Matagaluega pau a le mea o le totogi o nai aufaigaluega o lo o ovataimi pei o le tou Matagaluega lea tele ina ovataimi. Ia pe le mafai ona faatino pea ia auaunaga aua o le tou Matagaluega o lo o feagai pea ma auaunga ia i le tiuteina o uafu ma vaalele.

O le Matagaluega o Faatoaga e tatalo atu i lau Afioga o le itumalo leni ia o lo o manaomia a le tuuina atu o nai manupapalagi sei faatino ai o matou fuafuaga.

Ia o le Afioga i le Minisita mo Galuega, Felauaiga ma Atinae Eeseese, ia o le tatalo a le nuu leni o Lauili talu lava ona faavae leni nuu e le i faia lava se auala galue i luga i le mauga. A silasila foi i leni nuu o Lauili o le nuu leni e sai ai le tala e muafale i le moana ae tuafale i papa, fai o le moana i luma e aia mai ai le taligalu ia a o tua foi na o le o atu lava i tua tau loa i le mauga. E tatalo atu i lau Afioga i le Minisita mo Galuega, Felauaiga, ma Atinae Eeseese, pe le mafai ona faatino ni auala e agai i luga o mauga e le gata e o ai si ou nuu e aumai ai fua o faaeleleaga ia a o se mea foi e sosola ai pe a sau se Tsunami, ona e le mafai ona iai se tulaga mamao i uta o le nuu. Se i silasila ane i le vaega lea pitonuu i tai o Lauili ia ma le pitonuu mai ia faapena foi lau Afioga le auala. Ua tatalo mai foi si o matou nuu i le aualatele lea oso atu i totonu o le nuu ia a tou silasila pe tout e afifio atu i Lauili toeitiiti a oso auala i totonu o fale. Ia pei o le tatalo a le sui usufono pe le mafai ona taunuu loa i le mea e amata ai Lauili alu atu ai loa iina le auala faatoa toe ea ifo a i o aua pei o le mea lena e faaetete ai foi i auala pe a oo i o ona toeitiiti a oo i totonu o fale.

Ae a faatino lea fuafuaga alu atu a i luga o le taligalu ae ea ane i le pitonuu i tai, ia o oe a o le tupu lau Afioga i le Minisita mo Felauaiga. E faapena foi le aualagalue a Letogo lau Afioga i le Minisita pe le mafai ona e silasila ane iai ia faatasi ai ma auala tuloto i uta i Letogo ma Vailele pe mafai ona e silasila ane i ai. Lau Afioga i le Minisita o le nuu o matou i Fagalii ia a tou silasila ua tele ina faaoga atu le auala le alu atu i Fagalii-uta sei tulou agai i lalo o le vai i le aoga lea Samoa Primary. Pe le mafai ona o la e faaogaina e le mamalu o le atunuu le malae vaalele i Fagalii ia ae a outou silasila i lalo mai o le malae vaalele i le pioga lena ma le vaiti e tatalo atu ai pe le mafai ona fai se auala savali po o se footpath e afifio ai ona e fai o le vaiti o le auala ae leai se mea e feoai ai ma savavali ai tagata i le auala faamolemole. Sei silasila ifo iai lau Afioga i le Minisita mo Felauaiga.

Ia lau Afioga i le Minisita mo Falepuipui ma Auaunaga toe Fuataina, e tatalo atu leni itumalo i se falepuipui, pe le faia sou lala e avatu ai ni au Leoleo i le vaega lea a matou i Vailele uta po o Maugafiafia. O le faaeteetega ona ua tele atu nai tagata e afifio atu i i ia ae pei o lea e tuafale foi nai aiga ia i pulega a alii ma faipule. E le gata foi i lea o le tele o e ua faatetea mai isi nuu ona oatu lea nofo lisi ai i fanua nei, e leai se mea o tupu ae mo le puipuga o nai tagata o lo o umia nai fanua ii pe le mafai ona fai ai se lala o sou Ofisa Leoleo e faigofie ma le tau vili soo mai, ae a iai a se tagata iina e le mafai ona toe iai se tagata e toe faatinoina sea vaega faapea.

Lau Afioga i le Minisita mo le Soifua Maloloina, o le tatalo foi a leni itumalo i si ou nuu o Lauili, a faia se tatou lala ona ua tele a ina omai i le falemai. Ia ae pe le fai iina i Lauili i le pitonuu i tai i le vaega foi o lo o iai nai fanua ia sina lala pe taitasi a i le vaiaso ona i ai nai fomai e faatino ai lea auaunaga. E lelei foi lena e omai Atua le oo mai i le falemai ae omai lava ma faagata i i i le falemai lea o le a faatu i le pitonuu lea o Lauili. O le tatalo foi i lau Afioga i le Minisita mo le Soifua Maloloina, ia pei o lea e matauina a le manaia o le auaunaga o lo o i ai ia afioga i tamaitai ma alii fomai o lo o auauna i le po. O lea ua e tofiaina



ia auvaega ia fai latou private lea ua faatinoina ni auauanga i le po, ae o le tatalo pei e manaia pe a faaoga pea lau staff fomai i le po a o le vaega lea private e manaia le tuu mai i le ao pe manaia le tuu mai i le ao e faasikuea ai le tele foi na le o latou, ae o lea foi ua toe agai atu i lea auauanga faafetai atu ai

Lau Afioga i le Minisita Fiamme po o lau Afioga i le Sao Faapito, ia e pei ona ou tatalo atu i le tulaga lea i le taligalu a Lauilii, ia a outou silasila i ai ua matuai aia lava, ona o mafuaaga nei. Sa ou fesili atu po o le a le mafuaaga ae fai mai o lea ua faataga atu e lau Matagaluega le lauina o le oneone. Ia e fai la o le naunau foi i le atinae o le Malo, ia ae a outou silasila ai, o lou aiga i ina i Lauilii a louloua foi le tau, e sau a le sami ua oo mai foi i tuamaota. Ia o le tatalo pe le mafai ona silasila ane i se taligalu a lenei foi afioaga lea ua ou tatalo atu ai.

E le gata i le alu atu o le taligalu e ea ifo i le pitonuu i tai, ia alu atu ai foi ma le auala, ona alu ai lava lea e free way e leai se isi e faalavelave aua foi o lea o le a le oso atu i fale ma totonu o le afioaga, ia e pei o nai motugaafa na a lenei itumalo.

Faafetai tele lava i lau Afioga i le Palemia mo le taitaiina o le tatou Malo, ia o lo o lelei mea uma lava, le tapuaiga a Samoa ia o lo o aumai lava le lagolago i lau tapuaiga ma le faafoeina o le tatou Malo, ia o lo o faapena ona manuia ai ona tagata nuu.

Ia o lenei itula e le mafai ona tuua se avanoa ou te faafetai ai i lou itumalo, ia lou itumalo pele, ia taumafai e molimoli atu se agaga faafetai i lo outou faatupu ma lo outou faatamalii. Ia o ai ea le tagata o ai ua manatu mai ai? Ia o ai na manatu o le a fai Eseta ma masiofo? I la outou faaaloalo maualuga ma la outou faaeaea, o le upu moni, ia ua ou sula lea ua ula. Ua ou sula ua ou maua, ua ou sula ua ou afifi i la outou faaeaea i la outou tofa faatupu, tofa faatamalii ma le utaga faafaleupolu. Leitioa a saafi le fatupese, e uso a mo aso uma, ae o ou aiga ma ou nuu mo aso vale. E le faagaloina foi le aufaitatalo i la outou punapunou, ma tatalo i le ao ma le po, ia ma sema i le Atua le tofa, lenei ua oaoa ai nei i Faleseu, ae sao i maa o malie ona o lo outou titi faitama, ua mafua ai ona popo mosi futiafu e tasi, o au lava o la outou tamafanau. O la outou pule lea, ua ou sapaia faafatua eleele. Faafetai, faafetai tele lava. Ia manatu ifo manatu ane, o Sulamanai i Letogo ma Lauilii ma Leituau i Letogo, Togia i Vailele Naea i Fagalii, Fetaiai Tauilili Tuivasa.

O le a faauma atu lau Afioga i le Fofoga Fetalai. Ia alofagia e le Atua, ia sao sao a lautolo la outou tofa faatupu, aua tuutauaiga i le alofaiva o le Palemia ma lana faigamalo aua se lumanai manuia o le faigamalo. Lou itumalo pele, e le galo outou i lau tapuaiga, manatua pea lo outou auauanga i a outou tatalo.

E le galo foi lenei taimi ou te faafetai atu ai nei i lou uso sa ma tauva mai i le nofoa o lenei itumalo le Afioga Tuisugaletaua ia e momoli atu le agaga faafetai a o e tulai maifo e ave a oe ma fofoga foi o le tatou itumalo, ia faafetai le taalo faatausala, ia faafetai foi mo galuega lelei sa e faatino foi a o e tulai mai i lo tatou itumalo. Ia o le tala, ia e taaalo a uso a o taua e aiga, ia aua o taua o uso tuofe e le o se uso taufeagai. Ia manuia tele lau Afioga i le Fofoga Fetalai ia ma le tapuaiga a lenei Maota, ia ona o Iesu, soifua.

### **23 IUNI 2016**

**Afioga TOFA FOLENI LIO TAMA GALU (Faasaleleaga Nu. 3):** Faafetai i lau Afioga i le Fofoga Fetalai mo le avanoa, e faamauina pea le faafetai i le Atua ua tatou i ai i manuia i lenei afiafi toamalie ma le filemu mai le Atua. Ua tatou lagona foi e le o tea ese lava le Atua ma lenei Maota, ui lava i sina taimi sa fai ai sina malologa, ae filiese lava le soifua ma lo tatou ola. Ae momoli pea le faafetai i lo tatou Atua o lo o i ai Lona agalelei i le Fonousu a Samoa. Lau Afioga i le Fofoga Fetalai, e taumafai atu ia lenei usugafono mai Faasaleleaga Nu.3, e fai atu foi se sao aua le Tala o le Tupe pei ona folasia e lau Afioga i le Minisita o Tupe. Ae muamua ona ou faafeiloai ma ou faatulou i le paia o le Maota, pe tauave lava o le maota i Tiafau e tumau lava, o le Maota e fili ai le tofa ma le faautaga, o le Maota o Samoa, Maota e leai se isi e finau i ai, aua o le Maota lava ua mamalu ma maualuga. Tulouna ia le paia o le Maota, e faafeiloai atu ai i lau Afioga i le Fofoga Fetalai ma le Sui Fofoga Fetalai, malo lava le onosai, malo foi i le taitaiga o le tatou Fono.

E faafeiloai atu i le Palemia faapea foi le Afioga i le Sui Palemia, tulouna ia oulua paia, aua le taitaiga o le Malo faapea foi le tatou faigamalo, faapea foi le paia aua alii ma tamaitai Minisita o le Kapeneta, e faafeiloai ma faatulou atu i o outou paia, faapea sui usufono mamalu o le Palemene o Samoa, o i latou filifili mai itumalo o outou lava ua filia mai le fuifui aua lenei lima tausaga o le Palemene. Ia, e le galo le tapuaiga mamalu a Lana Afioga Mamalu O Le Ao o le Malo, Afioga Tui Atua Tupua Tamasese Efi ma lau Masiofo, faapea foi le tapuaiga i le Sui o le Fono a Sui Tofia, faapea foi le Afioga i le Faamasino Sili ma le Ofisa o

Faamasinoga, o le tafatolu lea o Faigamalo aua le Malo o Samoa ma lana Fono e tusa ai ma lenei foi lima tausaga.

E le galo foi Faauluuluga o Matagaluega, Pisinisi Tumaoti ma Faalapotopotoga o lo o galulue aua se manuia o le Faigamalo ma ana atinae, i la outou feau ma le galuega e le selu atu foi i le tele o outou tiute, ae faamalo i faauluuluga o Matagaluega a le Malo, faalapotopotoga ma pisinisi eseese. E le galo le tapuaiga a Samoa i le paia i Aiga ma Tama, Tama ma Aiga, le usoga a Tumua ma Pule, Ituu ma Alataua, Aiga i le Tai ma le Vaa o Fonoti. Faafetai Samoa, o le tapuaiga lava e manuia ai faiva o lou Palemene e pei lava ona i ai le tatou nonofo ai.

Le paia i le tapuaiga a le Aufaigaluega paia a le Atua, outou o lo o nonomanu aua se manuia o le afioaga, le Malo ma le tatou atunuu. Faafetai tatalo i le nofo a Faafeagaiga i tapuaiga e fia ma Ekalesia e fia, faafetai i lo outou anapogi ma tatalo pea mo Samoa, atonu o la outou tatalo ma le mana o talosaga, lea ua folau ai Samoa i le lagima, folau i le manuia ma le filemu moni mai le Atua. E le vaea le falaooto aua le tapuaiga a o tatou uso i Sasae, aua le paia ia Sua ma le Vaifanua, Fofu ma Aitulagi, tainane foi Saole ma Saleaamua ma le Launiu Saelua, le Faatui o le Motu, Tootoo o le Faleula ma upu ia te oe le Manuatele. O paia na o Samoa i Sasae ma Samoa nei lea ua tatou sapi ai, ua tatou manuia ai aua le Malo ma le tapuaiga mamalu. Tulouna ia laia outou paia, ou te le sagolegole ne i sese se upu ona avea lea ma lape o le failauga.

A o outou paia faale-Malo, paia faale-Ekalesia, paia faaleatunuu, o paia lava ua popo, o Samoa o le atunuu tofi, e leai lava se faafiaatamai pe toe faaopopo pe toesea ia paia, ae nuunuu ia ia paia i le galuega tausi a Tumua ma Pule, aemaise o Faleupolu o Tofiga, o le latou galuega tausi lea.

Avea lenei avanoa taua ou te faafeiloai atu ai si ou itumalo pele o Faasaleleaga Nu. 3, e amata mai le afioaga o Saipipi seia paia Siufaga. O le paia lava lea Taulagi, le Matua Fetalai ia Segi ma le Pule ia Leuu, faapea Salemuliaga, faamalo i lo'u itumalo faafetai i la outou pule to ma la outou faaaloalo lea ua manuia ai le tatou faiga filifiliga i lena masina ua te'a. E momoli lau faafetai faapitoa i si ou nuu o Saipipi aemaise lava lo'u Tama toaina ia Kaleve Leifi faapea le nofo a faafeagaiga a le Ekalesia Mamona, Worship Center ma le Aso Fitu. Ia faafetai ia outou le aufaigaluega faafetai i la outou tatalo ma lo outou folafola o le finagalo o le Atua ia toafilemu ma manuia faiga filifiliga. Ia faafetai i le paia i le taulagi i lau Afioga i le Sa'o Tofa ma lo outou Aiga Sa Tofa ia faapea foi Su'a o le maopu ia tainane le alo o Vaafusuaga ma Leusoalii faapea le mamalu i le Falefitu. Lau fetalai Totoaitu o oe o le tausi nuu, Sa Taufauga ma le mamalu ia Salemuliaga faafetai i lo tatou nuu. E le galo foi le faafetai i le mafutaga a Tina o Faletua ma Tausi o Saoao o lupe faasa'osa'o, ia faafetai i le mafutaga i Tina faapea Toleafoa ma le aualuma. Ia ae le gata i lea ae o so o se tama fanau a Saipipi o lo o aitaumalele o lupe faalele lea sa outou lagolago, e moni a le upu o le aiga o le mea e tasi. O le tatou nuu o le aiga e tasi aua ua tatou iloa lava tele tausaga, a tau le 40 tausaga e le o toe o'o mai se tofi i Saipipi o se mea lea e lagona ai le loto faafetai. Faafetai i lou lotonuu faamaoni lea ua faailoa le tali o a tatou talosaga i le Atua a lea ua tatou i ai o lea ua maua so tatou tofi ona o le faamaoni o le tatou nuu, aiga uma o e sa galulue. Ia lafo mai laia o lo outou faatuatuaga o le a se mafai e mafai e lenei tagata faatauvaa tatou faamoemoe i le Atua mea uma. Ia e le faagaloina si o tatou nuu i Saasaai aua Toleafoa ma Vaafusuaga, tua fetalai ia Segi ma le pule a Leuu ma Salemuliaga faafetai i lo outou lagolago mai. E faafetai faapitoa i lau Afioga Tea Peato, ia a tuu loa i upu o le taulagi ia e uso a Tofa ma Tea, o le mea lea faafetai i lau Afioga Tea o lea ua e faaaloalo atu i le Aiga Sa Tofa. O oe foi ua leva ona e galue ua leva foi ona e pale mai i le Palemene ma le Nofoa o le itumalo, e momoli atu le agaga faafetai. Faafetai i mafutaga a Tina, Faletua ma Tausi ia aemaise o Aualuma ma Tamaitai ia ma le malosi o le nuu ma Toleafoa ma le Aualuma ia ma le tatou nuu uma i Saasaai. Faafetai i lo outou tautua, faafetai i la outou puleto ma la outou faaaloalo aua faiga filifiliga i le amataga o lenei tausaga. Ia e faafeiloai atu foi i le tatou nuu o Faga mai Salimu seia paia Siufaga ia o le paia a lea i le taulagi toano o alii o Faga faapea foi lo outou Toafa Tagatamatutua ma le Faleaana ma Salemuliaga. Ia malo faafetai.

E avea lenei avanoa e momoli atu ai le agaga faafetai ona o le manuia ma le filemu lea sa tatou iai a o filifili ni o tatou tofi. Faafetai i lau Afioga Toala Tulouna faapea foi lau Afioga Unasa pei ona i ai, ia faafetai o tatou lava o le aiga e tasi. O le taulagi o le aiga e tasi o lea ua outou faaaloalo mai i le aiga Sa Tofa ia lafo mai la outou faatuatuaga. Ia e le faagaloina foi le Afioga ia Tuileutu Alaivaa lea sa seei i le Nofoa o le itumalo ia faafetai ia te oe le uso lea ua e faaaloalo mai, faafetai galue i lea foi 5 tausaga sa e pale mai ai ia faafetai i lau Afioga Tuileutu. Ia lafo mai laia o le a lava se mafai ou te galue ai ma auauna i le itumalo ia

o le agaga lea. A o le agaga fiafia ma le agaga faafetai e ese le faigofie o le tatou filifiliga e leai lava se mea na gāse filemu mea uma, o le mea lea o le mea mai le Atua, faafetai la outou pule lea ma la outou faaaloalo. Ia avea lenei taimi e faafetai atu ai i lau komiti mai lava i Saipipi sei pa'i mai i Siufaga ua outou mafatia i le ala, laina, timua, sautia ua outou uluulu matafolau ona o lo outou sailimalo ia maua so tatou sui e tauaveina upufai a le Malo aua le tatou itumalo. Ia malo galulue e le faigofie ia a o lea ua tau lo outou ai lea ua tali le Atua ona o lo outou faamaoni ma lo outou alofa moni i le itumalo ua manuia ai mea uma. Ia faafetai foi i ou aiga faafetai tele i ou aiga o paolo ma gafa uo ma e masani, ia faafetai mo le tofa ua a'e fai ai au ma auauna e galue mo le itumalo. Ia o le agaga faafetai lea i le tatou itumalo ae o lenei taimi ia o le a taumafai nisi foi o mea o lea ua vaavaai iai aua le itumalo. Ia o lea lava tatou feiloai lava i vaiaso uma, o lea lava tatou te talanoa, a feiloai ma fesilisili ia a o lea lava ou te iloa mea la e faaletonu i le tatou itumalo. Ia tapuai maia vaeatu le tapuaiga, o a lava ni manatu e aveatu i le aiga Kapeneta e tuu atu pea ma le agaga maualalo ma le loto e momoo aua le faataunuaina ia ae e fuafua lava nei mea uma.

A o le i oo se faamatalaga i manaoga o lenei itumalo faafetai i le Minisita o Tupe lau Afioga Sili faafetai i le tala malamalama o le Tupe i lenei tausaga. O lea ua vaavaai iai ia e matagofie lava, lea foi ua vaavaai o lo o iai tupe totoe ae le gata i lea o tupe mai fafo ia tasi lea mea taua. O tatou lava e saili a o le Atua e foai, o tatou lava e tuitui a o le Atua e tatala mai faamanuiaga, ia faafetai i le Malo i le alii Palemia aemaise le Kapeneta aua o le tatou saili ia lea ua siitia ai le tamaoiga siitia mea e fai. A vaavaai ia Samoa i lenei vaitaimi ia o le upu a lea e fai ma muagagana ua tele le suiga o Samoa. Aisea? Lelei atina'e tele atina'e o lea ua vaavaai ma molimau o eletise, auala o le suavai ae le gata foi i lea o maota ma laoa, seasea se nuu toe iai se fale samoa tele lava i maota ma laoa falepapalagi, fale mananaia, o faleaoga. Ia o aiga foi ua manuia matamata le TV ma lelei mea e nonofo atonu o le siitaga lea, le naunautaiga o le manulauti foi lea a le Malo ia ola ma soifua lelei tagata o Samoa ia manuia tagata uma. O le mea lea faafetai i lau Afioga i le Minisita o Tupe mo le Tala o le Tupe ia ae pau lava le matou tala silasila pea o a nisi fesoasoani ia aapa i ai tatou faauouo aua o Samoa ia o lea ua tatou oese mai le upu lea, o Samoa e tau atiae. O lea ua tatou oese ma lea laina tatou meime i luga o Samoa ua atiae lea ua siisii lona tamaoiga ia o le agaga fiafia lea.

O matou foi lea faatoa ofi mai ia o lea lava sa pati ma po ma tapuai mai faiva o le Malo a lea ua tatou tiu ai ma tatou aeae i le manuia ona o tulaga pei ona iai.

Lau Afioga i le Minisita mo Galuega, Felauaiga ma Atinae Eseeese, ia ou te iloa e tele lava manaoga o lenei Maota ia o nai manaoga lava ia i mea e fia faaleleia. Faafetai mo le asiasiga lea sa e afio atu ai e le gata i lau Afioga ae na afio atu foi le alii Palemia i si afa lea na agi nei ia Aperila. Ia e le toe tau faiatua se matou talosaga o lona ua i lou Ofisa foi le talosaga. O le mea lea na tupu i Saipipi faafetai i le Atua na o le tasi le po ae ana lua pe tolu po o lona uiga ua leai se Saipipi ua tafua uma ma faaleaga uma ona o le malosi o le vai e tafe mai uta malosi foi le galu. O le sau mai Saipipi i Siufaga e matua maaleale lava, e ilitata tele i le suavai aemaise a le fafati mai o galu o aau e lata mai i uta e matua aafia lava lenei itumalo. O le talosaga la i lau Afioga ma le Minisita mo le Siosiomaga, e fia fai ni taligalu lelei fai ia malolosi, fai ia lelei aua o le faafitauli a lea o lenei itumalo o le vai lava fai o le sami a o le tafe lea sau i uta. O le tafe lea sau i uta o le tafe i Vaiaata a o le faalavelave e sau le alavai lea mai o i Maliolio Samalaeulu. A tutumu nei e pa uma atu i tai lea la e pa atu le isi alavai lea i Sapapalii ia ae lelei la Sapapalii e lua alavai a la e lelei la ua sima ma aualalaupapa. A o le pa mai lea o le vai i gauta o Saipipi, Saasaai ma Faga e leai ni alavai ni proper drainage e tafe solo. Ia silafia foi o le vai e sue a e ia lona auala, tasi la lea talosaga le Siosiomaga se i silasila atu a i le taligalu ia ma le faaleagaina ia aemaise a o nai maumaga, toga niu, o maota ma laoa, o manupapalagi, o meaituaolo e tafea uma. E faaleagaina uma ma tafua i tai ia ma le manuia ai lava.

O lona lua i lau Afioga i le Minisita mo Galuega, Felauaiga ma Atinae Eseeese, o le auala lea ua fuafua mo Saipipi o le auala lea e taua tele, e alu atu tau i le faleaoga le primary school ma le Amoa College. Alu atu i uta tau i le pamuvai a le Malo ua tele aiga e matua tele le auala lea i lau Afioga ma le faafofogaaga a le Maota. O le auala lea e tau i uta i Vaiola College ma e a failelei le auala lea ma fai loa ma aualatele o le Malo tasi lea auala lelei aua o tamaiti nei i Vaiola e omai i le Itu o Tane o i la o le a assess ai le alu i uta ia ma faigofie i femalagaaiga. E oo atu i uta i Vaiola, Tapueleele ia aemaise le Falepuipui ma le Ofisa o Leoleo, e faigofie a le auala lea pe a fai nei. O le auala foi lea e fesootai mai ai le isi aualagalua o Saipipi ia ma le aualagalua o Saasaai fetau uma i le auala lea ia o loa i uta. A o le taua lona o le a faigofie mo nai fanau aoga, o lona uiga e le toe tau oso se taavale i Safotulafai lea o le a oso tasi ii e faapena foi i mea e

moomia mo le o i le Itu o Tane e faigofie a le auala lea. O le mea lea lau Afioga i le Minisita ia e le toe tau faiatua o lona ua e silasila ae faafetai i lou afio atu. O la lava e fai le galuega i le taimi lenei, la lava e galue le taligalu ia ma mea ia. Ua e silasila iai e lua mea na motu i le auala, motu i totonu o le nuu ma le isi pito ia tele le afaina. O le vai foi mai uta i Saipipi ma Saasaai na tupu foi i le 1989 ia na motusia foi le auala tafea fale o aiga e oo i fanuaoti tulou na tafefea uma i le sami. Oka, oka se vaaiga faanoanoa na toe tupu foi i le 1991 o le mala a lea e tasi.

O le mea la lea e talosaga atu afai lava o le climate change o mea ua tutupu ma afaina ai le Siosiomaga o le fofu lava o nei lava aua le toe faatalia tatou galulue i le taimi lenei. Ia o le talosaga lona, aualagalue o le matou nuu i Saasaai fia maua foi, aualagaluega i Siufaga ma le matou nuu i Faga ia pau a ia o mea ia e talosaga atu ai o aualagaluega ia lelei. O le isi foi mea e silasila iai o le tele o le nuu lenei ma le itumalo ua agai i uta, e leai ma se aiga o toe nofo i tai ua agai uma a i uta ae tuu tai e alu ai le aualga o le Malo. O lona uiga mo le isi 50 tausaga lumanai ua i uta uma le nuu ae tuu tai mo le auala a le Malo. Ia o se vaavaai mamao lona iai ae lafo atu i lau Afioga i le Minisita mo Galuega. O le isi mea ne i galo o le uafu lea i Faga, o le uafu lea pei a o lea ua vaai e le aiga lea o Caferelli, le uafu lea sa ou vaai iai i le vaiaso lea i tua sa tu ai iina le helicopter. Na ou faapea lea oka se manaia ae faalelei le uafu lea e land ai helicopter aua la mea e tutupu faafuasei. E lelei le uafu lea e latalata i Tuasivi i le Falemai, latalata i le Ofisa o Leoleo ia ma e tuli mai iai le motu o Savaii. A I ai ni mea faafuasei ia e manaia tele, o la e teu e le aiga lea o Kafarelli se i tulou, ae a fesoasoani loa sina fesoasoani a le Malo e toe faalatele ai le uafu lea, manaia lava mo le land ai o helicopter. E faafetai foi i lea Kamupani taua tele, e i ai mea e tutupu faafuasei, o mai, faalavelave ae ia i ai se emergency case e fesoasoani aua le faafigofieina. O i la i le uafu lea i Faga e taua tele, ia ma o le uafu lea o le uafu i aso ia, o i ina sa faaee ai le popo, koko ia ma pusa fai ae lei I ai ni uafu i Salelologa, e pei o nai uafu a ia sa amata ai felauaiga. Lau Afioga i le Minisita mo Galuega, Felauaiga ma Atinae Eeseese ma le Afioga i le Minisita mo le Punaoa Faalenatura ma le Siosiomaga, ia o nai manatu na, a o lona lava ua nofofale i lou finagalo ia tulaga sa faaleagaina o lenei itumalo, o nai aualagalue e faaleleia ma ni moli ia faatasi ai ma puipuiga na o le taligalu ia tuutuu laitiiti i tai, ia maua foi le avanoa e sasa ai le galu i tai ae aua ne'i oo mai i uta aua ua tele a se afaina o lenei itumalo.

Ona see mai lea i le Afioga i le Minisita mo le Soifua Maloloina, faafetai mo le falemai, la ua manaia le falemai lea sa tatala i lenei tausaga ia na ua matagofie galuega e faatino ai galuega a fomaini. Ae pau lava si fale la e faaletonu o le fale e nonofo ai mai, o le maota lona e tasi ai e gasegase ua fai lava sina faaletonu. O le mea lea ona o le tasi lea Matagaluega e ave i ai le faamuamua ma le tele o seleni, o lona ua tatalo atu. O Tuasivi sa fai ma laumua o Savaii e le gata i le Falemai a o le Ofisa o Leoleo, Ofisa o Faamasinoga ia la foi ua i ai ma le Victim Support la o le a iai. E tele Ofisa i Tuasivi ae sei vaavaai ane ina ia faaleleia, ia o le isi vaega i Tuasivi e fai lava sina laitiiti, o e foi e maliliu ma taoto ai, ia lea ua vaavaai e pei o se container le mea la e tuu ai tagata feoti. Ia ae se i silasila i ai, afai la o Savaii e maliliu tagata e 20 i le vaiaso, e le ofi, o lona uiga e tataua a ona toe faatele le tatou Falemaliu lea i Tuasivi.

Ae faafetai i le Afioga Pau Sefo i lona falemaliu i Safotulafai o lea e vaelua mai i ai, o le mea o le maliu o aso uma. Ia ae ua ese foi nei aso o aso la a maliu loa teu ia a o aso nei, ia ua faatalitali pe tasi i le lua vaiaso o faatalitali. Ae faatalitali la i fea? E faatalitali i le falemaliu. O le mea lea lau Afioga i le Minisita mo le Soifua Maloloina ia o nai vaavaai na mo le Maota i Tuasivi. E tele lava gasegase ia ma le isi la fautuaga taua, o Fomaini. O le mea o lo o tupu e tasi le fomaini ae toluselau mai i le aso. Talofa e o isi e mamao mea e malaga mai ai, ia o le faafitauli a lea o lea e tupu le lava fomaini, atonu foi e le na o Tuasivi ae faapena foi i Upolu nei ma Samoa atoa. O le mea lea sei vaavaai ane pe aisea ua ititi ai fomaini a o lea lava e i ai le aoga faafomaini. Po o fea le mea ua ave iai a o fea foi le mea e faataua po o faataua le soifua o tagata ia po o faataua tupe. Ia a o le agaga a, ia tasi lona vaega sei silasila iai i le tatou Ofisa lea i Tuasivi ia ma le tatou Falemai i Tuasivi, e moomia lava le faaleleia ma lona siosiomaga e le o matua lelei.

O le matou aoga i Amoa College, lau Afioga i le Minisita mo Aoga, Taaloga ma Aganuu, faafetai mo le valaaulia lea sa faafiafia ai i le Tutoatasi. Ia a o si aoga lenei e vaapiapi lava le malae, e fia maua se malae lelei, e tele foi alo ma fanau a Amoa o lo o lelei i taaloga, e lelei Iva o lea i ai le Prince Edward Park a o le itumalo Amoa mai Puapua i Faga, ia e leai lava se mea faapea. O le mea lea lau afioga i le Minisita mo Aoga, e talosaga atu i se malae ia masina fesoasoani se i faaleleia ai le faleaoga o le aoga lea a Amoa. Ia silasila foi I ai i sia foi Kolisi o lo o moomia le fesoasoani.

: Faafetai, o le tulaga lea lau Afioga i le Minisita mo Aoga o le Course lea e omai ai faiaoga e toe o i le NUS, tasi lea course lea afaina ai le short o faiaoga, o le mea moni lea. A omai la faiaoga e o i le course, ia na o le toavalu faiaoga i Secondary School po o Kolisi, e le lava ona la ua o e fai a latou course, degree course. A o ai la a o atu e toe faiaoga i vasega? Tasi lea mea o lea e tupu ai le pau i lalo ona o le mea lea o le fetuunaiga o faiaoga. Ia ona omai lea i Apia nei tumu ai Kolisi, ia ae ua afaina ai foi polokalame a Kolisi aua e fai loa suega a le NUS nonofo loa faiaoga ia e study ia ona le o loa lea i le aoga, tasi lea mea o lea e tupu ua absent mai le galuega. O le mea lea se i silasila ane, e lelei le polokalame pe tau o le Second and Chance Education, e lelei mo faiaoga, ae ana faapea lava e o loa e aoga ia full time i le aoga ma sue Degree o atu ai loa faiaoga e lelei. Ia a o le mea lea o le lua o galuega, ia e moni ai le upu, e faamaoni i le isi ia ae le faamaoni i le isi aua o lea o le a alu e aoga i le NUS toe alu e toe faiaoga ia e le taitai lava le taimi ma afaina ai tamaiti. O le isi vaega i le Ofisa o Aoga, o lea e lipoti mai le tele o suiga, ona ua te'i lava ua tuu le vaega lea sa tau o Asiasi Aoga ua te'i lava ua tuu.

A o asiasi aoga sa faalupe o Tama o itumalo, o latou ia sa galulue mai i tua i nuu, o a faafitauli o nuu, faafitauli o komiti, faafitauli o faiaoga e faia uma lava. E omai ma lipoti i le Ofisa Tutotonu, e le gata la i lea ae ua tele materials ia ua tufa atu o equipment, ia o lea lava e fai ma leiloloa ma leaga. Ae ana toe fai le vasega lea o asiasi aoga aua o le latou galuega e o e review mai, e le gata i le curriculum ae o e monitor pe vaavaai galuega i tua. Ia e le mafai e le Ofisa ona o atu e tau vaai. E faapefea ona tau vaai ia aoga toeitiiti 200 ua I ai nei i totonu o le atunuu. O le mea lea, na ona toe faamanatu atu tasi lenei mea ana fai ni asiasi aoga ma toe fai le package lea o school review officer, e leai lava ni mea e tutupu. O mea ia e tutupu i Avele, ou te talitonu e mafai a ona foia e asiasi aoga i le latou va feagai ai. Ia tasi lenei leaga e tasi lenei vaega taua o le galuega, o le monitoring system, o le o e vaavaai ma lipoti ia ma fofo e latou faafitauli aemaise lava le mea o le faiaoga lea i ai nei. E short lava faiaoga i Kolisi ona ua tele ina omai i Apia nei ma galulue ai, ia a galulue foi la ma iu mai a latou degree, ia e lua tausaga o le bond ona o foi lea sue isi galuega a o lea sa sponsor e le Ofisa o Aoga, ona o lea i isi galuega toe faigaluega ai ae tuu le galuega na o atu ai. O lona uiga, o le a le mea e le tuu ai se 5 tausaga e fai ai le mea lea o le bond, ina ia manino lelei ia 5 i le 10 tausaga ia ona pule lea o ia. Aua o le faafitauli lava lea i Samoa atoa, e le lava faiaoga i luga e lelei le Primary School o la e lava faiaoga la foi e i ai le afaigaluega, a o luga ia tatou Kolisi, e talitonu e le o lelei ma atoatoa. Ia lau Afioga i le Fofoga Fetalai ia ou te iloa na pau lea o nai manatu ia a o le agaga atoa lava lea. A o le Tala o le Tupe ua folasia i lumamea i le Maota Fono e matua lagolagoina e lenei itumalo, pau lava le mea ia tatou vaavaai pea mo le manuia ma le agai i luma.

Ona faaiu atu ai lea o se leo o lenei usugafono, tau ina ia manuia lau Afioga i le Fofoga Fetalai, maua le tofa faapea foi le Taitai o le Malo ia maua lou soifua maloloina e le gata i le tino a o le mafaufau sili le agaga ia faapea le aiga Kapeneta, le mamalu o sui usufono ia manuia pea. E le galo pea le tapuaiga O Le Ao Mamalu o le Malo, tau ina ia mama le lagi i le tapuaiga a Lana Afioga Mamalu O Le Ao o le Malo, Fono a Sui Tofia faapea le tapuaiga a Samoa, aua ne'i gau le tootoo pe gausia le fue. Ia alofa le Atua maua le upega lauga e puipuia ai Samoa ia ma le tatou Fono, ia manuia le aso faafetai.

## **23 IUNI 2016**

**Afioga AFOA AMITUANAI FALEULU MAULI (Palauli Sisifo):** Faafetai i lau Afioga i le Fofoga Fetalai mo le avanoa. Lau Afioga i le Fofoga Fetalai faafetai ua maua se avanoa o lenei sui usufono e momoli ai se leo o lenei itumalo aua le Fonousu a Samoa e ala i le Palemene.

O le a ou le toe faloina le afalolua aua paia sausaugata o Samoa i le afua mai Gagae seia paia le atualuga i le papa le gae'e o tupu ma tamalii faapea le fale le see ma faalupega o tofiga. Ua mapu ai nei i sasaga le utuga o le vai nai Maauga ma Nuuausala, aua o lea ua uma ona e momoli lapalapa o malo e ala i le faamua ma le tatou taulaga faafetai i le Atua ua Faavae ai le Malo o Samoa.

E talitonu ai se manatu o lea ua mapu i le vai le ata o le tama o Samoanagalo, ua tatou mimusa i le taeao ula na pasioa paioa aua o lea ua futifuti manuula ina ua liutino le tatou tatalo sa fauao faupo ina ia manuia Samoa ma lona Malo.

Ua paia le Maota i le afio o lau Afioga i le Fofoga Fetalai ae tainane o le afio o lau Afioga i le Palemia ma Afioga i Minisita o le Kapeneta faapea Minisita Lagolago ma le mamalu o le Palemene i ona tulaga faalupe. E le faagaloina Afia isi ona vao i le tapuaiga a Lana Afioga Mamalu O Le Ao o le Malo o Samoa ma lau

Masiofo. Afifio Sui o le Fono a Sui Tofia ma a outou Masiofo, o le tapuaiga lava lea i Tama ma o latou Aiga, o Aiga ma a latou Tama, le Usoga ia Tumua ma Pule, Ituau ma Alataua, Aiga i le Tai ma le Vaa o Fonoti. E le faagaloina le nofo tapuai mai a le Motu i Sasae ia Sua ma Vaifanua, Fofu ma Aitulagi, Saole ma Saleaamua, Tootoo o le Faleula ma upu i le Manuatele.

E le vaea le falaooto i le nofo tatalo i sui vaai a le Atua i susuga i Faafeagaiga Taulagi o lo o falelemalu i so o se fatafaitaulaga i se tafa o le atunuu ma taloa manuia o Samoa ma lona Malo.

Ona ou oo mai lea i lou itumalo pele o Palauli Sisifo i lou nuu o Taga. Afifio le paia o Aiga Salevalasi, alaalatai lau tautalaga Faiumu, faapea foi le mamalu ia Falefa ma Faigata, ae tainane foi Faleupolu o Tofiga ia te oe le Salemuliaga. Isi ou nuu o Salailua ma Siutu, afifio mai alo o Sina ma Lealaitafea, afio aiga Sa Amituanai e susu ai le Savaiinaea, afio le Aloalii ma alii o le Vaipaepae, alaalatai oulua Matua o le Aitutagata Tuato ma Tuitolovaa ma le mamalu ia Salemuliaga. Afio mai Sa Lauulu ma Suafa, alaalatai lau fetalaiga Faatoafe ma le nuu faigata. O si ou nuu o Satuiatua ma Gagaemalae. Afio Faatupuinati ma Tuuaato, afio le Falesefulu o Pesefeamanaia, afifio Fuifale ma Sa Lilomaiava ma le mamalu ia Gagaemalae o le Tama e tasi o Faleupolu o Tofiga. O si nuu o Foailuga, afio le Matua o Tauavamea ma Leuso, alo o Mailata ma Moefaganoa ma Itualamavae ma Tamalefale ma Sa Lilomaiava, le nofo ituaiga i le Ailaoa; ma si ou nuu o Foailalo, afifio mai Letele ma Leaupepe Afio mai le Alo o Maiava, Alalatai le Falelua, seei ane ia i tou fala le see, ae se i ou momolia lo outou leo i le Fonousu a le atunuu.

Lau Afioga i le Fofoga Fetalai, ou te fia faaleo manaoga o si ou itumalo i le vaitaumafa o Palauli Sisifo. Ua ova ma le 15 tausaga le feagai ai o si ou itumalo i le faaletonu o le suavai, amata mai i Foailalo, Foailuga ma Satuiatua. O lo o maua mai se vai vili mai Sagone ia ma Fogasavaii i lalo o le Pulega o Suavai SWA, paga lea e mai le vai, ma e talafeagai e faaoga na o faleletaua e faaoga i ai. E ola tuu taimi foi, o vai e faatali i tane, o lo o taumamafa ai lo matou itumalo. O Salailua o lo o i ai lo latou vai tumaoti ua ova ma le 50 tausaga o i ai, ma ua mana'o foi se toe fia faaleleia i latou tane teu suavai. I Taga, o lo o ola mai le vai mai le vai vili a le SWA, ma e ola tuu taimi foi. E maitau atu o lo o faigata ma taugata vai o lo o vili mo pore holes e pei ona taua e lou uso faipule mai Sagone. E fai o le vai, taugata le eletise e mimitia mai le suavai, ae fai foi ma uma le suavai o le eleele. Ou te talitonu o lo o i ai le fofu tumau long term solution i faafitauli o vai i Palauli Sisifo ma itumalo o lo o sosoo ai i Salega.

I si ou nuu o Salailua, o lo o i ai le vaipuna, i le talaloa e malulu e pei o le kiona, ma o lo o feinu ma ola ai le nuu i le ova ma le 50 tausaga. Ou te faatusaina le punavai lea, e pei o le vain a puna mai i le papa lea sa ta e Mose ma feinu ai le nuu o Isaraelu i na onapo. Ou te talitonu o le vaipuna lenei, o se meaalofa lea a Ieova lo tatou Atua e faavae ai Samoa mo le atunuu, ma e tataua loa ona tapue ma tufa loa i o tatou tuaoi, o lo o galala i le fia inu. I le tele o taimi, o lo o maimau le suavai, e le mafai ona ofi tane e lua a le nuu o lo o i ai.

Lau Afioga i le Minisita mo Galuega, Felauaiga ma Atinae Eeseese lau Afioga Papalii Niko, lau tuualalo faamolemole na o se lua lava pe tolu ni tane storage tetele e teu ma faasoa atu ai le suavai. Ou te talitonu o punavai ma le sami, e pule ai le Malo., ae soalaupule e alii ma faipule o Salailua le meaalofa a le Atua ua foai fua mai, e manuia ai le nuu ma nuu tuaoi. Ou te talitonu e na o lena ua faaauau polokalame a le vai i Savaii i lalo o le EU ma le SWA le Pulega o le Suavai, ma alofa se i toe silasila ane lava ma faasaoloto loa si o matou itumalo o Palauli i Sisifo lenei pologa i le suavai.

Ou te fia tautala lau Afioga i le Fofoga Fetalai i le mala ua o tupu nei i le tatou atunuu, o le mala ua amata ona faatupulaia i lenei vaitau ma ua manaomia se fofu tumau, long term solution mai le Palemene, aua ua le mafai e matua, Faafeagaiga Taulagi, pule alii ma faipule ona fofu. O le a lea mala? O le faatupu vevesi le mafaufau, violence, e aofia ai le faamisa, ma le fasi tagata, talepe fale ma le faaleagaina o meatotino a tagata lautele pisinisi ma le Malo. O le vevesi a aoga i le tele o tausaga ma le vevesi a Avele mulimuli nei, o lena ua uma ona fai ai se fofu a le Kapeneta mo le taimi nei, faafetai. Ou te talitonu, e toaititi lava, pe tasi pe lua pe tolu e na faatupuina nei vevesi, a o lea e aafia uma ai le toatele o fanau matua ma le aoga taualoo o Avele e le i faamisa ma leai se agasala.

Ou te talitonu ia pau pea le samala i le ulu o le fao. Mo le fofu o lenei mala, ou te fia faatepa le Palemene i taiala o lo o i totonu o le Tusi Paia, o lo o i ai uma fofu o so o se faafitauli o lenei lalolagi ma faigata o tatou i ai nei. I le Esekielu 18:1-2 e faapea, “ua toe oo mai le afioga a Ieova ia te au e faapea, o le a le uiga o lenei faaupuga masani e tou te faia ia laueleele o Isaraelu e faapea, ua aina e Tama o vine moto ae magiagia

ai nifo o le fanau. O lo o ola au, ua fetalai mai ai le Alii, pule Silisiliese o Ieova, e le faaaauau ona outou faia lenei faaupuga masani Isaraelu. I le fuaiupu 20 e faapea; o le tagata ola e agasala e oti lava ia, e le nofosala foi le tama ona o mea sese a lona atalii. O le amiotonu a le ua amiotonu, ua i ona lava luga, o le amio leaga foi a le ua amioleaga e i ona lava luga.” E fautuaina ai le Palemene, e fai se Tulafono e toe faatulagaina ai le solitulafono o le faatupu vevesi, violence, faamisa, fasi tagata ogaoga ia tutusa ma solitulafono e pei o le faasioti tagata, toso teine, fualaau faasaina e tai 10 tausaga i le Toese ma sueina faatopetope i latou o faia nei solitulafono ma loka i le pasima se i maea lona faamasinoga. A faamaonia solifatulafono, ia lokaina i le pasima po o ni potu high security ma aua ne’i toe tatalaina i fafo se i maea se tausaga i le pasima.

Lau Afioga i le Fofoga Fetalai, ona ou oo mai lea i le mataupu foi lea i tama, tina, uso ma tuafafine i le Ola Toefuataina i le Toese, e pei o tamaiti faatupu vevesi sa ou taua muamua, ua fai le agasala a pagota e toalua pe toatolu e sosola, a ua aafia ai weekends a nai tagata sa usitaia latou weekends. O le tele foi o nai uso ma tuafafine na sasi i tulafono laiti Betty Crimes e pei o aitalafu le totogia ma mea faapena, ou te tatalo atu i le Kapeneta e toe silasila atu i le faaaauau pea o latou weekends ma latou o lo o usitaia tuutuuga o weekends. Ae loka pea i le pasima o pagota sosola soo e na o le toatolu pe toafa, ma faafoia ai foi le manaomia o leoleo e 200 e alu ai foi tupe e tele, e pei ona taua muamua e isi o sui usufono.

Ona ou oo mai lea i le aualatetele o Palauli Sisifo, lau Afioga i le Minisita mo Galuega Papalii Niko, ua ou maitau atu o lea faatoa oo atu atinae o auala galue i Palauli Sisifo, ua maea le auala galue e tasi i Salailua toe lua auala galue e le i faia, e le i maea le auala galue i Foailuga. E leai se auala galue i Foailalo, Satuiatua faapea lou nuu i Taga ma o lea e tatali atu lava le auala i Taga, i le mataaga foi lea o le Blowhole o lo o numera tasi i tagata tafafao mai atunuu i fafo. Lau Afioga i le Minisita mo Galuega, matou te taua oe o se tupu, pe a uma atu le lua tausaga, ua maea le suavai ma tatou aualatetele i lenei Paeaiga.

Lau Afioga i le Fofoga Fetalai, e talitonu le agaga o Samoa e na o se atunuu laitiiti i le lalolagi, ae a faatusalia i le olaga atiae ma le matagofie, o lo tatou atunuu i auala a le Malo, o atufalega matagofie ma taumafa tatou te maua, o le ola i se atunuu e toafilemu ma saogalemu, ona faapea ifo lea o i tatou nei, ua faafetai le Atua e Faavae ai Samoa, ua faafetai i le tatou Faigamalo i le atinae ua oo i ai Samoa.

Lau Afioga i le Fofoga Fetalai, o le agaga faafetai ma le loto malie , e momoli pea i lou itumalo o Palauli Sisifo, tofiga ua mafai ai nei ona usufono i le Fono Aoao a Samoa . Ia faamanuia le Atua i lau Afioga i le Fofoga Fetalai, faapea le Palemene a Samoa ae ola pea le sui usufono o Palauli Sisifo, soifua ma ia manuia.

## **23 IUNI 2016**

**Afioga ALAIASA MOEFAAUOUO MALAGAITUTOGIAI SEPULONA MOANANU (Anoamaa Sasae):** Malo faafetai i lau Afioga i le Fofoga Fetalai. Sa ou tau mafaufau lava pe fai se sao o lenei itumalo ae faafetai mo le avanoa. E le umi foi se matou faamatalaga, ua maitau foi i saunoaga, ua o se fau lava e tai finagalo o Afioga i sui usufono mamalu. E pei lava o lea e agai i le faafetai a itumalo ma nai manaoga aua lava le tapuaiga a itumalo. Ua taoto a o se alaoo paia o Samoa, e i ai foi le talitonuga o lenei itumalo, na ona uliuli lava o le moana, a ua iloa lava ala o i'a. E tele laau o le vao ae iloga lava le laau e malu i ai laau i lona paolo. Ona i ai lea o le matou manatu, o le a le toe taina i tua se matou faamatagaluega, o lea foi ua matau atu ua tuli tamoe le faamoemoe o le tatou Fonousu aua le talanoaina o le Tala o le Tupe.

O le a fagatonu ia le malama ma vili tonu le ifi a Maina, aua se faamoemoe mo manaoga laiti o lenei itumalo. E pei lava ona ou talanoa atu, e savili a faapuna o manu le tatou taeao na liugalua, o manu foi ma lupe sa vaoseese o lea ua fuifui faatasi i le Maota i Tiafau o le Maota o le Faautugatagi e saili i ai le tofa ma le moe aua Samoa mo nei ma taeao. O lenei aso o le aso lava a atofa aua le faamoemoe o le lauiliuina o le tamaoaiga o le atunuu, faafetai. O la e tapuai mai, o lea foi ua tetee i tai lo tatou sa, o lea ua tuanai peau iti, o aau iti, a o lea o le a tatou oo atu i aau mamao. Ona i ai lea o le manatu, e mua se faafetai ma se viiga i le Atua ona o lana puleto ma le pule faasoifua ua momoli mai ai le soifua o le paia o le Maota i lenei taeao na liugalua. Ua ou vaai la ua maua, aua e i ai le talitonuga o lou lelei o lea ua see ai nei le sa o Samoa i tai o penapenaga ae le o tua o tai. Ua tatou see foi i peau matamataloloa aua ua gase le peauvale, ae ua laga le peau aua le sa o Samoa. Ua uma foi ona tofi tofa le laau a le tamaitai aua le filiga o faigamalo, sa saili i le tai se agavaa ia Samoa ma lona fale ma lona sa, o lea ua tali le Atua e ala i ana tofiga. Tatou te faafetai ma viia le Atua i nai so o se mea.

Na o si au faapai i le tapuaiga a Samoa ne i fai ma lape o se matou leo, i le tapuai mai i maota ma laoa ma tui ai le muli o le papa ma feula mai le mulila e amata mai i le tai samasama seia paia le siufanua o le Alataua, le paia aua le Faatui ma Tootoo, le paia aua le nofo i le Faleagafulu, le paia i Aiga ma Tama, ae a le Usoga a Tumua ma Pule. O paia faataotooto na e le avea o lou sa Samoa ma lou atunuu paia e le avea i le tapuaiga malu i le aufaigaluega tofofi a le Atua i fatafaitaulaga e fia, i la outou faanonogamanu, o lea ua ae manuia o tatou faiva. Talu ai nei, sa poia i afa le folauga, ae peitai ane, ua toe faia lava e le Atua mea silisili tatou te viia ai Lona suafa, ua faaseeloa ia matagi i le vasa, ma nuu e leai ni tagata, ae ua faasaoina ou laufanua Samoa. Aemaise foi le tapuaiga mau aua le tafatolu o Faigamalo, i Lana Afioga Mamalu O Le Ao o le Malo aemaise foi o Sui o le Fono a Sui Tofia, lau Afioga i le Palemia ma le Kapeneta, tainane le Fofoga Fetalai ma sui usufono mamalu o le Palemene, tainane foi le afio o le Faamasino Sili ma le paia o le Matagaluega o Faamasinoga. Ia o le mamalu lava lea o Matagaluega taitasi a le tatou Malo.

Ia, si o matou itumalo, o lo o taputapu mai foi ma tatalo mai, faafetai mo latou faaeaea lea ua papale ai lo outou sui usufono i upufai o Malo, e fai ai lo matou faatauvaa e fai ma outou sui usufono aua lenei Paeaiga. O le paia lava lea aua le afio o le Tapaau ma oe Lufilufi o le Tumua, ae a ou fuaiala. O le paia foi aua le falefitu o le itumalo i le afifio o Aiga, Aiga o Tupu ma Aiga o Nofo, tainane i laua Matua ma le tofi faasolo i le aai o le Tupu. O paia taotooto na o si ou itumalo, faamalo le tatalo. I le paia o le Aufaigaluega o lo o talafaauto aua se manuia faale-Agaga o le itumalo. Le paia i le susu o le Toeaina ae faapea foi le Afioga Patele, ae a Faafeagaiga e fia o faafalelemalu i totonu o le afioaga, o outou manu na ma outou mama na. O le tatalo a le sui usufono, ia to ni manu mai le Atua ma ia aoga le ea o le Anoamaa Sasae aua se faasiliga malosi faaletino.

Ia, e le tele lava ni manaoga o le itumalo....

Faafetai mo le avanoa. Ia, ua palemene foi le faamalositino a sui usufono mamalu o le Palemene, ua maua foi si faasiliga malosi e faaauu ai le tatou galuega.

Ia, o le a oo mai se tala a Anoamaa Sasae i manaoga o si ou itumalo. E pei lava ona ou faailo atu, sa tilotilo foi, e le tagisa foi le itumalo, ua masani lava le itumalo ia, o le a le mea e maua, o lena.

Lau Afioga i le Minisita mo Galuega, Felauaiga ma Atinae Eseeese, o lena ua faaoo atu se project development a lenei itumalo i lau Afioga. E tuutuu atu i ou autafa sina poloketi mo lenei itumalo. O le 2001 e ese le sui usufono na tulai mai. O le 2006-2011, o le tausaga lava ma le faiga palota ma sui le sui usufono. O lea foi la ua sui mai le 2016, e tasi lava le tala a toeaia, sole, vaai le tatou auala. O lona uiga, a le faia foi le auala, e le toe sau foi le sui usufono i le isi palota. O le mea lea, na ona tuu atu lava i ou tafatafa i lau faasoa, ia e alofagia lenei itumalo, e pei lava o lea e le o lavea i le faasoa foi lea a le tatou Malo. Ae ua iloa foi o le mea lea o le Tala o le Tupe o le balance sheet e tataua ona paleni le isi itu ma le isi itu. O le 1985 na fausia ai le atinae a le Malo lae i ai i le mea o le poloketi foi lea e alu ai le eletise i le vai. O lea la e oo mai lava i le taimi lenei, e le o tagisa lava le itumalo, na pau le mea o le vai ia ola lelei ai le eletise a le atunuu, ae ositaulaga lava Anoamaa Sasae. O le mea lea, na ona tuutuu atu faapena i le Minisita mo Galuega, leaga e i ai isi itumalo e aiuu i mea ia, a o Anoamaa Sasae, e faasafua ea ia aua le manuia o Samoa.

Lau Afioga i le Minisita o Tupe, o lau faamalosi ia te oe, manatua le upu foi lea a le Atua na fai ia Iosua ina o le a faaauu le malaga foi lea i totonu o le nuu paia, fai mai, 'Ia e lototele ma e faamalosi, ou te i ai ia te oe i aso uma o lou ola.' O le mea lea, o lau faamalosi ia te oe le Minisita o Tupe, aua e te palaai, aua e te fefe, ioe. O le mea o le tupe, o le mea e sue, ioe, o le mea e maua. A e le tuitui, e le tatala mai foi mo tatou, ae aua e te atugalua, leaga o le olaga o tatou, e faigata lava ona e alu alu i luma e toe sau i tua. E leai, a e alu loa i luma, e tai pei lava o mea a le Atua, e te siitia mai le isi mea i le isi mea, i le isi mamalu i le isi mamalu, ae pei o le a taofiofi. O le mea lea, o lau lea faamalosi i lau Afioga ia lava lou loto e fai ai mea a le atunuu. O lea ua faafofoga mai, ua tagi uma mai Samoa. O ai e sulu i ai? E sulu mai i le Malo. O le mea lea tuutuu atu i ou tafatafa ia maua pea lau tofa, aua le polo faasoa aua Samoa. O lea ua matau atu, faafetai i lenei tupe tele ua aumai i le matou Matagaluega lea o aoga. E pau lava lenei o le atunuu i totonu o le lalolagi e aoga fua mai lava i lalo i le Year 1, e tau i luga i le Kolisi. O se mea matautia lea ua faatu e le tatou atunuu. Ae fai fono a nuu i Aso Toonai, o lea e tau aue atu le pulega a alii ma faipule i matua, se se i ave tamaiti i le aoga. E ui lava o i ai foi ni tulafono lea e i ai e compulsory aoga, ae i ai lava matua e faatautau lava i le tulaga o le fausia o manaoga o le Malo. O le matou lea tatalo i le atunuu, amuia outou, atonu foi o le mea lea ua tau le lelei ai aoga a le fanua, ona o la e maua fua le mea. Ua tataua foi ona toe tuu i ai sina...



e tau aumai pili aua na o le bingo le mea lea e sosoo, po uma po uma o lea ua faaalu ai la le tupe lea, ae faagalo le fanau, o le oa mai le Atua, o le lumanai manuia lena o le aiga.

Faafetai i lau Afioga i le Minisita o Tupe, ona o le tele o lenei tupe. E na o le lua lava lu'i ia e tuu atu i le Minisita ona faaiu ai lea o le matou lauga. O le mea muamua, o lea ua aumai le Tulafono lea o le Fono a Nuu, Village Fono, o lea foi ua toe teuteu mai ai isi mataupu ia e toe tuu i ai i toeaia. E a pe a vaai se vaega tupe e maua ai tupe o le Fono lea. O la e tapuai mai toeiina ae tatou o foi lea, o luga o security boxes, o le malu puipuia o le atunuu, e telē tele le sao o alii ma faipule i le mea lenei. E le taitai ona gafatia e tatou leoleo lea e i ai, e le o faaauppegaina foi leoleo. Ana le tu malosi mai le pule lea a alii ma faipule, ia talofa e, e na ona ou tuu atu faapena i lau Afioga i le Minisita. O lona lua, sei vaai ifo le totogi o le aufaigaluega a le Malo, ua sefulu tausaga e lei toe siia se totogi, o le mea lea ou te fai atu ai, e pei lava na ova sii i le isi vaitaimi. Ao le mea e tatau ona siisii malie foi lea, aua e pei lava e masani tele loa i lau tupe maua, ia ua vave a foi ona masani le faaogaina. O nai lu'i ia e lua, i lau Afioga i le Minisita, ia tautuana ma oe le faamoemoe. Faafetai mo le tatou atinae o le malae vaalele, o le matua atinae taua, o lea foi ua molimauiina e le Tala o le Tupe, e tasi lenei o tupe tele o le a faaalu i lenei Paeaiga, o le atinaeina o le malaevaalele, aua lava le faatosinaina o turisi. Ae pau lava le isi mea, sei toe lalaga le tulaga o le tatou vaalele, pe le mafai ona toe tuu ifo i ai, ia fai sina o tatou kamupani vaalele fou, sui le igoa ae faaalu ai le tatou atinae lea, aua le agai i luma. Ona faaiu atu lea o s matou faamatalaga lau Afioga i le Fofoga Fetalai, e le mafai ona faagaloina si a matou komiti o le palota o lo o tapuai mai, ma nai ou aiga. O le anavatau lava o le palota a matou, o le pese lea a le ekalesia Katoliko, o le faatuatua ma le faalagolago, ae o le sili o ia mea o le alofa. O lea la ua ou pale mai, faafetai i lo outou alofa, faafetai o lea ua aumai lo outou talitonuga, ia faafetai. Faafetai foi i nai ou aiga, a ta'u loa lo'u aiga o lona uiga ua lavea uma ai tagata uma o aiga, e lavea atu ai ma isi tagata e le tatau ona taua. Ae o le suafa o le sui usufono mo le silafia, o Alaiasa Moefaauouo Malagaitutogiai, o lona uiga o le lufilufi o le Falefa ma le Falevao, o ou aiga uma lava na i o matou nuu ia, e le iloa pe toe fai nei foi se isi matai i le lumanai. E toatele aiga, ae faafetai i le Atua i la outou lagolago o lea ua pale ai. Viia foi le Atua i nei tofiga ua amanaia ai e le Malo. Ia tatou faafoi le viiga i le Atua. O le tulaga o le... na o sina tala sei oo i si o matou nuu i Lufilufi. Lufilufi faafetai i lau susuga Faapaū, aua le va ma le tamā o le tatou nuu. O lea lava ua taulu taulu, ua malo lava le finagalo o le Atua. O le mea lea, e le selu atu, leaga e tapaa faasisina ia ma le tapaa le fano. O oe lava o le fale Tuiatua e malu i ai Samoa. O le mea lea, ia faamalo fai o le faiva, malo tofa i le Atua, ia talosia ia faiva o le atunuu, aua le alofaiva o Le Ao Mamalu o le Malo, aua le alo faiva o le Palemia ma le Kapeneta, ia to ni manū, aua Samoa tapuai. Soifua ma ia manuia ae ola le sui usufono mai Anoamaa.

## **23 IUNI 2016**

**Afioga ALIIMALEMANU ALOFA TUUAU (Alataua Sisifo):** Faafetai mo lou avanoa. Lau Afioga i le Fofoga Fetalai o le Maota, faapea sui usufono mamalu o le Palemene, Samoa ua faatasi mai, ma Samoa ua faafofoga tapuai mai. Faafetai i le Atua Soifua, mo le Palemene o Samoa, faapea lenei avanoa, ou te tulai atu ai ma le ava e taumafai muamua lava le uluai saunoaga a le itumalo o Alataua Sisifo, mo le Paeaiga Lona XVI a le Palemene o le Malo Tutoatasi o Samoa, ona muliai ai lea o se faamatalaga i le Tala o le Tupe.

Ona ou tu lilia lea, aua o le papa e gata le Maota o Samoa, e leai lava se faafia atamai po o se faafiamalosi, e mafai ona gafagafa le tautolopaa o le Ulufanua. E mafua ai ona faapeipei se matou tala, aua le afio o lau Afioga i le Fofoga o le Maota o Samoa, lau Afioga i le Fofoga Fetalai, o lo o taimatalii le Palemene, o lea foi e afio mai le Afioga i le Taitai o le Malo, le Afioga i le Palemia. O lo o taimatalii le pulega a Malo, afio le Afioga i le Sui Palemia, faapea Afioga i Minisita o le Kapeneta ma Afioga i Minisita Lagolago. O lea foi e alaala atu Afioga i sui usufono mamalu, o sui o Komiti Faapalemene, ua lafo mai i ai le faatuatua e agaia le Malo, e ala i le faatinoina o matafaioi e aiaia le Palemene, i le mataituina o faatinoga a le pulega a le Malo.

Ua tatou faatasi foi ma Faaululuga o Matagaluega ma Faalapotopotoga a le Malo, o le malosi o le pulega a Malo faapea sui o le au faasalalau ma auunaga nofo tuavae a le Palemene o Samoa. O sa ia ma mamalu, o le a toa i le Maota o le Palemene. Ona segia lea o au i le ilaila masina, aua le faafofoga tapuai mai a Samoa, mai tuaoi tapui o le tauataata o le Gagae, seia paia le tauafiafi o le Gagaifo, mai ona vaega

maualuluga seia paia le tagutugutu o le vao filifili, ae a le ee o fata lele o o le vaatele o Samoa, le Afioga O Le Ao Mamalu o le Malo ma le Masiofo, faapea le ee papaaao a le nofoa tolu o Sui o le Fono a Sui Tofia, ma a outou Masiofo. A o le tapuaiga foi a le Afioga i le Faamasinoga Sili, ma le ituau fefaatauagai o le Faamasinoga, aemaise lava faiva tatalo a le Auaigaluega totofi a le Atua, o lo o polapui e le pulega a alii ma faipule i afioaga ma alaafaga.

O le paia lava lea aua Aiga ma latou Tama, Pule ma Tumua, Ituau ma Alataua, Aiga i le Tai ma le Vaa o Fonoti. Ae le galo i le loto, le tapuaiga a Tutuila ma Manua, o le Uso ma le Aiga, aua Sua ma le Vaifanua, o Fofoga ma Aitulagi, Ituau ma Alataua, Saole ma Saleaamua ma le Launiu na Saelua, faapea le Faatuiolemotu, Tootoo o le Faleula, ma upu i le Manuatele. O le maualuga lea o Samoa e le gafataulimaina e le vaivai, ona i ai lea o le taofi, taoto ia le laau ma ona lau.

Ona fai lea o lau faafetai, faafetai i le Atua i Lana valaau ma le faaogaina o lou tagata faatauavaa, lea ua ou seei ai nei i le Nofoa o le itumalo Alataua Sisifo, ma ou vaavaai atu i lau Afioga i le Fofoga Fetalai, ma le maualuga o lenei Palemene, ma auai i le Maota o lo o fai ai tonufai a Samoa, ae sa lilo i manatu, e faitau ane ai. O lea le loto, ina ia tauaogaina le ola ma le malosi, mo si ou itumalo ma Samoa, ae sili ai le viiga o le Atua.

Lou itumalo pele o Alataua Sisifo, aua le paia o si ou nuu o Falelima, le afio o Tapaau ma Nofa a Faalupega, lau fetalai Fofoga o le Fofoga o Papa ma Faiga ma le mamalu i le Alataua. Le faafofoga a si ou nuu o Tufutafoe, afio o Gisa ma Leusoalii, afio le Seuula ma le Aiolutepotea, susu ai Toleafoa, afio Tuifaiga, alaatai ai lau fetalai Momoemausu ma le Lautinalaulelei, ma le mamalu i le Alataua. E faapitoaugafa sau faamatalaga i si ou nuu pele o Neiafu, aua le afio o le Tama na Faasau a le Alataua, o le Tapaau Tasi, lau afioga Tonumaipea o le Alataua, afio aiga o Samoeleoi, o le aiga Faitatau, o le aiga na au i Ao, o le aiga na au i Papa, alaatai laua Taatiti ma Tuaiiafai, i le mamalu o le Nofa o le Fofoga ma Faleauga, ma Upu ia te oe le Alataua. E le galo le tapuaiga le malolo a le Auaigaluega paia a le Atua o lou nuu faapea le itumalo.

O lea ua pale i galutuu le seega papa a le tupu, ae sina ulu auma ina ua tau le autapale ma le faatinigauto ua ae malo lau tapuaiga leolea sa fauamalo i le alofaiva o la outou auauna, peitai e le galo i le loto oe ma lau tofa faalele, ua filifilia ai lou tagata faatauavaa e momoli mai lou finagalo i le Fonousu a Samoa. E lagona ai pea le faatauavaa, a o ai ea le tagata? A o le a foi se maataua e mafai ona ou avatu, e faailoa atu ai lou agaga faafetai? Pau o lea, ou te tulivae i le ao ma le po i le Atua o manuia, ia faamanuia i lo tatou itumalo. O si ou manao, aua ne'i galo ita i si au tatalo faamolemole, aua e mana lau tapuaiga, e maua ai le malosi o le auauna, aua e le faigofie tofi ma tiute o le valaauina. E faapena foi si au tatalo fai tumau, ia aua ne'i liliu ese fofoga o lo tatou Atua, ma i lo outou paia ma mamalu ma ia pale pea Lona suafa i le viiga, i lo outou soifua faaogaina. E faafetai atu foi i uso ma tuagane vaeatu o outou sa e le avea, e sa tatou tauva i le faiga palota lautele a le atunuu, mo se tofi o la ta itumalo. O lea ua malama ulugalua i le tofa o lo tatou itumalo, ae manatua i le loto lo outou finagalo tamalii. Ae o le soifuaga ua maea tuumatamaga e le Atua soifua, o au nei, o oe taeao. Tatou taofa tatalo, aua e fou le alofa ma le agalelei o le Atua i aso uma. E fia faafetai foi i le Afioga Lafaitale, sa tauaveina le tofi o le Alataua Sisifo, i Paeiga e lua ua mavae. O le a taumafai e faaauu galuega lelei sa fitaituga i ai.

E fia fai lau faafetai i le Afioga i le Taitai o le Malo, le Afioga i le Palemia, taoto ia lou soifua lafoai mo Samoa, aua e sau aso e alu foi aso, a o lou sao taua mo Samoa e tautala aso, aua o au galuega lelei e mulimuli atu ia te oe, a o manuia foi o le Atua, e auga tupulaga. E manuia ai e tutupu mai ia te oe, vaeatu ou sa ma faiga. Ae o lau faafetai faapitoa, ona o le le afea o au i se tofiga o Minisita Lagolago, ae avea au ma se tasi o le Itu Agai faaitaitai, o sui usufono o Komiti Faapalemene, e mataituina faatinoga a le Malo, ma faatino isi matafai o le Palemene. O le mea moni, e pei na tau i ai se lagona le amanaia ina ua le tofia, ma i tofiga o Minisita Lagolago, ae ua amata nei Galuega a Komiti Faapalemene ma ua foi mai foi i le malaga muamua Faapalemene na o atu ai i Ausetalia, ua taoto mai le ata ma le taua o le galuega a Komiti o le Palemene. O lau faafetai lenei, ou te le o fai atu o nisi o tulaga, ae o le taua o le atinae o lou sui usufono, ua manino le faamoemoe ma le taua o le galuega, faasui o Komiti o le Palemene i nei foi faatinoga o le valaauina.

Lau Afioga i le Fofoga Fetalai, e fia fai foi lau faafetai i ou aiga, e le gata i totonu o si ou itumalo ia ae faapea foi le salalau ai i Samoa nei ma atunuu i fafo. Faafetai le loto aiga, faafetai le fai afafine, faafetai le fai uso, faafetai le fai tuafafine, e lagona i le loto le mafanafana o a outou tatalo, faamanuia tele le Atua ia

te outou uma. Faafetai foi i uo ma e pele i le loto, i la outou lagolago i lenei taumafaiga, ua tau manuia i lo outou alofa, o e foi sa galulue faatasi i so o se tafa o le soifua galue, faafetai lagolago, faafetai tatalo. Alofagia e le Atua lo outou valaauina.

Lau Afioga i le Fofoga Fetalai ou te fia faafetai foi i lo matou aiga, le Afioga ia Leota Taatiti Manaiia Kenape Tuuau ma le fanau, aua e tasi lava le auala e faigofie ai ma mafai ona saofaga se tina, i faalagamaea nei a le atunuu, o le finagalo malie o le tama o le aiga. Aua o le vaa sii vale lava se sa e fou folau i fafo, ae e le i taoto i le agatonu le lotoifale. Ia e lagona ai lava ma le faatauavaa ia alofaaga ma le loto faafetai, i le toalua ma le fanau, vaeatu lenei Maota ma Samoa faafofoga mai.

Lau Afioga i le Fofoga Fetalai ma lenei Maota, a o le i tuuina atu se manaoga o lenei itumalo, e fia fai sau tala i lau vaaiga lautele i le soifuaga ua tatou i ai nei. O Samoa o le atunuu faamanuiaina, e tele taimi e galo ai i ai tatou o Samoa o le atunuu faamanuiaina, ona e tupu pea le manao, ma le soifua faatusatusa. Ae a tatou vaavaai i le televise, i faalavelave tutupu i isi atunuu o le lalolagi, o le molimau ola lena, o Samoa, o le atunuu faamanuiaina O nisi o na atunuu, o atunuu e malolosi lo latou tamaoiga, ma le puipuiga malu faafitafita, ae ua soifua i le fememeai ma le atuatuave, ona o faiga faaterorisi. O le mea mautinoa, o le malosiaga o nei atunuu malolosi, e tele ai foi le avanoa e toe atinae ai, mai ni puapuaga tau osofaiga ona e malolosi tamaoiga. A faatusatusa i si o tatou atunuu e maaleale lona tamaoiga, e matua faigata ona toe tau atinae, pe afai e tutupu ni puapuaga faapenei.

E pei ona tatou maitauina i afa e pei o Eveni na mavae atu nei, i le toe taufetuunaiga o mea e ave i ai le faamuamua a le Malo, ina ia aua nei nofo le auaunaga taua masani ae toe taumafai mea na faaleagaina. O i tonu lea e mafua ai lau tala, o Samoa o le atunuu e faamanuiaina, pe a tatou vaai i le televise i le soifua sauaina ma le matelaina i fafo, ona tatou molimauina lea o vavega o le alofa tunoa o le tatou Atua ia Samoa. Peitai, o nei foi vaaiga i le televise, e aumai ai ma le feau taua, o le ola mataala ma le soifua magafagafa, aemaise o tatou o taitai e puipui si o tatou atunuu, ina ia ‘aua ne’i oo mai nei sauaga, ona o talitonuga faale-Lotu, ona tatou te le iloa pe mafai ona tatou manumalo ai. E mafua ai le lagolago o le Alataua Sisifo o le finagalo faaalua o le Afioga i le Taitai o le Malo, le Afioga i le Palemia, ua tatau ona silasila i le faamautuina o le faavae o Samoa, na o ekalesia keirisiano, e faataga i Samoa. O le tiute lea o i tatou o taitai o Samoa, o le silasila i ni auala e puipui ai lo tatou atunuu. Ma ou te talitonu, e ui o lo o agai le saunoaga a le Minisita o Tupe i le autu o le Tala o le Tupe 2016/2017 i tulaga tau tupe, lea e faaautu e faapea, ‘faamalosi le faavae ma tapena mo taeao.’ Ae ou te manatu, o vaega uma ia o le soifua faamalosi le faavae ma tapena mo taeao, e aofia ai ma le faamautu o se lumanai manuia ma filemu ma saogalemu, mo tupulaga o Samoa o fai mai, i so o se tulaga moomia. O le tatou valaauina lea o taitai o Samoa ia tapena ia malosi mamalu Samoa mo a taeao. Lau afioga i le Fofoga Fetalai, ua manino le saunoaga a le Minisita o Tupe i le Tala o le Tupe 2016/2017, e faauou lea autu ma le Tala o le Tupe 2015/2016 e faapea, ‘ia fua o tatou manao i le seleni ua tatou maua.

O lea e faapunafanau le Tala o le Tupe 2016/2017 e faapea, toe fetuunai tupe maua ma tupe faaalu ina ia fausia ai se faavae mautu mo le tamaoiga mo le lumanai. O i lea e taoto ai le talitonuga o lenei itumalo, e folasia ai manaoga, ona lafo atu lea o le faasoasoa a lo tatou Malo.

Lau Afioga i le Fofoga Fetalai e auala atu i le Nofoa nai talosaga nei a Alataua Sisifo, i Afioga i Minisita o le Kapeneta ma le pulega Malo. Lau Afioga i le Minisita o Tupe, sa ou faalogologo ma le totoia i le tele o manaoga a itumalo, talofa i lau tau faasoasoa ma lau faamanatu mai ia i matou, e le mafai ona manuia se atinae, pe a tatou naunau i seleni tatou te le mafaia ona tagolima i ai, faaopopo ma le mau, e tatau ona fua le manao i le seleni ua maua. O le tuualalo, ia toa lou loto, o le a tatou galulue faatasi pea e ala atu i le Komiti o Tupe, ae na ona ou faapea atu, e le tagisa lou itumalo, lea o le a fua tonu atu lava le manao o Alataua i le seleni ua maua, ma o i ina e iloa ai le lagolago o lenei itumalo i le Tala o le Tupe ua folasia i le Maota.

Lau Afioga i le Minisita mo Aoga, Taaloga ma Aganuu, taoto ia ou paia, ae ou te manatua ai lava oe a o e taalo i le Manu Samoa i le saosaoa o lau tamoe ma le vave lasiina o le polo, o lea ou te manatua na umi ai lava ona i ai le talita i le SCOPA i nisi o tausaga ua mavae. E le taumate e faapena foi le faatinoina o lau auaunaga i le Matagaluega i le vave pasi o faaiuga i le aufaigaluega ma le saosaoa o le faatinoina o mataupu tuua.

Faamolemole se i tagai ane lava i le galuega mo le vaeluaina o aoga faaitumalo a le Itu Asau, po o le lua tausaga talu ai lea e faapea, o le a tuufaatasi Falealupo, Tufutafoe, Neiafu ma Falelima ma o le a fai lava le matou faleaoga Faaitumalo ona ua taumamao Sataua mo fanau aoga. Ua maua sa i ai se maliega o le a faatupe le matou aoga Faaitumalo e le Faletupe o le Asian Development Bank o se isi o a tatou paaga, faafetai pe afai o lea se fuafuaga o le a i ai, pau le mea e popole ai, i uma ane ua faatupe ai se isi faleaoga, ae o lo o fia vaai mai lava le matou itumalo i lou afio atu e faatino lea auaunaga taua mo fanau.

Lau Afioga i le Minisita mo Galuega, Felauaiga ma Atinae Eseeese, faafetai ua maea le auala galue a Tufutafoe ia Fepuari o le tausaga nei, e talitonu o lena ua oo tonu lava lau faasoa i auala galue a lou itumalo, aua ua 30 tausaga e le i toe fuaina o matou auala galue, ua toe lava la o auala galue o Neiafu ma Falelima e le i suaina. Matou te le manaomia se ta, ona e taugata, ona e tau faasoasoa tupe a le Malo. E pau le mea e moomia faamolemole, ia sua le auala galue ina ia sao taavale i uta i faatoaga, faaopoopo i ai ma le fia faaleleia o le auala-ta lenei... Road mai Tufutafoe agai i Neiafu-tai, ona ua le toe mafai ona toe uia e ni taavale laiti. Ia ua uma mana o Alataua Sisifo i mea e ono faaalu ai tupe a le Malo, ma ua fua tonu atu lava le mana o le seleni ua maua.

E lua lava nai motugaafa lau Afioga i le Fofoga Fetalai aua le faaleleia o nisi auaunaga i lou itumalo, ae leai se tupe faaopoopo a le Malo e alu ai. Lau Afioga i le Minisita mo Fesootaiga, Faamatalaga o Fesootaiga Vavave Faaneionapo ma lou soatau, se ua faafetai, ua matua talafeagai lelei lava le tuufaatasi o oulva i le Matagaluega Faatekonolosi. Pei lava ona ou faamatalatala atu soo, le matua le iloa lava e si o matou nuu o Neiafu o mea e tutupu i Apia nei, ona e fai o le lē ola ai o se TV, ae tau le maua lelei mai foi ala leitio. Ou te talitonu e leai lava se isi o Neiafu o iloa o lea ua fai le lauga faa-taupou a le latou sui usufono. Faafetai o lea e maitau atu i le TV ma le leitio le faamanatu faifaipea a le Pule Faatonu po o le Regulator i kamupani o lo o faia lea auaunaga taua i leitio ma televises, ina ia totogi a latou laisene mo le auaunaga mo Samoa atoa.

Lau Afioga i le Minisita mo Fesootaiga, afai o le laisene o lo o tuuina atu mo le auaunaga mo Samoa atoa, a lea e le o maua e Samoa atoa lea auaunaga. Se o i ina e iloa ai lou toa i la oulva tofa fetuutuunai, ma lua fautua lelei ma le talafeagai ma lou soatau. O le a lafo atu le faaleleia o lea auaunaga mo si ou nuu o Neiafu.

Lau Afioga i le Minisita mo le Soifua Maloloina, e faalogologo atu i saunoaga a sui usufono mai le motu tele o Salafai, e toetiiti lava le asa ma se talosaga mo se fomai i o latou falemai faaitumalo, aemaise foi le fia maua o fualaa ma vailaa manaomia. O le faaletonu la e tupu i le falemai i Salega, e tutusa lelei lava ma le faaletonu lea e tupu i le falemai i Satua, e na o pandols lava e maua i le tele o taimi i le falemai i Sataua lea e autovaa uma atu i ai itumalo o le Itu Asau, e tuli lava i Tuasivi le tele o talavai.

O lea e ave le faamuamua a le Malo i le soifua maloloina i le Tala o le Tupe, ma ua faaitiiti tupe galue a Matagaluega uma a le Malo i le 10% ina ia mafai ona siitia tupe faaalu mo Matagaluega a le Soifua Maloloina faapea Aoga. Ou te talitonu la, e le o le tupe lea e ala ai ona leai ni vailaa i falemai i Savaii, a o le lape i le auaunaga a e o lo o okaina vailaa ma faasoasoa atu i falemai faaitumalo. O le tala masani a fomai e fai pe a uma ona tusi mai talavai, ua leai se tatou sapalai vailaa ma fualaa, ona ua leai se tupe, se i maua mai le allocation o le masina fou ona faatoa maua mai foi lea o ni a tatou fualaa ma ni vailaa. E matua le malamalama lava nai toeiina ma nai loomatutua i ia faaupuga. E talosaga atu ai ma le faamolemole, se i tagai ane i lea auaunaga ina ia faaleleia.

Lau Afioga i le Minisita mo le Soifua Maloloina, afai ua paopapa sa matou tala, ia malu ave i fale lou finagalo mea uma o faaletonu o lo o tutupu i o matou falemai faaitumalo i Savaii.

Lau Afioga i le Fofoga Fetalai, ua taoto atu se lafovale o lenei itumalo i manaoga e patino ia Alataua Sisifo, e maitau atu e faapea uma foi isi itumalo o lo tatou atunuu, lafo atu pea ia i aao faasoa lelei o le Kapeneta, o laau na filitofi e faatino le finagalo o Samoa. Ona i ai lea o le taofi, o le a foi le leo o Alataua Sisifo, o le a se upu ua taugalemalie i le faafofogaaga, a o se manatu ua faapaiafoga, tofa malie ma uta malie

Se i fai sina tala i le fesili e uiga i le Lipoti a le Komiti o Tupe. O le fesili e uiga i le faaaogaina o le upu “pau”. Pei ona sa tali mai ai le Matagaluega i sailiiliga, e talitonu o le agaga tonu o le tali a le Matagaluega e pei ona i le kopi faasamoa, “o le lē maua o ni tupe faasili,” o le faaperatania tonu o le upu lea e masani ai matou o Accountants, o le Deficit. Atonu ua matuia tele le upu ua faaoga o le Bankruptcy. Ma o le

aotelega o le Tala Faatatau i le Tupe, e avea ai au ma sui o le Komiti o Tupe Maua ma Tupe Totogi, e faapea atu ai. E matua lagolagoina le Tala Faatatau o le Tupe 2016/2017.

Lau Afioga i le Fofoga Fetalai, alofagia e le Atua lou malosi i so o se tulaga moomia aua tiute o lou valaauina, maua lau tofa aua le faatautaiga o le Maota o Samoa. Lau Afioga i le Palemia, ia saga utupupuina e le Atua fulu o le segaula i lou malosi. Ia foai le tofa poto aua lou too taumua i le sa folau o Samoa. Lau Afioga i le Sui Palemia, a outou Afioga i Minisita o le Kapeneta, maua foi lo outou malosi ma le tofa mai le Atua, e fesoasoani i o outou tiute e le faigofie. Ia agalelei foi le Atua i le malosi ma finagalo o Minisita Lagolago, aua o outou tiute e lagolagosua. Maua foi se malosi o lenei itu o le Maota, i Taitaifono ma Sui Taitaifono Faapalemene, sili le latou tofa ma le soifua faale-Agaga, e tautoaluaina ai faiva ma tiute o le valaauina. Ia agalelei foi le Atua i Faauluuluga o Matagaluega Faalapotopotoga uma a le Malo ma o latou sui o lo o tatou mafuta i lenei afiafi.

Le tapuiga a Samoa mai e ua i ai tofiga a le Atua ma lana Aufaigaluega tofoti, seia oo i le tupulaga lalovaoa, agalelei le Atua. O a ni mala o fou mai, tau ina ta ma faapoi ae folau i lagima le sa o Samoa. Si ou itumalo pele o Alataua Sisifo, o lea ua ta fia manusina, ina ua to'a peau lagalaga o le vasa. O le a se vaivai, tofa malie ma uta malie, agalelei tele le Atua i lo tatou itumalo.

E faamuli ma le ai le faafetai tele i le Failautusi ma le Ofisa o lo o tautuaina le Palemene. O le matou tala lea ma le faaloalo. Manuia tele lau Afioga i le Fofoga Fetalai ma sui usufono mamalu uma o lenei Maota, faapea Samoa o faafofoga tapuai mai. Soifua.

## **24 IUNI 2016**

**Afioga Hon SILI EPA TUIOTI (Minisita o Tupe):** Lau Afioga i le Fofoga Fetalai, faafetai tele mo le avanoa. Talu ai ona o le faasaoina o le tatou taimi, e le umi foi se faamatalaga. E muamua ona momoli atu le faafetai tele i sui usufono mamalu o le Palemene mo a outou saunoaga matagofie e faatatau i le Lauga o le Tala o le Tupe a le tatou Malo mo le tausaga 2016/2017. E pei ona taua i le aso na folasia ai le lauga, o le Tala o le Tupe, o le Tala o le Tupe a le Malo atoa sa soalaupule ma iloilo totoa i ai le Afioga i le Palemia ma le Kapeneta ma sa fesoasoani mai foi iai fautuaga mai Ofisa Sili o Pulega ma Faalapotopotoga Tumaoti a le Malo ina ia mautinoa ua afea uma vaega taua o le tatou tamaoaiga ina ia mafai ai ona fausia se atinae mautu ma se lumanai manuia mo Samoa atoa. Faafetai i la outou lagolago, faafetai foi i manatu na faalia ma fautuaga i nisi o vaega o le Tala o le Tupe e saga faaleleia ai a tatou auunaga ina ia faapea ona tatou tali atu i auunaga o lo o manaomia e o tatou tagata. E maitauina foi ua lagolago atoa e le Komiti o Tupe Maua ma Tupe Totogi le Tala o le Tupe. E momoli atu ai le faafetai tele i lau Afioga i le Taitaifono o le Komiti faapea sui usufono o le Komiti.

Lau Afioga i le Fofoga Fetalai, o le po anapo lea sa saunoa le Afioga i le Palemia e faamalamalama atili le oototoga o le faataatiaga o le Tala o le Tupe. E pau nai vaega ou te toe faaopoopo i ai, o le tulaga lea o le tatou tupe faasili ma tulaga na laga e nisi o sui usufono i le nogatupe mai fafo ma nai isi tulaga e pei o le tuai ona totogi o aitalafu a le Malo.

Lau Afioga i le Fofoga Fetalai, e taua tele le tulaga lea o le i ai o se tatou tupe faasili. O lo o ua faataatia e \$23.6miliona le tupe faasili ua i ai i totonu o le Tala o le Tupe mo le tausaga fou. O le taua o le i ai o se tupe faasili, muamua, e tatau lava ona i ai se tatou teugatupe po o se faaputugatupe tatou te tagolima i ai i taimi e afaina ai lo tatou atunuu ma lo tatou tamaoaiga ona o ni faalavelave ma ni afaina e le gata i faalavelave faalenatura, ae faapea foi i fesuaiga o le tamaoaiga o le lalolagi aemaise tamaoaiga o atunuu ma Malo o lo o tatou faipaaga.

Lona lua, o le taua o le i ai o se tatou tupe faasili, o le a mafai ona tatou faatupeina ai nisi o atinae po o ni galuega ua ave i ai le faamuamua ma le faatauaina e le i fuafuaina i le taimi na tapenaina ai le tatou Tala o le Tupe i le amataga o le tausaga nei.

O lona uiga, o lo o i ai lava le avanoa i le tatou Malo a faapea e tulai mai nisi atinae taua ma ua tatau ona ave i ai le faamuamua, a o lo o i ai le tatou tupe faasili o lo o i ai e mafai ona fesoasoani e faatupeina ai vaega ia, e ese mai le tatou tupe ua fuafuaina mo le faaalu e le fuafuaina, po o le unauthorised expenditure.

Ma le lona tolu, o le i ai foi o tatou tupe faasili faapea, o le a maua ai le avanoa e mafai ai ona tatou toe tagai pe le tatau ona vave faaitiitia a tatou aitalafu i le faapea ona vave totogi atu. E pei o le tulaga lea e taua le toe faaopoopo atu ai i le faamalamalama a le Afioga i le Palemia i le po anapo.

O lona lua o mataupu lautele sa laga, o le tulaga lea i nogatupe. Pei ona taua i le lauga o le Tala o le Tupe, o le maualuga o lo o i ai tatou nogatupe i le taimi lenei, o le mafuaaga ona ua i ai i le tulaga ua tataua ona fai ni nogatupe i lona taimi e tali atu ai i le toe faaleleia o aseta a le Malo ma fesoasoani ai i pisinisi ma o tatou tagata i le afaina talu ai le lologa ma le afa lea o Evani, e pei ona silafia sa tele se faaleagaina ai o le tele o tatou aseta taua e pei o le auala, o le eletise, o vai, e faapena foi le fesoasoani atu i pisinisi sa afaina. O le tulaga lona e moni lava foi o lo o tatou taofiofi ma fuafua lelei a tatou nogatupe, ae i ai le taimi e alagataua ai ona tagolima le Malo i tulaga ia o nogatupe ina ia aua ne i afaina le tamaoaiga, ia faaleleia aseta ina ia mafai ona tatou tali atu i manaoga o tatou tagata.

O lo o faataatia lava le fua latou ia, e tataua ona 50% o le tatou GDP e tataua ona i ai tatou nogatupe mai fafo, ae tataua foi ona i le Malo le flexibility e mafai ai ona toe saili nisi tupe nono mai fafo pe afai ua manaomia e lagolago ai le atinae o le tatou tamaoaiga.

O le isi foi itu, e tataua ona tatou tagai i le faaaogaina lelei ma le faatinoina o atinae tetele a le tatou Malo o lo o faatupe mai nogatupe nei, aua a lelei faatino ma maua uma tulaga na tataua ai ona tatou manaomia nogatupe nei, o le a faapena ona toe fesoasoani lava atinae nei e toe totogia tatou aitalafu lea e i ai nei. O le faanaunaga foi lona i le Malo i le tulaga ina ia toe tagatagai i le capacity o lo o i ai i totonu o tatou Matagaluega ma Faalapotopotoga ina ia faapena ona lelei ma mautu le faaaogaina o nei tupe, ia faataunuu ma faavave maea atinae o lo o lagolagoina nei vaegatupe ina ia faapena ona maua e le tatou atunuu faamanuiaga mo nogatupe nei.

Lau Afioga i le Fofoga Fetalai, sa laga foi tulaga ia i mea o aitalafu a kamupani ma pisinisi i le Malo. Ou te masalo tasi lenei vaega e pei ona folasia i le Tala o le Tupe o lo o toe tagai i ai le Malo ina ia faafaigofie ma faavave ona toe faafoi atu tupe, aemaise lava i pisinisi laiti. Ua uma foi ona talanoa i le Matagaluega o Tupe e moni lava o lo o faapea o lo o i ai le faiga faavae e 14 aso e tataua ona iloilo, ae i lou manatu, e tataua ona o le taimi lava e taunuu uma atu ai pepa ma ua uma ona siakiina ua sao ma ua i ai vaegatupe, e leai se mafuaaga tataua o le a faatalitali ai i le fitu aso. E tataua ona toe vave ona toe totogiina atu, aemaise lava i a tatou pisinisi laiti i nuu i tua, o lo o tele ina faaaogaina e Matagaluega i a latou auaunaga.

Lau Afioga i le Fofoga Fetalai, masalo o le luitau tele lava mo i tatou uma o le tatou taumafai ina ia tatou galulue faatasi i le faatinoina o a tatou fuafuaga i se tulaga aupito sili ona lelei ma maopoopo. E leai se aoga e manaia ai tatou fuafuaga ae le lelei le faatinoina. Ia vave faatino atinae ua ave i ai le faamuamua a le Malo mo le soifua manuia o le tatou atunuu ma se tamaoaiga alualu i luma mo Samoa ma tupulaga o lo o fai mai.

Lau Afioga i le Fofoga Fetalai, e fia faaaoga lenei avanoa e momoli atu ai le faafetai tele i Ofisa Sili o Pulega faapea foi Faalapotopotoga Tumaoti a le tatou Malo mo galuega lelei o lo o faatino ma o lo o faaauau pea le faatinoga ina ia mafai ona tatou fesoasoani atu ma faaleleia atili, e le gata i le tamaoaiga a o le service delivery i o tatou tagata.

E momoli atu le faafetai faapitoa i le Ofisa Sili o Pulega o le Matagaluega o Tupe e faapea le aufaigaluega a le Matagaluega o Tupe, o i latou ia ua leva ona galulue e amata mai lava ia Oketopa i le tausaga talu ai i le tapenaina ma le tuufaatasia o le Tala o le Tupe ua i o outou luma. O le mea mautinoa o le taumafaiga ina ia faapena ona siisii i luga le tulaga o le auaunaga a le Matagaluega nei, aemaise foi o Matagaluega o lo o i lalo o lau portfolio. E pau le mea e faafiafiaina ai, e leai se faitio pe leai foi ni popolega i le auaunaga i le tele o Matagaluega o lo o i lalo o lenei portfolio e pei o le Faletupe Tutotonu, le NPF, o le Faletupe o Atinae, le SLAC ma le UTOs ma i latou na.

Lau Afioga i le Fofoga Fetalai, masalo na o le pau ia o ni vaega i le aotelega. E momoli atu foi le faafetai tele mo ni fautuaga tuuina mai. Masalo o nei fautuaga o le a fesoasoani tele lea i le Malo, i le Kapeneta, i uso a Minisitā ina ia faapea ona toe iloilo ai ma toe vaavaai i a tatou faiga faavae o lo o i ai nei ina ia faaleleia atili, ina ia faigofie ma faaleleia atili le auaunaga mo tatou tagata. E pei o se faataitaiga, sa tele foi ni finagalo faaalua i tulaga ia tau auala galue, atonu o fautuaga na aumai, e mafai ai foi ona tilotilo i ni faiga faavae, ni taiala e fua i ai pe prioritise i le faatulaga i le faatauaaina, po o ai itumalo e tataua ona faamuamua. E tataua ona fua i le tulaga o itumalo o lo o galulue ai atinae ma faatoaga, ae tataua ona ave i ai le faamuamua ina ogatasi ai ma le taumafaiga ina iaf aapea ona faateleina ni a tatou oloa e auina atu i fafo. Ae faafetai tele, ua maea ona faamaumau le tele o fautuaga taua, e ono fesoasoani ai i le toe faaleleia o le tatou auaunaga.

Lau Afioga i le Fofoga Fetalai, ua uma ona faapai atu foi i le itumalo ma le matou nuu i Salelologa i le aso na fai ai le lauga, ae toe avea ia lenei avanoa taua e momoli atu ai le faafetai tele i lo outou lagolagoina ma lo outou talitonuina o lenei tagata faatauva e avea ma sui usufono o le tatou afioaga i totonu o le Palemene o Samoa. O le tofiga foi ua i ai nei mai le Atua e auala mai i le Afioga i le Palemia, o le Minisita o Tupe, lou itumalo e, o lo tatou tofi lena tatou te tautua ma auauna ai ia Samoa ma ona tagata. O lea ou te tatalo atu ai ina ia faapea ona outou tatalo mai pea ma lagolago mai ina ia faigofie le galuega faifaatasi.

Ia fesoasoani mai le Atua e foai mai lona poto ma le faautauta ma le loto faamaualalo ina ia faapea ona tatou faatinoina ai ona tofiga ma galuega ua valaauina ai. Viia le Atua, faafetai i lau Afioga i le Fofoga Fetalai mo le avanoa.

## **24 IUNI 2016**

**Afioga Hon FAAOLESA KATOPAU T. AINUU (Minisita mo Faamasinoga ma Pulega Tau Faamasinoga):** Lau Afioga i le Fofoga Fetalai o le Fono Aoaofaitulafono a Samoa, ou te tulai atu i le agaga maualalo ma le faaaloalo tele e tataua ai ona o le avanoa ua maua e lou nei sui usufono faatauva e taumafai atu ai se sao o lou itumalo o Vaimauga Sisifo Nu.2 po o Vaimauga le Sagauga i le Paeaiiga Lona XVI lenei a le Palemene.

Ae ou te le i utufia le taua o tofumaoga na saafi ai le Malietoa i lona galala, ou te muai faatulou i le paia o le Maota o le Palemene ma le atunuu aua o lea ua tini tauao i ai paia ma mamalu o Samoa atoa. Tulouna le paia o le Palemene i le afio o lau Afioga i le Fofoga Fetalai, tulouna i lau Afioga i le Palemia, le Sui Palemia ma le mamalu o le Laulau a Fono a le Kapeneta. Tulouna le paia o sui usufono filifilia uma o itumalo faaalaalafaga, tulouna le paia i le nofo a Komiti eseese o le Palemene i ona tulaga faalupelupeina.

Ou te faatalofa atu foi i le faafofoga tapuai mai a Lana Afioga Mamalu O Le Ao o le Malo, lau Afioga Tui Atua Tupua Tamasese Efi ma lau Masiofo faapea le paia maualuga i Sui o le Fono a Sui Tofia, i lo outou vaa seetolu, lau Afioga Tuimalealiifano Vaaletoa Sualauvi, lau Fetalaiiga Tuiloma Pule Lameko, faapea lau Afioga Le Mamea Tuiletufuga Ropati Mualia.

Ou te faatulou atu foi i le tapuai mai a lau Afioga i le Faamasino Sili lau Afioga i le Aoe, Patu Tiavaasue Sapolu ma le paia o le Faamasinoga a Samoa.

Tulouna le paia o Tama ma o latou Aiga, o Aiga ma latou Tama, le mamalu ia Tumua ma Pule, Itua ma Alataua, Aiga i le Tai ma le Vaa o Fonoti. Tainane foi le faafofoga tapuai mai a o tatou uso i le motu i sasae aua Sua ma le Vaifanua, Fofu ma Aitulagi Saole ma Saleaamua ma le Launiu na Saelua, le Laau na Amotasi, Auvaa o le Tootoo ma upu ia te oe le Manuatele.

Ou te faatalofa atu foi i le tapuaiga a Ofisa Sili o Pulega o Matagaluega ma Pule Sili o Faalapotopotoga a le Malo, faapea foi le Afioga i le Failautusi o le Fono ma le paia o le aufaigaluega a le Ofisa o le Fono.

Ua maua foi lenei avanoa ou te faatalofa atu ai i le tapuaiga a le aufaigaluega tofofi a le Atua o feoi o le Talalelei o lo o tauasuina le ipuvai o le ola aua se inumaga faaleagaga a Samoa mo nei ma a taeao. O paia ma mamalu faalupe ia o Samoa ua taoto a o se alaoo, e leai se poto po o se vave na te toe suia, aua e mai le vavau e oo i le faavavau. Nuunuu atu ia ia Tumua ma Pule la latou matafaioi.

Lau Afioga i le Fofoga Fetalai, ina ne i tuutuuloga afeofe o le vaaloga i lau folasaga, ae ou te fia afea muamua si ou itumalo pele o Vaimauga Sisifo Nu.2 po o Vaimauga le Sagauga aua a na le seanoa la latou faaeaea i lou nei tagata po o penei ou te le o saofai i le Nofoa o le itumalo. Lou itumalo e, faafetai le lagolago, faamalo le lotonuu, faafetai le tofa sailimalo, o lea ua silimea le seuga nai tuavao ae silasila saaga le paia ma le mamalu o le Palemene o Samoa i le matagofie o lou alofa faaalua i le itumalo. O lo tatou galulue mulumulu aufoe faatasi aua le faamoemoe mo se tatou sao i upufai o le atunuu o lea ua malama ai i ulugalua e pei o le saoga o le faiva o le Tapuitema. Talofa ua sula fala o ieie i lou lailoa ai, o lou fatuatia ma le ulufia o ou aao mo le tapenaga o le faiga palota. Se a ea le tagata faatauva ua e manatu ane ai? Na o Asomua na sii lona fale i le mauga, a o lenei ua sii atu foi ma lou fale i le mauga, ona o le moni o lau sailimalo ma le moni o lou lotonuu. Na o le Atua na tetau atu lou agalelei, ia alofa le Atua ma tau i lou fitaituga.

A o paia o Sinave ma Motootua, o Tauese foi ma Matagalalua, e le tau faalauiloa, e tumau pea e le avea. O le tatou itumalo foi Vaimauga Sisifo o lo o tu ai le taulaga a Samoa e tapuvaetasi i ai le atunuu. E le gata i fatia ua alu ma taimi ua sola, ae oo mai i le aso.

Le paia e o le itumalo i le afifio o Tama Alosina ia Seumanutafa ma Toomalatai, le afifio o Fuaifale o Salevalasi ia Tamaseu ma Faualo, afifio o Iaua Matua ia Faaolesa ma Onofiatele, le faletolu ia Tuiletufuga, Letaa ma Pupualii ma le Vainalelepa. Tapuai maia ma tui mai le mulipapaga se i ou taumafai e taia le tuluvao aua so ta sao i upufai o Malo.

E le vaea foi le falaoto i lo tatou va nonofo ai aua le afio o Usoalii ia Tupuola, Faumuina ma Siligatusa, afifio Matua ma le aiga Sa Malietoa ma le paia eseese o Aiga e fia e pau mai Mulinuu, Sogi, Fugalei, Savalalo, Taufusi, Togafuafua, Saleufi, Palisi, Alamagoto, Aai o Fiti, Lalovaea, Leone, Vaisigano, Papauta, Setemafou, Alaoa, Vaoala, Letava, Papaloloa. Susu mai oe Tuisamau ia Feagaimalii ma Samau. Mapu ane laia i sasaga ma tuumuli o vaatele se i fana le u i le vateatea a la outou sui usufono, tatou talia lupe o mau, e faigata lau tapuaiga mo se ai o le ta itumalo i lenei Paeaiga.

Faafetai i le Atua ua filifilia le tofi o le tatou itumalo e le Afioga i le Palemia i le laulau a le Kapeneta, aua sa taumate i le ete ma tauilo i tofaga pe tau ane ai le faataata a le Afioga i le Palemia. Faafetai, faafetai, o lenei ua pale lo tatou vaa sa lalaga, o le viiga lea i le Atua. E lagona lava le faatauvaa ma le le tusa ai ma le faaeaea taualoa. A o la le fai Salamo, “Aua, aua, aua lava nei ia tatou le viiga, ia tuu atu pea le viiga i le Atua aua e onomea ma tataua Lona laei i viiga, le faamanu ma le faaneetaga.

Faafetai i le auaigaluega a le Atua i fatafaitaulaga uma o le itumalo mo talosaga molia i faletui i sou sao ia Manuvao o lea ua tau ai le ai o alae e pei o le fetalaiga i le pa ma le aso. Faamalo tatalo, faafetai faamalosiua, faafetai i taimi e tau fai ifo ai le malosi o le tagata. O faiva e manuia, o faiva ia e tapuaia.

O se taimi muamua lenei talu ona faavae mai le Malo o Samoa ua filifilia ai se matai o le nuu o Apia i le tofi o le Minisita o le Kapeneta. E ui lava e le o se mea fou i le itumalo lenei ma o se mitamitaga tele lea i lou agaga. E le uma ai lava le fia faafetai i le Afioga i le Palemia.

Le itumalo e, tuu maia se avanoa se i tau tapena ai la outou auauna. Atonu e le o toe mamao se taimi ona tatou feiloai lea, e le galo Afia i si ona vao. E fou lou tofi i le galuega faa-Minisita, e le taumate foi tulaga o fita ma le faigata o le galuega aemaise o le faatuatuga ua tuuina mai i lou faatauvaa e tauave ai tofi faa-Minisita. E faamoemoe lava mea uma i le agaga o le Atua i lona faatasi mai e manuia ai faiva ua tofia i ai. Ou te talitonu lau Afioga i le Fofoga Fetalai ua lava lea lauga, atonu e mau nisi manatu i se taimi o i luma.

A o se manatu i le Tala o le Tupe ua faapea ona faataatia nei, e avatu lava le faamalo i le Minisita o Tupe, faamalo i le Ofisa Sili o Pulega o le Matagaluega o Tupe, faamalo le galue, ma e lagolagoina atoa e lenei itumalo le Tala o le Tupe e pei ona talanoaina nei.

I le Minisita mo Galuega, Felauaiga ma Atinae Eseese, faamuamua pea auala o le ta itumalo, o lea ou te nofo ai ma e papaaao ai i le ta itumalo.

O talolasaga ua faapea ona taatia i le Laulau a Fono mai lea itumalo ma lea itumalo, taatia mai laia, o le a soalaupuleina faatasi ma le Minisita o Tupe ina ia maua se tali vave. E i ai foi faiga faavae e tataua ona mulimulitai i ai i lea fuafuaga ma lea fuafuaga aua se tali atu i la outou faatalosaga.

Lau Afioga i le Fofoga Fetalai, o le a seu i fanua le sa o lenei itumalo o Vaimauga le Sagauga. Ia lagi e mama ma faafualoa e le Atua le soifua o Lana Afioga Mamalu O Le Ao o le Malo ma Lana Masiofo. Ni ao gasolosolo aua le tapuaiga i le Sui o le Fono a Sui Tofia, lagimama lau Afioga i le Fofoga Fetalai o le Maota, ia manuia lou tulai mai i le foe. Faamanuia i le Palemia ma mamalu o le Kapeneta ma sui usufono uma o le Palemene. Ia manuia le faafofoga mai o le tapuaiga a lou itumalo o Vaimauga Sisifo po o Vaimauga le Sagauga ae ou ola i le alofa o le Atua. Soifua.

## **24 IUNI 2016**

**Afioga Hon AFAMASAGA LEPUAI RICO TUPAI (Minisita mo Fesootaiga, Faamatalaga ma Fesootaiga Vavave Faaneionapo):** Faafetai lava i lau Afioga i le Fofoga Fetalai. A o le i amata se faamatalaga, e muamua ona ou faafetai atu i le Ofisa o le Fono i nofoa ia matou te nonofo ai. O le manaia ia o le nofoa i le faalue, a o le manaia foi o le nofoa, o lea lava ua latalata mai le taimi e lauga ai, ae te i lava ua luelue le nofoa ae ta te le o gaoioi. Ia, faafetai tele i le tofa i nofoa ua faaoaga.

O le nofoa lea ou te nofo ai, ua ou fiafia lava i lou sau e tele e leai se isi o nofo i i le autafa lea ona o le tele o mea e mafai ona tuu ai au api, o pepa. Ae ina ua logo mai e amata atu i i le tali a le Malo, na vave lava ona ou manao e sau se isi e toe nofo i le pito lea. Ae faafetai i le tofa ua ae i le Afioga i le Palemia o la e ua oso mai le la i o, ae goto i le pito lenei a Amerika Samoa. E manatua ai le toe suiga o tatou aso.



Ou te tulai atu i le ava tele, o le a ou le tapuea faalaa le ola le paia o Samoa i leni taeao o le Fonousu a Samoa aemaise o le faafogafoga tapuai a si o tatou atunuu. Tulouna le susu o Taitai o Ekalesia ma le Aufaigaluega a le Atua o lo o tuitui sauli aua le alo o Samoa i ona faiva. Afai ou te uia le ala i Tavalagi, e popole, aisea? Aua e ae i mauga ma ifo i vanu o le Tuiatua. Afai foi ou te uia le ala i Tuvalu na ifo ai le aiga Sa Tagaloaalagi ae faalava le tamaitai o Leamo e popoe foi aua e faigata le Malietoa. Ae tau ia ina ou faapea atu, lau Afioga i le Fofoga Fetalai ma le paia o le Maota aemaise le tapuaiga a Samoa, tulouna galu e fa na faafua aua Aiga o Tupu, Aiga o Nofo ma Aiga o Papa o Samoa.

Tulouna galu e iva o Aloalii o Samoa, tulouna peau e sefulutolu o Aiga o Samoa, o paia foi o tapu e sefulu ma Mulivai Fetaiai, ou te talitonu o le atoaga lea o tupu nai ou malae ma le anofale, o le vaifala o Samoa, ou te manatu e le soona sagolegole i ai se tautai i aso faapenei. Tulou foi le tapuaiga a le tatou motu i Sasae, tulou tulouna lava.

Ou te faatulou atu i le faafogafoga tapuai mai a Lana Afioga Mamalu O Le Ao o le Malo ma lana Masiofo, i le afifio o lo outou sa seetolu aua Sui o le Fono a Sui Tofia, e faatalofa atu foi i le Tafatolu o Faigamalo i le afio o lau Afioga i le Faamasino Sili ma le mamalu o le Faamasinoga, afio foi lau Afioga i le Fofoga Fetalai ma le mamalu o le Fonousu a le Palemene, aemaise lau Afioga i le Palemia o le Taitai o le Malo ma le mamalu i Minisita o le Kapeneta.

E faatalofa atu foi i lau Afioga i le Failautusi o le Fono ma le Ofisa mamalu aemaise afioga i Ofisa Sili o Pulega ma Pule Sili o Matagaluega ma Faalapotopotoga a le Malo o lo o faatasi mai ma le tapuaiga leleoa a si o tatou atunuu pele mai ona fata maualuluga seia oo lava ina auvae mauga.

Ou te manatu o lea ua e lafo i lumafale le viiga o le Atua i leni taeao ma ua e soaina foi nifo o le fatafaitaulaga aua le siitia o le tatou viiga. E manatu tau lava ina tatou toe fono faapipii ia tumau atu i le Atua Lona viiga nei seia oo i le faavavau faavavau lava.

Si ou itumalo e, e lagona le ootia pe a ou tau ia te oe Aana Alofi Nu. 3, ia tapuai maia ae se i ou alo aua finagalo faaalua o le mamalu i le Fonousu a Samoa i lana Paeaiga Lona XVI. Lau Afioga i le Fofoga Fetalai, ae ou te le i alo e ta se ai muli a le Malo aua lou tali atu i le mamalu o le Palemene, ou te manatu o leni itula e fofogaina ai le faafetai a lou itumalo i le Afioga i le Palemia ona ua afea leni itumalo i lona finagalo ma ana tofiga ua ova i le 30 tausaga e le oo mai le tofi Minisita i le itumalo leni o Aana Alofi Nu.3. Faafetai faafetai tele. Lau Afioga i le Minisita o Tupe, matou te faafetai atu e tusa ma le galuega maeaea ma le tapena, faafetai i lau Afioga i le Pule Sili ma le mamalu o le Ofisa mo le galuega fita, ma e matua lagolagoina e leni itumalo le Tala Faatatau o le Tupe 2016/2017.

E faapea foi ona matou momoli le faafetai i le Komiti o Tupe i lau Afioga i le Taitaifono ma la outou Komiti i le galuega fita sa faafeagai ai aua le toe auiliiliina ma e momoli ai le faafetai i nai au Matagaluega ma le Pule Sili o le Matagaluega o Fesootaiga faapea foi le Susuga i le Tamaitai Pule ma le Faalapotopotoga o le Pule Faatonu, a o le Falemeli foi ma le aufaigaluega o le Falemeli a Samoa ona o la outou lagolagoina o tulaga uma i Paketi a nei matafaioi o lo o i lalo o la matou vaaiga.

Le mamalu e o sui usufono, ia ua tupu lava matagi i liu o vaa i outou finagalo faaalua. E le tele ni finagalo na agai mai, ou te manatu o se vaaiga foi lea ma foliga o galuega a le Malo sa faatino i lea tausaga ua tuana'i atu. O galuega faaaau nei a le Malo e tali atu ai i outou manaoga, aemaise o le itu tau fesootaiga. Ou te manatu o outou finagalo ua faaalua e ala i le televise ma manaoga tau leitio, o manaoga tau telefoni, o initaneti, ma so o se tulaga o fesootaiga, ia tau lava ina matou tali faapenei atu i lona aoaotetele.

O le tulaga o faiga faavae a le Malo ma lana manulauti, ina ia faasopolia le atunuu leni i faasalalauga, ina ia faafaigofieina faasalalauga i totonu o le tatou atunuu ma fesootaiga. A o fea pito e le i taunuu i ai, tau ina matou faapea atu, onosai mai, o le a faaaau atu, ma o le a faaaau atu galuega o leni lima tausaga. O le taimi nei foi mo lo outou silafia o lo o galulue le Malo e tau aumai i luga le tatou paipa mai lalo o le sami, submarine cable o lo o faamoemoe e taunuu mai i le tausaga fou. O le faamoemoe ina ia faapipii faatasi ma le tatou Samoa National Broadband o lo o i ai nei pei ona taua e le tele o a outou folasaga ma outou finagalo ona faapea lea ona faafaigofie ai fesootaiga, faataugofie ai fesootaiga, ma faaatoatao ai fesootagai i totonu o le tatou atunuu. Ua tatou ola i se olaga e pei ona outou faafogafoga i letele o folasaga ma le taua tele o le tekonoosi, o le fatu lea o le tamaoiga o le atunuu. O lo o tatou ola i le mea e tau o le E-role, o le E i le tatou faa-Samoa. O le E-commerce, E-agriculture, E-education, E-tourism, tele ituaiga E. O lona uiga o lo o outou faafogafoga mai nei, o le fatu o le tatou tamaoiga, ma o le fatu o le tatou atunuu lea o lo o uu i

aao o Lealailepule ma ou lima. Ae aua tou te popole, o lea o lo o faagasolo a tatou galuega, ma o lea foi ua faamaumau uma outou finagalo o le a amata ona faagasolo atu i ai a tatou galuega fai. Ae ki ki mai pea le TV, ki ki mai pea lau leitio, e alu alu lava ola.

Ia, lou itumalo pele o Aana Alofi Nu.3, i le susu o Faafeagaiga o lo o faafalelemalu i lo tatou itumalo aua le tauasuina o le vai o le ola, faamalo faafetai mo a outou talosaga ma la outou tapuaiga. E le gata a o alo si o tatou atunuu e faaae le tai ma faaifo le vao i le faiga palota na se i mavae atu nei, ia ae faapea foi i lenei taimi a o tau sii le sa o le Malo e amata a latou galuega fai. O la outou faatofalaiga i le mana o a outou tatalo lea ua momoli mai e ao ae tuutuu mai e le savili. Le afio o Saipaia le Aloalii aemaise o Sauimalae, le matua taulagi ia Taito faapea le afifio o Lilomaiava. Le afio o le Tamaitai tasi o Aana lau Afioga Letelemaana, maliu mai le matua ia Pei ma le Falefa aemaise lau fetalaiiga Satuimalufilufi.

Tainane foi le afio o lau Afioga i le Saoolii lau Afioga Toalepaialii ma lau Tapuala, lau Fetalaiiga Vaili o le Laau na Fausia ma le mamalu i le Faleaana ma si o tatou nuu i Satapuala. Le afio o lau Afioga Letelemaana, afio foi lau Afioga Taimalelagi ma alo o Taimalelagi ia Feiloivao, le afio o le Taofia aemaise le alaatai o lau Fetalaiiga Talimatasi ma le mamalu i le Faleaana ma le tatou nuu i Faleatiu, aemaise si ou nuu pele ia Vailuutai ma Fasitootai aua le afifio o le Aiga Taulagi i malae na lua, afio o Toleafoa ma le falefia o ona alo, aemaise foi le afifio o lo outou fale Tologafua Afamasaga ma Afamasaga ma Afamasaga. Afio o lau Afioga i le Maopu o le Tuiaana lau Afioga Tuigamala, ae tainane le alaatai o oe le alii o aiga o le Falefitu ma le Fale Fasitoo. Fai mai le tagi faasulu a le tamaitai o Sinalemalama, ua maea ona tapena le maota, ua salu ma ua sisi pola, ua fofola foi fala, ona fai mai lea o ana upu, se ua ta fia pai i vai o le tama i Amaile Leanapapa.

E faapena moomooga o Seaula i la outou auauna, e le mama ia te au la outou faaaloalo lea ua ou seei mai ai i le nofoa o le ta itumalo. Tau lava ina ou paia vai o le tama ma ou faapea atu, faafetai i la outou pule, faafetai le faaaloalo. O la outou pule lea ua toto tetele ua ou sapaia faatuaeleele, o lea ua tau i le niusina la outou faaeaea, a o lou loto ua soaemalagati i le olioli i le Atua ona o lou valaauina. Ae lafo mai laia, o a o tatou manaoga o i ai, o lea ua uma ona tuu i aao o le Malo e faasolosolo i ai ana galuega, ae tuu maia au se i ou ta se ta mamao e le gata mo le manuia o le ta itumalo, ae faapea foi ia Samoa atoa ma lenei tofiga.

Ou te fia faaagaina foi lenei avanoa lau Afioga i le Fofoga Fetalai ou te faafetai faapitoa ai i le Afioga ia Toeolesulusulu Cedric Pose Salesa Schuster, o se uso a o se tamalii foi o lenei itumalo sa ia tauave le tofi i le lima tausaga ua mavae. Faafetai tele ia te oe Toeolesulusulu i galuega uma sa faatino i lena lima tausaga. Faafetai foi i lou taalo faatamalii a o faapea ona alo le tatou Malo mo le faiga filifiliga. Aumai laia lou faatuatuga o le a ou asu se ta ipuvai aua le atinae o si o ta itumalo i lenei lima tausaga.

Lau Afioga i le Fofoga Fetalai, ou te fia faaii i lou faafetai i nai ou aiga ma nai au uo e le gata i Samoa nei a o atunuu i fafo. Faafetai tele i la outou lagolago, faafetai tele i la outou talosaga o lenei ua iu manuia faiva o le atunuu a o lea foi ua amata ona alo le tatou sa. Ia tapuai maia ma tatalo, ia alofagia e le Atua ma ia faamanuia ia te outou. Lou itumalo e, ia to manuia o le itumalo i outou eleele, ia ufitia ai le vaomatua, ma ia faapea ona lilofia ai le gataifale. Ia agalelei le Atua i susuga i Faafeagaiga aemaise lo tatou itumalo atoa ma e uma o lo o palota i le tatou itumalo.

Lau Afioga i le Fofoga Fetalai, ou te le mafai ona ou nofo i lalo ou te le i faafetai i lou toalua ma lau fanau. O lea sa saunoa nisi o sui usufono, o au le sui usufono laitiiti toe aulelei, ae ou te fai atu ia te outou, tou te le i tagai i le lalelei o lou toalua, o le best lava lea a le toeaia.

Ona faauma atu ai lea o au upu faapea, o upu a le Perofeta o Isaia i le Isaia 40 fuaiupu 31, ona o lea ou te mulimuli i le tali a le Malo i lenei aso ma le Tala o le Tupe, fai mai upu o lo o i ai, "A o e faatalitali i le Alii e faafouina i latou, e faaloaloa o latou apaau e pei o aeto, e tamomoe ae le vaivai, e savavali ae le saogalemu. Tuutasi le faiva o Pili i le Atua. O le tatou faatamasoaliiga ua amatatia i lenei tausaga, tatou tuu i le Atua, o le Atua lea o lo o faavae ai lo ta Malo. Ia manuia tele le Fonousu a Samoa i lenei aso, aemaise le tapuaiga faafogafoga mai a si ou atunuu pele, i le suafa manumalo o Iesu. Amene.

## **18 IUNI 2019**

**Tofa NAMULAUULU LEOTA SAMI LEOTA (Faasaleleaga Nu.2):** Lau Afioga i le Fofoga Fetalai, o lea ua talatuu le tafaoga i le tofa tatala ua ou uia ai foi lenei avanoa faaauo, se i faailo ai se lagona o lenei itumalo vaeatu le vaatele i le Fonousu a le Palemene o Samoa, ae tainane le tapuaiga mamala a si o tatou

atunuu. O le tala e fai i le atu Fagaloa, “Ou te tu i Fao ae ou te fia laa i Malata, se i apo ane le ua ina ia sopo le soifua o le alii o le atu” ae paga lava lea, e manao i le ufi ae fefe i le papa. E momoo foi i le lupe ae fefe i le gata. O le ala lea o le ui a uta o se leo o lenei itumalo, se i muai togi le aute i fanua ma faalanu le tapui e faigata lo tatou taeao ua sooula ma aso ua laei mamalu. E faafualalafa ai se leo ma le faaaloalo e faapea, tulou, tulou, tulouna lava.

Tulouna le malae i Tiafau o le afeafe o le faamanusina a Aiga ma a latou Tama, a o le tupua na tu malo ai le ati fetalai ma le faasau ma ta i matagi aua le usoga a Pule ma Tumua, Ituau ma Alataua, Aiga i le Tai ma le Vaa o Fonoti. Tulouna le malae i Tiafau o le malae na osi ai le feagaiga a Samoa ma le Atua o le faavavau, e ala i le galuega mana a le vaa folafola o le Talalelei na o latou lalase le povalea, ae faavae ai nei i le Atua Samoa, e pei ona togia e outou tuua ma o tatou matua. A lea ua pa ai nei le male ae maota lele ae maeva ai Samoa uma i le laulai o le alofa matalasi o le tatou Tapaau mai le lagi.

E muamua ona ou faatalofa atu aua le nofo tapuai a Lana Afioga Mamalu O Le Ao o le Malo, a o sootaualo foi o lau Afioga i le Sui o le Fono a Sui Tofia. Ua paia sautuaafe le malae i Tiafau aua o lea ua aina le falalafa i le tofa faalele, lau Afioga i le Palemia ma le Aiga Kapeneta, ua nofoia foi Nofoa o le tofa faatonutonufolau i lau Afioga i le Fofoga Fetalai o le Maota, lele foi ua atoa le atuao o le saofaiga i pou faifaia o sui usfuono o le Palemene o Samoa. A, e le galo le tapuaiga mou, a lau Afioga i le Sui Faamasino Sili ma le Ofisa o Faamasinoga.

E manatua foi le la itu o le vai, le paia maualuga i le Faleagafulu ma le Manuatele aua le susu o Sua ma le Vaifanua, Fofu ma Aitulagi, Ituau ma Alataua, Saole ma Saleaamua ma le Launiu Saelua, tainane le nofo a Maopu, le afio o le Laau na Amotasi, Alii Faatui ma le Auvaa o Tootoo ma upu ia te Oe Manuatele.

E faatalofa atu foi i le afifio o le Kovana Sili ma le Kovana Lutena, afio lau Afioga i le Peresetene o le Maota maualuga, le Fofoga Fetalai o le maota o sui ma le tafatolu o faigamalo a Tutuila ma Manua, ae matua lava le tuu i le faanonogamanu i Auauna o le Talalelei o lo o talafaauto i itu e fia o Samoa ona o lo latou valaauina. Faamalo le soifua laulelei.

Ou te manatu lau Afioga i le Fofoga Fetalai, o Samoa mamala na, taalolo laia paia le oia ma mamalu faalanugata aua a satia outou paia Samoa e, ona tavelo lea o tao o toa o Samoa i le vateatea ae faaifoifo i malae uma, e afua mai i le matasaua seia gagaifo le la i le fafa o saualii. E mafua aisea lea mea? Aua foi e leai se vave e leai se matuaofaiva faafialima maea na te toe uluulu matalauina le maota o Samoa, ua maea ona atofuli e o tatou tuua ma o tatou matua, taalolo ia.

Lau Afioga i le Fofoga Fetalai, o le viiga ma le faafetai i le Atua e faavae ai Samoa e le faaititia i ituaso faapenei. E maualuga le talitonuga, o lou tulai atu i le aso i luma o lenei maota mamalu, ona o lana valaauina ia te au. Faafetai le Atua i au meaalofa e ala i lenei tofiga. O lau tatolo faatauana, ia e fesoasoani mai ia te au i le faatinoina o lenei auaunaga, ma ia aua, aua lava nei i a te i matou, foi pea le viiga ia te Oe le Atua.

Avea ia lenei avanoa maualuga e mauala atu ai se leo o le auauna e momoli atu ai mai le taele o lou agaga lau faafetai tele ma lau faamalo i le paia ma le mamalu o si ou itumalo. Tulouna le malae i Mataniufeagaimaleata, o le malae na sunui ai le alafale o le Atua, o le malae na pulafia ai le lagi o Samoa ma fulitua ai tupu o Samoa i faanuupo ae liliu ane e tapuai le Atua ma le Malo e faavavau.

O Mataniu e susu ai le Aiga Sa Malietoa ma ona paepae e fia, e susu ai le alaafaga i Usoalii ae alaatai ai Mago ma i laua Luasiufanua, faapea le nofo a ituaiga ia te oe Sapapalii. Talofa e, o le a ea se upu o le a fai atu? E moni ai tala a le atunuu, “E le tauiloina le asa a le Tupu.” A lele ua silasila ma fita faafofoga Samoa e ala i le tofa sailimalo, e pei o upu i alii saafiifi, ‘se ua ta uu se ua ta pani, se ua ta moe i le va o tamaitai.’ Faamalo faafetai. O lea ua tasi mai Saua ae faalua i Matautunaaai.

E faatulou atu i le malae i Fuifatu, e fofola le fala e tasi e susu ai Sua o le tupu na tausi, tootoo o Fuifatu ma Faasaleleaga. Tulouna Fuifatu o le malae o le soaiga tao o le usoga a Puleono i Salafai, ae o le toaiga o le faaalataua a Tumua. O le malae e afio ai lau Afioga Leilua Peaalii ma lo outou aiga Sa Leilua, e afifio ai le Toalima o Alii, e afifio ai Sa Alaalatoa, e susu ai Alo o Malietoa ma le Matua, ae alaatai ai laua na pule, Tuilagi ma Namulauulu, alaatai ai Maopu Tufuga ma le na aimalae, le lautinalaulelei, le vainalepa ma le mamalu ia te oe Safotulafai.

Faafetai i la outou tofa o le laau taia e le oia e matagi, e a? Ou te malu ai, o le susuga pau, o le maa faafuagalu, malo faafetai, malo faaeaea. Faafetai sailimalo i lo tatou Aiga Sa Namulauulu i ona fuaifale e fia, i lau Fetalai Tuilagi ma le fuaiala, faafetai Maopu Tufuga ma le mamalu ia te oe Safotulafai.

O saafiafiga a le tupu o Tavita ia Ionatana, “Sa sili foi lou alofa ia te au na i lo le alofa o fafine,” ua faapena lagona tutupu ae lou nuu e. Se ua malepe le fale o le agaga i la outou puleto ma lo outou alofa molipo i le tagata na fanau i lou manava, se i tulou. Faafetai.

Le afifio o le fuaifale na toese o Salevalasi, lau Fetalaiga Fuga ma le mamalu ia Safotulafai, lo tatou nuu i Tapueleele, malo le toa, malo le tau. O le moli i le tuugalamepa ma le aai e tu i le mauga, e le mafai lava ona lilo. A lea ua ila le ai pei o le faiva o matematega, malo faafetai, faafetai le tauatai.

Le paia e o faletua ma tausii, saoa ma tamaitai, le malosi o le tatou nuu ma i latou uma na taupeau mamao mai mai itu e fia o Samoa, e le gata iinei a o atunuu mamao, ona o lo outou sailimalo. Se ua malo le alofa, faafetai le lotonuu. Lau susuga i le Tooa na Lua, lau Afioga Tuitogamatoe, lau susuga Tata ma Tei, malo faafetai. Afai o le pae ma le auli lo outou faalupega tina, o outou aao, o auupega e tau ai le taua, a o gaugatao lava e fasi ai au. O la outou tuualalo o le fesoasoani sili lea i taimi o puapuaga ma le le maotonu, o outou aao e malu ai le pitolaau a alii ma faipule. Faamalo faafetai.

E le faagaloina foi i le agaga le faafetai i tamalii ma failauga o le tatou itumalo, o nai ou uso vaeatu outou sa, sa matou tausinio i le faiga palota. Lau Susuga Papaliitele Taea Masipau, lau Tofa Maileiomalo Eneliko Pau ma lau Tofa Lemai Faioso Sione, sa ofoina mai lo outou soifua e fia tautua i lo tatou itumalo e ala i le faiga filifiliga. Ou te manatu o lenei ua tumatila finagalo o le tatou itumalo, ma ua agai mai ia te au. O lau tatalo, tatou galulue faatasi aua se tatou sao mo Samoa ma ona upufai. O le mea moni, e le tu faamauga foi se tasi na valaauina, e faiaso pea le Atua.

E le uma le agaga faafetai lau Afioga i le Fofoga Fetalaiga, i le Afioga ia Pau Sefo Pau, sa ia alagaina le galu ma sisi le atu o le taeao aua le tofi o le tatou itumalo. Talofa e, e ui lava ina ua tuua le Malo, ae o lo o mulimuli pea ia te ia galuega lelei sa ia faatinoina. Ou te tatalo i le Atua ia maua sou malosi e faaauuina ai ia galuega lelei. Tau ia ina ia alofagia pea e le Atua, ia maua pea le faamafanafanaga ma le lototele, lona filemu i lau afioga i le faletua ma le nofo a alo ma le aiga faanoanoa.

E faapitoaugafa lau faafetai tele i nai ou tama faaleagaga, i le nofo a faafeagaiga ma outou faletua e le gata i totonu o si ou itumalo, a o tafa e fia o Samoa ma le lalolagi atoa. Se ua tafe tino i vai i le mana o a outou talosaga, ua leai se mala e afe e toia ai lo tatou faamoemoe, e le mafai le mafai e se upu molemole ona faalanuina la outou galuega fita. O le tatalo, ia faamanaina pea e le Agaga Paia la outou tofa faale-Atua aua manu faaifo mai le lagi mo Samoa.

E fia faaleo le agaga faafetai i le Vaega Faaupufai a le HRPP, i lau Afioga i le Palemia ma sui usufono mamalu uma. Faafetai i le taliaina o se finagalo o lou itumalo ina ia ou tauaveina ai le fua o le HRPP i le faiga palota ua mavae atu nei. O le mea moni, e tautala galuega, e tautala mea lelei ua faatinoina e ala i la outou tautua faifaipea e le gata ia Samoa atoa, e aofia ai ma si ou itumalo. A lele ua tali faaaliali le mamalu o Faasaleleaga Nu.2 ua filifilia ai nei au o le sui faatu o le Vaega Faaupufai o le HRPP. E faaaliali ai le tumau pea o la latou lagolago ma le faatuatua o le Vaega Faaupufai a le atunuu, ua masani i le tautua atunuu. E tele ou fili, ae pe afai e au le Atua i se Vaega Faaupufai e silasila mamao mo le manuia auiluma o fanau a Samoa, o ai ea se faasagatau mai? Faamalo le galulue, faamalo le tautua punouai.

E le mafai foi ona ou faagaloina si a matou falefaigaluega, le Federal Pacific Group i Samoa, a o fafo atu foi o Samoa nei. Lau Afioga i le Taitaifono, le Komiti Faatonu, le Pulega ma le afaigaluega, talofa e, ua outou mafatia ma gasea, ae tatou te le soototo, tino ae sa faatino la outou galuega alofa i le lagolago i lenei faamoemoe ona o la tatou mafutaga, faamalo faafetai.

E momoli le faafetai i nai au uo, aumeamamae ma nai au paaga faipisini, se ua logo i tino logo i loto pei o le tala i le malofie lo outou alofa tulai ma le soosootauau. O le mea moni ua mama avega sii ai lenei faamoemoe, faafetai, faafetai tele.

Ou paolo e ma ou gafa, o ou aiga ou te malu ai, se o upu a le aumatutua pe a lalanu uaga, se ta te inu i ota tino ua le natia i fatualavai lo outou alofa moni, lo outou titi faitama ma lo outou talatama faaaliali i ituaso o faaiuga ma filifiliga faigata o le olaga, aemaise lava i faamoemoe tetele faapenei, se ua faamalo faafetai.

E taua tele i lenei ituaso ona ou faafetai faapitoa i ou matua sa tele so latou sao i lou olaga tuputupuae a ua fai i lagi le folauga. Ou te faafetaia matua o lou tina le Susuga i le Faafeagaiga ia Setu Namulauulu ma si ou tina ia Avalisa Fuamatu. Ou te faafetaia nai ou matua Fuimaono Joseph Fuimaono ma lou tina ia Vevesi Tugaga Fuimaono. Ou te manatua foi si ou tina o Luao Taatimu ma si ou tina o Upu Setu Namulauulu. Faafetai i la outou tausiga, timaiga ma aoaoga taua, e le taumate o lea ua manuia ai lou olaga.

Ou te manatua foi le tapuaiga a nai ou matua o lo o nofo tapuai mai Niu Sila, si ou tama o Taulapapa Leota Fau, ma si ou tina o Ututau Fau Sami Namuulu Leota ua le auai mai ona ua le atoatoa le malosi o le tino. Ou te faafetai i luma o lenei aofia ia te oulua matua, ia saga faamanuia pea le Atua ia te oulua.

E muliai lau faafetai i lau Afioga i le Fofoga Fetalai i si ou toalua ma si au fanau. O taimi uma lau Afioga ou te talanoa ai i lou toalua, ou te lagona ai le agaga faafetai i le Malo o Samoa ona o le auina atu o alo ma fanau i atunuu mamao e faalateleina ai le atamai, aua foi o i tonu lava lea sa ou fetai ai i lou toalua ina ua ou malaga atu i Ausetalia. Ina ua maea le tausaga muamua lau Afioga, sa maua mai le faaiuga o suega faaiu o le tausaga, ua matua tele lava le faaletonu ua i ai. O le mea moni, sa logo au e le Ofisa, o le a toe faafoi mai au i Samoa. Ia ona ou nofo lea ma ou mafaufau, sa ou vili mai i si ou tina, o le uso o si ou tina sa faapea ona tausia au ma ou nofo aoga ai i Vaimoso. Sa ou logo le loomatua ma ou faapea mai, 'vaai oe tina, ua ou le mafaia le aoga o le a toe faafoi atu au i Samoa.' O le mea masani lava a le olomatua, sa ia ote ia te au, ote ote ia te au ae muliai lana faamatalaga faapea mai, 'atalii, a ua e le mafaia le aoga, sue se teine palagi e te sau ma aumai i Samoa.'

Lau Afioga i le Fofoga Fetalai, ina ia faamotu le ote, sa ou fai atu i le olomatua, ua lelei, o le a faia lou finagalo, ma le le iloa foi e le olomatua, ua ia faapoopo le mamafa o le isi avega, aua o le mea moni lava, o lo o tau kamuta foi le nanu i lena taimi.

Lau Afioga i le Fofoga Fetalai, o le mea na tupu ina ua fai lau uo palagi, na pasi lau aoga ona sa ou musu ou te fail, faafoi mai au i Samoa toe faamavae ai ma lau uo lea. Avea ia lenei avanoa ou te faafetai ai i si ou toalua, Maria, I want to thank you today, without a doubt, you have been my healing strength. I want to thank you for standing by my side right through the good times and also the hard times.

Lau Afioga i le Fofoga Fetalai, o lea ua maea ona tapui le vatapuaia e tusa ai ma tu ma aga faaleaganuu i ona tulaga faalupelupe, a o lenei vaega o le aso, se i faailo se manatu o lenei itumalo aua le taulafoga o lo o faia nei. Faafetai i lau Afioga i le Minisita o Tupe i le tala manino o le Tupe ua faataatia mai i lenei tausaga, e matua matagofie le sini autu ua faataoto, ia autasi mo se lumanai manuia o Samoa. Ou te manatu ona o au o se sui o le Komiti sa lauliliuina le Tala o le Tupe ua faataoto nei 2019/2020, o lea o le a le tele ai se faamatalaga i lea vaega. Sau se taimi ona folasia atu lea e le Afioga i le matou Taitaifono le aotelega o le matou galuega.

Na pau o lea, muamua, e ao ina faaleo atu le agaga faafetai tele i lau Afioga i le Fofoga Fetalai ma sui o le Komisi Faa-Palemene ona o la outou faatuatuaga e ala i tofiga ua outou faaeaea ai lenei itumalo i le Komiti o Tupe ma tupe alu. E fiafia foi e faailoa atu le lagolagoina atoatoa e lenei itumalo o le Tala Faatatau o le Tupe ua tuuina mai 2019/2020.

Lau Afioga i le Fofoga Fetalai, e momoli atu le agaga faafetai i le Malo e auala atu i le Minisita o Faiga Palota, ona o galuega lelei uma sa faia i nisi o Tulafono ogaoga ma le maaleale e le i leva ona pasia atu nei e le Maota. Amuia foi lenei itumalo ua faamauina i talafaasolopito o Tulafono o Faiga Palota ua latou asaina le gasu o le taeao i le uluai faatinoina o manaoga o ia Tulafono.

O Tulafono sa fulfuligata faalaau mamafa i ai le tofa ma le faautautaga alumamao, aua e ui lava sa tetele i Pesega, lele ua matua i le oo. E tele ma anoanoai vaega lelei o lenei Tulafono sa o matou matauina.

O le mea muamua, o le le toe i ai lea o ni fale palota i Apia nei, ua tafieseai ai le laumea faapaiamata sa faavaatua ai Sui Tauva e ala lea i le manumalo mai Savaii ae toilalo atu i Tumua nei. O le uluai palota foi lenei ua ave ai le faamuamua mo le aumatutua ma le mamalu o le atunuu e le atoatoa le malosi aemaise i latou o le a fou malaga. Pau si a matou tuualalo lau Afioga i le Fofoga Fetalai, muamua, ia lava se taimi e faalauiloa ai e le tatou ofisa lea vaega aua le nofo silafia e tagata palota.

Lona lua, ina ia faatinoina e le Ofisa o Faiga Palota le iloilo toto o le agavaa o suitauva ina ia tusa ai ma le Tulafono, ina ia taofia ai le anoano o le mau vevesi, o lo o tulai mai i taimi o faiga palota aemaise o i latou o lo o faatupu vevesi ma faia nei soligatulafono ma le iloa.

Ma le mataupu lona tolu lau Afioga, se i tagai ane le Ofisa i le faatauina o le pulega mamalu a alii ma faipule. O le tasi lenei o meaalofa tuusao a le Atua ia Samoa o lana faamatai, e pulea ma taitaiina ai Samoa ma lana faigamalo. O le molimau ola, o lo o nofo filemu ma fealofani ai pea Samoa i le sili atu i le 3,000 tausaga ua mavae e oo lava i le aso. O le atugaluga lau Afioga, e le o i ai se vaega o faataua ai i le Tulafono le aiatatau a alii ma faipule fai ai a latou faaiuga tonu ma talafeagai i totonu o nuu ma afioaga. E maualuga lou talitonuga o le Malo o Samoa ua faavaeina i le Atua, ae salani i tu ma ana agaifanua faa-Samoa. Lau

Afioga i le Fofoga Fetalai, o le talosaga lena, se i tagatagai ifo i ai le Malo i le faatauaina pea o le pulega faamatai aemaise i taimi o a tatou faiga filifiliga. Ou te le tau faailo i le Maota lenei, o le maota o matai, ua filifili mai e Samoa atoa, o le Maota o tagatanuu o Samoa uma. E le faatonuina le la i le mea e goto i ai, ma le fisaga i lona ala e agi i ai. Ae tau ia ina ia taulia i le ave so matou vaivaiga tautaulenuu, i tafatafa ane o lau Afioga ma le faigamalo.

E fia faaleo le faafetai tele i le Malo o Iapani, i lona sao maoae ma lona aao fesoasoani mai ia Samoa ma ona tagatanuu uma i le tele o tausaga, e ala atu i lau afioga i le Amepasa o le malo o Iapani. Lau Afioga Maugaileatuolo o se matai o lenei nuu ma lenei itumalo. Faafetai mo le faamatuina mai o le fesoasoani tau tupe aua le toe faaleleia o le faleaoga o Safotulafai, tau ina ia saga faamanuia pea le Atua i lau afioga ma le malo o Iapani. E momoli le faafetai i le Minisita ma le Matagaluega o Galuega, ua faatino le auala i Maliolio i Samalaeulu, o se tasi o auala sima, e matua sopo gata pe a louloua le tau. Ae na ona ou valuvalusia ai aa o le fau i se finagalo o lau afioga ma le Matagaluega, pe le ua tatau ea ona se i tagai ifo loa i le auala sima lea i Sapapalii, aua o lo o i luga foi o la tatou auala autu. O le mea moni, e tutusa lelei lava le faigata o lo o feagai ma tagata femalagai i Maliolio ma Sapapalii. O se popolega tele ua matua lamatia le soifua o tagata aemaise le afaina o eleele ma faatoaga pe a sopo tafega.

Faafetai i le Malo i se tofa na ae, aua le toe faaleleia o le auala lea e ui atu i tua o Safotulafai agai atu i Patamea ma Samalaeulu ma isi nuu. Faafetai aua o lea o le a i ai se auala e alo i ai i aso louloua aemaise pe a motusia ma osofaia e galu tetele le auala autu. E fia afeaina i sau faamatalaga le auala galue lea a Tuasivi ona e taua. O lea ua maea ona asia ma fuafuaina le survey a le Matagaluega, ma o le auala lea i Tuasivi o se auala ua talafeagai mo le faamoemoe lea a le Malo, e aveesea faatopetope ese atu ai gasegase mai le falemai i Tuasivi agai atu i le auala lea e fausia i Patamea ma Samalaeulu pe a oo i le taimi o galuafi ma sunami. O lena foi ua i le Matagaluega la matou talosaga mo lea auala, atoa ai ma le matua lagolagoina e o matou nuu o Fogapoa ma Tuasivi fuafuaga a lo tatou Malo mo lea auala. I le faatinoina lava o lenei auala i Patamea ma Samalaeulu, o lea foi ua faaalua e le Matagaluega o le a faaleleia atu ai ma le aualasima lea i Vaiaata i le agai mai i tai i si o matou nuu o Tapueleele. O se faamanuiaga tele lea i si o matou nuu aemaise le Kolisi o Vaiola ma i latou o lo o aumau ai i lea nofoaga, ona ua tausaga e le mafai ona sopoia lenei auala sima pe a tetele tafega i aso louloua.

E le po malae i lenei vaitaimi i le siisii i luga o le suasami, ua matua uia ai lava ala o galu i totonu o si o matou itumalo, afua mai i Sapapalii se ia paia Tuasivi. E tatalo atu le Malo, se i tagai ifo mo ni talitgalu mo si ou itumalo, aemaise lava i aiga tau lalata i le sami. E na ona ou tuitui malofie atu ai i le tofa lufilufi lima lelei i lau Afioga. Se i e silasila ane i le talosaga a lenei itumalo, aua lava le malupuipua o soifua o tagata, pe a oo ina gatalitalia ma soua le gataifale.

Lau Afioga i le Fofoga Fetalai, matou te ta le lave ma leu le iuofi a tautai o le mafua taulafo, e avatu ai malu i puega i la outou fita faafofoga, i lau Afioga i le Palemia, le aiga Kapeneta ma sui mamalu uma o le fonousu a Samoa ae tainane le tapuaiga mamala a vaa folafola o le Talalelei, Tama ma Aiga, le Usoga a Pule ma Tumua, Ituaa ma Alataua, Aiga i le tai ma le Vaa o Fonoti. Faamagalaga sa matou upu ua logovale, pe taulaulu i la outou fita faafofoga, o upu lava a le au faitofa a le atunuu, e leai se faiva e leai se lafoai. E ui lava foi ina potu le tautai ae se lava lana atu i ama. O manatu faamagalaga ni lape ma faatape i iliili mamate, ae tatou seu i le Atua e magalo ai mea uma.

Faatai ma se leo o le auauna, faamatafi e le Atua lo tatou aso. Soifua ma ia manuia.